

HARI
Johoph.

2.





Signat. Top.

Est 74

Tab 6

Number 27

A
5470

VETERIS ET RECENTIORIS
PHILOSOPHIAE

DOG MATA

JOANNIS DUNSIISCOȚI,

Subtilium Principis Doctrinis accomodata,
Atque in tres Tomos distributa,

OPERA ET STUDIO

Fr. JOSEPHI ANTONII FERRARI

DE MODOETIA,

Ordinis Minorum S. P. Francisci Conventualium , Artium
& S. Theologiae Doctoris , atque Almæ Mediolanensis
Provinciæ Ex-Ministri Provincialis.

EDITIO TERTIA,

*Ab ipso Auctore recognita , & nonnullis etiam doctrinis
illustrata.*

TOMUS SECUNDUS,

Priorem Physicæ partem , quæ Physica Generalis dicitur ,
complectens.

BIBLIOTEC
INSTITUTO V. NUNCIA
SORIA



MATRITI M DCC LXXXIV.




APUD BLASIUM ROMAN.

SUPERIORUM PERMISSU.

БАЛКАРСКОЕ
АТАМОСОБ
ИТООЗИМСКОЕ СУВЫНО

СТАВРОПОЛЬСКОЕ
СОЛДАТСКОЕ
ИТАМСКОЕ ПРИЧАСТИЕ



PHILOSOPHIÆ PARS QUARTA, SEU PHYSICA.

IN PHYSICAM PRÆFATIO.



Hysica rite describitur *Scientia*, quæ contemplatur res naturales, ut naturales, eorumque principia, affectiones, & effectus nititur perscrutari, & expendere. Est autem duplex Physica, Historica, & Æthiologica. Prior illa res naturales describit: quod Aristoteles exhibuit in libris de Historia, de partibus, & de generatione animalium. Posterior rationem effectuum reddit per eorum caussas, quas demonstrat: & hanc complexus est Aristoteles iis in libris, qui in Scholis explicari consueverant.

Hujusce porro Facultatis objectum id omne est, quod naturæ rationem habet, unde mutationi, seu motui obnoxium fit. Quo circa non solum Corpus Naturale; sed ipsa Substantia finita naturalis, ut tradit Scotus lib. 6. Metaphysicæ, quæst. 1. constitui debet tanquam adæquatum Physicæ objectum. Sunt enim etiam Angeli mutationibus obnoxii: ut diximus in 2. parte Metaphysics, disp. 2. Ratio autem naturæ est objectum formale ipsius Physicæ, quippe per ipsam à priori demonstratur rem posse mutari, nam id omne mutationi subest, quod habet in se se principium motus, & quietis, cuiusmodi est natura, quemadmodum declarabimus disp. 3. quæst. 2. Sed cum Angelorum existentia, & essentia colligatur sola ratione, nec in se

se quidpiam sensibile præ se ferat; iccirco præcipuum hujusce Facultatis objectum est Corpus Naturale: quod solum Aristoteles contemplatus est, quoniam Angelos immobiles esse judecavit.

Physica plurimas continet demonstrationes certas, & evidentes, quas circa res naturales efficit, ipsarumque veritatem assequi nititur: velut cum probat, corruptioni obnoxium esse corpus, quia ex partibus constat. Proinde Scientia est: & quidem Theorica, seu Speculativa, quia non ordinatur, per se se ad bonum moris, sed veritatis assecutionem unice intendit. Quod quidem ex iis appareat, quæ docuimus in Præfatione Logicæ.

Attamen ingenue fatendum est non nisi imperfectam apud nos esse Scientiam hanc, quippe interiores rerum caussas, & intima principia clare, distincteque assequi non possumus in hac nostra mortali conditione: ut diximus in 1. parte Logicæ, sect. 3. cap. 5. Quamvis autem in Physicis multa sint certo evidenterque perspecta plurima tamen solius probabilitatis limitibus circumscripta manent, in quibus subinde mens nostra nuttat.

Pluribus experimentis Facultas hæc veritatem aperire contentit, & eamdem persæpe re ipsa consequitur; unde *Scientia Experimentalis* appellatur. At diligenter animadvertere oportet, ne semel cognito experimento præcipitanter in unam vel alteram cæco velut impetu irruamus sententiam. Hinc sane plurimum errorum origo dicitur, nam experientia sine ratione ut navis sine Rectore est. Itaque ratiocinatione probanda sunt illa, quæ perspectis experimentis consentanea esse dicuntur.

Ex hoc ipso fas est intelligere, quanta sit hujusce Facultatis necessitas, ut res naturales experientia simul, & ratione declarantur; una enim sine altera, dum de sensibilibus agimus, non satis idonea est ad veritatem acquirendam. Summa etiam utilitas ex rerum naturalium contemplatione profluit ad vitæ usum accommodatissima, & superabunda etiam jucunditas oritur. Quippe, ut sapienter scribit Philosophus, lib. 1. de Partibus animalium, cap. 5. *Natura Parens & auctor omnium ineffabiles in illis excitat voluptates, qui & caussas pernosse cupiunt, & ingenue philosophantur.* Quo factum est, ut Facultas Physica cæteris omnibus utilior habetur, tot rerum inventis illustrior, antiquis, & nobis doctrinis ornatior. Nos itaque diligentiam omnem adhibebimus in perlustrandis Veterum, ac Recentiorum sententiis, iisdemque ratio-

tione simul ac experientia velut Iydio lapide explorandis.

Sed hic in ipso Physicæ Vestibulo dicendum occurrit: An Geometria, seu etiam Mathematica, sit Physicæ necessaria: & quatenus ad res physicas assumi queat? Jam vero nos illorum cumprimis opinionem rejicimus qui rerum naturalium principia, & caussas ex Mathesi depromendas putant. Etenim nullam potest Mathesis caussam phænomeni cuiusque ostendere. Ex facultatis Mathematicæ principiis proportio eisdem colligi poterit, qua effecta præstantur: ut subinde in genere redarguitivo evincatur, non illud esse caussam effectus, quod ut caussa venditur; sed quæ sit caussa, non potest Mathesis aperire: quippe ista objectum suum non habet, nisi à rebus ipsis abstractum. Non quero, dicebat optime Cicero lib. 4. Academicarum Quæstionum, illa initia Mathematicorum: quibus non concessis digitum progredi non possunt: Punctum esse, quod magnitudinem nullam habeat: Extremitatem, & quasi libramentum, in quo nulla omnino crassitudo sit: Lineam autem latitudine carentem Hæc quidem ex hypothesi admitti possunt, sed non absolute. Vera sunt, si idearum nostrarum consideratio habeatur, sed non ubi rerum naturam perspexeris. Nam & Mathematicus extensionem, non rem extensam contemplatur, &, ut notat Aristoteles lib. 3. Metaphysicæ, sensibiles lineæ non sunt tales, quales Geometria dicit. Quocirca inconsulto Philosophi plerique demonstrationes mathematicas sic adhibent ad res physicas, quasi in rerum natura extensio ita se haberet, ut à Geometris supponitur. Hoc enim est transire de genere in genus, ab iis, quæ sunt tantum in ideis nostris, ad rerum naturam. Est adeo nostra sententia, Mathesim non esse scientiam realem: (si formaliter accipiatur) quod ex dictis liquido appetet. Unde Plato in 7. de Republica ajebat: Mathematici circa rerum naturam, & quantitatem quodammodo somniant.

Geometrica igitur facultas cum ingenii exercendis, tum menti excolendæ plurimum valet; sic etiam instituit Adolescentes, ut ediscant veritati acquiescere, nec nisi solido rationis fundamento disputare. Proinde Veteres Philosophi, & præ cæteris Pythagoras, ea facultate instructus Auditores suos exposcebat. Sed quæ Logica Ars tunc erat admodum imperfecta, perfecta nunc iisdem animi morbis medetur, Auditoremque instituit. Quamobrem si quis præire Geometriam Physicis faciet, is profecto nostro erit etiam judicio laudandus: non quod facultatem neces-

sarium præmittat Physicæ , sed quod optimæ Scientiæ vacandum censeat.

Quamquam illud merito cavendum est , ne ipsa Philosophica Facultas dicatur Scientiarum omnium complexio. Nam & sius cuique locus est ; & experientia cognovimus , eos , qui plus quam oportet , Mathematicis in Physica indulgent , physicas , naturalesque cognitiones , ac disputationes omittere , caussasque physicas , & reales vel pro arbitrio præsupponere , ut ipsis arridet . vel earum inquisitionem supervacaneam putare , ac negligere : quod à Philosophia , & præsertim à Physica longe alienum est. Satius ergo nobis erit , quæ disputationibus nostris ex Geometrica Facultate subservire poterunt , suis in locis explicare : quemadmodum & ex aliis Scientiis nonnulla erunt assumenda.

Physicam Facultatem in tres partes secabimus , ut prior de rebus naturalibus universim disserat , secunda de corporibus agat vita expertibus , tertia corpus animatum contempletur.

PHYSICÆ
PARS PRIMA,
SEU PHYSICA GENERALIS.

DIPUTATIO PRIMA.

De Principiis Corporis Naturalis.

QUÆSTIO PRIMA.

Quænam sint prima Physica Principia Corporis Naturalis ex sententia Aristotelis, Cartesii, Gassendi, aliarumque Philosophorum: & quæ præceteris sint approbanda?

UBI

De Existentiâ Formæ Substantialis Materialis speciatim disserimus.



Hysica prima Corporis naturalis principia, ait Philosophus, lib. 1. Physicorum, summa 3. cap. 1. Ea sunt, quæ neque ex se se, mutuo, neque ex alias, sed ex ipsis omnia esse oportet. Ex ipsis nempe corpus naturale, velut ex partibus intrinsecis componi intelligimus; & cum principia prima quæramus, evidens est eadem ex aliis constare non posse, nec mutuo invicem constitui; alioquin enim

vel neutrum eorum, vel nullum ex ipsis obtineret notionem primi principii.

Jam vero ipsa Corporis naturalis principia, vel ad ipsius effectionem comparantur, vel ad ejusdem compositionem; sive, ut placet Scholis, alia sunt principia: *Compositi in fieri*, alia *in facto esse*. Priore sensu merito tria habentur principia, nimirum Materia, Forma, & Privatio. Neque enim hic tale constituitur principium, quod sit caussa vere efficiens; sed

ge-

generatim illud intelligitur , quod ad effectiōnē Corporis naturalis , seu ad rerum mutationem , utcumque pertinet . Porro mutatio sine alterutro illorum trium minime habetur . Necessarium est enim subjectum , quod mutatur , sive materia ; id , quod de novo accipitur , seu forma ; & oportet etiam concipere ; ipsum subjectum à privatione formæ ad eamdem accipiendam transire ; unde mutatio definitur *transitus de non esse ad esse* . Quamobrem Materiā , Formā , & Privatiō velut essentialia mutationis prædicata sunt , & aper-te in illa intelliguntur . Agens vero extrinsecum est ; & dispositiones ad mutationem præviæ , ad ipsam pertinent materiam , aut formam . Ita tempus , & locus extrinseca sunt mutationi .

Corporis autem naturalis principia in facto esse , quæ nempe illud componunt , omnium Philosophorum consensu duo reputantur , Materiā videlicet , & Formā . Quemadmodum enim in Artefactis materiā primum habetur , quæ à figura determinatur ; ita in naturæ operibus subjectum primo extat , seu materia , quæ ad hanc , vel illam rerum speciem determinatur , & forma , quæ determinationem materiæ præstat . Et quidem id ipsum invictissime appetet ex rerum mutationibus , quæ sub aspectu cadunt . Omnes etiam Philosophi duo hæc principia approbant ; etsi in expli-canda utriusque principii essentia

inter se differant : ut mox declara-bimus .

Peripatetici Materiā , & Formam arbitrantur præ se ferre enti-tatem substantialem , & absolutam , ut sint duæ res invicem realiter distinctæ , incompletæ tamen , unde & invicem ordinantur , velut de-terminabile , seu perfectibile , & determinativum , sive perfectivum .

Materiā itaque describit Ari-stoteles , lib . 1. Physicorum , pro-pe finem : *Dico Materiā subje-ctum uniuscujusque , ex quo fit ali-quid , cum insit , non secundum ac-cidens : & si corruptitur aliquid , in hoc abibit ultimum* . De eadem inquit lib . 7. Metaphysicæ , t . 8. *Per se ipsam neque quid , neque qua-le , neque quantum , nec aliud quid-piam dicitur eorum , quibus de-terminatur ens ; sed est quid , de quo singula eorum prædicantur* . Quibus omnibus declarat Aristoteles ; materiam ex se se nulla for-ma donatam esse , seu nulla spe-cie ; nec ad ullum pertinere re-rum naturalium ordinem specifi-ce determinatum ; sed esse subje-ctum primum omnium formarum , & mutationum : adeo ut ipsa sem-per subsistat , & ab una forma ad alteram transeat , ac demum insit corporibus naturalibus , tanquam pars substancialis illorum , quæ à forma speciem , ac determinatio-nem accipiat . Quamobrem Materiā sic definiri potest ex doctri-na Scoti in 2. dist . 12. quæst . 1. *Est substantia materialis , incom-ple-*

pleta, & imperfecta, subjectum primum omnium formarum, & mutationum, ac pars essentialis compositi substantialis, velut pura potentia in ordine physico specifico.

Neque vero hæc materiae notio imperceptibilis est, aut Arabum commentum, ut Recentiores conclamat. Etenim eamdem agnoverunt Cicero, & S. Augustinus. Et ille quidem lib. 1. Academicarum Quæstionum, de antiquissimis Peripateticis disserens, de Materia ita eos sentire tradit: *Subjectum putant omnibus sine ulla specie, atque currentem omni alia qualitate....materialiam quamdam, ex qua omnia expressa, atque effecta sint, qua tota omnia accipere possit, omnibusque modis mutare, atque ex omni parte; eoque etiam interire, non in nihilum.* Augustinus vero materiam ita describit: *Materia in corporum mutabilitate utcumque cognoscitur, nam per se ipsam nec sentiri, nec intelligi potest.* (lib. 20. contra Faustum, c. 14.) Non est aliquid, non color, non figura, non corpus, nos spiritus: non tamen omnino nihil; sed solum quedam informitas sine ulla specie (lib. 12. Confessionum, c. 3.) *Materia est mutabilitas rerum mutabilium, capax formarum omnium, in quam mutantur res mutabiles* (lib. contra epistol. fundamenti, c. 6.) Et in prioribus capitibus lib. cit. Confes. scribit, materiam ab Antiquis dictam fuisse Hyle, à Poetis Caos à S. Scriptura materiam informem,

Tom. II.

profunditatem, tenebras, abyssum; & lib. 10. c. 7 dicit illius, esse, parum distare à non esse. Eamdem igitur Materiæ ideam habuerunt Cicero, & Augustinus, quam nos exhibuimus; adeoque ea imperceptibilis non est, nec commentum Arabum, qui longe post Ciceronis, & Augustini tempora extiterunt.

Itaque constat ex dictis, quid sit Materia. Ea nimurum non est Corpus completum, ac perfectum, ut sunt illa, quæ sub aspectum cadunt; Nec tamen est nihil, sed corpus lata significatione, quatenus ex partibus integrantibus componitur: ut erit postea declarandum. Materia etiam ex se se potentiam dicit ad formas suscipiendas; unde ex se se nullam habet formam.

Quid sit autem Forma substantialis, quæ ad Corporis naturalis specificam constitutionem pertinet, intelligimus ex lib. 2. Physicorum, ubi Aristoteles inquit: *Forma est quod quid erat esse rei: quæ quidem verba obscura sunt, sed hunc sensum habent: Forma est illa pars essentia rei, qua res constituitur in determinato specierum ordine.* Unde Forma habet rationem attus respectu materiae, hoc est, materiam ipsam perficit: quomodo figura perficit materiam artefacti; etsi dispar in hoc ipso habeatur ratio: ut postea dicturi sumus.

Consueverunt Scholastici Formam ita describere: *Forma substantialis est attus primarius materie,*

B. unum

unum per se cum ipsa constituere natus. Quod ut distinctius percipiatur, animadvertere oportet, duplarem distingui Formam, substancialem unam, accidentalem alteram. Prima est, à qua habetur determinatio specifica compositi, & hæc forma advenit materiae ex se se nullatenus completae in ordine physico specifico: sic se habet forma, ex. gr. ligni, aut lapidis. Secunda advenit rei jam in genere physico specifico completae: ut v. gr. albedo corpori; nec pertinet ad specificam rei naturam, seu determinationem. Prior illa dicitur facere cum materia *unum per se*, quia ex illis conflari intelligitur unum compositum, quod unica constat specifica essentia. Non sic posterior, quæ facit *unum per accidens*, quatenus addit quidpiam rei jam completae in sua essentia physica; nec ad rei naturam pertinet, sed ex accidenti illi adiungitur. Prior Forma dicitur *esse in subiecto per informationem*, altera *per invasionem*. Forma Substantialis, quoniam recipitur in materia paritur substantiali, & tribuit materiae *esse specificum*, atque cum illa facit compositum unum specie, ideo dicitur *esse in subiecto per informationem*. At Forma Accidentalis, quia recipitur in materia, quæ cum sit substantia, est generis diversi, & quia materiae dat quoddam *esse accidentarium*, nec cum illa facit unum specie; ideo dicitur *esse in subiecto per invasionem*.

Sed essentia Formæ substantialis in eo maxime elucet, quia ipsa est radix, fons, & origo formarum omnium accidentalium. Forma enim Substantialis vim habet exigendi, producendi, ac etiam reparandi collectionem accidentium, quæ unicuique speciei propria est. Unde est causa immanens, seu intima in composito, omnium physicarum proprietatum; ipsa etiam est, quæ partes rei coordinat, ac disponit, velut intimum principium hanc, vel illam partium dispositionem exigens. Quamobrem tot, & tam varii effectus, qui in rebus sensibilibus apparent, ex diversitate, & natura Formarum substantialium oriuntur; Ut nimirum uni speciei congruat una partium dispositio, & una accidentium collectio; alteri speciei ex adverso eadem non respondeant: ob variam formarum substantialium naturam.

Proinde Forma Substantialis rite sic describitur: *Est perfectio, qua tribuit materia specificam determinationem physicam, & cum illa facit unum specie compositum, & principium est omnium physicarum rei proprietatum.* Forma autem substantialis rerum corporearum & ipsa materialis est, & corpus, quatenus ex partibus integrantibus constat.

Quando immutata rei essentia, advenit illi nova accidentalis perfectio, tunc Alteratio habetur. At si essentia rei mutetur, ut specie di-

diversum sit compositum, nova Forma substantialis producitur, & habetur *Generatio*. Unde *Generatio*, & *Alteratio* non præ se ferunt solam partium transmutacionem. Ipsa autem Formæ substantialis productio, seu generatio appellatur *Eductio*: & Forma dicitur educi, non creari: Quod est distincte explicandum.

Afferunt itaque Peripatetici, Formam educi de potentia materiae: in quo si fortassis paullo duriorem verborum corticem excipias, nihil erit dignum admiratione. Cum primis autem non is est sensus, Formas omnes antea primum in materia latitare, & nunc unam, nunc alteram extrahi eductione locali: quo modo gladius à vagina educitur, ut videtur olim sensisse Anaxagoras. Sed nec inchoationes quasdam formarum omnium in materia approbamus, quasi nonnullæ omnium formarum partes in materia contineantur. Tertio rejicitur etiam illorum opinio, qui vel à solo Deo vel ab altero extrinseco agente formas omnes produci in materia dicebant. Et has quidem opiniones Peripatetici omnes rejiciunt, aliasque varias explicationes tradunt, ut declarent, quid sit formam educi à materia.

Placuit autem nobis præ omnibus modus ille, quo Scotus in 4. d. quæst. 1. num. 28. rem expavit, dicens: Formam autem materialem dico esse omnem illam, que ex natura sua necessario inclinatur

naturaliter, ut sit actus materiae: sive sit substantialis, sive accidentalis. Itaque aliud est formam fieri ex materia constitutive, ut ajunt; aliud formam fieri ex materia præsuppositive. Constitutive fit, quando ipsa materia formam constituit: ut statua fit ex lapide. Formam vero fieri ex materia præsuppositive, præ se fert, formam ex propria conditione necessario produci in materia præsupposita cum aliquibus dispositionibus, sive cum aliqua forma accidentalí, quam naturali ordine forma substantialis producenda subsequitur; unde forma infieri, & conservari ex propria conditione à materia dependet.

Hoc ergo sensu forma fit ex materia, & educi ab illa dicitur: neque hoc ipso aliud nos intelligimus. Sane cum saltem naturaliter, & immediate non possit ex quolibet fieri quodlibet, necesse est, in rebus quæ producuntur, ordinem extare aliquem unius formæ post aliam: quem ordinem nulla caussa secunda invertere possit. Alioquin formarum productio casui potius, quam naturæ, quæ ordinatissima est, adscribi deberet. Hinc est formas ab Antiquis Philosophis comparatas fuisse numeris, quorum talis est unius post alium ordinatio, ut ternarius, v. gr. non ad quemlibet numerum, sed ad binarium, & binarius ad unitatem necessaria vicissitudine subsequatur. Ex hoc ipso etiam formarum ordine manifeste colli-

gitur limitatio operandi , quam omnes caussæ secundæ patiuntur, ut non possint quilibet immediate formam producere , sed eam solum , cui consentaneæ sunt dispositiones in materia præcedentes.

Hæc si animadvertiscent Recentiores , perspicient etiam latissimum illud discrimen , quod à Peripateticis sæpe expositum , nihilo minus se non satis assequi contendunt ; Nempe quatenus *Creatio* , & *Generatio* invicem differant. Etenim *Creatio* dicitur productio rei , *tum ex nihilo sui* , *tum ex nihilo subiecti* : quatenus res creata nec præcessit secundum aliquid sui , nec illius productio supponit subiectum cum dispositione aliqua , seu forma accidentalis , quam *ex propria conditione* naturaliter subsequatur , & à qua ipsa forma , quæ creatur , dependeat *ex propria conditione* quantum ad sui conservacionem. E converso res contingit in Generatione , ut declaravimus. Dicimus , *ex propria conditione*. Quofit , ut anima rationalis non sit dicenda generari , sed creari. Quippe cum sit spiritualis , atque adeo à materia independens , siccirco non pendet à materia *ex propria sui conditione* , & *natura* ; quamquam ad corpus perficiendum sit ordinata.

Apparet ex dictis notio materiae , & formæ substantialis , quarum prior perficitur , & determinatur ; posterior perficit , ac determinat. Atque ita in Peripatetico Systema-

te omnia corpora naturalia constant ex materia , & forma substantiali materiali. Tum vero cujuslibet corporis naturalis integrantes minimæ partes appellantur *Minima Physica* , quæ & variis pœdita sunt figuris juxta formarum substantialium varietatem. Sua itidem corporibus respondet moles , seu magnitudo , quæ ad actiones effectusque exhibendos est necessaria. Sed & ipsa forma substantialis suum cuique rei motum attribuit ; hoc est , vim præ se fert , qua vel totum ipsius corpus , vel illius partes moveri , aut mutari possunt , vel in aliud operari. Hinc vero per motum , figuram , & molem fas est plurium effectuum naturalium rationem reddere : quatenus ea omnia vel principia sunt operandi , seu effectrices caussæ : vel dispositionis instar , effectuum productionem necessario præcedunt.

Res declaratur exemplo productionis Ignis : cuius equidem explicationis ratio apparebit in 2. disp. Ignis calidissimum elementum , vi caloris primo disponit lignum , seu aliud subiectum , tum frida corpuscula ex illius poris propellendo , & illius frigiditatem destruendo , tum partes ligni agitando. Interim autem plurima ignita corpuscula ab igne egredientia pervadunt ligni poros ; atque hinc ducitur ratio , cur ignis fortius agat piramidaliter , quam lateraliter : quia nempe tum ex proprio im-

te.

testino motu , tum ex propria levitate , seu minori gravitate , faciliter , & abundantius corpuscula sursum emitit. Porro hæc ignea corpuscula , accedente etiam dispositione piramidata figuræ , suo motu particulæ ligni pervadunt , eas dividunt , motumque in illis procreant. Ea vero materiæ pars , quæ sulphurea , nitrosa , crassa , & pinguis est , ignem primo concipit , in quo nova habetur formæ ignis generatio. At si quæ ligni particulæ non satis dispositæ sint , tum ex crassitie , ac pinguedinis communicatione , tum ex actione ipsius ignis , apte redduntur , ut ignis formam suscipere valeant. Cum autem ignis in ligni particulis excitatus est , suo motu partes alias disrumpit ; fuliginem , fumumque sursum emitit ; aquæ , & aera corporuscula egredi cogit è poris ligni ; ejusdemque particulæ etiam magis resistentes secum abripiendo absunt. Atque adeo totum lignum ingnescit. Sed aliae ligni partes igni concipiendo minus idoneæ , crassitatemque non habentes , nec propter tenacitatem partium suscipientes , in cineres evadunt , quæ vim ignis effugiunt.

His distincte declaravimus Peripateticum Systema.

Aliorum autem Philosophorum Systemata variam de Materia opinionem referunt ; sed quoad Formam consentiunt , eamdem non aliud esse , nisi partium materiae

combinationem. Hinc si dispositio partium materiæ ita mutetur , ut non amplius ea , quæ prius erat , partium coordinatio permaneat , sed ex toto variata sit , diversa etiam tunc habetur forma , diversumque compositum essentialiter : & Generatio fieri dicitur ; sed si dispositio partium non mutetur omnino , ac proinde eadem sensibilitas permaneat , tunc dicitur Alteratio. Formam adeo relativam constituunt , in ordine videlicet , & combinatione partium materiæ , quæ combinatio varia est pro diversa corporum naturalium essentia. Hinc formam essentialē appellant , non tamen substantiale , quia non est quidquam absolutum , & substantiale , ut Peripatetici ajunt ; licet ad essentiam pertineat corporis naturalis , quod per unam , talem , determinatamque partium materiæ dispositionem ab omni alio specificè secernitur. Nihilominus Leibnitius etsi materiam primam in Monadibus constitutus , quæ sint substantiae simplices , & partibus careant ; quod attinet ad formam , Peripateticis adhæret. Etenim in epistola quadam , data sub die 13. Januarii 1716. scribit : Substantia composita continet aliquid substantiale præter Monades , alioqui nulla dabitur substantia composita . . . & hoc me prorsus cum Scholasticis sentire arbitror. . . . Mea doctrina de substantia composita videtur esse ipsa doctrina Scholæ Peripateticae , nisi quod illa Monades

non agnovit, sed has addo nullo ipsius doctrina detimento. Aliud discrimen vis invenies, et si animum intendas. Idem aliis epistolis affirmat. Vide Memorias Trewolienses, Mensis Junii 1753. Vol. 1.

Quoad Materiam vero, Epicurus ex Veteribus, Gassendus ex Recentioribus; aliique *Atomos* docent esse corporum naturalium materiam, unde *Atomista* appellantur. Atomī autem sunt particulae minimæ, plenaæ, sine vacuo, trine mensurabiles, sed tamen indivisibiles, mole, seu magnitudine, figura, & pondere, sine motu præditæ. Nam inter unam & alteram atomum extare vacuum putant, locum nempe privatum omni corpore: quod *Disseminatum*, seu interspersum nominant. Moles porro, figura, & metus sunt in Atomis variæ, ac multiplices, unde una atomus majorem, altera minorem magnitudinem obtinet, multipli motu agitantur, & ex ipsis aliae sunt rotundæ, aliae quadratæ, aliae triangulares, aliae hamulorum instar figuratæ. Porro ex atomis fiunt moleculæ, seu primæ atomorum concretiones, quæ sensibiles sunt, & per diversam atomorum texturam, seu combinationem specie invicem distinguntur.

Nonnulli Philosophi, ut Honoratus Fabri, & Pace, Systema Elementare tuentur, quo nempe quatuor elementa, Ignis, Aer, Aqua, & Terra, dicuntur materia corporum naturalium. Id ex Veteribus

docuit Empedocles. Alii unum, vel alterum elementum pro materia habuerunt, & inter istos Thales Milesius refertur id aquæ tribuisse, quam sententiam jamdiu conseputam excitavit Helmontius. Formam vero in elementorum varia combinatione constituant.

Chymici, sex Spargirici, ex corporum naturalium resolutione, compositionem ipsorum detegere, conati sunt. Quinque ergo substantias, seu principia velut rerum omnium materiam habent, variaque istorum combinationem formam esse docent. Porro ea quinque principia sunt *Sal*, *Sulphur*, *Mercurius*, *Terra*, & *Aqua*, quæ ex vi ni analysi ope ignis colligunt. Primo enim elicetur liquor quidam subtilis, penetrans, & inflammabilis, quem *Mercurium* appellant. Deinde educitur humor alias insipidus, qui à communi *aqua* vix differt, & *Phlegma* dicitur. Vehementiore postea adhibito igne, quidam viscosus, & inflammabilis factens humor extrahitur; quem oleum crassum, seu *Sulphur* appellant. *Sal* demum separatur ab altera quadam materia, quam *Terram* damnatam, seu caput mortuum nominant, eo quod ad nullos usus deserviat. Aliis placet tria tantum constituere principia, *Terram*, *Mercurium*, & *Phlegma*, seu *Aquam*. *Terra* dicitur habere rationem materiæ, *Mercurius* formæ, *Phlegma* vim habet utrumque connectendi. Alii duo tantum principia docent, *Acidum*, & *Alcali*.

Acidum est corpus sapidum , ita appellatum ex eo sapore, quem in accepto , aliisque aceto similibus experimur. *Alcali* corpus est alio sapore donatum , nempe habet saporem quedam obtusum ; immixtumque acidis liquoribus mitigat illorum saporem. Hinc Sales Alcalici appellantur. Utrumque porro principium in varias distribuitur species , nonnulli ea principia tradunt non esse equidem prima, sed secundaria , ita ut in quolibet corpore re ipsa reperiuntur exquisitè permixta , atque vi ignis invicem postea separantur.

Cartesius 3. p. *Principiorum n. 45.* & seq. & tract. *de Lumine c. 6.* docet , essentiam materiæ , seu corporis naturam sitam esse in extensione actuali in longum , latum , & profundum. Nullum subinde Vacuum ne divina quidem virtute possibile esse, tradit, quia nec corpus esse potest sine extensione, nec extensio ulla sine corpore. Hinc materiam ipsam , seu Mundum, nec finitam vult esse, nec infinitam; sed eamdem appellat *infinitam* , quatenus nullis terminis claudi potest , quippe ultra quosvis terminos Mundo præfixos , adhuc Cartesius intelligit spatium extensem, adeoque corpus & Mundi partem. Est enim ista Cartessii idea clara, & distincta, quæ falsa esse non potest , nisi Deus sit auctor falsitatis ; atque adeo extra cœlos existere indicat verum corpus.

Omnem illam materiam fuisse

initio à Deo divisam in particulas quamproxime inter se æquales , & magnitudine mediocres autumat Cartesius. Has porro varia figura affectas ait , non tamen ab initio sphæricas fuisse : iisdem vero multis angulos , & multa latera attribuit. Äequaliter postea motas fuisse docet , tum singulas circa propria sua centra, & separatim à se mutuo, tum etiam plures simul circa alia quædam puncta. Eamdem vero motus quantitatem, quæ fuit ab initio materiei à Deo impressa , nunc etiam permanere asserit , non quidem in singulis materiæ partibus, sed in tota materia. Porro ex illa materiæ ratione , & vehementi motu successu temporis abrasi fuerunt anguli , & particulæ rotundæ prodire. At quia vacuum non est possibile, ramenta quædam minutissima materiæ implevere intervalla relata inter rotundas illas materiæ particulas : ea vero ramenta maximo motu carent , & figuris indoneis constant ad intervalla impensa.

Igitur ex prædicta materiæ rotatione , & collisione partium ipsius, abrasi ob mutuan attritionem angularis, partes aliae angulares, rotundæ aliae, aliae ramosæ, aliae ovales evaserunt, impletibus interim spatia inter unam , & alteram partem minutissimis ramentis, quæ ex partium collisione velut in farinam abierunt.

Hinc tres corpusculorum classes, ortas esse dicit Cartesius, quibus varia

ria respondet figura; eaque tria elementa appellat, seu rerum omnium adspectabilium principia: atque ea-tenus illa existere probat, quoniam ipsorum ope phænomena naturæ se explicare posse confidit. Primum elementum est materia subtilissima, sive scobs, capax figurarum omnium, sed nullius figuræ tenax, gaudens exilitate maxima partium, ac pernicissimo motu; & hæc re-pplet spatiola vacua inter partes materiæ crassioris. Ex hoc primo elemento Solem, & stellas fixas pro-diisse Cartesius docet, illudque in corporibus lucidis, & ignitis maxi-mē dominari. Secundum elemen-tum est materia sphærica, seu ro-tunda, atque ex hoc elemento ae-rem compactum fuisse tradit. Ter-tium elementum est materia ramo-sa, cujus partes erasiores sunt, & ramorum instar figuræ, atque ad motum minus accommodatae; & ex hoc Terra, Planetæ, & corpora opa-ca constare dicuntur. Igitur ex tribus hisce elementis, variorum vor-ticum ope omnia formata fuisse corpora Cartesius docet. Materiā autem uniusmodi esse tradit, & homogeneam, nempe extensiō-nem in longum, latum & profun-dūm. Partes materiæ varia donat figura, & diverso motu: cujus-modi sunt tria recensita elementa. Ex varia porro trium elemento-rum complexione, textura, com-binatione formam haberi putat, qua corpora invicem differunt es-sentialiter: affectiones quoque sen-

sibilis rerum à solo motu, figura, & mole deducit. His itaque expli-catis.

Dicimus Systema Peripateticum de Principiis Physicis admitten-dum esse, cæterisque præponen-dum; adeo ut materia prima, & forma substantialis materialis sint duæ substantiæ absolutæ.

Et quod ad materiam attinet, consentiunt omnes Philosophi, ni-hil naturaliter anihilari, hoc est, ita destrui, ut ne subjectum qui-dem illius permaneat; nihil etiam creari, id est, secundum omnia sui ex toto produci: sed subje-ctum semper manere, quod ab una forma ad aliam transeat. Subje-ctum itidem istud extensem esse docent omnes: quidquid sit de par-tibus ejus integrantibus, quas non-nulli indivisibiles, alii divisibles contendunt. Quocirca utrum tale subje-ctum sit materia juxta sensum Peripateticorum, carens nempe omni forma seu specie; ex eo est constituendum, quod ad for-mam pertinet. Nam si forma est distincta à materia, velut sub-stantiale aliquod absolutum eidem superadditum, profecto materia ex se se caret omni forma.

Probatur igitur I. Formam sub-tantialem materialem esse absolu-tum aliquod à materia distinctum; non vero ipsius materiæ textu-ram, aut combinationem. Novæ habentur rerum generationes; nam experientia compertum est, v. gr. lignum in ignem transmutari. Sed

Sed istæ generationes exposcunt productionem novæ entitatis substantialis. Ergo Forma præ se fert novam substantialiam realiter distinctam à materia. Minor probatur. Generationes illæ non habentur ex sola partium materiæ nova combinatione, & textura. Ergo productionem exposcunt novæ entitatis substantialis. Probatur antecedens. Generatio distinguitur essentialiter à simplici formatione. Atqui istud esse ntialle discrimen exigit veram productionem novæ substantiæ. Ergo generationes illæ non habentur ex sola partium materiæ nova combinatione, & textura. Minor probatur. Combinatio, seu textura rerum præexistentium non est diversa à simplici formatione; nec rite dicitur generatio. Alias quilibet Artifex ex partibus corporis præexistentis diverso modo collocatis statuam componens, aut horologium, dicendus est statuæ, vel horologii genitor, ac productor; omniaque artefacta non solum formata, verum etiam genita rite dicrentur. Quæ quidem omnia obsona sunt & ridicula: ut evidentissimum est. Atque adeo partium textura, cum sit communis simplici Formationi, non valet constituere discrimen essentialie ipsius à generatione.

Idem pene argumentum sic instituitur. Corpora naturalia invicem differunt specie, atque adeo essentialiter. Ea rerum mutatio, quæ dicitur Alteratio, est diversa

Tom. I. I

essentialiter ab illa, quæ appellatur. Generatio. Hujusmodi porro essentialie discriminem non sola partium varia combinatione conflatur. Nam ista quidpiam est accidentarium, & ad essentiam materiæ non pertinet. Igitur opus est forma substantiali absoluta.

Respondent, Generationem satius discriminari à simplici Formatione; quia res genita fit ex partibus materiæ præexistentibus in caussa generante: quo modo ignis producit ignem in ligno ex suamet substantia in lignum transfusa; at vero nihil simile accedit in simplici Formatione horologii, vel statuæ, nam hæc non fiunt ex materia præcontenta in Artifice.

Verum ista responsio facile convellitur. Etenim Creatio, & Generatio in generica Productionis notione intelliguntur univoce convenire; nam Productio, generis instar, adæquate distribuitur in Creationem, & Generationem. Atqui Productio non præ se fert, materiam præcontineri in caussa producente. Nam id, quod est essentialie generi, ad essentiam itidem specierum pertinet: Creatio autem ex nulla præexistente materia habetur. Ergo Generatio, ut productio est, non connotat materiam præexistentem in generante. Atque adeo Generatio ex hoc ipso non discriminatur essentialiter in ratione Productionis à simplici formatione. Hinc si quando Medicus ex humoribus, aut ossibus

C etiam

etiam à suo corpore decisus medicamentum aliquod efformaret, non propterea vere genitor illius medicamenti appellaretur. At vero Deus, qui cum nullam in se ipso materiam habeat, nihil efformare potest ex materia in se se præcontenta, dicitur tamē productor rerum omnium materialium, & ex præexistente subiecto potest etiam alias res producere per generationem.

Respondent proinde communis voto Recentiores, discriminem essentiale Generationis à simplici Formatione in eo situm esse, quod partium combinatio in Generatione fit *insensibiliter* per particulas insensibiles; at in simplici Formatione fit *sensibiliter* per partes sensibiles.

Sed ista Recentiorum doctrina non aperit essentiale discriminem inter Generationem, & simplicem Formationem. Inde enim consequens est, eas non absolute differre inter se se, sed solum relate ad sensum nostrum. Quamobrem ubi rem ipsam secundum se se concipiamus, atque à sensuum nostrorum operatione abstrahamus, nullum erit discriminem essentiale inter Generationem, ac simplicem Formationem. At hoc ipsum à communis opinione alienum est. Quippe ratio *sensibilitatis*, vel *insensibilitatis* non discernit essentialiter rerum naturam, sed illam solummodo manifestat, vel nostris sensibus celat.

Respondent igitur, subsistere essentiale diversitatem Generationis à simplici Formatione, & quidem absolute, ac secundum se. Nam Generatio præ se fert omnimodam mutationem combinationis partium materiae. Id est, in Generatione ex toto immutatur dispositio partium materiae, adeo ut collectio affectionum sit omnimode diversa. At in simplici Formatione non occurrit omnimoda mutatio; sed partialis tantum, nempe unius, vel alterius affectionis, non vero totius collectionis affectionum. Ita & in alteratione res se habet. Unde Alteratio, & simplex Formatio essentialiter distinguuntur à Generatione, & per eamdem collectionem variam affectionum discriminantur invicem specie corpora ipsa naturalia, tum etiam distinguuntur essentialiter ab artefactis.

Contra est 1. Experientia competum est, Argentum vivum, seu Hydrargyrum varias exhibere sui species, seu aparentias, quin mutetur essentialiter, nam in fumum abit, redigitur in pulverem, resolvitur in liquorem limpidissimum aut etiam crystallizatur: & nihilominus, idem postea reddit, frustrato Chymicorum labore. Hinc Boerhave (ut refertur in Diario Eruditorum Transalpinorum, cap. 194) asserit, Hydrargyrum mutari, ac alterari non posse, ut quamquam varias induit formas, quibus sit etiam cognosci tunc mi-

nime posse semper tamen sit argen-
tum vivum: hoc est, nullam sub-
beat essentialē mutationem. Ita
& ex Cinnabari, quæ rubri, colo-
ris est, ope ignis extrahitur argen-
tum vivum: ut præ ceteris notat
Lemery lib. 1. c. 8. Ex quo itidem
constat, argentum vivum quando-
que sit amittere externam sui spe-
ciem, ut non possit cognosci: cum
tamen re ipsa adhuc tale sit substanc-
ia sua. Jam vero si sola mutatio
collectionis accidentium constituit
essentialē rerum discrīmen, & no-
va est rei generatio, ut placet Re-
centioribus affirmare oportet no-
vas, & novas generationes haberi
in illis argenti vivi mutationibus:
cum tamen non nisi accidentariæ
sint, nec hydrargyrum subeat ul-
lum essentialē discrīmen, dum in-
duit externam speciem fumi, pul-
veris, liquoris, crystalli. Sane ac-
cidentium collectio tota pene immutata
est, unde argentum vivum
tunc minime cognoscitur. Cum
igitur novæ generationes tunc non
habeantur, nec essentialis ulla con-
tingat in hydrargo mutatione; pro-
fecto Generatio, & essentialē discrīmen
rerum effici non possunt, ne ex tota quidem accidentium
collectione. Adeoque idipsum non
sufficit ut Generatio ab Alteratione,
aut simplici Formatione
essentialiter discernatur.

Contra 2. Unius, vel alterius
accidentis mutatio, & varietas non
sufficit, ut habeatur nova genera-
tio, aut essentialē rerum discrīmen.

Ergo nec omnium simul acciden-
tium mutatio, ac varietas in idip-
sum sufficit. Probatur consequen-
tia. Uni, vel alteri accidentium
essentialiter repugnat novam con-
stituere Generationem, aut essen-
tialē discrīmen. Ergo omni simul
accidenti idipsum repugnat. Quippe
in prædicatis essentialibus con-
secutio est optima à distributivo
ad collectivum. Quemadmodum
ergo rite sic argumentamur: Uni,
vel alteri rei animatæ essentialiter
repugnat constituere animatum
aliquid: ergo omni rei animatæ
simul idipsum repugnat; Sit in re
nostra erit optima ratiocinatio ex-
posita. Nam uti nulla relucet pro-
portio respectu rei animatæ in sin-
gulis rebus inanimatis, atque adeo
nulla itidem apparet in istis om-
nibus, simul, & collectim accep-
tis; ita nulla relucet proportio
inter essentialē discrīmen, & sin-
gula accidentia, adeoque nec in
omni simul accidentium collectio-
ne.

Quid quod corpora naturalia
sunt substantiæ, atque adeo invi-
cē debent essentialiter differre in
aliqua substantiali ratione: sicuti
convenire intelliguntur in ipsa ra-
tione substantiæ? Alioquin unica
pene substantia esset in Universo;
nec duo naturalia corpora plus in-
vicem different, quam statua li-
gneæ, & cathedra ligneæ: Nimirum
tota diversitas penes figuram ha-
beretur; atque adeo nec speciei
discrīmen ullum esset, cum Magis,

& Minus discriminem specie non faciant. Ac vero accidentia, sive singillatim, seu collectim accepta ad ordinem substantiæ non pertinent; sed uti sunt extra substantiæ coordinationem; ita nec substantialiem faciunt differentiam.

Dices. Peripatetici ex totali accidentium varia collectione colligunt, corpora differre essentialiter, atque novas, & novas generationes: cum tamen ad id non sufficiat unius, vel alterius accidentis mutatio. Cur igitur, quemadmodum in auro, & ferro; ita & in illis hydrargyri variis formis,实质的 specimenum discriminem non faciunt? Aut cur non poterit tota affectionum collectio constituere generationem, &实质的 discriminationem rerum: etsi unum, vel alterum accidens id exhibere non possit?

Respondetur, argumentum non urgere Peripateticos. Etenim nos, quoties varias accidentium collectiones intuemur, conjicimus eisdem实质的 esse rerum discriminem; Sed non id absolute, ac semper sic assentimur. Oportet enim diligentem adhibere inquisitionem, num sit constans ea collectio affectionum, nec fucata, & umbratilis: quemadmodum ostendit postea experientia in variis illis argenti vivi apparentiis. Sed nec in ipsa tantum collectione vim habet ratiocinatio nostra; alioquin infirma plane esset: Robur accipit ex eo principio: Effectus diversi necessario presup-

ponunt caussam diversam, à qua procedant; tum aliis argumentis innititur, quorum ope cognoscimus substantialie rebus inesse principium, quo ex se se, & seclusa etiam omni accidentaria affectione, invicem essentialiter, ac substantialiter differunt; unde accidentium collectio manifestat à posteriori hujusmodi principium: atque id affirmamus, ubi ratio non refragatur. At in Recentiorum sententia nihil simile occurrit, cum sola accidentium collectio generationem faciat, & rerum实质的 discriminationem: quod cum re ipsa constituantur per collectionem accidentium, hæc sane semper illud efficit, tametsi ipsa non sit constans. Immo cum ipsa accidentium nova collectio sit generatio, & discriminatione实质的; ubi semel illa inest, ibi statim generatio habetur, & diversitas essentialis.

Probatur 2. In corporibus naturalibus extat principium, radix, seu vis conservativa, & exiguita determinatae collectionis accidentium sensibilium. Porro principium istud istud non est aliud, nisi forma substantialis absoluta, & distincta realiter ab illa collectione. Ergo admittenda est forma substantialis materialis in sensu peripatetico. Major appetit experimentis. Nam aqua calefacta reparat sibi connaturalem frigiditatem: Ignis conservat in se se intensionem caloris sibi determinatam: Arbor reparat ramos, & folia: Hydrargyrum,

rum, ut antea dicebamus, postquam varias induit formas, propriam sibi reparat externam dispositionem, ac speciem. Minor probatur. Materia certe non est ea vis conservativa, & exiguitiva determinatae collectionis accidentium: cum ipsa sit indifferens ad accidens omne, & ad quamlibet accidentium collectionem. Nec alteri adscribi potest hæc vis, nisi formæ substantiali. Igitur &c.

Respondent aliqui, aquam reduci ad priorem frigiditatem à quibusdam particulis frigidis, quæ in eadem aqua reperiuntur. Alii causam habent frigus aeris externi aquam ambientis. Plerique declarant id contingere, quoniam calida corpuscula evolant ab aqua, unde illam relinquunt, ut prius: modo turbida propriam recuperat claritatem per separationem partium terrestrium. Putant autem, corpuscula illa calida separari ab Hydrargyro, tum aquæ permixto, tum per aerem volitante. Dixere etiam nonnulli, caussam illius effectus esse diversam materiae dispositionem. Nam & species vini in Sacramento Altaris post Consecrationem, si quando calefiant, priorem recuperant frigiditatem: cum tamen nulla ibi adsit forma substantialis, à qua hujusmodi effectus repeti possit.

Verum neutra ex allatis responsionibus pars est effectui explicando. Non prima. Nam si ejusmodi frigidae particulae extant in aqua

fervente, eadem sane paucæ essent; atque adeo maximum calorem ab aqua propellere non possent. Non secunda. Quippe si frigus aeris externi calidam aquam refrigerat, aqua citius rediret ad priorem frigiditatem, quando aeri frigidiori exposita esset. Hoc ipsum vero experientia contrarium est, qua constat aquam calidam Solaribus radiis expositam citius refrigerari, quam si aeri frigido exponatur. Quin etiam cum aliquando calor aquæ longe excedat aeris frigus, potius superaret istius vim, quam ab illo vinceretur.

Sed nec tertia responsio apta est. Primo enim ad caput redit. Siquidem ea vis dividens in Hydrargyro, unde-nam erit repetenda? Nec pars est ratio de aqua turbida, quia terrestres particulae, cessante motu, ad proprium centrum redeunt naturali gravitate. At idem affirmare non possumus de calore, qui faciliter cessat, aqua Solaribus radiis exposita, licet Solares radii vim habeant procreandi calorem ipsum in subjecto, in quod terminantur. Pro libito etiam effinguntur tot Hydrargyri particulae ubique diffusæ, ac per aquam; & aerem volitantes, ut separare valeant ab ipsa aqua plurimum calefacta tot calidas particulas in ea existentes.

Ultima demum responsio & ipsa principium petit. Inquirimus enim, unde-nam repetenda sit ea materiae dispositio, quæ propria est aquæ: cum ipsa materia ex se se ad

ad unam , vel alteram dispositio-
nem sit prorsus indifferens. Rursus
in Recentiorum sententia Altera-
tio est divisio & transpositio par-
ticularum ; ergo aqua , quæ per
calorem patitur alterationem , non
habet eamdem omnino dispositio-
nem partium , ut prius. A quo
igitur ea dispositio partium denuo
efficitur ? In Sacramento autem
Altaris Deus virtute sua uti sup-
plet defectum materiæ , ita & for-
mæ substantialis : nempe ut fides
locum habeat. Quapropter nihil ex
eo quisquam colligere potest , ut
necessitatem formæ substantialis in
corporibus naturalibus excludat.

Probatur tertio multiplici ratio-
ne. Et primo quidem si Forma
Substantialis non est absoluta , sed
relativa tantum , & in sola par-
tium combinatione sita est: ut Re-
centioribus arridet , nulla ratio ha-
beretur , cur naturaliter non possit
quodlibet fieri ex quolibet : sed
certa , & infallibili lege ordo sit
quidam formarum , ut una forma
sequatur immediate hanc , & non
illam : sicuti cineres post ignem
habentur , ignis post lignum , aut
stuppam , non ē converso. Nul-
lam sane rationem reddere Recen-
tiores possunt. Nam cum ex eadem
materia cera fiat Trianguli figu-
ra , vel Circuli , non magis ex
Triangulo effici potest Circulus ,
quam ex Circulo Triangulum. Si-
mili modo quia eædem sunt lit-
teræ , quæ componunt duo hæc no-
mina , *Roma* , *Amor* , vicissim *Amor* ,

& *Roma* queunt converti. Ergo
si omnino eadem est in corpori-
bus naturalibus substantia , quæ
partium sola dispositione discrepat;
cur non poterit naturaliter idem
numero redire compositum , aut
ex quolibet fieri quilibet ? Nec
profecto dicant Recentiores , ma-
ximam partium transmutationem
contingere in corporum natura-
lium generationem ; Quippe in-
quirimus semper , cur maxima hæc
transmutatio fieri possit de Carbo-
nibus in Cineres , non autem de
Cineribus in Carbones ? Quod si
reponant , particulas corporum in
varia loca dispergi nec posse pari-
bus tempestatibus naturaliter col-
ligi ; ostendant id ipsum adjuncta
ratione : tum probent id fieri non
posse saltem naturali virtute An-
gelorum , quibus distantia earum
particularum non officit : ut ex
eorum mirandis effecti appareat (2.
par. Met. disp. 2.) fortassis Dei
Legem id ferre , dicet Recentior
quispiam ? Sunt enim hac nostra
ætate familiares Recentioribus ejus-
modi responsiones. Sed probare eos
oportet , quod dicunt.

Secundo. Recentiores nullam sub-
stantia differentiam in corporibus
naturalibus extare contendunt , ar-
gumento ex artificialibus ducto. At
inepta est hæc consecutio. Nam lon-
ge latissimum est discriminè inter na-
turalia & artificialia. Naturalia ha-
bent in se principium suorum mo-
tuum ; Artificialia moventur solum
ab extrinsecis , unde motus horo-

logii non ab aliquo proficiuntur, quod intrinsecum sit horologio, qua horologium est, sed vel à naturali ponderum gravitate, vel ab interna virtute elastica calybis, qui ab externa violentia convolutus connititur ad nativam extensionem. Naturalia producunt effectus, & in naturalibus species parit speciem; At non ita contingit in Artificialibus: ut subinde vel ipsi Chymicorum effectus à naturalibus promanent agentibus, quæ per Chymicam Artem applicantur. Naturalia essentialiter differunt, & substantialiter; Artificialia non nisi ex accidenti, unde malleus, & horologium solo accidentario figuræ discrimine distinguuntur. Natura est substantia Agentis; Ars est habitus accidentalis. Ex quibus efficitur, Artem longissime distare à Natura.

Tertio. Recentiores nihil frequentius, & acrius Systemati Peripatetico objiciunt: quam istius ope naturales effectus explicari non posse, atque eo tandem Peripateticorum perduci responsa, ut dicant, hos, aut illos exhiberi effectus, quia hæc, vel illa substantialis inest Forma. Addunt etiam, ejusmodi Systema intelligi satis non posse. At vero ex mole, figura, & motu nobis etiam in promptu esse effectum naturalium explicationem, jam supra diximus. Ultimam autem in composito naturali caussam non aliam esse fatemur, nisi Formam substantialem. Sed & ipsi Re-

centiores eo tandem devenire con-guntur, ut hunc, vel illum habere dicant effectum, quod hic, & nunc illæ, vel istæ concurrente particula: quod hæc extet, vel illa partium combinatio. Quamobrem nec ipsi meliorem afferunt responsionem. Facilius autem potest quis intelligere, corpora naturalia coalescere ex Materia, velut ex parte perfectibili, ac determinabili, & ex Forma, tamquam ex parte perficiente, ac determinante: sicuti in Metaphysicis genus, & differentia rebus inesse dicuntur; Quam possit assequi particularum dispositionem, coordinationem, combinationem, transpositionem, separationem, extractionem, attemperationem, resolutionem, irretitionem, fixationem, percolationem, concoctionem, fermentationem, & sexcenta pene alia, quibus Recentiores dum suas opiniones explicare conantur, magis magisque confundunt, & obvolvunt. Igitur &c.

Objic. 1. Sacrae Litteræ tradunt, nullam substantiam de novo produci. Ergo formæ substanciales materiales Peripateticorum admittendæ non sunt in corporibus naturalibus. Probatur antec. Ecclesiastici c. 1. dicitur: *Nihil sub sole nrum: nec valet quisquam dicere: Ecce hoc recens est: Jam enim præcessit in sacerulis, qua fuerunt ante nos.* Hinc S. Augustinus, lib. 5. de Genesi ad litteram, c. 23. de Deo scribit: *Vnde nullum ulterius creaturam instituens, sed ea, qua om-*

*omnia simul fecit, administratorio
actu gubernans, & movens, sine
cessatione operatur, simul & re-
quiescens, & operans.* Refertur
etiam ab aliquibus alter Augustini
locus ex lib. 3. de Trinitate, c. 9.
cujuſ hæc verba recitantur: *Nec
oritur, nec moritur aliquid, nec
incipit esse, nec desinit.* Igitur &c.

Respondeatur, argumentum in
primis de medio tollere etiam crea-
tionem novam animæ rationalis:
cum tamen certum esse debeat, sin-
gulas hominum animas à Deo pri-
mitus creari, quando nova habe-
tur corporis dispositio: ut dicturi
sumus in 3. parte Physicæ, disp. I.
in fine quæstionis secundæ. Itaque
Ecclesiasticus non loquitur de re-
bus quoad numerum, & entitatem,
sed de rerum generibus: ut opti-
me interpretatur S. Augustinus
lib. 12. de Civitate Dei c. 13. Eo-
dem sensu idem S. Doctor disserit
in priori laudato loco; unde prius
dixerat: *Novum autem genus Deum
instituere, credi recte non potest,
quia tunc (in prima scilicet rerum
conditione) omnis consumavit.*

Sed alter relatus Augustini lo-
cus Recentiores potius urget. Nam
S. Doctor ea verba adaptat Divinæ
Essentiæ, non rebus creatis, de
quibus c. 8. aperte dixerat, cauſas
secundas habere virtutem produ-
cendi unumquodque secundum ge-
nus suum. Verba autem Capitis
noni hæc sunt: *Sicut Matres gra-
vidæ sunt fatibus, sic ipse Mun-
dus gravidus est cauſis nascen-*

*tium quæ in illo non creantur, niſi
ab illa Summa Essentia: ubi nec
oritur, nec moritur aliquid, nec
incipit esse, nec desinit.*

Objicies 2. Nullum Agens crea-
tum potest quidpiam creare. Por-
ro substantialis forma, si admittar-
tur, deberet produci ab Agente
creato per creationem. Ergo for-
ma illa non est admittenda. Major
omnium consensu firmatur. Pro-
batur Minor. Forma fieret ex ni-
hilo; Ergo crearetur. Creatio enim
est productio rei ex nihilo.

Respondeatur. Nego minorem.
Ad probationem, distinguo ante-
cedens: Forma fieret ex nihilo sui
& ex nihilo subjecti, nego: ex
nihilo sui, concedo antecedens, &
nego consequentiam; ac simili mo-
do distinguo istius probationem ad-
junctam. Creatio, ut jam pridem
diximus, est productio rei ex nihi-
lo sui, & ex nihilo subjecti: Sive
Creatio non fit in subjecto, hoc
est, nullum subjectum supponit,
à quo id, quod creatur, pendeat
in fieri, & conservari ex propria
conditione. Quod enim hoc sen-
su subjectum supponit, dicitur elu-
ci, non creari. At Forma Substan-
tialis hac ratione pendet à subje-
cto, ut diximus.

Instabis 1. Forma substantialis
nullo modo pendet à subjecto. Er-
go nulla responsio. Probatur Mi-
nor subsumpta. Licet Angelus præ-
supponat locum, in quo creetur,
tamen non pendet à loco. Licet
Anima rationalis præsupponat cor-

pus organizatum , tamen non pendet à corpore. Ergo licet forma substantialis præsupponat materiam , tamen ab illa non pendet: maxime cum sit substantia , & possit à Deo creari , etiam sine materia.

Respondetur , ex dictis patere disparitatem. Anima enim rationalis non præsupponit corpus ex propria conditione , cum ipsa sit spiritualis. Angelus per accidens omnino se habet ad locum. At forma substantialis ex propria conditione præsupponit materiam. Cum autem sit substantia , non est in subjecto *per inhesionem* , sed per informationem : ut supra diximus. Deus porro supernaturaliter potest formas producere sine materia , quia forma non componitur ex ipsa materia , sed eam solum naturali ordine præsupponit.

Instabis 2. Materia nihil influit in formam. Ergo vere forma creatur , quia nihil ipsius præsupponitur in materia , & nihil à materia accipit. Ita quoque forma anihilaretur ; quia nihil ipsius permanet , quando materia per novam generationem transit ad aliam formam.

Respondetur , materiam certe nullam activam virtutem exercere in formam ; tamen præsupponi ad hujus productionem , velut subjectum ejusdem. Ita quoque nihil formæ præexistit in materia , si ipsam formæ essentiam spectemus , & forma nihil accipit à materia ; sed

Tom. II.

materia præexistens est formæ subjectum , quod ab ea præsupponitur ex propria conditione ; & similiter ratione , quando forma desinit , permanet materia. Quo fit & subjectum formæ præexistere ante productionem ipsius formæ , & subjectum formæ permanere potest formæ destructionem : adeoque formam nec creari : sed anihilari ; quia sicut creatio supponit , subjectum non præexistere , ita anihilatio præse fert , subjectum non permanere. Quamobrem Deus & creare poterit formam , & illam anihilare : si videlicet subjectum simul cum ea producat , & postea simul cum ipsæ subjectum destruat.

Objicies 3. Si caussa secunda posset producere formam substantialiem , polleret amplissima , & indeterminata virtute , qua valeret formam omnem educere à materia. Sed & ipsa materia infinitam pene deberet habere in se se perfectionem , quoniam præcontineret omnes formas possibles , quæ ab illa educi possent. Ex omnibus etiam rebus , si formæ fiunt ex nihilo , omnia nasci possent ; è mire primun homines , à terra posset oriri squamigerum genus : ut Lucretius argumentatur lib. 1. de Rerum Natura. Hæc omnia non congruunt limitationi caussæ secundæ , nec imperfectioni materiae ; immo ridicula sunt , & absurdæ. Igitur &c.

Respondetur , caussarum secundarum limitationem non eatenus colligi quia nihil possint producere ,

D

ac

ac solummodo valeant disponere variis modis partes materiae : quemadmodum in Artefactis contingit; longe enim distat Ars à Natura, ut diximus. Ergo caussarum secundarum limitatio tum in eo relucet, quia finitam habent essentiam , adeoque & finitam operandi virtutem ; tum maxime quia ordo extat formarum ad invicem , ut supra declaravimus : quo fit , agentis creati virtutem ab ipsa formarum natura , & à dispositione subjecti determinari ; tum denique quia necessaria est proportio quædam determinata , seu specifica inter causam , & effectum : Hæc autem proportio non in omnibus habetur. Sed nec materia præcontinet in se formam ullam : quasi formarum educio mechanica esset , ac mere localis. Ergo in materia præcontineri dicitur forma virtualiter , quatenus materia certis ac determinatis affectis dispositionibus , quæ à forma producenda exiguntur, præcedit formæ productionem , velut subjectum ipsius. Ita & in creaturis virtutes extant aliarum productivæ: quo sensu dicebat Augustinus , lib. 3. de Trinitate , cap. 8. *Omnium rerum , que nascuntur , occulta quædam semina in istis corporeis elementis latent.* Sed hinc minime evincitur , aut materiae , aut alteri caussæ creatæ inesse infinitam virtutem. Fabulosa autem est , & ridicula argumentatio Lucretii. Potius enim ille colligere debuisset , formas nec è terra , nec è mari fieri, si

fiant ex nihilo. At cum formæ non fiant ex nihilo subjecti, siccirco non ex quolibet fieri potest quodlibet: & hujus ratio in nostra sententia apparet , cum eadem à Lucretio , & aliis Recentioribus afferri non possit.

Objicies 4. Solus Deus conservat res creatas. Ergo si formæ substantialies extarent, à solo Deo conservarentur: atque adeo à solo Deo crearentur : cum rerum existentia immediate pendeat ab ipso Deo.

Confirmatur argumento Andreæ Pissini Atomistæ. Agens naturale non potest dare existentiam formæ substantiali absolutæ. Ergo hæc forma non extat , nisi dicatur à Deo creari. Probatur antecedens. Omne agens naturale cum qualibet sua virtute nota , aut occulta , passique præjacentis concurrentia , est sine ulla proportione , convenientia , & connexione cum illa forma absoluta. Sed ubi nulla habetur proportio , convenientia , & connexio , ibi nulla exerceri potest caussalitas. Ergo &c. Probatur major. Quæ omnino sunt contradictionia , nullam habent proportionem. Atqui agens , & forma sunt contradictionia. Quippe agens est ens , & existit ; forma vero antequam producatur , non est ens , nec existit. Igitur &c.

Respondeatur , creaturem omnes ita esse à Deo, ut in fieri , & conservari essentialiter ab ipso pendant. At à caassis secundis sic multæ dependent , ut semel accepta existentia persistant , etiam caussa illa

per-

pereunde. Cæterum & ab ipsis causis creatis persæpe dependet aliquorum effectuum conservatio, quos possent utique destruere. Quæcumque autem res creatæ necessario dependent à Deo, qui suo generali concursu eas primum producit, tum continuo servat.

Argumentum vero Pissini omnino ineptissimum est. Probaret enim, Deum non potuisse procreare Mundum, quia inter Deum, & Mundum, antequam iste crearetur, nulla erat proportio: cum Deus existeret, Mundus autem non existeret. Vedit sane instantiam istam Pissini, ex qua ineptiam argumenti cognoscere & potuit, & debuit, Sed obstinatio mentis obcæcatus errorem primum pejore comulavit: dicens, eam esse in arguento vim, ut secundum naturalem rationem probet, Mundum non fuisse à Deo creatum. Quo quid absurdius effutire potuit, si pro Atheis contra Christianos pugnasset? Igitur dicimus: proportionem inter caussam, & effectum non referri ad utriusque existentiam, sed eorum essentiam respicere: quatenus specifica, seu determinata sit similitudo inter prædicata essentialia caussæ, & predicata essentialia effectus: quod sane habetur inter agens naturale, & formam ab eo productam; de quibus in præsentiarum loquimur.

Objicies 5. Si extaret forma substantialis absoluta, componeatur ex materia physica. Est enim

materialis, atque adeo materiam includit. Nam quemadmodum omne animal constat animalitate: ita omne materiale componitur ex materia physica. Ergo non esset primum corporis naturalis principium: sicuti omnium consensu est materia; quippe prima principia nec ex aliis, nec ex se invicem fiunt.

Respondetur, argumentum laborare in æquivocatione. Quippe aliud est esse materiale, aliud vero esse materiam physicam; seu, ut dicunt materiam primam; quamquam & ipsa materia physica includat esse materiale. Etenim esse, materiale præ se fert solam pluralitatem partium, in quo secernitur à spiritu. At materia prima non solam dicit pluralitatem partium, sed etiam rationem partis potentialis seu perfectibilis, & determinabilis: ita ut pluralitas partium sit genus illius, esse autem perfectibile sit differentia; quemadmodum in homine animalitas est instar generis, rationalitas est differentia. Unde latius patet esse materiale, quam esse materiam primam. Quapropter forma est materialis, & potest talis esse, quin sit materia prima. Porro animal; & animalitas idem omnino esentialiter præ se ferunt, nec unum patet latius altero, sed sola connotatione differunt; adque adeo omne animal constat animalitate. Sic quoque omne materiale constat materialitate, sed non componitur ex materia prima, seu physica.

Instabis. Omnis substantia spiritualis est spiritus. Ergo omnis substantia materialis est materia prima.

Respondetur, ex dictis materiam primam duo præ se ferre, nimirum & partium pluralitatem & rationem potentiae; materiale autem unica constare partium pluralitate. Propterea non est consecutio ex materialitate subinferre materiam primam. At spiritus, & spirituale idem omnino præ se ferunt, & quidem indivisibile, nempe parentiam partium, nam pluralitatem partium ambæ æqualiter amovent: atque adeo omnis substansia spiritualis est spiritus.

Objicies 6. In Productione corporis naturalis non aliud habetur, nisi nova materię dispositio. Ita & in illius corruptione non nisi partium habitudo mutatur. Sane dum lignum resolvitur, possumus ibi agnoscere corpuscula callidissima, & mobilissima, quæ ubi è crassiore mole evoluta fuerint consociataque emerserint, speciem ignis referre possint; tum ex illis esse flamnam, quæ ex sœcum, partiumque aliarum impurarum abjectione, clara fit. Ergo sufficit nova, & varia partium materię combinatio, ut generatio habeatur, quæ vel particularum adjectione contingit, ut in viventibus; vel transpositione, quo pacto vermis è caseo extrahitur; vel discessu, ut cum ignis è lapide, vel ligno prodit; quo pacto (inquit Lucre-

tius loco citato) ex 24. litteris Alphabeti tot vocum varietates effici possunt. Ita ergo ex multipli dispositione partium materię tot prodire poterunt composita species diversa. Hoc argumentum late exagerant Atomistæ.

Respondetur, jam ex nostris probationibus plurimas præsto esse rationes, quæ ostendunt, neutiquam sufficere illam materię dispositionem. Utinam vero Atomistæ satis probarent ea, quæ facile dicunt. Nos igitur inficiamur, ignis generationem fieri discessu particularum ignearum antea in ligno latitantium. Nec urget nos litterarum exemplum. Et primo quidem, si litteræ non sint sono diversæ, ex illis conflari nequeunt voces diversæ. Ergo particulæ materię deberent esse inter se essentialiter, ac substantialiter diversæ, ut possent constituere composita essentialiter, ac substantialiter diversa. Inquirendum autem superesset, undenam diversitas illa particularum materię sit repetenda? Sed in præsenti maxime urget, quia ut in vocibus non alia extat diversitas, nisi figuræ, ita & corpora naturalia solo accidentario figuræ discrimine invicem distinguenterentur.

Instabis. Mundus est compositum naturale, & substancialie; nec tamen ullam habet formam substancialiem, sed sola partium dispositione, & coordinatione coalescit. Ergo simili ratione singula corpora naturalia, & substancialia, quæ sunt

sunt in Mundo, per solam partium combinationem constituuntur; unde etiam hæc ipsa semel posita corpus naturale intelligitur.

Respondetur, longe disparem esse rationem. Etenim Mundus est quidem compositum naturale, & substantiale, quatenus ex naturis substantialibus conflatur, velut ex partibus integrantibus, quæ invicem essentialiter, ac substantialiter distinguuntur. Unde Mundus est aggregatum quoddam *per accidens*, nec in se ipso habet universale aliquod principium motus, & quietis. Fabulosa est enim anima illa Mundi, quam Platonici confinxerunt, nec non & Archæus ille Magicus, quem Helmontius cum Paracelso somniavit. At corpora naturalia, ut diximus, invicem differunt essentialiter, ac substantialiter: sunt unum *per se*; habent in se ipsis principium motus, & quietis. Neque vero sola partium dispositio sufficit: ut *ex dictis* probatur. Immo si res ita se haberet, & ipse Mundus rite diceretur maximum Animal, & ridiculum commentum prædictum esset approbandum: quod vel ipsi Recentiores minime ratum habent, adeo ut in ipsorum etiam sententiam Compago rerum, sive Mundus sit mirabile Artefactum, non autem corpus aliquod naturale.

Objicies 7. Per solam diversam partium combinationem fiunt composita essentialiter diversa. Sic ex ferro diversimode disposito efficiuntur

catenæ, mallei, enses, horologia, & innumera alia instrumenta essentialiter diversa. II. Ex varia dispositione particularum Aquæ prœdeunt imbres, glacies, nix, crystallus, spuma, sal. Eadem enim Aqua in vapores convertitur, tum in nives densatur, postea in glaciem, ac demum Aqua appetat, ut prius, quin substantialis ulla forma mutetur. III. Lutum mutat statum sensibilem, & convertitur in lates, Arenulæ in animalibus convertuntur in calculos, Cineres in vitrum: Nec tamen istis nova forma substantialis accedit. IV. Corallum, ut vulgo creditur, quamdiu immersum est aquæ, planta mollis, ac tenera est; At ubi extra quam in aeré consistit, abit in lapidem. V. Arte Chymica ex venenosis salutares medicinæ fiunt, ex amaris dulcia, ex odoris fætida, ex frigidis calida, ex aperitivis constringentia. Quæ quidem omnia contingunt absque ulla deperditione partium; eadem enim arte Chymica priores omnes partes ad suam redeunt speciem, VI. Ex vario ordine lapillorum tot efficiuntur imagines specie diversæ, quæ vulgo musaicæ dicuntur. Igitur eodem modo ratiocinari debemus de omnibus corporibus naturalibus: maxime cum Deus optime potuerit corpora hæc disponere arte mechanica, & machinarum instar effingere.

Respondetur ad primum enumerata omnia longe distare à gene-

nratione corporum naturalium: ut ex nostris probationibus evincimus. Itaque entia illa artificialia, quæ ex eadem materia constant, non differunt invicem essentialiter, sed solum accidentaliter ratione figuræ; Nisi quis velit aburi terminis, atque malleum, qua talis est, appellare essentialiter diversum ab ense: qua ratione corpus album, ut album, diceretur differre essentialiter à corpore nigro. At corpora naturalia essentiali invicem discriminē donantur.

Ad secundum. In ipsa etiam Recentiorum sententia, Aqua, Vapores, Imbres, Nives, Glacies, Spuma, non differunt essentialiter; sed sola in illis accidentalis differentia occurrit: quemadmodum suo loco declarabimus. Sal non fit ex aqua, sed cum prius in qua extarent salineæ particulæ huc illic dispersæ, tum invicem coaduantur, & ab aqua extrahuntur. Chrystallus itidem non ex sola aqua constat, sed ex permixtis terrestribus particulis, quarum ope fixatur.

Ad tertium. Nullum est esse-
tiale discrimen inter lutum, & la-
teres, ut vel ipsi sensus perspiciunt.
Arenulæ in Calculos concrescent,
dum viscosa materies eas pene-
trat, invicemque colligat. Sed nul-
la habetur mutatio essentialis, aut
nova generatio. Idem dicimus de
Cineribus, ex quibus Vitrum com-
ponitur: ut postea explicatius de
clarabimus.

Ad quartum. Recentioribus con-

sentientibus, non relucet in Cor-
ralio, sive molle sit, sive durum,
mutatio omnium affectionum; qua-
propter non occurrit nova ge-
neratio, sed Coralium salibus da-
ratur, quæ ad se attrahit ex aere,
ac veluti imbibit. Nonnulli asse-
runt, Coralium esse plantam; alii
id inficiantur.

Ad quintum. Ipsa experientia
ostendit, non perfici arte Chym-
ica novam generationem, quando
cædem numero partes redeunt. Qua-
propter exquisita mixtione attem-
perantur rerum affectiones, & il-
larum activa virtus. Sed & Chymi-
ci applicant activa passivis, & dis-
ponunt caussas naturales; unde ef-
fectus non sunt ab Arte repeten-
di, sed à caassis naturalibus, quæ
per Artem applicantur.

Ad sextum. Figuræ illæ musai-
co ordine dispositæ non differunt
invicem specie, nisi lapilli specie
differant: & hoc dicimus, specta-
ta earum entitate, non vero repræ-
sentatione, secundum quam invi-
cem differunt. Nam & illarum én-
titas ex pluribus corporibus com-
pletis coalescit, unde dicitur *unum
per accidens*.

Quamquam autem in Mundo
plura habeantur artefacta, non ta-
men licet inde colligere, omnia
esse mechanice disposita. Longe
etenim distant naturalia ab artifi-
cialibus, ut diximus. Et cum præ-
cipuum illorum discrimen in eo sit,
ut naturalia intrinsecum habeant
principium motus, artificialia au-
tem

tem illud non habent, & solum ab extrinseco moveantur; ideo contradictione esset, naturalia corpora esse artificialia, sive vi tantum mechanica constare. Proinde id unum est ex iis, quæ impossibilia judicantur.

Objicies 8. Multa experimenta ostendunt, superfluam esse Formam absolutam Peripateticam. I. Quamdiu oleosæ, ac pingues lacticis particulae una cum serosis exquisite permiscentur, ac uniuntur, tamdiu lactis species integra subsistit. Sed ubi partes oleosæ, ac pingues à serosis secernantur, alioque modo, & ordine inter se consociantur, ac disponantur, tunc species lacticis interit, ac butyrum, caseus, & serum prodire incipiunt. II. Per variam dumtaxat partium texturam, & situm, ex sulphure, carbonibus, & sale petræ Pulvis Pyrius conficitur. Ex arena, & sale fusis Vitrum exoritur: uti Æs ex cupro, & lapide calaminari simul colliquefactis conscrevit. Ita & lapides in crystallum fusi, adjuncto sale ad hoc idoneo, unum quid sensibile homogenum, nempe Crystallum pellucidam, componunt sui mixtione. Sic aurum cum argento simul fusum, & exquisite permixtum constituit unam massam adsensum homogeneam. Sapotiam ex sebo, & cinere, aliisve pinguisibus, & salinis particulis conscrevit. III. Dum Triticum in farinam, & furfur convertitur, nihil in ista mutatione præter motum,

ac divisionem partium occurrit. Simili modo ubi farina per aquæ affusionem fit massa, quæ manibus subacta coquitur in cibano, nihil adhuc præter partium traspositionem, aut mixtionem observamus. Tum massa illa cocta, quæ Panis dicitur: dentibus contrita, & in ventriculo variis adjuvantibus sucis digesta, chyli primum, postea sanguinis, & carnis speciem, per solum partium motum, aut transpositionem, aut aliam hujusmodi mutationem, induit. IV. Idipsum luculentius apparet in Lino, quod ex parvo semine natum, ad altitudinem duorum, vel trium palmarum concrescit, corticem caulis habens viridem, sicut cætera virgulta exinde ab aqua, radiisque Solaribus emollitum, in ipsa aqua colorem, densitatem, & asperitatem relinquit: spatula postea excussum, & ferroprexum, restringitur in subtilissima filamenta, candida, flexilia, & mutuo disjuncta; ita ut tunc plus videatur differre ab eo, quod viride erat in agro, quam differre videantur invicem saxum, & lignum: quæ tamen differunt essentialiter. Idem Linum postea contextum deservit hominum usui in lineis panis. Exinde denuo ab aqua maceratum dissolvitur in partes minutissimas, ex quibus in pistrino contusis Charta conficitur, quæ summe quidem, essentialiter à Lino viridi diversa videtur; cum tamen non nisi diversa ejusdem materiae com-

combinatio Linum modo , modo Chartam denominet. Igitur per solam partium combinationem habentur composita essentialiter diversa.

Respondetur, nihil proficere omnibus hisce experimentis Recentiores aduersus Peripateticum Systema; quod nempe non eadem sit ratio illorum omnium , ac corporum naturalium.

Itaque , ut primum experimentum explicemus , oportet in lacte serosas particulas secernere ab oleosis , & pinguis. Non enim tam serosæ , quam oleosæ particulae formam , ac naturam lactis participant ; sed natura lactis in partibus pinguis , & oleosis sita est ; & serum nihil est aliud , quam liquor quidam , qui simul cum lacte generatur , à lacte tamen diversus: non secus ac liquor quidam cum animalium sanguine genitus eidem permiscetur. Quare cum ex lacte fit caseus , separatur lac à sero , & caseus nihil est aliud , quam lac addensatum, atque nonnullis affectum accidentibus ; quæ diversa sunt ab iis , quibus afficiebatur , quando immixtum erat sero. Proinde Caseus , & Butyrum fiunt ope artis extrinsece congregantis partes dispersas lactis.

Ad secundum. Pulvis Pyrius non jam est unum aliquod substantiale per novam generationem ex sulphure , carbonibus , & sale petræ resultans ; sed aggregatum est quoddam per accidens ex illis omnibus

exquisite invicem permixtis , subsistente tamen eorumdem natura. Sane experientia id ipsum aperte manifestat. Etenim si in recipiente Machinæ Pneumaticæ (disp. 2. quæst. 7.) Pulvis Pyrius constituantur , sulphureæ tantum particulae , exhausto aere crassiore , accenduntur salis petræ aciculis remanentibus. Quo compertum fit salis hujus particulas separari , atque adeo suam semper in pulvere pyrio servasse naturam.

Vitrum quoque non est quidam distinctum ab arena , & sale fusis , simulque exquisite commixtis , sed aggregatum est per accidens ex illis , nequaquam essentia liter ab eisdem diversum. Sane ut Vitrum diaphanum est , & in lamellas distenditur , ita sal in lamellas dividi potest : quod ubi perficeris , diaphanum sal esse perspicies . At vero cum sal liquabile sit , vitrum vero nequaquam , consistentiæ habet vitrum ex commixtione exquisite arenarum , quæ vi ignis plurimum communiatæ , & in subtilissimum pulverem redactæ ex agitatione cum sale liquato eidem permiscentur ; unde ea soliditas Vitri habetur. Neque tamen Vitrum saporem salis præ se fert , etsi ex sale componatur ; nam & ignis vi subtiliores , sapidioresque salis particulae evolare coguntur , & terrena illa corpuscula arenæ , cum sint insipida , salini saporis sensum impediunt.

Eodem modo explicanda est com-

compositio Æris ex cupro, & lapide calaminari. Eadem est ratio de Crystallo ex lapidibus, & salibus compacta; Unde & tradunt, arte fusoria totam lapideam materiam, eamdem, quæ prius erat, eodemque pondere, & ut prius non pellucidam, sed opacam extrahi. Sic & in massa contingit auri, & argenti simul fusi. Nam Chrysulæ beneficio separantur postea invicem auri hinc, inde argenti particulae illibatae, ut erant prius. Saponem pariter aggregatum esse per acidens dicinius ex sebo, & cinere: sive ex oleo, aut pinguedine, aqua calcis, & aliis salinis materiis compactum.

Ad tertium. Furfur non est aliud, quam partes crasiores Tritici: ut Farina non est nisi subtiliores partes illius; quamquam Farina, & Furfur nonnihil etiam invicem differant. Panis autem non est essentialiter à Farina diversus. At cum panis convertitur in chylum, sanguinem, & carnem, novas generationes haberi dicimus, & novas formas absolutas substantiales, & inficiamus sufficere solam variam partium texturam: quod supra probavimus.

Ad quartum. Omnes illæ mutationes, quas linum subit, non præse ferunt essentialem ullam, & specificam diversitatem. Constat enim innumeris experimentis, mutacionem coloris, densitatis, & asperitatis, ac duritiei non præse ferre essentialem differentiam. Hinc & Charta non est specifice di-

Tom. II.

stincta à laciniis lineis, sed solum accidentaliter; & nihil est aliud, quam minutissimæ linteorum particulae in unum colligatae, & dispositæ. Longe aliter continet in compositis naturalibus, quæ specie habentur diversa, ut sunt lignum, & lapis. Quippe in istis non solum quedam accidentia habentur diversa, sed variae relucant in eis virtutes, ac proprietates, & partium internarum textura longe diversa. Et sane vel ipsi Recentiores majorem differentiam in naturalibus corporibus constituunt.

Objicies 9. Materia, & Forma Peripatetica satis percipi non possunt, immo nulla est illarum idea. Sane materia non es quid, non quale, non quantum, non aliquid *in actu*, sed tantum aliiquid *in potentia*. Proinde eamdem nulla idea ideo assequi possumus. Simili ratione de Forma dicendum; nam est substantia, nec tamen est per se, sed à materia dependet.

Confirmatur 1. Peripatetici satis declarare non possunt, quid sit ipsum esse physicum materiæ, & formæ sed tantummodo exhibent conceptum metaphysicum illarum; & quamquam utraque dicatur esse quid absolutum, tamen utraque relative solum describitur: forma per ordinem ad materiam, materia per ordinem ad formam. Jam vero conceptus metaphysici non sunt, nisi in intellectu abstrahente; quemadmodum & de lineis Geometrarum nos diximus. Quam-

E obrem

obrem physicā , & realis principiorum natura est omnino occulta.

Confirmatur 2. Cum essentia materiæ , & formæ sit nostræ cognitioni abdita , & reclusa ; ex illis nequeunt expendi naturalia phænomena. Hinc Peripatetici non alia ratione explicant effectus naturales , nisi dicendo , eosdem ab hac vel illa potius substantiali forma præstari , quippe forma est talis naturæ , ut eos possit efficiere. Modum vero , vim , & rationem , cur isti , aut illi effectus exhibeantur , penitus ignorant . In quo non melior , aut amplior est Peripateticorum notitia , ac illa , quæ ultius insidet menti cuiuslibet hominis , etiam rusticani. Immo vero quum sciscitantibus , cur ignis calefaciat ? respondent Peripatetici , ignem idco calefacere , quia ejusmodi habet sustantiale formam : illudunt sane , & iram commovent , quo modo exposcenti ; cur , & quomodo horologium sic exacte horas demonstrat ? si quis reponant , id ex eo provenire , quia horologium tali constat forma , seu dispositione apte ad horas indicandas ; non-nē iste interroganti illuderet , ejusdemque indignationem commoveret ? E contra Recentiores per motum , figuram , & molem sic explicant naturales effectus , ut nihil jam scitu necessarium , & utile desit. Ergo Peripateticorum Systema inane est. Ita præcæ-

ris Cartesiani argumentantur.

Respondeatur , distingui oportere existentiam materiæ , & formæ ab illarum essentia. Porro existentiam earum aperte cognoscimus ; at vero ubi ad essentiam contemplandam convertimur , quemadmodum in cæteris rebus accidit , ita nec materiæ , & formæ claram , distinctamque ideam assequi nobis datum est. Eam tamen utcumque cognoscimus , confusa saltem idea , ex affectis , & proprietatibus illorum principiorum petita : uti satis apparet ex nostri Systematis expositione.

At nullam esse eorum principiorum ideam , reclamat Cartesiani , qui & contestantur , se nullatenus ea intelligere , quæ nos toties dicimus. Verum cum rei sæpe exposita fuerit , cum apertissimis verbis fuerit explanata ; quid est , quod Peripateticus eam intelligere possit , Cartesianus non possit ? Immo vero quid est , quod Augustinus , & Cicero id mente assecuti sunt , quod Cartesiani conclamat esse omnino imperceptibile ? (Vide quæ diximus in expositione Systematis Peripateticici) Proinde materia , laudatis etiam præstantissimis Viris definientibus , in genere physico specifico est tantum *potentia* ; sed propriam habet essentiam , & existentiam. Forma itidem , quoniam est substantia , non potest inhærere , & per se est : quod non

nō tollit , eam esse in materia per informationem , ut declaravimus.

Quemadmodum autem aliarum omnium rerum essentia facile conceditur , licet nos lateat , cuiusmodi ea sit ; ita impræsentiarum disserendum est : latere quidem ipsam ultimam differentiam , ac intimam notionem materiæ , & formæ ; nos tamen ea contentos esse debere idea , quam pro statu isto consequi possumus . Quapropter cum illa idea ex effectis colligatur , siccirco materia , & forma per relationem describuntur , quas tamen ex ratione cognoscimus , & probamus præ se ferre entitatem absolutam . Ostendunt etiam Peripatetici , extare ipsa quidquid metaphysica definitione significatur , & prædicta metaphysica esse realia probavimus in secunda parte Logice , disput. 2. ad Geometræ lineam , ut ab ipsis accipitur , re ipsa existere nusquam demonstrant . Argumentum denique urget Recentiores , qui nec possunt clare , distincteque declarare , quomodo fiat diversa particularum combinatio : præsertim vero Cartesianos torquet , qui etsi profiteantur , nihil sè affirmare , nisi ex claris distinctisque ideis profectum , asseverant nihilominus indefinitam materiæ divisionem ; de qua ipsemet Cartésius part. 2. Principiorum , num. 25. ait : *Quamvis quomodo fiat indefinita ista di-*

vissio materia , cogitatione comprehendere nequeamus , non ideo tamen debemus dubitare , quin fiat . Atomistæ etiam docent , atomos indivisibiles esse , & partibus carere , extensas tamen , & figuratas dicunt : quod ne ipsi quidem mente assequi possunt . Newtonianæ vim attractionis materiæ ingenitam adstruunt , quam satis declarare non valent . Et sexcenta penne alia his similia in omni Philosophorum Secta passim occurunt . Cæterum ex ipsis Cartesianorum placitis fas nobis est naturam materiæ declarare . Quemadmodum enim Cartesianis imperceptibile non est . Extensionem idoneam esse figuris omnibus accipiendis , & cogitationem aptam esse suscipiendis omnibus modificationibus , seu modis cogitandi ; (vide quæstionem tertiam , disput. 3. part. 2. Metaphysicæ) ita materia erit apta suscipere formas omnes : neque id portenti loco habendum est , quod mentis nostræ aciem fugiat .

Ultima demum argumenti pars solutionem habet ex iis , quæ diximus in expositione nostri Systematis , ubi etiam ignis generationem declaravimus . Nam si proximam caussam , seu dispositionem alicujus effectus declarare opus sit , nihil prohibet , quin Peripatetici molem , figuram , & motum assumant , quæ uti instrumenta sunt exhibendorum effectuum , ita iisdem explicandis

deserviunt. At ubi ultimam , remotam , intimam , ac radicalem caussam exposcimus , à qua naturales effectus proveniant , non aliam profecto assignare fas est , nisi rei agentis naturam utcumque perspectam : quemadmodum & ipsi Recentiores eo tandem deducuntur , ut dicant tales , effectus exhiberi , quia talis est in causa dispositio partium , & combinatio . Nostram responsonem docet etiam Sanctus Augustinus , qui eadem usus est . Nam in libro 21. de Civitate Dei , cap. 7. enumeratis quibusdam mirabilibus Naturæ effectibus inquit : *Alia de illis non redditur ratio , nisi ut dicatur , hanc eorum esse naturam . Brevis sane ista est ratio , fateor , sufficiensque responso .*

Objicies 10. Forma corporum naturalium in sola accidentium congerie sita est . Ita docet Sanctus Augustinus in libro de Immortalitate animæ , numer. 8. alias capite quinto , ubi ait : *Si eorum , quæ in subjecto sunt , (nempe accidentium) tanta commutatio fieret , in illud , quod subesse dicebatur , dici jam omnino non posset nullo modo aliqua ratione quidquam eorum , quæ in illo subjecto ideo erant , quia hoc erat , remanere putaretur .* Censem ergo subjectum destrui ex accidentium ablatione ; atque adeo illud constitui per accidentium collectionem . Similia scribit San-

ctus Basilius homilia prima in Hexameron . Aristoteles quoque idem sæpe tradit , formas enim corporum naturalium comparat artificialibus , similes ait esse numeris , ordini , & musicæ , & inficiatur eas generari . Quæ omni soli formæ relativæ convenient . Igitur &c.

Respondetur . Nego antecedens . Sanctus Augustinus non aliud intendit , nisi ex affectionum omnium mutatione consequens esse , ut res ipsa , seu affectionum subjectum intereat , atque non idem amplius censeatur : quod verissimum est . Ibi enim probat , animam esse immortalem , quia non accidit ei tanta mutatio , quæ faciat ipsam non esse , seu mori . Ergo cum ex adverso materiales res considerat tantæ mutationi subjectas , eas ex consequenti ob affectionum omnium mutationem destrui docet : quemadmodum & animæ id ex consequenti tantummodo eveniret . Basilius etiam tradit , nihil cognosci à nobis posse , nisi cum suis affectionibus , quarum ope unum præ alio compositum cognoscimus , & discernimus : ut & nos sæpe diximus .

Mens autem Aristotelis manifeste colligitur ex tot Sapientissimorum Interpretum sententia , qui nostrum Systema illustrarunt , & sua approbatione obfimarunt . Animadvertisimus autem similitudinem non præ se ferre identitatem , sed in

in exemplis simile, & dissimile inveniri: ut diximus in t. p. Logicæ, sect. 3. c. 7. Itaque Aristoteles formas naturales comparat artificialibus, quoad proportionem quamdam genericam, quatenus sicut forma artificialis perficit subjectum suum, ita forma naturalis materiam perficit; at latum esse discri-
men inter naturalia, & artificialia satis patet ex iis, quæ supra diximus. Unde etsi Aristoteles etiam formas viventium fecerit similes artificialibus, proculdubio easdem esse absolutas docuit. Concedimus quoque, ex mutatione omnium sensibilium qualitatum subinferri es-
tentiale, ac substantiale rerum mutationem: quod Aristoteles sæ-
pe intendit. Negamus tamen, id haberi per solam affectionum variam combinationem. Formas iti-
dem dicimus similes numeris, qua-
tenus unius est post aliam ordo ab agente naturali immutabilis. Cum vero Forma substantialis affectiones exposcat, ac deperditas repa-
ret, partesque invicem disponat; iccirco ordini, & musicæ assimila-
tur. At quia Forma intelligitur si-
mul cum materia facere compo-
situm, quod *unum per se* appellatur, & ex utraque coalescit; proinde Compositum ipsum dicitur esse primarius terminus generationis, per se intentus ab Agente. Quamobrem ipso Forma hoc sensu non dicitur generari, quia licet pro-
ducatur, tamen non ipsa per se est objectum ultimum agentis, & Na-

turæ; sed Forma producitur, ut cum materia faciat unum corpus naturale, seu compositum.

Colligit, omnes formas rerum materialium, etiam Cælorum, & Elementorum, rite dici eductas à materia. Ejusmodi enim sunt, ut ex propria conditione pendeant ab ipsa materia in fieri, & conservari. Cum autem Cæli in libro Geneseos dicuntur creari, materiam Cælo-
rum tunc significari intelligimus, addente S. Scriptura: *He sunt ge-
nerationes Cæli, & Terra.* Animad-
vertite etiam, dispositionem par-
tium materiæ appellari equidem posse substantialem, quatenus af-
ficere intelligitur extrema, quæ sunt substantialia: non tamen esse in se se quidpiam substantiale. Re-
centiores utique primum conve-
dunt, quod ad denominationem pertinet. At nostræ rationes poste-
rius evincunt, quod formæ ipsius naturam designat.

Ex hucusque dictis facile est colligere, quid universim præ se ferat Generatio Substantialis, quidque vicissim opposita Corruptio dicat. Cum enim in Generatione substantiali nova Forma itidem substantialis, novumque subinde intelligatur Substantiale Compositum; iccirco Generatio substantialis rite describitur: *Productio Com-
positi Substantialis ex presupposito
subjecto.* Quippe dum nova forma educitur, Compositum generari dicitur, quod est proprius, prin-
cipialisque terminus generationis,

atque à Natura, & ab Agente per se intentus. Et ita quidem de substantiali Generatione disserimus, quatenus notionem habet productionis. Nam si eamdem spectare velimus, prout dicit mutationem, ea tunc ad materiam primam referunt, ut ad primum subjectum mutationis omnis substantialis, proindeque hoc sensu Generatio substantialis præ se fert transitum materiae à privatione formæ ad eamdem formam substantialiem. Quamobrem ita describi poterit: *Est successio formæ substantialis in materia post privationem ejusdem immediate precedentem.* Quo sensu accipitur dictum illud Philosophi, lib. 2. de Gen. cap. 5. *Generatio est mutatio à Substantia in potentia ad substantiam in actu.* Hinc vero apparet, Corruptionem substantialem, quatenus mutatio est, præ se ferre transitum materiae à forma substantiali ad ipsius privationem. Sed substantialis Corruptione, quatenus destructio est, connotat, formam substantialiem prius existentem, subindeque substantialie illud Compositum, non amplius existere. Nemo porro non intelligit latum discrimen inter Generationem substantialiem, & Alterationem, quæ solas respicit accidentarias affectiones, manente eodem specifice substantiali composite. Affectiones autem accidentarias sensibilitatem corporum constituere, atque earundem diversam collectionem, specificum quo-

que compositorum discrimen indicare, jam diximus, suisque in locis distinctius apparebit.

De Systemate Atomistico.

Quæ hucusque diximus, satis ostendunt, Recentiorum Systemata corruere. Nihilominus præstat speciatim eas rationes summatim exponere, quæ singulis expositis Systematibus adversantur, eademeque manifeste ostendunt à veritate aliena.

Et cum primis in Systemate Atomistico duo sunt invicem appetissime contradicentia: nimurum Atomos extensas esse, ac figuratas, & tamen partibus carere, & esse indivisibles. At extensum ne intelligi quidem potest sine partibus, quæ extendantur: nec uncinatum aliquod, aut rotundum, aut quadratum, aut angulare concipere possumus sine partibus, quarum una sit extra aliam, & ab altera realiter distinguitur.

Deinde vel Atomistæ dicunt, atomos esse ejusdem essentiae, vel diversæ. Si primum ergo nullum ex ipsis haberi posset compositum specie ab altero diversum: quomodo cumque atomi dicantur diverso modo invicem colligari, & disponi. Semper enim una, eademque res ex omnibus atomis prodiret. Quo codem argumento Epicurus refellebat Heraclitum dicentem omnia ex uno Igne componi: ut refert Lucretius lib. 1. Hinc

experientia compertum est , corpora ex partibus homogeneis compacta nullatenus invicem fermentari. Si secundum , redeunt nostra argumenta , atque essentialē atomorum diversitatem à quo repeatant Atomistæ ; inquirimus , cum partium combinatio in illis non sit , & figura tum in omnibus aliis rebus accidentaria sit , tum sine partibus intelligi non possit.

Tertio , Varia illa , quæ adstruitur , Atomorum figura , nulla ratione probatur , sed pro libito conficta est. Sane probari non potest ex figura corporum adspectabilium , quia à toto ad partem non est legitima consecutio in iis , quæ toti sunt accidentaria ; cuiusmodi est figura , vel rotunda , vel quadrata , vel ramosa &c. Nec probari potest Atomorum figura ex effectibus , quia effectus fiunt quidem à moleculis , seu concretiōibus atomorum , non ab una , vel altera atomo , quia nulla atomus per se se operatur.

Demum cum Recentiores Philosophi jactent , se tradere Philosophiam sensum , & mechanicam , atomos postea insensibiles in medium proferunt , figuram atomorum insensibilem , eorumque motum insensibilem , ut caussam effectum naturalium exponant. Quo sane nemo non intelligit , eos à proposito deficere , & nullam mechanicam , & sensibilem caussam proponere. Vacuum autem Disseminalium non satis à Recentioribus

probari declarabimus , disp. 7. quæst. 4.

Quoniam vero placet aliquibus Recentioribus Systema Atomisticum sic amplecti , ut atomum dicant partibus re ipsa constare ; opera pretium ducimus animadverte re , eos à vero Atomistico Systemate recedere. Veteres enim Atomistæ constanter docuerunt , atomos nullis re ipsa constare partibus. Ut enim scribit Numenius , apud Eusebium lib. 14. Præparationis Evangelicæ , cap. 4. Democritus , & Epicurus rerum principia statuerunt corpora quedam individua , que nec multis è partibus informari possent. Plutarchus , lib. 1. de Placitis Philosophorum , cap. 3. inquit , Epicuri atomos esse corpuseula , quæ coagmentationem è partibus non subeunt ; quamquam Epicurus dicat , eas non esse minutissimas instar puncti , quippe punctum omnino indivisible est , etiam per mentem. Lucretius etiam lib. 1. de rerum Natura , atomum describens ait : id nimirum sine partibus extat ; & postea de atomis inquit ; nullis jam prædicta partibus extant. Quamobrem dum ibidem dicit : minimis stipata coherent partibus arte , pro minimis partibus , idem intendit , ac nullis partibus : quemadmodum minime accipitur pro non. Hinc Gassendus , licet lib. 3. Physicæ , sect. 1. c. 5. videatur partes atomo tribuere , tamen c. 6. agnovit Lucretium negasse atomis partes actuales re ipsa:

ja ; & explicans quod de atomorum partibus c. 5. dixerat , postea inquit : *Tales partes sola por mentem designatione distinguuntur , suntque re ipsa non tam partes multæ , quam una simplicissima , ut ita dicam , entitas.* Proinde alii Atomistæ , ut Maignanus c. 7. Philosophiæ , prop. 4. & Casimirus , par. 1. Philosophiæ , disp. 1. art. 4. qu. 1. docent atomum partibus omnibus carere. Hæc est autem differentia inter atomum , & puncta inextensa à Zenone olim constituta , sive puncta mathematica , ut hæc ne per mentem quidem dividi queant , in atomo autem partes conceptu mentis intelligi possunt.

Moleculæ autem ; seu Atomorum concretiones , ex partibus coalescent , in omnium sententia. Molecula ergo differt ab Atomo , ut totum à parte.

Objicies. Compertum est , Deum creasse rerum omnium materiam. Sed sole atomi creari potuerunt. Materia enim prima Peripateticorum supponit partes , ex quibus constituantur ; atque adeo non vere creator , cum creatio nihil omnino supponat , sed gignitur potius , ac componitur. Secundo , si primordia rerum non sunt omnino indivisibilia , quælibet res infinitis partibus constaret : quod assequi mente non possumus. Tertio , omnia corpora resolvuntur in minimas particulas : Sic triticum in farinam , lutum in pulverem ; atque

id necessarium est ad mixtionem , & generationem rerum : hæc autem minimæ particulae non sunt nisi atomi. Igitur &c.

Respondetur ad primum , distinguendam esse compositionem integram à compositione essentiiali. Et ipsi enim Atomistæ concedunt , lignum , ex. gr. & saxum , invicem esse distincta essentialiter , nec tamen sic invicem distinguunt partes lignum integrantes. Itaque singulæ partes Materiæ primæ Peripateticorum à Deo fuerunt creatæ , nam & ante illas nihil erat. Ad secundum solutio patebit in qu. 3. disp. 3. Sed omnino etiam repugnat intelligere atomos extensas sine partibus ; figuratas sine partibus ; extensas , & indivisibiles. Ad tertium. Ulro assentimur , omnia corpora in minutissimas particulas resolvi , quæ vel ipsam oculorum aciem effugiant. At inficiamur , has particulas esse atomos. Farina autem , pulvis , & similia sub aspectum cadunt , & partibus constant , unde sunt divisibilia : cuiusmodi certe non sunt atomi , quæ dicuntur omnino insectiles , & sine partibus. Eadem illæ particulae , quas nos Minima Physica appellamus , permiscentur invicem , & generationi deserviunt ; quamquam nec ipsa partium permixtio sit forma substantialis , aut generatio : ut diximus.

De Systemate Elementarii.

Nulla ratio, nulla experientia ostendit, in mixtis corporibus latitare quatuor elementa, vel duo, vel alterutrum illorum. Deinde hujusce Systematis Patrocinatores, vel prima corporum naturalium principia docent esse elementa sensibilia, vel alia, nescio quæ, elementa sensibilia? Neuto modo hypothesis ista subsistit. Igitur &c. Minor prob. Non primo modo, quia elementa sensibilia non extant re ipsa, & secundum suam entitatem, seu, ut dicunt, *formaliter*, in mixto: tum & ipsa sunt obnoxia generationi, & corruptioni (quemadmodum in sequenti disputatione probabimus) adeoque composita sunt ex materia, & forma. Non secundo modo, nam Elementa insensibilia, vel sunt diversæ naturæ, & tunc redit argumentum, quia & ipsa componerentur ex materia, & forma; vel dicuntur ejusdem naturæ, & tunc ea urgent argumenta, quæ contra Atomistas proposuimus. Igitur &c.

Objicies. Helmontius comperit experimento, ramum salicis, terræ in vase constitutæ in infixum, ad 60. librarum pondus, anni decursu, excreuisse: cum tamen sola aqua pluvialis extrinsecus accesserit. Igitur ex sola aqua pluviali arbor salicis excrevit; adeoque ex sola aqua omnia componuntur. Et sane idem Helmontius testatur, se liquo-

Tom. II.

re quodam, quem appellavit *Ignem Gehenna*, dissolvisse argentum vivum, metalla, & omnia alia corpora in aquam limpidissimam. Omnia etiam ex humido fiunt, ut in rerum generatione compertum est: & Terra ipsa fit ex aqua, nam experientia ostendit terram ab aqua, extrahi. Cui consonat illud Genesios c. 1. *Spiritus Dei ferebatur super aquas: Fiat firmamentum in medio aquarum, & dividat aquas ab aquis: Congregentur aqua, quo super celo sunt, in locum unum, & abpareat arida.* Apparere autem coram Deo idem est, ac primo existere. Igitur &c.

Respondetur, non solis aquis pluvialibus arborem salicis excreuisse, sed terrestribus particulis aquæ permixtis. Etenim in aquis pluvialibus, quemadmodum & in aere, multæ terrestres particulae reperiuntur dispersæ, quæ non aliud sunt, nisi halitus è terra emissi, atque sursum elevati, & hac illac per aerem, & vapores aqueos dispersi. Hi porro halitus, quando vapores ipsi in pluviam condensantur, concrescent in moleculas, & rerum accretioni deserviunt: Hinc referri Digbeus, in oratione, *De vulnerum per pulverem sympatheticum curatione*, se occludisse in vitro a cucurbita catulos quosdam viperarum recenter exclusos: eosdem vero ante unius anni cursum excreuisse ad unius pedis longitudinem, satis crassos, & ponderosos, solo nimis, ac subtilissimo acris pastu.

F Ne-

Neque tamen Helmontius hoc se
expérimento convinci pateretur,
ut aerem fateatur esse primum rerum
principium. Idem ergo ad Hel-
montii experientiam dicimus.

Fabulosa sunt autem ea, quæ
jactitavit Helmontius de suo illo
Igne Gehennæ. Nec enim adhuc
illo certe experimento compertum
est, aurum, aut talcum resolvi posse.
Quamvis igitur aurum in mini-
mas dividi queat particulas fluido
innatantes; tamen semper servat
speciem suam, seu naturam.

Fatemur etiam, humiditatem,
seu fluiditatem prærequiri ad rerum
generationem; sed negamus succum,
& semina rerum humida esse aquam.
Ex aqua terreas particulas extrahi-
diciimus, quia dispersæ in illa repe-
riuntur: ut exposuimus.

Neque S. Scriptura adversatur
nostræ sententiæ. Nam Theodore-
tus sub nomine *spiritus Dei* ipsum
aerem intelligit, quæst. 7. in Ge-
nesim. Ita & Firmamenti nomine
ipsum aerem possumus accipere,
qui vapores, seu nubes aqua gra-
vidas dividit ab aquis inferioribus.
Quamquam dum primo Deum dici-
tur segregasse terram ab aqua, non
significetur profecto eductio ipsius
terræ ab aqua.

Alia argumenta vide soluta dis-
put. seq.

De Principiis Chymicorum.

Primo enim Principia Chymica
in simpliciores substantias resolvi

possunt. Ergo sine sufficienti ra-
tione dicuntur prima rerum prin-
cipia. Assumptum ostenditur. Spi-
ritus vini inflammabilis secundum
magnam sui partem resolvitur in
aquam, & salem volatilem: ut te-
statur Auctor Philosophiæ Burgun-
dice. Sic etiam spiritus acidus,
seu non inflammabilis, in salem
fixum, & aquam arte ipsa Chymica
resolvitur. Oleum crassum pari-
ter in terram, aquam, & salem
volatilem abit, qui rursus in aquam,
terram, & oleum magis expurga-
tum resolvitur. Postremo Tache-
nius modum tradit solvendi sales
ipos fixos in aquam, & terram.
Ergo Chymicorum principia resolv-
vuntur in alias simpliciores substanc-
ias. Corruptioni etiam abnoxia
sunt ea principia: ut experientia
indicare videtur. Igitur &c.

Secundo. Chymici, ut ingenue
testatur Lemery sua principia in
multis corporibus naturalibus non-
dum ostendere potuerunt. Et cer-
te in Metalis ea observare haec-
enus non licuit. Ex auro etiam, ar-
gento, hydrargo, talco veneto,
lapide ossifrago, ostrocula pura,
& susibili arena non possunt elici-
salia, & sulphura. Quamobrem
pro istis alia fôstassis principia e-
runt stuenda. Ergo Chymica prin-
cipia sine sufficienti ratione dicun-
tur omnium prima. Animadverit
etiam Franciscus Vandermonde in
quada quæstione Medica, t. 190.
Diarii Eruditorum Transalpinorum,
experimenta Chymicorum omniñ
esse

esse fallacia, nam solanum, & brasica in eadem principia resolvuntur: cum tamen illud sit venenum, hæc vero sit juscum nobis optimum. Ita & Scammonia, si pura est, saporem reddit amygdalæ; sed hæc cibus est, illa vero purgat.

Tertio. Chymici suas resolutiones potissimum vi ignis absolvunt. Atqui ignis est agens validissimum, non ad solvenda modo, sed etiam ad componenda, & quidem indissolubiliter, corpora, quibus applicatur: ut præ cæteris competitum est in vitri efformatione. Erga non satis constat, Chymicorum illas substantias per meram divisionem detegi. Fieri siquidem absolute potest, ut eadem de novo prodeant. Atque in id ipsum assumere etiam possumus eam ignis vittutem, qua ad se trahit circumstantes rerum particulas, primum in acre hac illac dispersas. (Vide in fine quæst. 3. disp. seq.) Ex his probatur etiam, Chymicas substantias nec dici posse principia secundaria rerum.

Objicies 1. Omnia resolvuntur in Chymica principia. In plerisque sane id ad sensum appareat. Quapropter & de cæteris idem iudicium ferendum est. Immo vero peritiores Chymici possunt etiam resolvere aurum, vitrum, & alia, quæ irresolubilia dicuntur, Boylæus siquidem, & Hombergerus docent vitrum evaporari in furnis vitrariis, & aurum per vitra caustica omni-

no fuisse destructum, aut certe vitrificatum, aut in crystallos solutum. Quod si eadem Chymica principia resolvi videntur, non nisi in alias similes abeunt substantias: ut sulphur in ignem, quæ duo juxta Chymicorum sententiam ex accidenti invicem discrepant, quantum Sulphur est ignis clausus, solitus, atque concretus; ignis vero est sulphur apertum, & solutum. Igitur &c.

Respondetur, Chymicos non posse satis probare, aurum, & vitrum resolvi in Chymica principia, eo quod evaporentur, & destruantur. Crystallizationem autem auri ab Hombergero factam ostendit Hartsækerus provenire à particulis aeris inducentibus auro crustam, prout ipsem expertus est similibus experimentis per vitrum caustum Hassiacum. Quamobrem nihil proficere potuerunt Chymici, ut aurum, etiam ignis vehementissimi ope, in sua illa principia dissiperent. Cuncta adeo miris illis compagibus hærent. Probandum etiam manet Chymicis, veram contingere analysis, quoties suas illas substantias ope ignis exhibent. Unde potius colligimus, ea principia aliunde accedere, nec mera separatione extrahi, quoniam in multis naturalibus corporibus nullum extat ipsorum vestigium. Demum ignis, aqua, & terra longe diversa habentur à Chymicorum principiis, & pro arbitrio effingunt Chymici, Sulphur, & ignem dis-

ferre solum ex accidenti.

Objicies 2. Ex providentia legibus in quolibet mixto requiritur cumprimis Terra aliqua loco basis: deinde Aqua, quæ glutinis instar invicem nectat terrestres partes: tertio opus est subtili substantia intime resolubili, ut spatiola imperfecta partibus corporum repleantur: quarto necessarium est activum principium, quo partes moveantur, & ad actionem impellantur: quinto requiritur pars volatilis, quæ per totam massam discurrens separat ea, quæ ad rem non pertinent, & rem ipsam ferment. Ejusmodi porro sunt quinque Chymica principia. Igitur &c.

Confirmatur. Mixtis corporibus insunt hæ proprietates, Odor, Sapor, Solubilitas, Inflammabilitas, Volatilitas. Ergo in illis extat commune principium harum proprietatum. Id ipsum exhibent Chymica principia. Nam Sal est principium saporis, & solubilitatis, Sulphur est principium odoris, & inflammabilitatis; Mercurius volatilitatis. Ergo &c.

Respondetur, eas utique diversas proprietates inesse mixtis, sed illas aliunde repeti posse, quam à principiis Chymicis. Nam consistentia tum ab ipsa materia prima desumi potest, tum à partium figura, & contextura. Aqua valet eisdem multa per artem unire sed non satis evincit, eam esse commune vinculum Naturæ Spatiola inter corporum partes repleta sunt aere,

& subtiliori æthere; quamquam nemo nostrum inficietur, interdum particulas salium in poris corporum reperiri, sicut & aqueas particulas. Forma ipsa substantialis rerum determinatam exigit partium dispositionem, partesque coordinat, & principium est motus, cui multum confert partium figura, & subtilitas.

Ad Confirmationem. Color in primis non habet commune principium; convenit enim Mercurio, Sulphuri, Sali, quin & Phlegmati. Sic & Volatilitas convenit Mercurio, Sulphuri, & Sali, nam multa extant Salia volatilia. Commune autem principium gravitatis, soni, & aliarum affectionum, præsto non est apud Chymicos. Deinde si Sal est principium saporis, ergo omnis res insipida salino careret principio: quod Chymicorum sententiae contrarium est. Illud etiam fidem excedit omnem, Sulphur, foetoris officinam, esse principium odorum omnium: maxime cum multa mixta nullum emitant odorem. Inflammabilitas non videtur sulphuri correspondere; nam stipulae siccae, paleæ, fœnum sunt maxime inflammabilia: nec tamen poterunt Chymici ostendere sulphur ex illis corporibus. Verum de istis mixtorum affectionibus suo erit loco dicendum.

Ex hucusque dictis plurima alia declarari possunt experimenta. Ita Vitriolum, extractis prius ab ipso aqua, spiritu, & oleo, rursus sub dio expositum, novum olei, aquæ,

aquæ, & spiritus proventum ex aere circumfuso trahit. Sunt enim innumeræ ejusdem modi, rerum particulae, continuo è Tellure emissæ, & per aerem dispersæ; quarum etiam coadunatione fulgura, tonitrua, & aliæ impressiones igneæ generantur. Dum rosa, vel alia herba in alembico resolvitur, separantur subtiliores, & crassiores partes, tum quæ pingues sunt; atque hæ permiscentur aliis terrestribus halitibus ab igne attractis.

De Principiis Phisicis Cartesii.

Cartesianum Systema contradictionem præ se fert, & plura continent vero minus similia.

Et primo quidem Cartesius docet, vacuum omne prorsus esse impossibile. At Systema Cartesii necessario vacuum præ se fert. Ergo istud Systema apertissima laborat contradictione. Minor probatur. Systema Cartesii tradit, materiam. cum primum una, eademque esset, divisam postea fuisse in plures partes, quarum pleræque angulis præditæ fuerint: exinde partes hasce motas fuisse singulas circa suum centrum, & circa centrum commune: quod factum sit, ut abrasio angulis prodierit Scobs, seu subtilia materia. Porro divisio ista, & motus ne intelligi quidem possunt sine vacuo. Quid enim fissuras materiae primum divise implebat, cum nondum præsto esset materia subtilis, quæ partium jam divisarum

agitatione nata est? Quomodo partes materiae circa suum quæque centrum torqueri potuere, cum plena essent omnia? Connisus ille partium, ea colluctatio, motuus ille attritus ostendunt sane vacuum aliquod tunc extare debuisse, ut eadem illa haberentur. Oportet igitur Cartesium fateri vacuum, quod tamen impossibile esse pronuntiat.

Respondent ex Cartesio, cap. 6. *de Lumine*, argumentum procedere ex falsa suppositione. Supponit enim divisionem ante motum: quod falsum est. Quippe divisio sita est in ipsa motuum diversitate, quo Deus impressit partibus materias efficiendo, ut à primo suæ creationis momento aliæ in unam, aliæ in alteram partem moverentur. Quamobrem idem fuerunt divisio, & mutus; vel saltem simul fuerunt: velut cum folium chartæ in duas partes dividitur, unam movendo Orientem versus, alteram versus Occidentem. Proinde præsto semper fuit materia subtilis, quæ cum motu extitit. Quemadmodum igitur Peripatetici tradunt, motum localem extare sine vacuo, ita dicendum de motu materiae Cartesianæ.

Contra est. Cartesius docet partes materiae in prima divisione habuisse multos angulos, multaque latera, quæ per motum rotationis abrasa fuere. Nunc ita ratiocinamur. Quando fuit prima divisio, partes materiae habuerunt angulos: quando, extitit motus rotationis,

partes materiae fuerunt sine angulis. Ergo vel divisio præcessit tempore motum istum; vel si divisio simul fuit cum isto motu, partes materiae simul habuerunt angulos, & fuerunt sine angulis. Igitur. Cartesius *incidit in Scyllam cupiens vitare Charybdim*; nempe ut devitet unam contradictionem, in alteram labitur.

Ut vero idipsum distinctius apparet, oportet distinguere motum separationis, quo partes materiae invicem primo divisæ à Deo fuerunt, & motum rotationis, atque attritus, quo partes materiae dicuntur invicem collisæ. Priorem motum simul fuisse cum prima divisione materiae facile assentimur. posteriorem negamus. At Cartesius scobem, seu subtilem materiam prodisse scribit ex motu attritus, & rotationis, quo abrasi fuerunt anguli, prius certe extantes in materia utcumque divisa, & separata. Aserit etiam Cartesius, in prima divisione materiam divisam fuisse, à Deo *in particulas quamproxime inter se aequales, & magnitudine mediocres*. Non ergo tunc simul admittere potuit particulas scobis, seu materiae subtilis, magnitudine profecto minutissimas. Videbimus postea Cartesianos dicentes, non oportere nunc immutari rerum figuræ, etsi maneat idem motus in tota materia, quoniam nunc extat materia subtilis, quæ valet spatiola implere. Ergo si & in ipsa prima divisione ma-

teria extitisse dicatur materia subtilis; cur debuit materiam suam postea tunc immutare figuram? Non igitur scobs, seu fluidum corpus præsto tunc fuit in prima divisione materiae ad vacuum replendum: quo modo per fluida corpora motum haberí posse sine vacuo, rite docent Peripatetici: ut declarabimus disp. 7. q. 4.

Secundo. Cartesianum Systema tradit, eamdem motus quantitatem, non quidem in singulis materiae partibus, sed in ipsa tota materia, nunc etiam perseverare, quantam primo Deus ipsi materiae impressit. Jam si id verum est, oportet, ejusdem motus vi partes secundi, & tertii Elementi Cartesiani figuræ continuo mutare, ut quæ rotundæ sunt, contundantur, & complanentur; angulosæ autem abrasiæ angulis planæ fiant: quemadmodum primo id contigit in rotundis, & angulosis materiae partibus. Eadem enim actione permanente, idem effectus debet apparere. Cum ergo Cartesius ex minutissimis primi elementi partibus compactum esse Solem dixerit, & Stellas fixas: ex globulis secundi, Cælos: ex ramosis tertii elementi corporibus, Planetas, & terrestria corpora; continuo hæc omnia in dies immutabuntur; crescent, decrescent, restaurabuntur, trasponentur, multiplicabuntur ex partium componentium mutatione per motum facta. Atque adeo ex celeberrimo Cartesii Sy-

stemate induceretur rerum, quæ in Mundo sunt, confusio, & ruina: in dispendium ordinis illius mirabilis, immutabilis, quem à tot sæculis perennem conspicimus.

Respondent Cartesiani, materiam nunc servare constantem figuram, nec debere istam mutare. Quippe cum jam præsto sit materia subtilis primi elementi, quæ replere valet spatiola partibus materiae interjecta, optime intelligimus partes secundi, & tertii elementi moveri, quin ipsarum figura mutetur: quo sane modo in mixtis partibus crassiores, & angulosæ, communicato suo motu aliis materiae partibus, invicem uniuntur per quietem, quin illarum partium figura mutetur.

Sed hæc responsio principium petit. Quemamodum enim primum Cartesii elementum ex agitatione magis magisque comminuitur, & figuræ continuo varias subit, & quando illius partes aliæ in alias incurront, motum suum amittunt, & in crassam, ac striatam tertii elementi materiam convertuntur: ut Cartesius docet; ita profecto contingere deberet particulis secundi, & tertii elementi, ut invicem figuræ amittant. Immo vero cum primum elementum, Cartesio teste, velocissime discurrat inter partes secundi, & tertii, illius vi deberent potius hæc omnia invicem discindi, ac dispergi. Dicebant autem Cartesiani, ut paullo ante retulimus, in prima divisione materiae ex-

tisse etiam materiam subtilem, quin tamen ea impediret, ne partes angulosæ fierent rotundæ, ac istæ complanarentur. Quod ergo tunc materia subtilis impedit non potuit, ecur nunc valet? Inquirimus etiam rationem, qua partes aliquando invicem per motum disjunctæ, denuo uniantur. Nisi enim nova accedit extrinseci agentis maxima vis, partes liquidorum, quæ, ut Cartesianis placet, perpetua urgentur agitatione, ex se se nunquam possent uniri per quietem, quam ipsarunt aliquæ acquirant. Immo cum Cartesiani doceant, duo corpora simplicia non posse ita invicem offendere, ut utrumque amittat suum motum, videtur illud evenire non posse. Vide in fine disp. 8.

Tertio. Ut docet Cartesius, par. 2. Principiorum, n. 60. quando sola impulsio manus caussa est, cur corpus aliquod moveatur, hoc ipsum non potest celerius moveri, quam impellatur. At Cartesii simul opinio est, secundum elementum moveri tardius primo: & tamen particulas primi elementi celerimè moveri à secundo elemento. Compertum etiam est omnibus, figuræ diversitatem plurimum conferre motui; unde motus plumæ angulis resertæ tardior est motu æqualis materiae rotundæ. Jam vero partes secundi elementi Cartesiani figuram propriam habent rotundam, & partes primi elementi continuo varias subeunt figuræ, rotundas, quadratas, angulosas &c. Igitur

tur impossibile est, partes primi elementi velocius moveri partibus secundi; Imperceptibile pariter videatur, materiam primi elementi substantiam esse, & corpus, & tamen nullam sibi propriam vindicare figuram. Demum nulla ratio, nulla experientia ostendit tria illa elementa vere esse prima corporum naturalium principia. Igitur &c.

Respondent ex Cartesio, par. 3. Principiorum n. 51. primum elementum posse moveri celerrime à secundo tardius moto: sicuti aer, qui à follis orificio egreditur, celerrime movetur, etsi impellatur à lateribus follis, quæ tardiori motu comprimuntur. Addunt etiam, in mixtis varietatem motus à diversis caassis oriri: ut in motu plumæ, aliorumque sensibilium; sed non ita rem se habere in Cartesianis elementis, quæ ut simplicia sunt, sic à simplicibus caassis originem habent sui motus.

At nihil prodest Cartesianis exemplum illud follis. In folle enim novus efficitur motus à vi impulsiva laterum follis, quæ vicisim perstringuntur. Quare si motus aeris excedit motum follis, non tamen excedit impetum, quem follis causat, comprimendo aerem, cui cum non alias pateat exitus, nisi per angustum orificii foramen, necesse est, ut illuc totus procedat, semper in minoribus partibus colligendo pressionem illam, quæ partibus simul omnibus imprimitur. Non ita res habet in elementis Car-

tesianis. Partes secundi elementi omnes eodem motu recedunt à centro, nec una se se versus aliam colligit ad partes primi elementi impellendas. Sed nec illæ minus expeditæ sunt ad motum, quam istæ; immo illæ magis, utpote angulis carentes. Non ergo apparet ratio, cur partes secundi elementi acelerare debeant motum partium primi elementi: maxime cum istæ, utpote nullius figuræ tenaces, exitum sibi aptum ubicunque reperiant.

Denique cum ipsi Cartesiani suas opiniones exemplis tueantur mixtorum: ut vel in nuper allato follis experimento compertum est; pro libito reponunt Peripateticis, idonea non esse exempla illa, si comparentur ad simplicia Cartesianæ elementa.

Objiciunt 1. Cartesiani. Illud verum est, atque adeo approbandum, quod per claram, & distinctam ideam concipitur. Ita sæpe Cartesius docet. Atqui tria Elementa Cartesianæ, ut rationem habentia materiae prime corporum naturalium, per claram, & distinctam ideam intelliguntur. Id sæpe testatur Cartesius, qui & in lib. de Methodo, n. 5. ait: *Ita primam hanc materiam descripsi, ut nihil, mea quidem sententia, clariss, & intelligibilius sit in Mundo.* Igitur tria elementa Cartesianæ sunt materia prima corporum naturalium.

Respondeatur. Nego majorem: ut diximus in 2. parte Logicæ, disp. 1. Nego etiam minorem: ut ex nuper di-

dictis appetit. Proindeque nego consequentiam. Cartesio autem sat nobis est opponere, tot illustres, sapientesque Vires nullam ideam habere claram, & distinctam, quæ repræsentet tria illa elementa, velut primam corporum naturalium materiam.

Objiciunt 2. Tria sunt genera corporum; lucida, quæ lucem effundunt; diaphana, que lucem trahunt; & opaca, quæ lucem remittunt. Sed hæc sunt tria elementa Cartesiana. Primum enim elementum fons est, & origo lucis; secundum in diaphanis dominatur; tertium opaca facit corpora. Igitur extant in corporibus naturalibus tria elementa Cartesiana.

Respondetur. Nego minorem, donec Cartesiani eamdem solidaratione, aut experientia probent.

Objiciunt 3. Per hypothesesim Cartesii explicantur origines, & natura omnium sensibilium. Sic primum elementum impertitur motum corporibus, & implet poros minutissimos rerum. Ergo admittenda est hypothesis illa. Quippe, ut ait Cartesius, p. 4. Principiorum, n. 204. *Ne quis forte sibi persuadeat, Aristotelem aliquid amplius prestisset, aut prestare voluisse, ipsem et in 1. Meteorologicorum, initio cap. 7. expresse testatur, de his, que sensui non sunt manifesta, se putare sufficietes rationes, & demonstrationes afferre, si tantum ostendat, ea ita fieri posse, ut à se explicantur.* Igitur cum Cartesius ex suis principiis

possibilem reddat rerum naturalium rationem, eadem illa approbare oportet.

Respondetur, assumptum esse falsum ex dictis. Quotquot vero à Cartesianis recensentur effectus, optime explicantur sine principiis Cartesii: ut suis in locis declarabimus. Verum est autem quod scribit Aristoteles, deficiente evidenti ratione, probabilibus esse assentiendum. At nusquam ille tradit, probabilia hæc, velut certa, & explorata habenda esse: quod Cartesiani de suis principiis affirmant. Tum Systema Cartesii probabile non esse, satis apparet ex nostris rationibus. Demum neque id omne, quod possibile est, approbare debemus tanquam re ipsa effectum; nam & potuit Mundus esse ab æterno, tamen non ita fuisse dicendum est.

De Systemate Newtoni, & Wolsii.

Quod ad tem præsentem attinet, Newtonus, ut ex ejusdem sententia liquet, libr. 3. Optics, q. 31. primam corporum materiam docet esse particulas quasdam primigenias, solidas, duras, impenetrabiles, mobiles, diversisque figuris præditas; formam vero eorumdem corporum non aliud esse, nisi earum particularum variam texturam, vacuo interjecto, quemadmodum Atomistæ docuerunt. Sed ex dictis evincimus, hoc etiam Systema rejiciendum esse. Nam particularum textura non sufficit ad

substantiales, essentialesque corporum naturalium formas constitutas. Plurima etiam, quæ Atomistis opposuimus, huic pariter Systemati adversari, perspicuum est. De substantiæ corporeæ essentia disputabimus suo loco, ut de aliis corporum affectionibus.

Wolfius, in Cosmologia §. 186. & seq. duplex atomi genus adstruit, atomum nempe naturæ, & atomum materialem. Atomus naturæ dicitur carere partibus, proindeque nec in se se divisibilis est, nec vi ulla in partes resolvi potest. Atomus autem materialis, licet in se sit divisibilis, tamen naturaliter dividi nequit; nulla quippe caussa in rerum natura existens, huic divisioni efficiendæ satis idonea est. Prima porro rerum naturalium principia Wolfius constituit atomas naturæ, quæ tamen singulæ sint invicem dissimiles par essentiam, cum nec figura, nec magnitudo iisdem conveniat. Nullam vero mutationem in corporibus contingere posse affirmat, nisi quoad figuram, magnitudinem, partium situm, & locum totius. Sed hoc ipsum Systema ex dictis rejicitur, prasertim ex iis, quæ contra Atomistas proposuimus. Tum essentia lis illa differentia atomorum naturæ probari debet, & explicari. De ea enim idem inquirimus ac de essentiæ corporum discrimine.

QUÆSTIO SECUNDA.

Utrum Materia prima propriam habeat existentiam, & an queat plures simul formas recipere?

REcolere impræsentiarum oportet ea, quæ docuimus in 1. Metaphysics parte, disp. 3. q. 3. Ibi enim animadvertisimus, potentia considerationem esse duplensem. Nam *potentia*, vel *objectiva* dicitur, vel *subjectiva*: quemadmodum tradidit Subtilis Doctor in 2. d. 12. q. 1. *Objectiva potentia* præ se fert rem ex statu possibilitatis reapse produci posse, & constitui in statu existentiæ actualis. Sic ea, quæ nunc futura sunt, vel possibilia, habere dicuntur *potentiam objectivam*. *Potentia* vero *subjectiva* significat, rem jam existentem posse in se se formam aliquam, seu affectionem recipere. Quemadmodum autem generatim *potentia correlativus* est *actus*, sive *perfectio* potentiam ipsam complens; ita duplice illi potentia duplex *actus* responderet. *Potentia* quidem *objectiva*: *actus entitativus*, seu ipsa existentia, quæ res constituitur extra suas causas; *Potentia* autem *subjectiva*, *actus formalis*, forma nimirum, seu affectio: quæ in *subjecto* recipitur.

Quærimus itaque, utrum Materia prima ita sit pura potentia, ut omnem *actum* recipiat à forma substantiali? an vero eidem materiæ independenter à forma convenienti

actus

actus emittitivus, seu existentia? Thomistæ primam problematis partem tuentur, Scotistæ secundam cum Doctore laudato.

Quia vero Materia receptiva est formarum substantialium, inquirimus, an divina saltem virtute possit plures formas substantiales in se recipere? Non loquimur autem de formis illis, quæ invicem *subordinatae* appellantur, quoniam una alteram præsupponit; ut anima supponit in materia formam substantialē corporis: de qua disseremus in 3. part. disput. 1. quæst. 5. sed de formis illis nunc disputamus, quas *disparatas* nominant, quoniam nec invicem inter se ordinem servant, ut anima, & forma corporis, nec mutuo adversantur, ut forma ignis, & forma ligni. Quæstio igitur ex. gr. versatur circa formas substantiales ligni, & lapidis.

Dicimus, Materia primam habere propriam existentiam, duasque substantiales formas disparatas simul ac semel recipere posse divina virtute. Primam partem docet Scotus in 1. cit. secundam in 4. d. 10. q. 2.

Probatur 1. pars. Materia prima est subjectum, quod recipit formam ipsam, & quod ab una in aliā mutatur, quin unquam desinat existere. Porro subjectum præsupponitur existens, ut possit formam recipere, nam quod non est, nihil valet: Mutari etiam præ se fert aliter se habere nunc, quam prius

adeoque mutatio necessario supponit subjectum, in quo fiat. Ergo materia præintelligitur existens ante formam: atque adeo non accipit à forma illud ipsum, quod debet primo habere, ut suscipere valeat ipsam formam. Igitur Materia propriam habet existentiam.

Confirmatur. Materia prima terminus est creationis, nam formæ dicuntur eductæ: Creatio autem dat existentiam. Tum Materia in generabilis est, & incorruptibilis: ut ex ipsius definitione apparet; ergo non habet existentiam à forma; alioquin dum una forma destruitur, periret etiam existentia materiæ, atque adeo & ipsa materia corrumperetur, & destrueretur. Demum, ut in citato Metaphysics loco probavimus, existentia non est accidens re ipsa distinctum ab essentia rei. Cum igitur Materia prima sit res, propria gaudet existentia realiter indistincta. Ergo &c.

Respondent Thomistæ his omnibus explendis satis esse, si materia existat per existentiam formæ, vel præcedentis mutationem, vel hanc subsequentis. Hinc docent, materiam ex se se esse quidem existentem *inchoative*, & *in fieri*; per formam vero fieri existentem *complete*, & *in facto esse*.

Contra est. Ut simili Thomistarum doctrinæ objecimus in citata quæst. Metaphysicæ, petimus etiam nunc explicari nobis, quid sit materiam ex se se existentem esse

inchoative, & *in fieri*? Vel enim præ se fert, materiam ex se se jam esse extra suas caussas, scu extra nihil; vel non? Si primum, hoc ipso materia habet propriam existentiam; id enim notio ipsa existentia significat. Si secundum, redit argumentum nostrum; quippe tunc materia non posset formam recipere, nam quod re ipsa non existit, nihil est: quod autem nihil est, non potest in se se recipere aliud. Hinc forma ipsa, ut recipiatur in materia, præsupponit materiam existentem. Etenim recipi in materia est eidem conjungi, sed quæcumque conjunctio semper supponit extrema jucunda re ipsa existentia. Ergo materia præsupponitur existens ante receptionem formæ. Deinde cum forma supponat subjectum, à quo educatur, ne re ipsa fiat ex nihilo, & creetur, materia profecto existere non potest per formam, quæ subsequitur mutationem; sed nec existere dicenda est per formam, quæ præcedit mutationem; alioquin enim & ipsa materia destrueretur, quando forma hæc dedit esse.

Objicies i. Sicuti se habet subjectum ad affectiones accidentales, & materia artefacti ad actum, seu formam artificialem, ita se habet materia prima ad formas substantiales, que naturales sunt. Atqui subjectum accidentium ex se se nullum includit actum accidentalem, & materia artefacti nullam ex se se habet formam artificialem. Ergo

materia prima ex se se nullum habet actum naturalem. Porro existentia est actus, seu perfectio naturalis. Ergo materia prima non habet ex se existentiam.

Confirmatur. Materia prima, & forma substantialis possunt existere eadem unica existentia. Ergo cum forma dubio procul habeat propriam existentiam, superflua est altera existentia in materia. Probatur antecedens. Anima, & Corpus unica vita vivunt. Natura humana, & Natura Divina in Christo eadem unica personalitate subsistunt. Ergo etiam &c.

Respondeatur, argumentum laborare in æquivocatione vocis illius *actus*. Ut enim diximus *actus* alter est *formalis*, alter *entitativus*. Forma substantialis est *actus formalis*; Existentia est *actus entitativus*. Ideo materia prima sine forma substantiali non habet *actus formalem*; habet tamen *actus entitativum*. Quanobrem sicuti subjectum accidentium ex se se nullum habet *actus accidentalem*, & tamen habet *actus entitativum*, & quemadmodum materia artefacti ex se se caret omni actu artificiali, & nihilominus habet *actus entitativum*, sive existentiam; ita materia prima ex se se non habet *actus formalem*, & *specificum*, quem à forma substantiali accipit; tamen gaudet suo *actu entitativo*, nempe existentia, quæ necessaria est ad *actus formalem* recipiendum. Atqui hinc dispar est ratio de-

materia prima, ac de allatis exemplis. Nam subjectum accidentium ex se se semper capax est recipendi actum accidentalem, & materia artefacti ex se se idonea est ad accipiendo actum artificiale, quippe & subjectum, & materia artefacti supponuntur existere. At materia prima, si ex se se non haberet existentiam, nihil esset, adeoque nec esset capax recipiendi actum substantiale.

Ad Confirmationem. Nego antecedens. Ad probationem, concessu antecedenti, nego consequentiam, & paritatem. Quippe, ut nuper diximus, si materia prima non haberet propriam existentiam, non posset formam recipere. At corpus ex se se vitam non habens, semper capax est vitam accipiendo, quia jam existit. De subsistentia apparet ratio discriminis ex iis, quæ constituimus in quæst. ultima primæ partis Metaphysicæ; quippe subsistentia creatæ est mera negatio communicationis personæ divinæ.

Objicies 2. Si materia prima haberet ex se se propriam existentiam, forma esset primus *actus* materiæ, & non esset primus *actus*. Hoc sapit contradictionem. Igitur &c. Major probatur. Forma esset primus *actus*, ut supponimus; non esset autem primus *actus*, quia existentia, seu *actus entitativus* in materia præcederet formam.

Confirmatur. Philosophus sæpe docet, formam substantialem dare

esse rei. Existentia etiam dicitur ultimus *actus* ipsius rei; ergo in materia debet prius intelligi forma, quam existentia. Igitur &c.

Respondet ex dictis, formam esse primum *actum* materiæ in ordine specifico, & formaliter, non vero in ordine *entitativo*, & existentiali. Unde tollitur omnis contradictionio. Ita etiam forma dat rei esse *specificum*, non vero esse *entitativum*. Existentia autem est ultimus *actus* rei in genere metaphysico: ut suo loco diximus.

Instabis 1. Existentia in materia nullum habet finem. Ergo &c. Probatur antecedens. Existentia ordinatur ad operationem, velut ad finem. Etenim, ut dicitur, esse est propter operari. At qui materia ex se se non est operatrix, unde etiam dicitur *pura potentia*. Igitur &c.

Respondetur. Nego antecedens. Finis enim; cur materia propriam habeat existentiam, is est, ut videlicet materia possit recipere formam: ut diximus. Ordinatur autem materia suæ naturæ ad cœmpositum constituendum, cui per se se convenienti operationes. Ipsa vero materia est *pura potentia subiectiva*, & ex se se non habet esse specificum, non tamen est *pura potentia objectiva*.

Instabis 2. Forma substantialis ita est *actus*, ut nullo modo sit *potentia*. Ergo materia prima ita est *potentia*, ut nullo modo sit *actus*.

Respondetur, in primis falsum esse antecedens, quippe forma substantialis est in potentia ad formas accidentales. Deinde Forma substantialis ita est *actus formalis*, & *specificus*, ut in hoc genere non sit *potentia*: materia autem ita est *pura potentia subjectiva*, & in ordine specifico, ut in hoc ipso non possit habere rationem *actus*. Diversa autem ab his omnibus est notio existentiæ, seu *actus entitativi*, quæ tum formæ, tum materiae potest convenire.

Objicies 3. Materia prima facit *unum per se* cum forma substantiali. Atqui si materia gauderet propria existencia, non faceret *unum per se*. Ergo &c. Minor probatur, Ex duobus entibus in *actu* non fit *unum per se*. Igitur &c.

Respondetur. Nego minorem Ad probationem, distinguo antecedens: ex duobus entibus completis, concedo: incompletis, nego antecedens, & consequentiam. Ex iis, quæ diximus quæst. præced. in expositione Systematis Peripatetici, patet, materiam primam ex se in genere physico specifico non esse quidpiam completum: formam etiam substantialiem ex se ordinari ad materiam, ut compositum constituent. Cum ergo materia ex se se non sit ens in *actu formalis*, & *specifico*, & forma substantialis sit pars incompleta, quæ ad materiam refertur; siccirco ex utraque fit *unum per se*.

Instabis. Ergo plures existentiæ ha-

bentur in quilibet composito, nempe existentia materiæ, existentia formæ, &c. quod absurdum videtur: sicuti absurdum esset plures admittere in eodem composito quantitates.

Respondetur. Concedo consequentiam, & nego id esse absurdum, sicuti in quantitatibus contingat. Quippe, ut diximus, existentia necessaria est in materia, ut hæc recipiat formam. At semel admissa una quantitate in materia, altera in forma, materia, & forma redderentur impenetrabiles, adeoque invicem penetrari non possent ad compositum constitutendum.

Objicies 4. Sicut Deus est *primus actus*, ita materia est *prima potentia*. Atqui Deus, quia est *primus actus*, quamlibet potentialiter, & imperfectionem excludit. Ergo materia, quia est *prima potentia*, excludit omnem perfectionem, & actum. Tum existente uno oppositorum, aliud quoque admittere oportet. Atqui existit *actus purus*, scilicet Deus, excludens omnem potentiam. Ergo extare debet etiam *pura potentia* excludens quemlibet *actum*. Porro hæc non erit, nisi materia prima. Igitur &c.

Respondetur, Deum esse *primum actum* in quocumque genere, quia omnem perfectionem habet identitatem perfectissima: materiam vero esse *primag potentiam* solum in genere *specifico* & *formali*. Neque relatio inter opposita concludit,

uno

uno existente aliud quoque extare debere; alias quia existit Summum Bonum, consequens esset etiam existere Summum Malum: quod sane ridiculum est, & absurdum. Ea igitur relatio veritatem obtinet tantummodo quoad prædicata essentialia. Itaque Deus, qui est *purus actus*, nullam potest recipere perfectionem extrinsecus advenientem; at materia, quæ est *pura potentia in genere specifico*, potest recipere perfectiones à formis substantialibus; cum nullam earum *ex se se habeat*.

Colligite materiam primam esse partem compositi substantialis, & caussam materialem ipsius, adeoque etiam hoc ipso debere eidem attribui propriam existentiam; quia nihil non potest esse pars alterius, nec ulla caussa intelligi potest, nisi concipiatur existens. Animadvertere etiam oportet, materiam primam non esse compositam, sed *simplicem* in ordine physico specifico, quia, *ex se se caret* omni forma specifica: compositam tamen esse ex partibus integrantibus, & in ordine metaphysico: ut in præcedenti quæstione diximus.

Probatur secunda pars nostræ assertionis. Deo possibile est quidquid non sapit contradictionem. Atqui nulla est contradictione, si dicamus, materiam primam simul ac semel recipere duas formas substantiales disparatas. Ergo idipsum est possibile. Minor ex solutione argumentorum apparebit. Deinde

materia prima ex se se indifferens est ad omnes formas. Ergo si quæ esset ratio, cur simul nequeat plures formas recipere, hæc ab ipsis formis oriretur, quatenus una alteram excluderet ab eodem subjecto. Atqui expulsio unius formæ à subjecto, quæ sit per adventum alterius; est effectus secundarius istius formæ advenientis; effectus enim primarius in eo est, ut forma tribuat subjecto perfectionem specificam. Porro Deus impedire potest effectum secundarium formæ; nihil enim obstat. Igitur &c.

Objicies 1. Ut optime docet Scotus in 3. dist. 1. quæst. 2. duæ personalitates, seu subsistentiae nequeunt esse in eadem natura. Ita nec duæ singularitates. Ergo à simili duæ formæ substantialies non possunt simul esse in eadem materia. Consequentia probatur. Ut enim duæ personalitates dependentiam terminant, & communicationem naturæ, ita duæ formæ substantialies capacitatem explent materiæ. Igitur &c.

Respondetur. Nego paritatem, Quippe cum personalitas naturam reddit incommunicabilem, habetur contradictione, si duæ extarent in eadem natura personalitates; hæc enim per unam fieret incommunicabilis, & tamen esset reipsa communicabilis alteri. Idem dicimus de duabus singularitatibus, quia singularitas notione sua naturam reddit; individuum, & alteri inferiori incommunicabilem. At ve-

ro nihil simile occurrit in re nostra, quia forma substantialis tribuit materiae solam physicam perfectionem specificam. Ad probationem consequentiæ, dico capacitatem materiae bifariam considerari debere, vel secundum *intensionem*, quatenus ad unam specificam perfectionem physicam refertur, à qua indeterminate accepta, indifferentia materiae terminari potest; vel secundum *extensionem*, quatenus ad omnes refertur perfectiones physicas specificas, quas recipere potest. Itaque una forma substantialis explet capacitatem *intensivam* materiae, non tamen *extensivam*; sed nec primario excludit alteram specificam perfectionem physicam ab eodem subjecto: sicuti personalitas; ut diximus, ex sui notione præ se fert incomunicabilitatem &c.

Instabis. Illa eadem contradictione, quæ contingere in natura per duplēm personalitatem determinata, eveniret etiam in materia, ubi hæc duas formas simul reciperet. Ergo par ratio habenda est. Minor subsumpta probatur. Materia cum una forma substantiali constituit compōsitus, quod est incomunicabile. Ergo etiam ipsa materia tunc est incomunicabilis. Igitur si alteram haberet formam, eidemque communicaretur, simul esset incomunicabilis, & communicabilis; adeoque omnino eadem haberetur contradictione. Prima consequentia probatur. Personalitas,

seu subsistentia immediate afficeret *totum*, seu compositum, & mediate afficeret partes. Atqui hoc ipso tribueret etiam partibus, nempe materiae, & formæ, effectum suum formalem primarium, nempe incomunicabilitatem. Ergo etiam ipsa materia cum una forma substantiali esset incomunicabilis. Probatur minor. Quantitas, quæ in sententia Scotistarum afficit immediate compositum, & mediate partes, materiam videlicet, & formam, nedum composito, sed etiam partibus tribuit effectum suum formalem primarium impenetrabilitatis. Ergo idem dicendum de personalitate.

Respondeatur. Nego minorem subsumptam. Ad probationem, nego primam consequentiam. Ad hujus probationem, nego minorem. Ad probationem istius, concedo antecedens, nego consequentiam, & paritatem. Ratio discriminis inter quantitatem, & personalitatem, quod ad rem præsentem attinet, in eo est, quia nedum compositum, sed certam partes idoneæ sunt, ut fiant impenetrabiles; ad hoc enim sufficit extensio, quæ & composito, & partibus convenit; quapropter quantitas illis omnibus attribuit suum effectum formalem primarium; at partes compoſitti idoneæ non sunt, ut fiant incomunicabiles, quippe personalitas, seu subsistentia, in Metaphysica diximus, supponit naturam substantialem completam: cujusmodi non sunt

sunt materia, & forma; & ideo istis non attribuit suum effectum formalem primarium incomunicabilitatis.

Objicies 2. Non potest idem effectus simul produci à duabus causis totalibus, & ab illis pendere; ut dicendum erit disp. 5. quæst. 5. Atqui si eadem materia simul recipere plures formas, idem effectus præstaretur à duabus caussis totalibus. Ergo &c. Probatur minor. Perfectio specifica materiæ ab utraque forma haberetur, & eadem materiæ passiva informatio à duplice forma, velut caussa totali præstatur. Ergo &c.

Respondetur. Nego minorem. Ad probationem dico, tunc duas specificas perfectiones formæ attribui à duplice forma substantiali; atque duæ subinde haberentur passivæ informationes materiæ. Duo etiam tunc fierent composita: ut postea declaravimus. Adeoque nunquam idem effectus præstaretur à duabus causis ex toto agentibus. Redit autem hic responsio, quam primæ objectioni adjecimus. Nam passiva informatio materiæ, vel ejusdem capacitas vel intensive, vel extensive spectari potest. Una forma substantialis expletat capacitem materiæ, & passivam ipsius informationem intensive, non tamen extensive; unde & materia potest successive plures formas recipere. Id declaratur exemplo aptitudinis, qua corpus refertur ad locum; hæc enim secundum intensionem

expletur ab uno loco; at secundum extensionem respicit omnia loca, unde & per vices potest corpus esse in omnibus locis.

Objicies 3. Si materia simul posset plures formas recipere, posset etiam recipere infinitas. Neque enim potior est ratio, cur duas accipere valeat, & non omnes. Atqui hoc præ se ferret in materia virtutem, & aptitudinem infinitam. Vis enim aliqua ad unam formam recipiendam requiritur; major ad duas; ac per consequens infinita ad infinitas. Porro hæc infinita virtus in materia repugnat. Igitur &c.

Respondetur. Nego majorem. Cum enim materia sit essentialiter finita, obstat finitas ipsa, & intrinseca limitatio materiæ, ne infinitas simul perfectiones physicas specificas à formis omnibus recipiat. Hinc & caussæ efficientes creatæ possunt divina virtute elevari ad plures effectus procreandos, non tamen ad infinitos, quoniam ipsa caussæ secundæ circumscripção, & limitatio adversatur.

Instabis. Corpus, quod in pluribus locis constitui à Deo potest, etiam in locis infinitis potest collocari. Idem ergo de materia dicendum. Deinde Natura Divina, quæ potest communicari tribus personalitatibus, potest etiam communicari infinitis personalitatibus, si istæ essent possibles. Ergo si materia potest communicari pluribus formis, etiam infinitis communicari posset &c.

Respondetur, latum esse discrimen. Et quoad primum. Corpus mere passive se habet, & nullam à loco intrinsecam recipi perfectionem. Quoad secundum. Natura Divina propter suam summam fecunditatem communicatur tribus Divinis personalitatibus infinito modo, & ipsa pollet infinita perfectione, & per identitatem illis communicatur. Longe aliter dicendum esse de materia prima, omnibus perspicuum est.

Objicies 4. Si eadem materia duas simul reciperet formas substantiales, compositum esset unum, & non esset unum. Hoc præ se fert contradictionem. Igitur &c. Major probatur. Compositum esset unum, quia una esset materia : ea autem sunt unum numero, quorum materia est una, ut ait Aristoteles lib. 5. Met. At non esset unum, quia duæ haberentur formæ : forma autem dat esse specificum, & unum ab alio distinguit.

Respondetur, in hypothesi plura numero composita haberi, etsi una esset materia, quia duæ perfectiones specificæ illi tribuerentur. Hinc distincte compositis illis convenienter singularitates: de quibus loquitur Philosophus loco citato: ut diximus in 1. parte Metaphysicæ, disp. 3. q. 4.

Instabis. Duæ naturæ cum una personalitate efficiunt unum concretum, nempe unam personam. Ergo duæ formæ cum una materia constituerent unum compositum.

Consequentia probatur. Ad multiplicationem concreti substantialis requiritur multiplicatio naturalæ, & personalitatis: ut docuimus in prima parte Logicæ, sed. 1. cap. 1. Ergo ad multiplicationem compositi substantialis requiritur multiplicatio formæ, & materiæ.

Respondetur. Nego paritatem. Cum enim concretum hoc, persona præ se ferat naturam incomunicabilem, & cum, ut diximus in loco citato Logicæ, tam natura, quare suppositum idonea sint terminare dependentiam adjectivi numeralis, *unum*, *duo*, *tria*, &c. ideo si una sit ratio incomunicabilitatis, nempe personalitas, & unus extat ultimus terminus dependentiam sistens adjectivi numeralis, videlicet unum suppositum, subinde unicū etiam est concretum. At cum quælibet forma, in hypothesinostra, uniatur immediate ipsimet materia, (quippe formæ non sunt invicem subordinatae, sed disparatae, ut supponimus ex statu questionis) & cum materia faciat *unum per se*; hinc licet unica sit materia, plura tamen sunt composita propter formarum pluralitatem.

Objicies 5. Licet expulsio unius formæ à subjecto per alterius formæ adventum, puta expulsio formæ ligni per formam ignis, sit effectus tantummodo secundarius istius formæ ignis advenientis; tamen Deus non potest impedire hunc effectum secundarium. Ergo

go nec divina virtute potest materia prima simul ac semel recipere plures formas substantiales. Antecedens probatur multiplici partite. Licet amor non nisi secundario aduersetur odio; tamen nec divina virtute simul esse possunt relate ad idem objectum. Idem valet de assensu, & dissensu; de sanitate, & ægritudine; de pulchritudine, & deformitate. Ita quoque licet essentia formæ ligni secundario dicat exclusionem essentiæ lapidis; tamen nec divina virtute essentia ligni potest esse essentia lapidis. Igitur idem dicendum &c.

Respondetur. Nego antecedens. Ad probationem, dico latum esse discrimen. Nulla enim est essentia-lis connexio inter formam ignis, & expulsionem formæ ligni, ut patet, quia una destrui potest, quin altera succedat. At vero amor, & odium æquivalent contradictoriis, cum per amorem voluntas in objectum feratur, & per odium retrahat se ab illo. Idem contingit in assensu, & dissensu; illo enim propositio approbatur, isto rejicitur. Sanitas quoque proportionem dicit, seu æquilibrium inter solidas, & fluidas partes corporis animalis; ægitudo parentiam præ se fert istius æquilibrii: quemadmodum & pulchritudo sita est in convenienti partium proportione, deformitas vero est proportionis hujus parentia. Contradictoriis igitur æquivalent; & ideo nec divina virtute possunt esse simul; sicuti nec Deus

efficere potest; ut in eodem sub-jecto existat forma, & ipsius pri-vatio in illo habeatur. Ita etiam essentia formæ ligni notione sua es-se lapidis excludit. Nihil simile oc-currat in re nostra.

Atque hinc dubium aliud bre-viter dissolvimus, utrum nempe formæ accidentales, seu qualitates contrariae, puta calor, & frigus, possint simul esse in eodem subje-cto? Cum autem qualitates pluri-bus constent gradibus, siccirco spe-ctari possunt vel secundum omnem suam intensionem, quæ sit, ex. gr. octo graduum, & omne subjecti capacitatem repleat; vel secundum gradus numero minores, sive, ut ajunt, in gradibus remissis. Hoc posteriore sensu qualitates contra-rias simul esse posse naturaliter in eodem subjecto, compertum fit, dum aqua frigida paulatim incal-sescit; destruitur enim gradatim frigus, adeoque calor, & frigus in eadem aqua secundum gradus re-missos existunt, invicemque in se se agunt; unde aqua tepida dicitur. Nec oportet medium quandam no-vam qualitatem in iis commini-ci. At si qualitates contrariae om-nem suam intensionem habeant, sim-mul esse nequeunt naturaliter; quip-pe tunc una earum totam explet subjecti capacitatem naturalem, ut supponimus; atque adeo alteram sibi contrariam ab eodem subjecto excludit. Cæterum divina virtute hac expulsio impediri potest, cum sit effectus secundarius, quemad-

modum de formis substantialibus diximus; & qualitates contrariæ etiam in gradibus intensis queunt esse simul, Deo ita volente: dummodo tamen non equia leant contradictioniis, uti sunt ea, quæ superius, in objectione enumeravimus.

Ex iis quæ supra diximus, inferatur, positis in eadem materia forma ligni, & forma lapidis non valere hanc prædicationem: *Lignum est lapis*: cum enim hæ formæ substanciales sint, & substantive dicantur, ea prædicatio significaret, lignum essentialiter esse lapidem: quod absurdum est. At cum in lacte, v. gr. extent albedo, & dulcedo rite dicimus: *Album est dulce*, quia formæ istæ accidentales dicuntur adjective, & relate ad subjectum, quod connotant; unde istius prædicationis sensus est: Subjectum albedine affectum habet etiam dulcedinem. Dum autem fide docente dicimus in Christo Deum esse hominem, prædicatio hæc naturam divinam, & naturam humanam significat relate ad personalitatem, quæ cum una sit, verum est eamdem personam simul esse Deum, & hominem in Christo.

Potentia illa, qua materia recipit formas, est in ipsa naturalis, quia suapte natura easdem respicit, ut sui perfectivas in ordine physico; quia vero per naturæ vires materia non potest plures simul formas disparatas habere iccirco relate ad agens supernaturæ, ncm-

pe ad Deum, qui virtute, & voluntate sua plures simul formas in materia constitueret, ea materia potentia appellatur obedientialis, quantum divinæ subest voluntati. Respicit autem materia omnes, easdemque omnes rite dicitur appetere, omne enim imperfectum appetit perfectionem suam. Omnes porro respicit, non quod omnes simul habere queat; sed quomodo potentia intellectiva finita respicit omne intelligibile. Quod diximus; materiam appetere formas, derident Recentiores Philosophi, quoniam, inquit, appetitus de re inanimata dici non potest, quippe proprius est agentium per cognitionem. At eodem jure allegorias omnes, & metaphoras rejicere oportet. Nos vero arbitramur, appetitum translato vocabulo, etiam de re inanimata dici posse. Hinc Sanctus Augustinus, l. 11. de Civitate Dei c. 28. optime ajebat: *Si arbores essemus, nihil quidem sentiente motu amare possemus; verum tamen id quasi appetere videremur, quo feracius essemus, uberiorusque fructuosa. Si essemus lapides, aut fluctus, aut ventus, aut flamma, vel quid ejusmodi, sine ullo quidem sensu, atque vita, non tamen nobis deesset quasi quidam nostrorum locorum, atque ordinis appetitus. Nam, veluti amores corporum, momenta sunt ponderum, sive deorsum gravitate, sive sursum levitate nitantur. Ita enim corpus pondere, sicut animus amore fertur, quocumque fertur.*

De forma idem suo modo affirmamus , quod de Materia diximus , eamdem nempe formam divina virtute perficere simul posse plures numero materias . Quod ipsum eodem argumento concludimus : quemadmodum ex iis , quæ de materia docuimus , facile est ea dissolvere objecta , quæ ad rem præsentem afferri possunt . Animadvertisimus autem , nos hic non loqui de productione formæ , quasi vero eadem forma simul & semel educi queat à pluribus numero materiis , nam id repugnat alioquin eadem res bis simul produceretur : quod absurdum est . Quia eadem ratione Scotus , in 3. dist. 1. qu. 2. §. ad argumenta , negat idem accidens posse esse in duobus subjectis , nempe ita ut ab utroque dependeat ; ibi enim aperte loquitur de dependentia accidentis à subjecto . Dum autem supra idem Doctor ait , formam substantialiem , quæ perficeret substantialiter plura supposita , fore actualiter illimitatam ; non absolute id asserit , sed conditionate . Intendit enim ibidem probare , naturam creatam simul assumi non posse à tribus Divinis Personis , alioquin esset infinita , quemadmodum ex hoc ipso Natura Divina est infinita . Et quia dispar ratio videbatur , nam hæc substantialiter illis communicatur , natura vero creata solum ex accidenti iisdem Personis uniretur ; Subtilis Doctor idoneum non esse discriminem ait : idem quippe dicen-

dum de substantiali , & de accidentalis illa unione ; si enim forma substantialis perficiens plura supposita esset infinita , etiam accidens eadem supposita perficiens esset infinitum . Sicut (inquit) forma substantialis , quæ substantialiter perficeret plura supposita : esset actualiter illimitata : ita accidens , quod accidentaliter perficere eadem supposita , esset illimitatum .

Ad hujusce Quæstionis complementum addimus , materiam primam posse divina virtute existere sine omni forma substantiali . Cum enim propriam habeat essentiam , & existentiam , & in se se sit quidpiam absolutum , atque prius forma : ut diximus , consequens est , ut optime concludit Scotus ; in 2. d. 12. q. 2. eandem posse divina virtute existere sine forma . Idem de forma substantiali tenemus , cum & ipsa sit aliquod absolutum , & propria gaudeat essentia , & existentia . Quod autem materia sit subjectum formæ , & pars compositi , forma vero perfectio materiæ , & altera compositi pars ; hoc indicat ipsarum aptitudinem , non tamen necessario determinat , eas semper tales esse debere etiam re ipsa . Quemadmodum igitur corpus existere potest sine loco extrinseco , hoc est sine superficie externa ambiente ; ita materia &c . Naturaliter tamen & corpus in loco est , & materia cum forma , adeo ut sine ista nequeat existere per naturæ vires . Ordo enim præfixus

à Deo , ut auctore naturæ , non potest inverti ab ullo agente naturali : ordo autem ille expostulat perfectionem , & integratatem Universi , quæ ex elementis , mixtis , viventibus , & ex specierum varietate resultat ; materia porro ex se se nihil horum est ; atque adeo naturaliter debet esse sub aliqua forma substantiali . Forma quoque naturaliter existere non potest sine materia , à qua pendet in fieri , & conservari , ex sui naturali conditione .

DISPUTATIO SECUNDA.

De Elementis.

QUÆSTIO PRIMA.

Utrum Elementa obnoxia sint generationi , & corruptioni?

Elementum ab Aristotele , lib. 3. de Cælo , t. 3 r. definitur illud corporum , in quod alia corpora dividuntur , in quibus inest potentia , aut actus ipsum est indivisible in diversa specie . Nomen itaque elementi non naturæ est , sed officii ; quatenus nempe ea , quæ elementa appellantur ad mixtorum corporum generationem concurrunt ; unde & principia secundaria corporum appellantur : ipsa vero elementa nequaquam dissolubilia sunt in plures rerum species ; in quo à mixtis corporibus secernuntur , quoniam hæc sæpe abeunt in plures species ut lignum in ignem ,

& terram videtur resolvi .

Porro non unicum elementum constitui debere , constat ex iis , quæ adversus Atomistas , diximus . Nec enim mixtio exquisita , vel alteratio ex rebus ejusdem naturali haberi potest , sed contrarium conflictu opus est . Unde liquores unusmodi nec fermentantur invicem , nec exquisite permiscentur . Probabilius autem censemus quatuor admittenda esse elementa , Ignem , Aerem , Aquam , & Terram , ut docet Aristoteles lib. 2. de Generatione , & Corruptione , c. 4. Sane tot rite dicuntur esse elementa , quot modis qualitates omnium primæ , sive Calor , Frigus , Humiditas , & Siccitas , que sunt invicem disponi , ac combinari ; Primo enim simplici corpori , cuiusmodi habetur elementum , prima , & simplex affectio attribuenda est . Atqui primæ illæ affectiones quatuor modis disponi queunt , & combinari . Sic in Igne Calor cum Siccitatem componitur , Calor cum Humiditate in Aere , Frigus in Aqua cum Humiditate , & in Terra demum Frigus cum Siccitatem . Igitur probabili satis ratione quatuor constituuntur elementa . Animadvertis autem singulis elementis , ut diximus , duas convenire qualitates , ita ut una sit in su. amo , altera citra excellentiam , quod erit postea declarandum . Quemadmodum & in Igne distinguere oportet formam , seu naturam ipsius à sulphureis , & nitrosis parti-

ticulis, & à materia inflammabili; unde Cartesiani perperam excludunt Ignem à numero clementorum.

Quæ adspectamus Elementa, non sunt pura, sed variis permixta salium, succorum, vaporum, exhalationum particulis, quarum infinita pene est multitudo, rerum omnium sensibilium meatus pervadens. Inquirimus igitur, utrum hæc elementa visibilia, & sensibilia generationi, & corruptioni sint obnoxia, quemadmodum alia corpora: quæcumque tandem habentur sententia de substantiali, seu essentiali forma, sive absoluta, siue respectiva. Id enim ad rem præsentem non confert, quippe contra Recentiores disserimus, qui mixta corpora essentialiter transmutari fatentur, & elementa ita se habere inficiantur, sed contendent tantummodo partes ipsorum hæc illac dispergi. Non est autem nobis quæstio de elementis quibusdam invisibilibus, & insensibilibus, nam ista pro arbitrio conficta sunt: ut in præc. disp. qu. 1. adversus elementaris Systematis Restauratores.

Dicimus, elementa esse obnoxia generationi, & corruptioni. Assertionem trædit Scotus in 2. d. 19. & in 4. dist. 11. quæst. 7. & dist. 44. quæst. 1.

Probatur 1. Ratione naturali speciarim contra Recentiores. Ubi totalis contingent affectionum sensibilium transmutatio, fatentur Re-

centiores, corruptionem rei præexistens haberi, & novam alterius generationem fieri. Atqui experientia ostendi, contingere in clementis totalem affectionum sensibilium transmutationem. Ergo in elementis nova fit generatio, & corruptio; adeoque &c. Major certa est. Ita enim de mixtis corporibus. Recentiores philosophantur: ut in præced. disp. quæst. 1. vidimus. Minor probatur. Dum ignitus carbo, particulis nempe igneis referitus, in aquam immergitur, talis, ac tanta partium ignis mutatio conspicitur, ut nihil supersit præcedentis sensibilis affectionis. Dum lignum aliquod comburitur, sensibus ipsis patet totalis affectionum sensibilium transmutatio, & nova emergit combinatio partium, quæ ignis speciem præ se fert. Igitur &c. Sane incombustione ligni tam, ac tantam flammarum conspicimus, quam in ligno prius extitisse, nihil est quod suadet, immo fidem omnem superat: quam itidem hac illac primo dispersam, congregari, & in unum colligi, nulla ostendit ratio. Ecquis vero sibi suadere poterit, per exiguum aquæ portionem demissam in ardentiissimi ignis fornacem, nullatenus affectionum omnium complexione transmutari, quando tanta ignis illius vis apparet, quæ vel duriorum corporum affectiones omnes disrumpat? Si ignis elementum tanto impetu, tanta vi absumit ligna, non poterit vim suam exercere in aeris particulani ali-

aliquam, in guttulam aquæ? Quemadmodum ergo in mixtis corporibus generationem, & corruptionem admittunt Philosophi Recentiores, ita fateantur oportet, elementa ipsa obnoxia esse generacioni, & corruptioni: in ipsorum etiam sententia.

Hinc ex nostra assertione facilis ratio redditur plurimum experimentorum: quod non adeo feliciter exequi possunt ii, qui elementa incorruptibilia, & ingenerabilia constituant.

Primo, quando oleum in lucerna comburitur, successive consumuntur tot partes olei, ut conficiant plures millionis partium ignis intra unicam horam: id observante P. Lana. Porro si tot ignis particulae latitassent antea in oleo, aut in instanti totum oleum absumeretur, aut oleum ipsum impedire non potuisse actionem ignis, atque adeo vel sola agitatione suarum partium debuisse accendi.

Secundo, spiritus vini totus in flamمام abit; adeoque juxta sententiam illorum, quos hic refellimus totus spiritus vini debuisse nil aliud esse, quam pura flamma. At si hoc verum est, ecquidnam impedimento fuit, ne flamma illa ex se se, aut saltem ex agitatione violenta suarum partium accendereatur, caloremve, an lucem procrearet? Quamquam enim particulæ quædam heterogeneæ dicantur latitare in ea flamma adhuc consipiata, tamen fateri oportet, igneas par-

ticularas & mole, & vi prædominari.

Tertio, repentina ignis extincio, & lucis omnimoda privatio, quæ contingit per violentam exsufflationem, profecto ostendit, ignem non tantum dispergi, sed destrui. Flamma enim ipsa violenter avisa à combustibili materia pabulo deficiente perit; atque huc illuc dispersæ ignitæ aliae crassiores particulae, contraria aeris actione, si non statim, tamen tractu temporis essentialiter transmutantur, ut in cæteris mixtis corporibus contingit.

Probat. 2. Ex S. Auctoritate. Aqua in vinum convertitur. Ergo elementa sunt corruptioni obnoxia, atque adeo etiam generationi. Assumptum ostenditur auctoritate Ecclesiæ; seu ratione illa ex Ecclesiastico ritu, deprompta, qua utuntur Concilium Florentinum in Decreto Unionis Armenorum, & Catechismus Romanus. Jubet Ecclesia modicam satis aquam vino consecrando infundi debere: ut scilicet facile queat brevi tempore in vinum converti, atque postea per consecrationem convertatur in Sanguinem Christi Domini. Quod expressius habetur in *Sacerdotali Romano*, plurimum Summorum Pontificum auctoritate approbato: atque juxta Concilii Tridentini sanctiones aucto, & emendato. In eo enim sic legimus, tract. ro. part. i. de Sacramento Eucharistie, cap. 2. *Aqua vero*, quæ in calice vino miscetur, debet esse in modica quantitate.

quantitate, quia eam in vinum converti oportet. Dicendum igitur est, aquam converti in vinum primo, tum in Sanguinem: non vero immediate in Sanguinem; alioquin enim supervacanea foret omnino tanta Ecclesiæ sollicitudo circa modicam ipsius aquæ quantitatem. Hanc sententiam, veluti probabiliorem, esse amplectendam declaravit Innocent. III. in capite *Cum Marthæ*, de Celebratione Missarum.

Idipsum suadet Eucharistici Sacramenti notio. Nam Christus Dominus ejusmodi Sacramentum instituit in cibo, & potu per se se aptis ad nutriendum, alendumque corpus, ut per effectum, quem cibus, & potus præstant corpori, significaretur effectus ille spiritualis, quem Sacramentum istud exhibit in anima suscipientis: uti docet Florentina Synodus, communisque Patrum sententia tradit. Atqui vinum nutritre valet corpus, quemadmodum ex instituto docet Galenus lib. 3. de Alimentariis facultatibus c. 40. minime vero aqua. Quamvis enim hæc vehiculum esse queat, quo alimenti partes in ipsum corpus dividantur, ac dispergantur; per se se tamen, etiam cibo commixta, nutritre non potest: ut idem Galenus docet lib. 4. de Usu partium, c. 5. Ergo aqua, nisi immediate convertatur in vinum, nec per se, neque ex accidenti, potest esse materia Sacramenti Eucharistici. Hinc Canones, & Concilia, præsertim Florentinum, constituunt, materiam

Tom. II.

consecrationis calicis esse solum vi-
num de vite; & aquam illi admis-
eri, non velut materiam, sed ob my-
sticam significationem aquæ à Chri-
sti latere olim egressæ, seu unionis
Ecclesiæ cum Christo. Igitur pro-
babili satis ratione concludimus, a-
quam in vinum transmutari; atque
adeo elementa obnoxia esse corrup-
tioni.

Respondent, prædictas Eccle-
siasticas auctoritates lata solum sig-
nificatione esse accipiendas, quatenus
cum tantillum aquæ infusum
est vino, istud prædominatur, &
amplius est; unde totum illud con-
flatum appellatur vinum. Ita & In-
noc. III. juxta communem aestima-
tionem loquitur, & humano locutionis
modulo accomodat se, quo,
cum aquæ particulæ per vinum
dispersæ discerni amplius non pos-
sint, totus potus dicitur vinum vi-
tis. Quid quod Pontifex ait: *Verum
inter opiniones prædictas illa proba-
bilius judicatur, que asserit aquam
cum vino in sanguinem transmuta-
ri?* Quibus verbis immediatam con-
versionem aquæ in Sanguinem vide-
tur approbare. Denique addunt, par-
ticulas aquæ ex commixtione cum
vino esse partes vini usualis, seu
communis, quod est vinum aqua di-
lutum: hoc autem est materia apta
consecrationi, nam ejusmodi vinum
usuale creditur Christus consecrassæ.

Contra i. Ut constat ex actis Flo-
rentini Concilii, Patres suo illo de-
creto emendare voluerunt senten-
tiæ Concilii Provinc. Tiburiensis,

I quod

quod c. 19. statuerat, tertiam partem aquæ admiscendam esse vino consecrando. Jam si vulgarem sensum, & loquendi usum, quo aqua permixta vino majori dicitur unum constituere cum vino, Patres illi intelligebant, nihil plane fuisset, quo Concilii Tiburiensis reprobarent sententiam, cum ubi tantummodo tercia inest aquæ pars, illud consueverint homines appellare vinum commune, seu usuale. E contra laudati Patres tantillum aquæ infundi debere tradiderunt: non alia profecto ex caussa, nisi quia judicabant, aquam convertendam esse in vinum; id autem haberi poterat in præexigua aquæ portione, non in tercia parte. Id ipsum apparet ex verbis, quibus violentia infertur; nam ea præsertim ætate, aquam in vinum converti, significabat veram, & realem conversionem, non moralē solum.

Contra 2. Innoc. III. nihil profecto expresserat, quo immediatam aquæ conversionem in Christi Sanguinem indicaret. Ergo hanc approbare non potuit; sed eam sententiam probabiliorēm judicavit, quæ aperte adstruebat conversionem mediata m. Hinc idem Pontifex eamdem opinionem docet, l. 4. Myster. Missæ. c. 30. hanc adjiciens rationem: *Quis enim ambigat, cum multo vino modicum infunditur aqua?* Verissime autem ait, aquam cum vino in Sanguinem transmutari, quia nempe non permanet, nec convertitur in phlegma: ut fere-

bant aliae opinione à Pontifice ibidem relatæ. Neque Innocentius vulgari hominum sensu, & moraliter loquendi modo nomen conversio- nis accepit. Etenim physice rem spectavit, unde addit: *Licet Physici contrarium asseruerint, quia quam in vino per artificium ajunt, posse separari.*

Contra 3. *Vinum aqua mixtum*, ut notat Plutarchus; etiam si major sit aqua infusa, quam vinum; vinum tamen vocatur. Ergo si materia consecrationis est vinum commune, quod nempe vinum appellatur ex vulgi æstimatione; consequens esset etiam vinum, cui major aquæ pars esset immixta, fore materiam aptam consecrationis. Atqui dum aqua superat quantitatem vini, consecratio non perficitur: ut docent Florentinum Concilium Sacri Canones, Sancti Patres, & Ecclesiæ Doctorum sensus. Igitur &c.

Quemadmodum ergo, ubi in hostia admixtæ essent particulæ diversæ à tritico, istæ non transubstantientur in Corpus Christi Domini, ita de aqua dicendum, si permaneat secundum suam substantiale formam. Et cum ista aquæ commixtio, non ex divina institutione, sed ex Ecclesiæ præcepto facienda sit, non potest aqua esse materia apta consecrationi, nisi in vinum ipsum convertatur. Quamvis autem credibile sit, Christum consuevisse bibere vinum satis limphatum, tamen fas est dicere, in ista Eucharistici Sacramenti insti-

tutione vel merum vinum adhibuisse, vel dicam satis aquam apposuisse, eaque temporis proportione, ut in vinum posset primo converti. Non enim Christus aquam vino consecrando immiscuit, temperantiae causa, sed solummodo ad mysticam significationem.

Objic. 1. Experientia compertrum est, aquam vino immixtam, ab eodem rursus extrahi. Nam si spongia olea imbuta obturetur orificium vasis pleni vino diluto, & vas ipsum invertatur, per spongiam tunc aqua pura effluit. Ita etiam segregatur aqua à vino, cui erat immixta, si vas compactum sit ex ligno hederæ. Ita & quando linteum succo Menthæ imbutum immittitur in vinum aqua dilutum, linteum ipsum ad se trahi aquam. Hinc in Gallia Cisalpina, ubi vinum aqua diluere consueverunt, hyemis tempore frigidissimo quidam globuli glaciei in vino reperiuntur, qui non aliud sunt, nisi ipsa aqua jam antea vino immixta, ac tunc congelata: unde aliquando contigit post hujus aquæ congelationem in dolio vini, auriri vinum præstantius. Sed celebre est præ aliis experimentum Maignani, quo comperit, aquam vinogeneroso immixtam, cum multis diebus vas sub dio exposuisset hyemis tempore, eamdem semper mansisse, ut à vino postmodum separaretur.

Confirmatur 1. Ovum in vino aqua mixto immersum demergitur, in puro supernaturat. Quod profecto mi-

nime eveniret, si aqua ipsa in vinum converteretur. Si vino immisceatur aqua maris, illud diutius conservatur; atque adeo aqua in vino permanet, cuius conservationem fovet.

Confirmatur 2. Statim ac aqua vino immixta est, profecto non convertitur. Ergo nec postquam multo tempore in vino extat. Quippe eadem semper appetet in vino mutatio.

Responderetur, hisce experimentis ostendi, non semper aquam in vinum transmutari. Primo quidem aqua vino immixta non convertitur statim post immixtionem. Secundo non convertitur, ubi aqua sit in magna quantitate. Tertio, quando vi externi frigoris ipsæ aquæ particulae durantur, & motus partium vini imminuitur: aliisve etiam de caussis. Hinc tunc facile erit, aquam rursus à vino separare. Conversioni enim obsistit vel temporis brevitas, vel maxima aquæ portio, vel aeris frigiditas. Oportet namque actionem unius in alterum tempore exerceri; oportet agentis vim longe esse superiorem; oportet vini partes motu suo in aquæ particulas operari. Immo vero crassiores aquæ partes difficiliter convertuntur: maxime si vinum non sit adeo generosum, nec spirituosis particulis refertum.

Quamquam ut lacti immixtum est Serum, ut sanguini Plegma permixtum est, ita & vinum continet in se se subtiliorem humorem, ab ipsa aqua diversum, quo & vini flui-

ditas adjuvatur, & motus partium vini fovetur. At cum humor iste non nihil accedat aquæ, siccirco facile cum aqua ipsa confunditur: & dum ille separatur, aquam extrahi visum est. Inde igitur possumus al-lato Maignani experimento rationem reddere, quod & frigidissimus externus aer actionem vini cohue-rit, & in ipsa aquæ à vino segregatiōne humor ille simul cum aqua extractus, eamdem aquæ quantitatē exhibuerit, & aquæ immixtus speciem aquæ præ se tulerit.

Si autem quod de Ovo dicitur, verū est, primo id evenire putandum est: cum maxima aquæ copia vino affusa conversioni locum non fecerit; secundo quod spirituosæ vi-ni particulae ob actionem in aquam ipsam dissipatae fuerint, & evola-verint, unde vinum debilius reddi-tur, & ea immutatio habetur. At vero aqua marina propter succos terrestres, salinos, & crassiores, corrup-tioni magis obsistit, atque adeo difficultius transmutatur, & minor illius pars in vinum convertitur, ac subinde vini foveat conservationem.

Objicies 2. Si una aquæ guttula in vinum abit, cur non item altera, aliæque deinceps plurimæ? adeo ut vini quantitas per aquæ affusionem augeatur, nec tamen vini vis debilitetur: quemadmodum ubi lignum igni applicatur, & in ignem ipsum convertitur, nulla in ignis ardore accidit imminutio, immo illius vi-res augentur. At experientia edocet nos, ex qualibet etiam minima a-

quæ infusione vinum debilius red-di. Dicendum est igitur, vinum non convertere in se se, nec transmutare aquam. Natura quippe nul-li tribuit virtutem activam, ex qua detrimentum agenti oriatur, cum finis activæ potentiae sit ipsius agen-tis perfectio, quemadmodum in vi-vantium nutritione compertum est.

Confirmatur. Vinum nihil ha-bet, unde queat in aquam opera-ri, eamdemque transmutare; hinc & in eodem vino uva intacta per-manet, oleum itidem, aut paleæ, aliave corpora. Quod si aqua con-vertatur in vinum, densior utique evaderet, quia vinum densius est; adeoque minorem occuparet locum: quod experientiæ adversatur. Tum in vino experimur aquæ affusæ af-fectiones, colorem, odorem, saporem: ergo semper in illo aqua ipsa permanet. Nec enim queunt istæ af-fectiones ab aquæ substantia in vi-num ipsum permeare.

Respondeatur, omne agens physi-cum agendo debilius fieri, ut ani-madvertisit Doctor in 4. d. 19. & ex-perientia manifestat in viventibus. Igitur vinum, quo plus aquæ con-vertit, eo debilius evadit, quia vi-num actione sua subtiliores, acti-vioresque spiritus amittit, quibus deperditis non potest pristinum statum reparare, & activa virtus illius minuitur. E contra ignis activas alias acquirit partes per ligni combus-tionem. Hinc ergo depromitur ra-tio, cur vinum non semper queat successive unam, & alteram aquæ par-

partem transmutare. Ita & viventia nutritione novas acquirunt spirituosas particulas: cum vinum partium suarum agitatione, & intestino motu subtiliores amittat spiritus.

Operatur autem vinum in aquam propria substantiali forma, tum & suis affectionibus, quibus aquam alterari indubium est. Nec ranta est diversitas raritatis in vino, & aqua, ut notabilis, & sensibilis variatio densitatis habeatur, quando pars aliqua aquæ in yinum transmutatur: præsertim cum sepe aqua, vel ob nimiam quantitatem suam, vel ob vini imperfectionem, permaneat in vini incorrupta; unde & ab istis crassioribus aquæ partibus oriri possunt accidentia illa, quæ post aquæ affusionem in vino permanent.

Objic. 3. Aqua tenacissimæ est naturæ, adeo ut igni etiam resistat. Nam si aquam conjicias in carentem ollam ferream, & vapores alembico excipias, totam aquæ quantitatem omnino integrum recipies. Ergo aqua transmutari non potest; atque potiori ratione non poterit in vinum converti. Secundo aquei vapores aeris immixti non corrumpuntur, cum tamen subtilitate sua nequeant resistere actioni ipsius aeris; sed rursus collecti, densatique in terram decidunt, ut prius erant. Tertio Rohaultius, libr. 2. part. 3. cap. 31. de Aqua, refert, se lagenam vitream longo collo instructam, quam Chymici

Matratum vocant, aere plenam, & hermetice sigillatam, intra dolium aqua plenum in crypta quadam profundissima per tres annos reliquisse: & nunquam aerem illum in aquam densatum, vel transmutatum vidisse. Kircherus in Museo suo Romano phialam oblongo collo instructam, & aqua limpida semiplenam, ante annos octoginta à Clavio insigni Mathematico sigillatam asservabat, quin quidquam aquæ in aerem transmigraverit, aut vicissim aqua enim semper in eadem altitudine permanebat. Ita etiam terra, aqua, & aer in vitta ampulla servantur diutius incorrupti, & licet permisceantur invicem, restituunt tamen se ad proprium locum pro sua gravitatis ratione. Quarto aer, etsi maxime compressus, ut in sclopeto pneumatico (de quo dicendum erit) numquam in aquam concreserit. Aquæ ab aere expurgata nihil postea aeris emitit, atque adeo aqua non convertitur in aerem. Quinto quantumvis aqua terram diluas, lutum quidem efficies: neutra tamen in alteram facesset. Accensi carbones multo temporis spatio sub cineribus delitescunt, & conservantur. Immo vero ignis ipse non est generabilis, nam quando primum sensibus apparet, tunc congregantur ignis particulae antea dispersæ; in calce enim viva, dum aqua effunditur, produnt se igniculi violenta tumultuatione, & incalescentia, unde S. Augustinus, lib.

lib. 21. de Civitate Dei , c. 4. dicebat : *Velut expirante ergo illa gleba (calcis) discedens ignis , qui latebat , apparet.* Experimentis adeo istis contendunt Recentiores demonstrare , sensibilia elementa obnoxio minime esse generationi , & corruptioni.

Respondetur , hisce omnibus experientiis probari quidem , non qualemcumque elementorum mixtionem satis esse , ut eadem transmutentur , nec facili negotio , aut brevi tempore conversionem elementorum perfici . Corrumpi autem elementa diximus , quando in ipsis contingit totalis affectionum sensibilium transmutatio , quæ in allatis experimentis non apparet ; immo nec in illis habetur exquisita particularum transpositio , divisio , ac dispersio , quam posse elementis contingere fatentur Recentiores.

Ad primum itaque dicimus , verum non esse , totam omnino aquæ quantitatem in alembico recipi , quin ulla pars deperdatur : nam & ipsi Recentiores consentiunt , ignis ope exquisitam adeo fieri aquæ rarefactionem , ut plerique insensibiles vapores è poris alembici effugiant . Attamen major aquæ pars in alembico recipitur , quoniam brevissimo illo applicationis tempore non potuit fieri uberior aquæ transmutatio , sed aqua statim in vapores resoluta est , & sursum elevata ignis actionem effugit .

Ad secundum . Vapores aquæ sur-

sum elevati per aerem non corrupuntur penitus eadem illa ratione , qua ex sententia etiam Recentiorum non ita disperguntur ; nec discinduntur invicem , ut iterum colligi , & densari non possint . Vis enim illa , qua sursum tolluatur , tum continua variarum partium aeris circa illos successio , in caussa sunt , cur permaneant ; quamquam multas illorum particulas ita invicem discindi , ut etiam postea transmutentur , pro arbitrio Recentiores inficiabuntur . Ergo vaporum permanentia non ex ipsorum incorruptibilitate caussam habet , sed ex motu , quo sursum aguntur , & ambientis aeris vim effugiunt , ut subinde invicem collecti aeri resistant ; tum ex ipsorum raritate , qua sit , ut aer haec illac agitato locum permeandi faciant : figura etiam aquæ in vaporum conservationem confert , cum aer è contra non sit adeo tenax propriæ figuræ .

Ad tertium . Ad elementorum transmutationem , quemadmodum ex Recentiorum sententia ad eorumdem dissipationem , necessarius est motus , quo partium textura dissolvatur , ut exinde elementum illud , quod destrui debet , vel dissipari , reddatur debilius ad resistendum . Eiusmodi porro motus in allatis experimentis minime contingit . Nam si motus ille extaret , vel in ipsa Recentiorum opinione , talis actio , & reactio saltem haberetur , qua dissiparentur sensibi-

liter partes unius, vel alterius elementi, unde ad sensum augeretur, vel decresceret ulterutrum illorum. Quamquam poros vitri pertranseat continuo ætherca saltem substantia, quæ successive alia est, & alia; unde nec corrumpi potuit ab aqua: quæ immota manebat in eodem vitro. Sed & ab ipsa lagena vitrea impeditebatur aqua, ne in aerem ageret eo in casu, de quo loquitur Rohaultius.

Ad quartum. Ut aer in aquam transmutari queat, non sufficit aeris compressio, & addensatio. Nam & in mixtis ejusmodi affectio corruptionem non parit. Quare nihil proficiunt experimenta scelopeti pneumatici. Sed nec aerem in aquam converti, ex eo probamus, quod aqua à se bullas aeris emitat. Fatemur quippe, multas aeris etiam crassioris particulas intra partes aquæ penetrare, & contineri: quas aeris particulas ubi excusseris, non amplius ad sensum appareret segregatio aeris ab aqua; etsi semper ætherea subtilissima substantia aquam ipsam pervadat, tum ex ea egrediatur.

Ad quintum. Jam diximus, non quamlibet mixtionem idoneam esse corruptioni; nec enim omnis mixtio texturam corporum penitus dissolvere valet. Cineres non sunt terra; atamen servare dicuntur carbones accensos, quoniam præpediunt actionem aeris in ignem. Falsum etiam arbitramur, sola partium antea dispersarum aggre-

gatione ignem de novo prodire. Experimentum porro calcis longe aliam habet rationem. In ea enim sulphureæ, ac nitrosæ partes agitatione, & commotione incalescunt, & accenduntur: quemadmodum & fulminis accensio citro loco explicanda. Sola autem ignearum particularum aggregatione id non contingere, inde apparet, quia etsi oleum foveat ignem, tamen calci affusum eamdem fervescere non facit: ut loco laudato S. Augustinus animadvertisit, qui ibidem totus in eo est, ut divinam celebret sapientiam, ac potestatem, quæ miram attribuit creaturis vim exhibendi effectus, quorum ratios latet; unde S. Doctor rem non physice, sed metaphorice describit, ut quemadmodum ignem latitare, ac tum discedere dicit, sic glebam calcis velut expirare.

Objicies 4. Præsertim contra secundam probationem. Pontifices, & Patres, quorum testimonia fuisse recenset Hiqueus in Commentario, q. 7. d. 7. absolute pronuntiant aquam cum vino in calice sacrificari & offerri consecrari & converti in sanguinem Christi Domini, nec dicunt aquam in vinum converti. Ergo ne illorum loquendi modus omnino sit impræprius, statuendum est, non solum vinum transubstantiari, sed aquam simul cum vino immediate in Christi Sanguinem converti.

Confirmatur primo. Post verba consecrationis credit Ecclesia Christi

sti Sanguinem esse sub speciebus illius potus sensibilis, & totus calix adoratur: nec tamen certum est, omnes aquæ particulas in vi-
num fuisse conversas. Ergo vel di-
cendum est, aliquando saltem a-
quam immediate converti in Christi
Sanguinem; vel dubium sem-
per maneret, num in singulis spe-
cierum partibus esset Christi San-
guis.

Confirmatur secundo. Concilia dicunt, materiam calicis esse vi-
num de vite, ac de uvis expressum.
Atqui aqua etiamsi in vinum con-
verteretur, ejusmodi nunquam eva-
deret. Ergo transmutari non potest
in Christi Sanguinem, nisi imme-
diata conversione. Est etiam ipsa
aqua apta ad nutriendum, saltem
si convertatur, & transmutetur
postquam sumpta est.

Confirmatur tertio, Christus Dominus aquam vino immiscuit statim ante consecrationem: & sa-
tis probabile est, tantam vino aquæ portionem affudisse, quantum ho-
mines sobrii, ac temperati adhibe-
re consueverunt. Tunc igitur aqua in vinum converti non potuit; at-
que adeo immediate in Sanguinem fuit transmutata. Ita, & Ecclesia in Missali Romano, ubi sermo est de defectibus in Celebratione Mis-
sarum occurrentibus, §. IV. n. 3.
4. & 7. Præcipit Sacerdoti, ut si paulo ante consecrationem adver-
tat, aquam appositam non fuisse;
vel si in ipsa sumptione animad-
vertat vini loco solam aquam fuis-

se calici immissam; ei, inquam,
Ecclesia præcipit, ut debitam fa-
ciat mixtionem aquæ cum vino,
& statim consecret. At tunc non
potest sane propter angustiam tem-
poris aqua in vinum converti. Er-
go immediate in Christi Sangu-
inem transmutatur. Ergo est mate-
ria apta consecrationi, etsi minime
convertatur in vinum. Igitur &c.

Respondetur ad argumentum,
Patres nunquam docuisse, Aquam immediate converti in Christi San-
guinem: sed simpliciter & absolu-
te eamdem dixerunt in Christi San-
guinem converti, cum jam suppo-
nerent eamdem fuisse prius in vi-
num conversam: ut pluribus ostendit laudatus Hiqueus. Nec quæ-
stionem istam mediatae, vel im-
mediatae conversionis expressius
evolvere; sed in id unice incum-
bebant, ut materiam in calice pa-
randam declararent, & aquam ca-
lici immixtam non permanere tra-
derent secundum suam substantiam,
nec in phlegma, vel aliam aquam
converti, sed in ipsum Christi San-
guinem transubstantiari.

Ad primam Confirmationem.
Ecclesia supponit etiam, mixtio-
nenm aquæ fieri debito modo, &
tempore, atque tunc morali cer-
titudine dicimus aquam in vinum
esse conversam. Quod si substantia
ipsa aquæ permaneret, sub ea non
haberetur Christi Sanguis, quem-
admodum si non nihil olei, vel
pulveris extaret in calice, utique
sub illo non esset Sanguis Christi;

At

At cum specierum adoratio referatur ad ipsum Christi Sanguinem; qui sub vini speciebus continetur, siccireo totus potus adoratur; Nam si aquæ, vel olei particulae quædam in eo essent, id omnino ex accidenti eveniet.

Ad secundam. Concilia appellarent materiam calicis vinum de vite, & ab uvis expressum, ut rei naturam significanter, ac secernerent ab aliis liquoribus, qui vino assimilantur, sed vini naturam non habent. Jam vero Aqua in vinum conversa habet vini naturam. Nec ratio allata ostendit aquam esse per se se materiam aptam ad nutriendum corpus; unde nihil derogat nostræ probationi.

Ad tertiam. Ex doctrina Ecclesiæ colligimus, Christum Dominum non antea consecrare, quam aqua fuerit in vinum conversa. Unde & plures actiones interposuit. In ea etiam Eucharistiæ institutione credibile est, Christum apposuisse vino peregrinam aquæ portionem, ut diximus ante primam objectionem.

Illa pariter Ecclesiæ Rubrica non instantaneam, nec præcipitatem actionem præcipit; sed ea particula, *statim* significat opus non esse, ut Sacerdos repeatat verba, & ceremonias consecrationem præcedentes.

Colligit guttam aquæ infusam calici consecrato non converti in Christi sanguinem, eo quod præsens non erat, quando prolata fuerunt

Tom. II.

verba Consecrationis: licet ea gutta in vinum convertatur à Deo supplente defectum substantiæ vini.

QUÆSTIO SECUNDA.

Quomodo Elementa maneat in Mixto.

Quærimus impræsentiarum, utrum clementa sic misceantur, ut substantia sua, id est, uti dicunt, actu, & formaliter, in mixto permaneant: an vero ita se se mutuo frangant, ut ex illis nova mixti forma, & novæ affectiones emergant; quatenus mixtum ex propria materia, & forma compactum sit, elementa autem potestate tantum, sive, ut ajunt, virtualiter inesse dicantur, quod ad mixti productionem concurrent, mixtumque in ea resolvit.

Qui clementa formaliter mixtis inesse putant, in varias iterum abeunt opiniones. Nam Avicenna clementa integra, illæsa, & sui similia, in mixto vigere dixit. Averroes formas quidem elementorum manere docuit, sed repressas, & fractas; à qua sententia non longe sunt plerique Recentiorum, qui tradunt clementa in mixtis manere, *actu* quidem, secundum suam substantiam, seu entitatem; *potestate* vero, secundum sensibiles ipsorum affectiones.

Aliorum omnium Philosophorum sententia est, clementa vir-

K

tua-

realiter solum, & potestate in mixtis superesse. Sed ne isti quidem inter se consentiunt. Nam Albertus Magnus formam mixti ex quatuor elementorum formis, eamque simplicem, emergere autumat. Thomistæ in ea videntur esse opinione, ut qualitates elementorum, non eorum substantiales formas velint in mixto esse superstites: sic tamen ut non eadem numero qualitates, quæ in elementis fuere, sed novæ, & recentes, quæque ex elementaribus fluunt, mixto insint corpori. Scotus autem in 2. d. 15. quamvis primas qualitates mixtis attribuat, tamen virtualem elementorum in mixto continentiam explicandam esse tradit penes ipsas substantiales formas; quatenus forma substantialis mixti continet virtute formas elementorum: quod erit postea declarandum.

Jam vero quæ ab Aristotele allata est Mixtionis definitio communis approbatione tenetur. *Mixtio*, inquit Philosophus in fine libri primi de Generatione *est miscibilium alteratorum unio*. Sed hanc ipsam descriptionem diversis adaptant sensibus Philosophi, ut eam quisque possit propriæ accommodare sententiae. Sic tamen res excipienda est ex dicendis, ut Mixtio sit mutatio substantialis ad formam mixti ex miscibilibus congregatis, & per mutuam alterationem dispositis, atque corruptis, in qua miscibia dicuntur uniri & contineri.

Ita enim proprio magis sensu Mixtionis nomen accipimus. Nam si sensu latiori Mixtio intelligatur, equidem significat plurium actionem & reactionem, qua sibi mutuo affectiones communicant, sed eorum substantiis iisdem manentibus, ut in medicamentorum compositione contingit. Quemadmodum etiam latissima significatione Mixtio de iis dicitur, quæ ad invicem locali motu, & partium transpositione confunduntur, quin ulla substantialis, vel accidentalis mutatio in ipsis eveniant.

Dicimus elementa non formaliter, sed virtualiter remanere in mixto.

Probatur. Si elementa formaliter insint mixtis corporibus; vel omnes formæ elementares invicem penetrantur, ita ut quælibet illarum pars afficiat quamlibet materialiæ partem; vel elementa sic insint mixtio, ut in minutissimas discissa particulas invicem sint aggregata. Neutro modo res potest constitui. Ergo elementa non sunt formaliter in mixtis; atque adeo virtute solum in aliis continentur. Probatur pars prima minoris. Si formæ omnes elementares competentes sunt invicem, eamdemque materialiæ afficiunt; jam mixtum corpus non esset unum per se substantialie. Quælibet enim elementaris forma facit unum *per se*; atque adeo plures formæ elementares, cum essentialis illarum invicem subordinatio, probari non pos-

possit, plura composita constituerent: ac subinde mixtum corpus esset aggregatum quoddam *per accidens*, ex pluribus completis naturis conflatum: quod à communione alienum est. Probatur secunda pars minoris. Quælibet mixti pars ad sensum homogeneam est, & mixta; quantumvis eadem minima sit, & concipiatur. Atqui si elementa sunt formaliter in mixto, in qualibet vel minima mixti parte extarent quatuor minimæ partes elementorum: quod concipere satis non possumus. Dicendum est igitur, elementa non formaliter contineri in mixtis.

Respondent, partes mixtiorum, quæ sensu percipiuntur, esse homogeneas. At ubi corpus vi caloris, aut ignis, minutius conciditur, tum demum intelligimus partes vel sensu minimas ex variis elementis esse compositas. Sic cineres, si sensum judicem adhibeas, partes habent, vel minutissimas, sibi omnino similes; sola tamen aquæ calidæ affusione, & percolatione, sal in aqua remanet, qui post aquæ exhalationem in vasis fundo ac lateribus concrescit.

Contra. Hæc omnia pro arbitrio à Recentioribus affirmantur. Neque enim locali extractione queunt à mixtis elementa separari, ut diximus in præcedenti disputacione. Quamobrem partes mixtorum etiam in se ipsis sunt homogeneæ, non vero tantummodo secundum externam speciem, quæ sensus no-

strorum percellit. Quod autem allatum est experimentum, id unice evincit in cuiuslibet mixti poris latitare plurimas salium, aliarumque rerum particulas, quæ tamen non ipsam mixti naturam faciunt, nec ad illius essentiam pertinent. Porro id ipsum nos minime inficiamur.

Respondent secundo, Mixtum esse ens *per se*, non vero aggregatum quoddam *per accidens*; quippe una est essentia mixti, quæ unius principiæ actioni à natura ordinatur; unde nec elementa in ipso mixto se solis operantur sed junctis viribus in eamdem, & communem conspirant actionem. In aggregato autem *per accidens*, partes vel sensu ipso distinguuntur, & unaquæque pars est sui juris, ac insestit; immo singulæ partes suas, & sibi proprias exercent actiones. Elementa ergo in mixto modum induunt entis incompleti, & quamvis sint inter se adeo disparia, devinciuntur tamen, quemadmodum ossa, caro, nervi, aliæque partes organicæ humani corporis.

Contra, Ut diximus, quælibet pars mixti revera in se se mixta est. Ergo si elementa formaliter insunt mixto, in qualibet vel minima mixti parte quatuor elementorum formæ, seu particulæ extare deberent. Porro id omnino est imperceptibile; quamlibet enim minimam concipiendas mixti partem, cogeris in ea simul quatuor partes elementorum intelligere; quare

illa non erit amplius sic minima, ut conceptu nostro supponitur.

Dispar autem est ratiō de partibus organicis humani corporis. Neque enim quaelibet pars corporis est caro, os, nervus &c. Inveniēm etiam partes istae ordinantur, & subordinantur: quod elementis non convenit. At cum inquiunt, elementa in mixto non exercere proprias actiones; non inde probant elementa formaliter inesse mixto. Nam nos idipsum non esse inficiamur, quia elementa suas in mixto non exerceant operationes; Longe enim alia est nostræ assertionis ratio, quam exhibuimus.

Maneat igitur dicendum, elementa non contineri in mixtis formaliter, atque adeo solummodo virtualiter: non quidem in genere caussæ efficientis, quasi vero mixti forma producere valeat formas elementorum; sed quasi in genere caussæ formalis, quatenus ut singulæ elementorum formæ quasdam sibi affectiones vindicant, sic & forma mixti determinatam exigit earum affectionum dispositionem, quas obtinent ipsa elementa. Hoc est ergo, elementa virtute in mixtis contineri; Nimirum ejusmodi esse naturam mixtorum, ut pertant affectiones illas, quas in elementis speciali quadam ratione dispersas novimus. Quo facile explicatur, quid sit, unum elementum prævalere alteri in mixto, si ve dari elementum prædominans.

Hoc enim est, unam mixti formam vindicare sibi potissimum affectionem peculiarem unius elementi præ altero. Unde in ista virtute peculiaris illius affectiones exigitiva assimilatur Mixtum uni potius, quam alteri elemento.

At vero elementa ad mixti productionem dicuntur cooperari per suas affectiones, seu qualitates, tamquam per instrumenta. Id porro sic explicandum est ex doctrina Aristotelis, libro primo Physicorum capite octavo. Quemadmodum ut statua ex ære fiat, primum calore opus est, quo metallum fundi possit, atque eterogenea quæque secernantur; tum vero fusum metallum non propriis terminis continetur, sed alienis; nam typi seu moduli figuræ se se accommodat, unde & humiditas ad statuæ efformationem est necessaria, quemadmodum siccitas in typo requiritur; postremo frigus ad statuæ duritiem, consolidationem, ac firmitatem confert; Ita per easdem primas qualitates elementa dicuntur concurrere ad rerum generationem. Ignis ergo cuncta movet, calorem illis, motumque impertiendo; Terra partium consolidationi confert; Aqua suo humore diluit, & connectit partes; Aer poros, & meatus implet.

Objicies i. Mixta corpora resolvuntur in quatuor elementa. Ergo ex illis actu nonexistentibus componuntur. Probatur antecedens. In
com-

combustione ligni viridis prodit primo vapor & fumus , seu fuligo , quæ statim ascendit sursum in aeris locum , veluti ad suum redditura principium ; atque adeo è ligno jam prodit primum elementum , nempe Aer , qui secum evenit sursum fuliginem . Secundo ibidem concipitur erumpens Aqua , sibilans , & ebulliens . Tertio lignum resolvitur in cineres , qui possunt appellari Terra . Quarto ignis ubique conspicitur per omnes ligni partes dominari . Sic etiam ex herbis , ex floribus , & ex amigdalisi oleum educitur . In ealce ante infusionem aquæ ignis sopitus jacet ; sed postquam aqua superefunditur , statim ad suum locum tendit , & apparet , ac lapis resolvitur . In urina manifeste apparet terra , quæ residet in fundo vasis . Et Kircherus testatur , ova ex quo posse , si in funda circumtagantur per aerem ; quare necesse est in aere igneas particulas latitare . Quo pertinet illud Augustini , capite primo , libri de Quantitate Animalium : „Si ex me quereres , arbor ista ex quibus constet , notissima ista quatuor elementa nominare , ex quibus omnia talia constare credendum est . Porro si pergeres querere , unde ipsa terra , vel aqua , vel aer , vel ignis constet , nihil jam quod dicerem reperirem . Tum infra : Simplex corpus terra est , & ideo elementum dicitur omnium istorum corporum , quæ fiunt ex quatuor

„elementis .“ Ita & Gregorius Nazianzenus in carmine de Virginitate dicebat : Igneus ardor inclusus saxis .

Respondetur . Nego antecedens , quod ex allatis experimentis non satis probatur . Atque cum primis inficiamur , quatuor elementa è ligno tunc prodire . Ignem sane nova generatione produci docuimus in præcedenti disputatione quæst . I . Quod vero proprius attinet ad rem nostram , cineres non sunt Terra , nec elementum aliquod simplex , sed mixtum corpus . Nam ex diversorum mixtorum cineribus longe diversi prodeunt effectus ; unde merito colligimus , non jam cineres rerum esse unum Terræ elementum , quod uniusmodi virtutem habet . Quamquam & in poris ligni multæ latitent terræ particulae , quæ ignis vi separantur . Ita etiam plures aquæ particulae in poris ejusdem ligni latitantes , ignis virtute foras expelluntur . Sed nec certo compertum est , humorem illum exeuntem à ligno esse verum Aquæ elementum . Illustrius autem apparet , fumum , seu vaporem non esse Aerem . Fumus enim & ipse resolvi potest in oleum , spiritum , & salem . Experientia pariter ostendit fumum è corporibus inflammatis exeuntem non esse Aerem . Quippe accenso communi sulphure sub campana , post adustionem flores sulphuris , & non Aer ; in campanæ lateribus colliguntur . Ita & in olla ebullientis operculo

crassiores spiritus , oleum, non vero Aerem referentes , exprimuntur. Quamobrem fumus aliud non est , quam partes mixti tenuissimæ , quæ ignis virtute sursum elevantur , una cum aeris particulis inclusis antea intra ligni meatus , & ignis actione rarefactis. Ad hæc , Aurum , Argentum , Vitrum , Talcum Venetum , etiamsi intensissimo igni applicentur , ne vel minimum vestigium exhibit aut Aeris , aut Aquæ. Ex quo possumus colligere Aquam , & Aerem in Poris ligni extasse primum latitantes.

Oleum itidem ex herbis emanans non est essentialiter ignis, aut aer; unde & retinet plures herbarum proprietates. Illud ergo oleum tum ex partibus herbarum subtillioribus , humidioribus , & pinguioribus coalescit , tum ex particulis variarum rerum , quæ in poris herbarum continebantur.

Terra illa , quæ in urina apparet , non aliud videtur esse , nisi particulæ quædam terræ in cibo primum , ac potu dispersæ , tum invicem collectæ , & vi caloris naturalis in massulam concretæ , ac duratæ. De Calce jam diximus in præcedenti quæstione , eamdem in fumum resolvi ob maximam siccitatem.

At vero Ova juxta Kircheri experimentum excoqui arbitramur , non jam ab igne , qui in aere existat , sed propter citissimum fundæmotu , seu rotationem , qua fit , ut

partes ovi incalescant & quæ fluidæ erant , indurescant. Postremo hæc , & similia experimenta ostendunt hac & illac dispersas rerum omnium particulas , iisdemque repleti poros , & meatus corporum : quod nos ultro fatemur.

Augustinus autem citatus loquitur juxta communem vulgi sensum , & vulgari formulæ loquendi se accomodat. Nec sane potuit S. Doctor quatuor elementa habere velut materiam mixtorum , cum ipse fateatur , eamdem materiam corporum vix percipi posse: quemadmodum vidimus in Systematis Peripatetici expositione. Nazianzenus etiam metaphorico sensu disserit : ut perspicuum est.

Objicies secundo. Mixtio est miscibilium alteratorum unio. At si elementa corrumpuntur , nec conjungi queunt , nec alterari. Ergo permanere debent in mixtis elementa secundum substantiam suam. Alioquin potius converterentur in ipsum mixtum ; Immo vero nullum esset discrimin inter mixtum , & elementum ; utrumque enim ex materia , & simplici forma componeretur. Tum nihil est , quo elementa omnia , dum ad mixti generationem concurrunt , corrumpi possint , unde saltem illorum alterutrum perseverare in mixto deberet. Immo omnia simul attemperari invicem sic possent , ut singula mixto inexisterent: qua ratione manent primæ qualitates , quin

quin invicem destruantur; nec tam mixtum una cum illis est aggregatum quoddam *per accidens*.
Igitur &c.

Respondetur, Mixtionem ex sua formalis notione, quod ad rem nostram attinet, præ se ferre veram generationem: quæ tamen presupponit elementorum miscibilium alterationem. Unde fatemur non lata significatione usurpari posse elementorum mixtionem. At vero Mixtum Corpus ex una tantum substantiali forma coalescere arbitramur; unde hoc sensu simplex sit ad instar elementorum; Nihilominus Mixtum presupponit elementorum mixtionem, atque omnes sibi vindicat singulorum elementorum affectiones; quamquam aliter, ut diximus. Quo etiam fit, ut virtute permanere dicantur ipsa elementa in mixto.

Ipsa porro elementa quando substantia sua præcedunt mixtgenerationem, destrui dicuntur à Generante; unde neutrum illorum debet necessario permanere. Quamquam si modum hujusc concursus attendas, quem supra exposuimus, nonnisi verba in argomento perspicies. Diximus etiam non easdem numero elementorum affectiones transire de subiecto in subjectum. Ipsæ porro qualitates possunt invicem attemperari, nec nos elementa mixtis formaliter inesse negavimus, quia eadem contraria sint, sed ob alias

longe rationem. Demum qualitates non pertinent ad substantiam rei; quare possunt plura ejusmodi accidentia eidem enti *per se* congruere: sed non plures formæ substantiales, nam istarum quælibet facit cum materia compositum unum *per se* substantiale.

Hæc ad Quæstionem rei pertinent, quæ elementorum evolvit permanentiam. Nunc dicendum est summatim de Aristotelis opinione circa rem præsentem.

Jam vero subobscurè satis promore, & maxime in hac disputatio evolvenda, loquutum fuisse Philosophum, cuilibet illius dicta attendanti perspicuum est. Quare in ancipiū semper visa est Aristotelis sententia, ut gravissimi Viri sentiunt, atque ex ipsis Recentioribus judicat Maignanus.

Nihilominus elementa non formaliter, sed virtute solum in mixtis manere juxta Aristotelis mentem, ipsius verba suadent in 2. de generatione t. 48. expresse: *Quæ miscentur secundum excellentias se corrumpunt, & tunc neque illorum contrarium alterutrum simpliciter erit, sed medium.... Et primo quidem elementa ita transmutantur: ex his autem carnes, & ossa, & quæ talia, calido quidem facto frigido, frigido autem calido; quando ad medium veniunt. Et lib. 2. de partibus animalium, c. 1. Cum itaque triplex sit compositio; prima statui potest ea, quæ ex primordiis conficitur iis, quæ nonnulli ele-*

men-

menta appellant. Terra dico dici potest ex virtutibus confici elementorum, iisque non omnibus, sed ut ante expositum est. Humiditas enim, & siccitas; caliditas, & frigiditas materia sunt compositorum. Quare docet Philosophus nullum elementorum simpliciter mixto inesse, sed eadem transmutari, ut compositum sit quoddam medium ab illis diversum; nec in mixto sint ipsa elementa, sed illorum tantummodo qualitates.

Quando igitur alibi tradit, elementa manere, oportet intelligere istam permanentiam virtutis: Unde & laudato priore loco t. 84. dicebat.. Neque permanent igitur actu, ut corpus, & album: neque corruptuntur, nec alterum, neque ambo. SALVATUR ENIM VIRTUS EORUM. Hoc ergo sensu elementa docet non corrupti, quia virtute permanent, ut jam antea declaravimus.

Constat etiam saepè eundem Philosophum elementi nomine significare Materiam primam, ut generali appellatione principium primum designet. Sic in quinto Metaphysicæ cap. 3. saepè elementi nomen adaptat affectionibus elementorum, aliquando quatuor humoribus, qui in animalium corpore inveniuntur, & quorum attemperatione vita constat.

Demum in praesenti re usurpat saepè Empedoclis placita, & responsiones adhibet illius sententiae

accomodatas; etsi illas saepè determinet, atque emendet. Assumit etiam exempla unionis plurium rerum secundum suam entitatem permanentium, ut elementorum permanentiam declareret: quod & Scotus aliquando præstitit. Sed nemo ignorat, exempla sic tenenda esse, ut non sint identites. Quare in illis simile quiddam intelligimus, nec non & dissimile.

QUÆSTIO TERTIA.

Utrum Elementa suis in locis constituta gravitent?

UBI

Hydrostaticæ Principia exhibentur.

Locum proprium Elementorum communi notione illum appellamus, quem iisdem à Natura ordinatum intelligimus. Sic Aer cum inter Tellurem est, ac Stellas, proprium dicitur teneare locum: Sic aqua in mari; Adeo ut Terra infimum teneat locum sub Aqua, Aqua sub Aere; unde unum Elementum sit altero gravius, aut saltem levius. Porro ubi Elementa hæc à proprio loco dimoventur, tunc eadem gravitare perspicuum est; nituntur enim proprium obtinere locum; atque quod est sub se levius,

vius, sursum trudere, & sub illo subsidere, nam hoc à Naturæ Auctore institutum appetet, nec non & ex rerum interiore natura dicitur, ut graviora infimum, minus gravia superiorē occupent locum. Quo sensu Scotus in 2. d. 2. q. 10. D. docuit gravia extra proprium locum gravitare, idest, conniti ut eam obtineant; in proprio autem naturali loco quiescere, quatenus ibidem vi sua permanent: quamquam tota corporis gravis moles sibi subjectum quocumque corpus pondere suo premat: quod sane Scotus non inficiatur.

Ergo præsens Quæstio Elementa considerat propriis in locis extantia, atque de illorum gravitatione disserit.

Est adeo Recentiorum omnium sententia, Elementa omnia suis etiam in locis constituta indesinenter gravitare in subjectum quocumque corpus, etsi ipsis gravius. Aerem ergo dicunt Telluri circumfusum esse gravem, suoque pondere Terram versus inniti, ita ut à sui summitate usque ad extremum, quo Tellurem afficit, pars superior inferiorē semper successive premat, deorsumque in Tellurem trudat: sic tamen ut inferior aer pressus à superiori, quoniā vel elastica pollet, qua pressus valet se ad pristinum statum restituere, continuo itidem renitatur superioris aeris incumbētis pressioni. Porro

aer ipse subjecta corpora premit & secundum lineas rectas, & secundum obliquas: adeo ut velut in columnas aer divisus concipiatur pressionem suam exercere, & ejusmodi columnæ sic compactæ sint, ut licet permanente inferiori aliqua aeris parte, fluat, & mutetur superior aeris pars; alia tamen succedat, quæ æqua vi inferiorem premat, unde per æquivalentiam eadem columna censeatur. Eadem ratione philosophantur de aqua in maris alveo constituta, & de terrestribus quibuscumque corporibus Telluris superpositis.

Oportet autem rem præsentem altius reperire, atque nonnulla exhibere principia Hydrostaticæ, quæ *Scientia est explicans rationem Gravitationis Fluidorum.* Brevibus tamen erimus contenti, uberiora Mathematicis permittentes, nam & Philosophia generales tantum notiones exhibet, nec omnem simul completitur Scientiam.

Itaque Fluidum corpus illud appellatur, cuius partes facile moventi cedunt, nec sunt invicem tenaci vinculo nexæ; nam è converso id solido corpori proprium est. Grave corpus id est, quod deorsum fertur; sed inter gravia corpora aliud est specifice gravius altero, quando nimis sub eodem volumine seu extensione majus pondus continet, quam alterum. Sic si duos globos accipias, quorum alter plumbeus sit,

alter ligneus, & iidem ipsi sint volumine æquales, puta eorum diameter sit unius pedis; plumbeus globus est specificè gravior ligneo, quia est isto gravior. E converso ligneus globus dici poterit specificè levior plumbeo, quia sub eadem cum illo extensione, minori gaudet pondere.

At vero ex duobus corporibus eamdem extensionem habentibus aliud sæpe est altero densius, aliud rarius. Densius est illud, quod plus massæ seu materiae sub eodem volumine continet, quam alterum. Rarius è contra sub eodem volumine minus massæ continet. Porro corpus specificè gravius est etiam densius; Gravitas enim, & massa invicem correspondent. Quo fit ut corpora in volumine, & densitate æqualia, ejusdem sint massæ, & gravitatis: & corpora volumine æqualia, ac densitate inæqualia, etiam in gravitate, & massa sint inæqualia, atque unum sit altero specificè gravius.

Igitur si in tubis communicantibus fluidi homogenei eadem altitudo fuerit, fluidum in uno tubo æquiperat fluido in altero. Quod si fluida sint diversa gravitatis specificæ, pro diversa gravitatis ratione, varia etiam erit illorum altitudo in tubis communicantibus. Sint v. gr. tubi A B, & D C (fig. 1. tab. 1.) communicantes & ejusdem diametri, impleantur aqua; hæc erit utrimque ad eamdem altitudinem, puta E F. At si ex una parte mercurium affundas, & ex alia aquam, quia argentum vivum sub eodem

volumine est specificè gravius aqua, ut 14. ad 1. diversa erit argenti vivi, & aquæ in tubis altitudo, ut 14. ad 1. atque adeo altitudo, aquæ in tubo AB 14. digitorum, altitudo vero mercurii in tubo DC unius digiti.

Hinc etiam facile possumus invenire quorumlibet duorum fluidorum specificam gravitatem, pro diversa ipsorum altitudine. Animaadvertit etiam Wolfius in hisce elementis Hydrostaticæ cap. 2. n. 38. quod si fluida facile commisceantur, tubum horizontalem B D mercurio replere debemus, commixtionem impedituri. Etsi autem fluida non facile commisceri soleant, specificè tamen gravius primo loco infundendum est, ne concepto impetu ruat in alterum, & fluida turbentur.

Liquorum gravitas in vasis astimanda est secundum ipsorum altitudinem, habita tamen ratione basis; sive, ut dicunt Geometræ, in ratione composita basis, & altitudinis.

Primo si vasa sint perpendicularia, & æquales habeant bases, ut vas ABCD, & vas EGHF; (figur. 2. tab. 1.) fluidum in illis contentum nihil habet, quod ei resistat; atque adeo premit fundum tota sua gravitate. Jam vero gravitas in fluidis homogeniis est proportionata volumini, nam si ejusmodi fluidum in partes æquales dividatur, eædem erunt etiam æquales secundum gravitatem. Porro volumina se habent ut altitudines.

Ergo in hac hypothesi pressio fundi est pro ratione altitudinum.

Secundo in vasis perpendicularibus; quorum bases sunt inæquales (ut in fig. 3. tab. 1.) pressio est in ratione composita basium, & altitudinum, quia nimis fluidum vi sua tota premit, ut mox diximus. Porro hæc vis volumini responderet, volumen ex basi repetitur, & altitudine, atque adeo hinc etiam dimetienda est pressio fundi.

Tertio ob easdem rationes si vas inclinatum ABDC eamdem altitudinem, & basim habuerit cum vase perpendiculari BEFG (figur. 4. tab. 1.) æqualis erit pressio utriusque fundi.

Quarto si bases vasis ABDC (figur. 5. tab. 1.) inæquales fuerint, fundus eodem modo premitur, ac si superiori inferior æqualis esset. Quippe fluidum nititur solum adversus fundum secundum lineas perpendicularares E F C D, & alia massa fluidi nititur in altera vasis. Idipsum apparet etiam quando inferior basis sit multo major superiori. Si enim vas metallicum AC DB (fig. 6. tab. 1.) ita construtum habeas, ut fundus CD sit mobilis, annulo coriaceo madefacto apprimendus, dum experimentum capit, & basi superior AB successivæ tubi æque-alti sed diversorum diametrorum applicari possint; tum vero funiculi per tubum FE trajecti alterius extrellum annulo K basi mobili afferuminato, alterum vero brachio alicujus librè alli-

ges, & in lance alteri appensa pondus colloces, idque adjectis minoribus tamdiu augeas, donec fundus CD attollatur: Experieris sane eodem semper pondere opus esse ad fundum attollendum, quæcumque sit tubi EF amplitudo, modo aqua constanter ad eamdem altitudinem consistat, sed & pondus æquale comprehendes gravitati Cylindri aquei, eamdem cum vase basim CD, sed altitudinem FK habentis.

Eadem de causa fundus superior dolii A B (figur. 7. tab. 1.) maxima vi attollitur ab aqua in tubo CD plurimum pedum contenta; ut proinde Wolfius in vase ligneo A B intus pice probe obducto, & tubo CD ex lamina ferrea stanno obducta parato, altitudinis quatuordecim fere pedum, experimentum capiens, observaverit 800. libras basi superiori impositas non potuisse impedire, quominus toleretur. Ab hoc eodem principio derivavit idem Wolfius Siphonem suum Anomaticum. Fieri scilicet curavit ex lamina ferrea stanno obducta vas cylindricum DEGF (figur. 8. tab. 1.) & eidem affruminari jussit tubum F I H. Quod si jam vesica, aut ventriculus, aut pellis animalium brutorum, aut aliæ quæcumque partes membranaceæ corporis animalis inversæ basi superiori superinducantur, eas non modo ingenti vi in hemisphericam figuram expandit, sed & poros subintrans omnes membranas & vasa ita dividit, ut levigata

cisura facta solis digitis multo accuratius separantur, quam cultro Anatomico: immo apparent etiam vasorum per substantiam illam membranaceam dispersorum ramifications, & insertiones minimæ; & tunicas quæ vulgo pro una habentur, liceat discerpere in plures. Notandum vero est, quod si interior vesicæ, aut reliquarum partium corporis animalis super vase DG expansarum, superficies aquam lambat, aqua per substantiam earum penetrare nequeat. Cæterum si vesicæ ingens pondus imponas, ab aqua in tubo H I vix duarum librarum attollitur. Quod in tubi inflexionem videtur refundi debere.

Huc pertinet experimentum Siphonis, cuius unum crus sit centies latius altero? (figur. 9. tab. 1.) In utroque enim crure ad eamdem altitudinem aqua manebit. Nam si aqua non præmeret punctum (e) secundum solam suam altitudinem, major aquæ moles in crure latiori deberet sursum attollere alteram aquam in minori crure contentam. Verum in præsenti accidit, quod alias in solidorum æquilibrio notabilius reciprocam nempe esse molis in una parte, & velocitatis ex altera rationem. Eodem ex fonte oritur, quod si vesicæ squillæ orificio (fig. 10. tab. 1.) aptetur tubulus, qui centies majorem habeat motus velocitatem in tubulo, quam in vesica, etiam si ratione sui, unius dumtaxat libræ habeat vim, ponderi tamen centum librarum æquivaleat; &

elevare possit pondus nonaginta novem librarum vesicæ impositum. Ita fit, ut pondus illud à puero possit hoc modo elevari (si tamen aerem continuo immissum, in vesica serves), quod vix à robusto viro potest sustineri sine artis adminiculo.

Expositæ doctrinæ in speciem adversari videtur; quod in tubis capillaribus, seu fistulis gracilioibus utrinque patulis, unaque sita extremitate sub aquam demersis, aqua ultra libellam assurgat: eo quidem magis, quo minor tubuli diameter. Ita & in Siphone crurium inæqualium, si horum alterum sit admodum angustum, aqua in hoc crure altius sustinetur, quam in latiore. Sed hujus phænomeni ratio est aliunde repetenda, nimirum ex aquæ figura, & angustia parietum vitri, ex quibus fit ut aqua iisdem adhærescat. Ex adverso res contingit eodem illo in Siphone, si repleatur hydrargyro. Hydrargyrum enim in latiore siphonis crure altius manet, quam in angustiore. Quippe partes hydrargyri utpote crassiores vitro adhærere non possunt, & ab aere inter ipsas, & vitri latera intercepto removentur; unde fit ut hydrargyrum in altiorem cumulum in maiori crure assurgat.

Ut eadem illa de pressione fluidorum sententia firmetur; oportet expendere, qua de causa aquæ ex altissimo loco in inferiorem per tubos deducta, etiamsi tuborum

extremus sit inflexus, illiusque ostium sursum pateat, nunquam tamen hæc aqua per illud ostium erumpendo, ad æqualem ei, ex qua decidit, altitudinem exiliat, sed illius saltus sit semper origine, seu receptaculo, unde defluit, inferior. Hujus porro ratio est, quia salientis aquæ motu obsistit aer, qui tanta celeritate dividi non potest, quantam aquæ salientis impetus requirit; unde imminuit, ac retundit ipsius aquæ motum, atque ejusdem partes disgregat, & dispergit. Cæterum ubi hujus resistentiae habeatur ratio, affirmare possumus, aquam ex edito loco descendenter, eamdem repetere altitudinem.

Postremo adnotandum est, quod si prædicto siphonis exemplo partes aquæ laterales in crure latiori agunt in partes medias, hæ quoque illis resistunt; Unde fit non debere à majori mole aquæ altius atollî aquam in crure minori contentam. Ita etiam, si aqua in glaciem concresceret, nullam vim una columnæ in alteram exerceret, necessaria est enim ad id ipsius aquæ fluiditas.

Alterum Hydrostaticæ principium est. *Corpus specifice gravius in fluido leviori eam ponderis sui partem amittit, quantum est pondus fluidi sub eodem volumine.* Res declaratur exemplo. Nam si cubum pollicarem plumbeum F. (fig. II tab. I.) sub aqua demergas, expellit cubum pollicarem aquæ, &

tantum sui ponderis deperdit, quantum est pondus aquæ expulsæ. Quare ponderis imminutio ex volume fluidi erit repetenda. Proinde cum fluidum specifice gravius sud eodem volumine majus pondus possideat, quam levius; idem corpus in fluido specifice graviori majorem ponderis sui partem amittit, quam in leviori; adeoque in leviori magis ponderat, quam in graviori. Ita globus plumbeus minus ponderat in aqua, quam in spiritu vini: Gravium igitur homogeneorum æqualium in aere æquiponderantium æquilibrium tollitur, si unum fluido graviori, alterum leviori immergatur.

Hinc ergo metiri fas est diversam gravitatem specificam corporum. Nam pro varia ratione gravitatis, diversa etiam ponderis est amissio, nec manet in corpore fluidis levioribus immerso, nisi gravitas illa, quæ excedit gravitatem ejusdem voluminis fluidorum; Ut ex. gr. si Mercurius quatuordecim vicibus gravior sit aqua, unicam libram in aqua demersam amitteret, & pondus retinebit 13. librarum: si lapis sit duplo gravior aqua, lapis, qui in aere est quatuor librum, sub aqua erit solum durum: quod idem valet de singulis corporibus cum aqua comparatis. Unde & illud profluit: si idem solidum variis fluidis immergatur, pondera, vel partes gravitatis, que ab ipso in fluidis amittuntur, erunt ut specificæ fluidorum

rum gravitates; tanto nimirum, ut dicebamus, majorem gravitatem amittet, quanto major est gravitas fluidi.

Facile etiam ex dictis colligere possumus, utrum duo corpora inæqualis figuræ, mole tamen, & specifica gravitate sint æqualia. Si enim separatim immergantur in idem vas aqua plenum, & aqua, utroque immisso corpore, æquali quantitate effluat, tunc utriusque corporis moles, & gravitas omnino eadem erit; inæqualis vero hæc deprehendetur si dispar sit quantitas aquæ effluentis. Quo medio Archimedes Hieroni Syracusarum Regi ostendit, coronam, quam is effingi sibi jussérat ex auro puro, alterius metalli permixtione vitiatam esse; quippe immissa in aquam corona, major aquæ quantitas è vase effluxerat, ac immerso ejusdem cum corona ponderis auro puro. Cæterum aliquando contingere potest duo metallæ ita invicem misceri, ut hoc hydrostaticum examen effugiant; nam si stannum argento specificè levius, & plumbum argento specificè gravius ita permisceantur, ut eamdem cum argento specificam gravitatem obtineant, adulteratio dignosci non poterit, nisi prius spectata singulorum metallorum gravitate.

Ex dictis explicatur, quanam ratione duo corpora, quæ in aere appensa, erant in æquilibrio, amittant æquilibrium, cum in aqua appenduntur. Sic ubi cuprum, &

plumbum in aere appensa sunt in æquilibrio, ab eo excidunt in aqua ponderata. Nam plumbum in aqua minorem locum occupat: cuprum vero majorem; minoremque illud aquæ portionem expellit, majorem istud; atque adeo plus istud deperdit sui ponderis, minus illud.

Simili ratione metiri poterimus, fit-ne gravior aqua fluminis, vel maris, in superficie, in medio, vel prope fundum. Nam si idem solidum in diversis ejusdem aquæ profunditatibus eamdem amittat ponderis sui partem; omnino ejusdem erit semper gravitatis aqua. At ubi ponderis amissio erit inæqualis, quo major hæc est, major subinde colligitur aquæ specifica gravitas. P. Franciscus Tertius de Lanis, in Magisterio Naturæ, & Artis, tom. 3. lib. 25. c. 1. exper. 7. tentavit idipsum; Accepto autem vase duorum pedum altitudine, cum globum vitreum eidem immitteret, qui pondus aquæ 18. granis exce-debat, eumdem quoque cum æquipondio 18. granorum perfec-tissimum facere æquilibrium expertus est. Cum eundem ex crine equino pendulum ad infirmam aquæ profunditatem descendere per-mitteret, ponderi ejus dimidium insuper granum decadere observa-vit: quod tamen decrementum quia in crimen equinum aquæ nunc totum immersum conjici debet, quippe extra aquam grani se mis-si æquiponderantem: aquæ partes in-

inferiores à superioribus nullam pati compressionem agnovit.

Aliæ habentur Hydrostaticæ leges. Si æqualia sint volumina solidi corporis & fluidi ; Solidum vel habet majus pondus , quam fluidum ; vel continet pondus minus isto; vel utriusque pondus est æquale. Si pondus corporis solidi excedat pondus fluidi , solidum totaliter in fluido demergitur. Si pondus corporis solidi sit minus pondere fluidi , solidum innatæ fluido. Si æqualia sint pondera solidi , & fluidi , solidum innatæ , & suspensum permanet in fluido.

Si solidum majori gaudet pondere , demergitur , & fundum petit. Cum enim sit fluido gravius , majori vi petit centrum , atque superiore cogit in locum fluidi partes minus graves. Id autem præstat , quia majori sua gravitate fortius agit in fluidum levius , atque hujus resistantiam vincit.

Si solidi pondus superatur à pondere fluidi , solidum innatæ. Cujus ratio ex adverso ducitur ac præcedens. Minori enim gravitate pollens solidum minori vi centrum petit , minusque agit in gravius , fortiusque sibi subjectum liquidum: quare & huic cedit inferiorem locum. Vi tamen sui ponderis ex parte immergitur , donec superius volumen ex ligno , ver. grat. aere , aliisve rebus conflatum , ad eamdem perveniat gravitatis æqualitatem cum æquali volumine liquidi.

Quod si æqualia sint gravitatis momenta in fluido , & solido , neutra vis alteram superare potest; quare solidum descendere non valet , nec vi sua fluidum à loco dimovere ; & eadem ratione fluidum attollere non valet solidum illud corpus.

Ex his prodit ratio , cur navis gravioribus etiam rebus onusta innatare queat aquis. Quippe volumen earum rerum , & aeris in nave extantium est minoris gravitatis quam æquale volumen aquæ. Ita non æquale pondus à dulci aqua sustineri potest , ac ab aqua maris. Gravioris enim ista est ponderis , quam illa , si æqualia spectentur volumina. Nam pes cubicus aquæ dulcis pondus habet 72. librarum , pes cubicus aquæ marinæ 73. librarum ; & trium quadrantium pondere gaudet : ut in tomo 11. Bibliotecæ Philosophicæ. Quare & gravius volumen solidi marinæ aquæ respondet. Quod si in navim penetret aqua , in locum aeris eadem subit ; proinde gravius fit volumen dum aqua gravior in navi contenta locum aeris levioris occupat ; atque adeo demergitur ipsa navis.

Eadem ratione pila cerea innatæ aquæ frigidæ , quia minori gaudet pondere , quam aquam aqua frigida. At si aquam calefacias , pila demergitur , quia istius volumen majorem habet gravitatem æquali volumine aquæ vi caloris rarefactæ. Quod si calor in aqua

augeatur, pila rursus innatæ aquæ, nam vi caloris rarefiunt aquæ, & vappidæ particulæ, quæ poros pilæ implebant, quo fit ut illius volumen minorem obtineat gravitatem, quam æquale volumen aquæ.

Ita & cadaver in aquam projectum, primo fundum petit, quia est aqua gravius. Ubi vero actione partium insensibilium aquæ, fibræ cadaveris redduntur laxiores, & internus aer se se extendit, auget cadaveris volumen, quod levius est æquali volumine aquæ, unde cadaver aquæ rursus innatæ. Sed denuo demergitur, cum egresso aere partes illius solidæ invicem constrictæ constituunt volumen arctius, & æquali aquæ volumine gravius.

Inde urinæ natatio explicatur. Inde & piscium in aqua motus; hi enim vesiculam habent intra se aere plenam, ex cuius ampliatione, vel constrictione fit, ut volumen ipsorum modo sit gravius, modo levius, modo ejusdem ponderis cum æquali aquæ volumine. Hinc pisces illi, quibus vesicula disrupta sit, præcipites statim ruunt in fundum aquæ, nec sursum manere possunt, nec ab aqua elevari: ut notat Dominus Derham in demonstratione essentiæ & attributorum Dei, lib. 1. cap. 1. num. 9. Id explicat etiam avium per aera volatum. Eadem est expositiæ quarundam insularum, quæ aliquando mari innatare visæ sunt.

Quamquam ad hos omnes effectus plurimum conferat diversa solidi configuratio, tum varius fluidi motus, nec non & partium solidi, ut piscis, & hominis natantis, avisque volantis.

Hæc retulimus ex Recentioribus, præsertim Wolfio, quorum opera consulant ii, qui plura in rem præsentem desiderant.

Jam vero redeamus ad institutam quæstionem, quæ est de elementorum in propriis locis gravitate, vel elevitate; præsertim vero de aqua, nam quæ de aere dicenda sunt, uberiorem dicendi copiam exigunt, quam exhibebimus quæstione septima.

Porro gravitas alia dicitur absolute, alia respectiva. Prior est pondus corporis secundum se spectati; Posterior dicitur de corpore, ut ad alia comparatur, & refertur. Quare certum est, terram, aquam, & aerem (nam de Igne dicendum erit in sequenti quæstione) sic se habere, ut illorum gravitas diversa sit; nam terra utique gravior est aqua, aqua aere: quod experientia, & rerum ordo convincit. Ita & terra compactior est aqua aere.

Dicimus igitur terram, aquam, & aerem suis etiam in locis constituta gravitare. Neque tamen id ita accipiendum est, quasi una pars terræ, vel aquæ, ut aeris, alteram sibi homogeneam, vel graviorem à suo loco detrudere nitatur; Nam quo una in alteram agit,

hæc

hæc in priorem reagit, immo nulla vis exercetur unius in alteram, cum æqualis sunt densitatis, gravitatis, atque adeo virtutis: sed quatenus tota aquæ, vel aeris massa pondus suum obtainere intelligitur, atque subjectum sibi fundum premere pro ratione basis, & altitudinjs: ut declaravimus. Ita etiam non æqua vis est gravitatis in hisce elementis; sed diversa pro ipsorum varia densitate.

Hoc ergo sensu accepta Thesis fere omnes Philosophos consentientes habet. Quod Aristot. tradidit l. 4. de Cælo, 4. dicens: *Omnia elementa gravia sunt præter ignem, & omnia levia præter terram.* Quorum verborum is sensus est, absolutam inesse terræ, aquæ, & aerigravitatem; sed eamdem diversam esse pro ratione densitatis illorum elementorum; unde ordo eorum invicem est: atque adeo unum pīæ altero levius esse respective intelligitur.

Probatur conclusio. Vas aere plenum plus ponderat, quam sine aere. Igitur aer est gravis. Ita Dominus Homberg, ut in Historia Academiæ Regiae 1687. & recentiss. P. Regnault tom. 1. pag. 294. à vitreο folliculo, scujus diameter erat 13. unciarum, extraxit aerem crassiorem: tūmque pondus folliculi unai uncia immunitum erat, ac esset iantea. Iterum eamdem experientiam instituit, atque erassiore aere exaustrò folliculum, ejus diameter erat unciam vi-

Tom. II.

comperit, ut habetur in Historia Academiæ 1696. Hoc ipsum est, quod omnium ore effertur, utres inflatos graviores esse, quam vacuos, excusso nempe aere. In idipsum ostendendum collineant omnia experimenta quæ paulo ante retulimus. Demonstrant enim aquæ partes nullam utique invicem compressionem pati, nec inferiores à superioribus incumbentibus densarii, quod ex aquæ configuratione repetendum est; ut declaravimus in quæst. 7. sed eadem illa experimenta ostendunt, aquam in vasis contentam gravitare, ut secundum ipsius altitudinem premet fundum subjecti vasis, etsi illud sit specificè gravius aqua. Sit tamen ut solidi instar pressio, & gravitatio per partes in fundum feratur. Unde si in tubo longiore extent foramina plura secundum diversum gradum altitudinis, tunc aqua in tubo contenta erumpet utique majori impetu per inferiora foramina, quam per superiora (ut in fig. 12. tab. 1.) Hinc redditur ratio cur vas aqua repletum demergatur, quemadmodum & navi, ubi locum aeris occupaverit aqua gravior, cur aqua in vasis contenta gravitet; cur demum aqua, & terra forniciibus cavernarum incumbens eosdem aliquando ruere faciat: ac sexcenta alia experimenta explicantur, quæ per totam hanc disputationem exhibebimus: & in præsenti quæstione sexta.

Respondent. Aerem folliculo in-

M

clu-

clusum augere pondus folliculi, quod terrestres exhalationes, & aquæ vaporess, per aerem dispersi, gravitent. Addunt etiam, in folliculo occlusum detineri aerem contra propriam naturalem affectionem; unde & vi sua elasticæ renititur, atque adeo auget depressionem folliculi. Ita & dicunt in aliis allatis exemplis, aquam non in suo proprio loco extare; unde gravitare perspicitur. Proinde non idem tenendum esse, ubi aqua in mari, vel flumine est.

Contra primo. Etenim si exhalationes, & vaporess in aere dispersi gravitare dicuntur, profecto cum infinita pene sit illorum copia, jam circa terram totus aer gravitare dicendus est; primo quidem ratione tot exhalationum, & vaporum, tum quod ista corpuscula gravitate sua aerem debent deorsum cogere. Sed & cum exhalationes, ac vaporess supra aeris partem aliquam consistant; necesse est illos esse leviores aere ipso, seu minus graves; atque adeo aer majorem habet specificem gravitatem. Ergo ea major folliculi depression ex ipso potius aere est repetenda; quam ex vaporibus, & exhalationibus.

Contra secundo. In eo, quod retulimus, experimento non jam aerem externa vi in folliculo compræssum spectavimus, sed ut naturali ordine folliculi partes occupat. Nam ubi intra folliculum densior aer cogitur artis ope tunc pro aere occlusi massa augetur rursus fol-

liculi pondus. Ipsa vero elasticæ vis compressionem aeris supponit, ut exerci illa queat, prioremque deperditam expansionem repetere quod in allato experimento minime occurrit. Quamquam illud verisimum sit; elasticam nempe vim quandoque motum aeris deorsum fovere, & augere. Cæterum si folliculus catenus deorsum gravitaret, quia aer contra naturalem suam affectionem occlusus inferiores folliculi partes deorsum cogit, eadem ratione dicere possimus alias aeris partes in superiori media parte folliculi contentas sursum agere has superiores folliculi partes: ut proinde aqua sit vis deorsum cogens, ac sursum elevans; cum aer omni ex parte, sive sursum, sive deorsum via sua elasticæ nitatur.

Contra tertio. Etsi aqua in vasiss non omnino sit in proprio loco naturali, tamen sub se habet corpus se ipsa specificem gravius. Eadem est ergo ratio, ac si in mari, vel flumine extaret. Quippe eadem est aquæ massa, eadem illius natura; eademque subinde gravitatio. Tum vasiss basis immediate supra terram collocari potest, ac terra simul circum ambiri; & tamen eadem certe erit aquæ pressio in ipsum fundum proportionate altitudinis aquæ columnæ.

Objicies primo. Urinatores sub aquis, atque etiam in maris fundo quandoque constituti non percipiunt incubentis aquæ pressionem, & pondus, ne à tanta superincubente ipsis aquæ massæ in

fundum urgentur. Ergo aqua in maris alveo non gravitat. Alioquin ejusmodi pressio perciperetur. Secundo herbæ etiam sub aquis verticaliter directæ nascuntur. Porro hæc fieri nequaquam posset, si aquæ perpetuo gravitarent tanto pondere in subjecta corpora leviora. Tertio Situla, etsi plena sit aqua, quamdiu sub aquis est, facilime atrahitur: nec sui ponderis sensum præbet, nisi dum primo effertur in aerem. Quarto si frustum plumbi appensum filo æquilibretur aliquando in libero aere, aliquando vero dum est aquis immersum, ita tamen ut contraponditum sit extra aquam; tunc data aquæ gravitate, quæ profecto aeris gravitatem excederet, deberet plumbum magis ponderare in aqua, quam in aere. Contrarium autem experientia ostendit. Quinto si ponatur, exempli caussa, æreum vas sphæricæ figuræ in libro aere, & repleatur aere, ejusdem ponderis est ac si idem vas immurgatur aquis, atque istis repletum sit. Id ipsum porro minimè eveniret, si aqua gravitaret, nam aqua replens vas utique majoris esset ponderis, quam aer, ac subinde vasis gravitatem augeret. Sexto Boyle, aliquæ sumpsere vas cylindricum, cuius interior diameter erat 62. partium. Huic cylindro immiscere orbem ligneum, cuius diameter erat 61. partium. Postmodum orbem ligneum bacillo detinuere in fundo vasis; sed infusa aqua, & sublata bacilli pressio-

ne, orbis ligneus aquæ superficiem emersit. Porro si aqua gravitaret in subjectum orbem ligneum, impossibile foret hunc orbem aliquando emergere ex aquis; quippe longe majori pondere aquarum urgeretur versus centrum, qua elevaretur sursum. Igitur &c.

Respondetur, iccirco Urinatores non percipere aquæ gravitatem, quod omnes aquæ partes se se mutuo non tantum secundum lineas perpendiculares, sed etiam secundum lineas obliquas, in æquilibrio sustineant. Ea enim est liquidorum natura, ut si in multis columnas æquales per mentem divisæ concipiантur, omnes eæ columnæ propter partium fluiditatem se se mutuo librent, & ad libellam componant; siquidem una ex his descendere non potest, quin vicinæ, & adjacentes ascendant, ut in bilance contingit: non est autem potior ratio, cur una columnæ aliam vincat, quam ut ab ea vincatur; hinc fit, partes liquidæ se se per lineas perpendiculares sustinere. Propter aquæ vero fluiditatem partes laterales secundum lineas obliquas sustentant alias superiores, & ab aliis circumpositis sustinentur. Quare Urinatoris corpus etiam in fundo maris constitutum eam pressionem aquæ incumbentis non patitur. Res declaratur exemplo forniciis. Nam in fornice laterales partes sustentant eas, quæ incumbunt; & hæ certe gravitant, nec tamen si locum sub fornice re-

plcas corporibus aliis, superiorum partium gravitatio in ista aget, quod à lateralibus sustineantur. Ita in fluido res se habet. Sane ut ostendit expositum in Hydrostaticæ principiis experimentum Patris Lanca, partes aquæ inferiores nullam à superioribus compressionem patiuntur; ne quidem si in communibus vasis experimentum capiatur; cum tamen tunc certum sit aquam gravitare pro suæ altitudinis ratione. Quare sic tota aqua gravitat, ut partes superiores instar fornícis ab inferioribus, & lateralibus sustineantur. Ita certe si manum demergas, vel totum etiam corpus in vas; seu dolium aqua plenum, quādū immota consistet manus, non percipies aquæ gravitatem, quam hisce in casibus nemo inficiatur. At ubi vel malum ab aliqua velis retrahere, vel totum corpus ab illa educere, senties euidem nonnihil divisioni aqua resistere, sed pondus, pressionemque minime patieris. Ne tamen quis cogitet, verum realemque fornicem hic à nobis in fluidis constitui. Etenim aut nimium simplicis foret id imaginari, aut plurimum invidi similia nobis, nostræque doctrinæ affingere. Similitudinem fornicis assumpsimus, ut re magis sensibili sententiam nostram faciliorem captu exhiberemus. Sed dum exemplis quidpiam suadere nitimus, quisquis id ipsum intelligit reminiscatur oportet regula illius, quam in p. 1. Logicæ, sect. 3. cap. 7.

statuimus, ea videlicet, quæ per comparationem dicuntur, non esse in omnibus similia. Similitudo quippe comparationem rerum præ se fert, sed non identitatem.

Eamdem fluidi naturam, seu vim, qua partes invicem sustinentur, ea experimenta demonstrant, quibus compertum est, solidum fluidis immersum gravitatis suæ partes deperdere pro ratione ponderis ipsorum fluidorum secundum volumen æquale. Ecce enim tantum ponderis à solido amittitur, & semper proportio illa servatur? nisi quia ut fluidi, partes inferiores sustinere poterant tantum pondus fluidi, ita tantumdem solidi pondus sustineant, ut proinde hac ratione decrescat solidi ponderatio. Et solidum sanæ aquæ demersum secundum omnes sui ponderis partes gravitat, quamquam non omnium gravitatio percipiatur.

Et illud jam antea notabimus, qua nempe de causa humanum corpus aliquando innatet aquis, aliquando iisdem immergatur pro varia sua voluminis, aerisque contenti ratione. Cæterum corpus humanum gravius specificè est, quam aqua, licet non multo; unde fit minus grave ob majorem aeris expansionem.

Aliorum etiam responsio est, cæterus Urinatores non percipere aquæ gravitatem, quoniam ex propria pressione fluidi in solidum fit, ut istud ab illo undique æqualiter prematur; & ideo nulla pars so-

lidi pressionem sentit. Etenim ponderis pressio non sentitur à sustinente, nisi ex peculiari doloris sensu in parte, quæ præ cæteris premitur, & laxatur, siveque loco dimovetur. Cum ergo fluidi præssio undique sit æqualis non potest aliunde dolor esse, nisi ex nimia totali constrictione. Hæc autem à fluido non est ejusmodi, nec talis, ut corporis humani solidam perfectamque strueturam lædere valeat.

Verum hæc responsio non satis firma apparet. Quippe eadem in omnes humani corporis partes esset aquæ pressio, nec tamen ejusdem sunt resistentiæ, & soliditatis partes omnes corporis. Quare quævis crassiorem partem durioremque percellere non potest, ea tenuiorem subtilioremque afficiet. Proinde responsionem hanc permittimus iis, quibus eadem placuerit. Quemadmodum eadem ratione probare satis non possumus eorum doctrinam, qui dicunt, iccirco Urinatores non percipere aquæ gravitatem, quia quantum Urinatoris corpus ab aqua incumbente premitur, tantundem ab inferiori etiam aqua sustinetur; unde æqualis est pressio, & resistentia. Immo hoc ipsum nihil prodest humano corpori, si tantum aquæ pondus agit in illud.

Patet ergo ex his uberrima responsio ad primum experimentum. Eadem adhibenda est responsio ad secundum; quamquam etiam herbae specifice leviores aqua in fundo persæpe nascantur.

Ad tertium. Cum situla aquis repleta in aërem effertur, tunc totum volumen ex situla, & aquis conflatu in aërem specifice minus gravem trahitur. At ubi aquis immersa est, ejusdem pondus pro ratione aquei voluminis imminuitur, tum eadem ab aqua sustentatur, & sursum agitur. Hinc fit, ut situlae pondus vix sentiatur, quamdiu illa sub aquis est.

Ad quartum. Nulla est consecutio, qua dicitur debere plumbi frustum ponderare magis in aqua, quam in aere, quoniam aqua est aere gravior. Immo vero ex hoc ipso ad oppositum ratio est ex dictis in Hydrostaticæ principiis. Cum enim demersi solidi pondus imminuat pro ratione gravitatis, aquæ in æquali volumine fluidi reperitur; iccirco si gravius utique est æquale volumen aquæ, quod à frusto plumbi occupatur, quam simile aeris volumen, profecto majorem ponderis sui partem deperdit plumbum in aqua, quam in aere. Neque incumbens plumbo aqua augere potest ipsius gravitatem, quod invicem sustentent se se partes aquæ, ut ad primum experimentum diximus.

Ad quintum. Experimentum istud omnino falsum est, etsi P. Eusebius Amort. t. 3. philosophiæ, parte 2. Physicæ Particularis illud referat, q. 3. Compertum est enim, solidum corpus qualemcumque maiorem sui ponderis partem amittere, ubi fluido graviore immergitur,

tur. Quare aqua pro majori sui voluminis gravitate imminuit magis, quam aer, demersi vassis ærei pondus. Sed nec aqua in isto contenta augere potest hujus gravitatem, quoniam invicem aquæ partes sustentantur.

Ad sextum. Quandiu paryum aquæ volumen effusum est super orbem ligneum unde fit levius volumine ligni, id in fundo subsedit. At ubi orbis ligneus cessante bacilli pressione exquis emergit, id evenit, quia illius volumen longelevius est volumine aquarum, ut jam antea declaravimus.

Quamobrem allata hæc experimenta non evincunt, aquam propriis etiam in locis minime gravitare. Ex dictis autem alia phænomena queunt expendi; præsertim ex responsione ad primum evincitur non debere nos comprimi, nec sentire super caput nostrum incumbentis aeris pondus. Quemadmodum enim in aqua contingit, ita & in aere partes se se invicem sustentant. Eiusmodi est enim liquidorum natura.

Objicies 2. Gravitas data est elementis, aliisque rebus, ut se se ad propria loca naturalia reducant. Ergo semel ac sunt in propriis locis, jam nulla amplius habebitur actio ratione gravitatis. Obtento enim fine cessat actio, propter quem ea suscepta est. Ergo aqua in mari, & aer tellurem ambiens, ibidem minime gravitant. Quod si in terræ centrum semper niti

dicantur, hoc omnino est impossibile, cum nequeant simul omnes aquæ, & aeris partes centrum tenere. Secundo quoties solidum corpus fluido immergitur, ea ponderis imminutio secundum æquale volumen fluidi, non siccirco habetur quod aquæ partes se sustineant, sed aliunde videri poterit repentina ratio. Id enim contingit propter vim, qua fluidum resistit divisio, & æquilibrium, & partium associationem servare nititur, vel deperditam recuperare; unde laterales aquæ partes in demersum solidum urgentur pro ratione æquilibrii sublati, & associationis deperditæ. Hinc in diversa etiam altitudine columnæ aereæ pondus duarum librarum æqualem præbet suæ gravitatis sensum, licet pro altitudinis ratione diversa sit aeris incumbens gravitatio.

Respondetur gravitationem ex massa corporis esse repetendam. Sic autem illa exercetur, ut Terra circa centrum congregari nitatur; aqua vero circa Terram ipsam; & aer, circa aquam. Sic est enim Universi Ordo, & gravitatis natura, ut graviora subsidant minus gravibus. Quare nec omnia gravia coire in unum Terræ centrum contendunt, sed pro suæ gravitatis ratione invicem ad centrum conglobatione ordinari. Hinc fit, ut terra, aqua, & aer, etsi in locis existant sibi respondentibus, & à natura ordinatis, gravitent tamen, ut suam servent conglobati.

bationem suumque ordinem.

Ad 2. hic apparet ratio. Eatenus enim aquæ se se ad libelam componunt, & sublato æquilibrio illud repetere nituntur, quia gravitant invicem, unaque pars alteram premit, ut illa circa Terram congregatio habeatur, & partium associato restituatur. At vero motus ille lateralium partium aquæ in demersum lapidem non potest illius pondus imminuere, sed solum hac illac lapidem commovere. Nec alia potest esse caussa illius adeo proportionatae imminutionis, nisi quia partes aquæ se se invicem sustentant; unde pondus æquale aquæ volumini imminunt. Vidimus etiam in Hydrostaticæ principiis pro majore fluidi specifica gravitate majorem quoque demersi solidi gravitatem admitti. Quare ubi sensibilis est diversitas ponderis in aere, ibi & sensibilis est major vel minor solidi gravitatio. Quod si in diversa columnæ aereæ altitudine, idem est solidi pondus, hoc ideo provenit, quia omnes illius columnæ partes sunt ejusdem gravitatis specificæ, & una alteram sustentat, & tantumdem suo elaterio incumbentibus partibus resistit, quantum istæ prement.

Plurima occurunt hic alia experimenta quorum rationem exhibere juvat, ietsi ad elementorum gravitatem videantur non satis apte à plerisque constitui. Primo itaque P. Pace tract. 6. partis 2. Physicæ

refert ex Florentina Academia Experimentali, ignitum carbonem sub una bilancis scutula positum eam deorsum trahere; & supra scutulam ita constitutum, ut eidem non incumbat, tum ipsam elevare. At experimentum non ita contingit, sed posito ignito ferro vel supra, vel infra lancem, hæc semper elevatur, altera lance depressa. Ita expertus est Joannes Alphonsus Borelli, ut docet in libro de motibus naturalibus à gravitate pendentibus prop. 61. qui id ipsum præfatæ Academiæ communicaverat, quamquam per errorem res aliter exposita fuerit. Id porro oritur à motu, quem aer calore ignis rario effectus sursus concipit ab aere densiore impressum, unde fit ut eundem motum etiam lanci communicet, proindeque ista elevetur, quo sane modo combustæ papyri partes sursum evolare cernimus. Hæc animadvertisit Ferdinandus Gasperoni in epistola ad Ludovicum Antonium Muratori.

Scundo non defuere qui dixerint, ampullam vitream plus ponderare reclusam sub aquis, quam in libero aere; eamdemque aliquando frangi sub aquis detentam. Sed illud primum omnino falsum convicitur, tum ex multis aliis experimentis tum ex principiis Hydrostaticæ. Alterum vero ex vehementis aeris condensatione repetitur.

Tertio si corpori Urinatoris appositæ sint cucurbitulæ; tunc Uri-

na-

nator per octo vel decem passus infra aquas descendens, sentiet eas tanta vi apprimi corpori, ut dolorem sustinere non valeat. Ex auribus etiam, & naribus Urinatorum sœpe sanguis exprimitur. Et Plinius lib. 31. Historiæ, c. 6. refert, luxata hominum, & quadrupedum corpora, natando in cuiuslibet generis aqua, facillime ad locum suum restitui. Porro primi effectus ratio non est repetenda ab aquæ pressione: quæ ad eam parvam altitudinem, secundum quam gravitat, non est tanti ponderis, maxima illa vi operetur. Caussa igitur est, quod aer intra cucurbitulas inclusus magis condensatur ob aquæ frigiditatem; atque ideo carre fortius trahitur, magisque elevatur. Secundi effectus caussa est difficultas, quam Urinatores patiuntur, aquam dividendo, sibique viam per eam parando; labor, quo membra movent; tum quod diu spiritum continuerunt. Terti effectus caussa esse poterit (sive verum est, quod ait Plinius) motus ille, quod corpus agitatur, & membra distenduntur, unde fit, ut naturali tensione locum proprium obtineat unaquaque pars, quo obtento difficile ab illo extrahitur.

Quarto aquam super terram existens eam penetrat, & pervadit, cogendo aerem minus gravem egredi. Qui ex alto loquitur facile auditur ab existentibus in loco inferiori, non è contra; tum quod aeris gravitas promovere potest mo-

tum soni deorsum directi; tum quod crassior & impurior aer ab ore loquentis egressus facilis descendit. Si folliculo inflato tale adjungatur pondus, quo mergi possit in aquam: deinde ferreo circulo circumdetur folliculus, ita ut folliculi, & circuli diametri inter se æquales sint: & postea per aliquot palmos immersatur, tunc, circulus folliculum refinquet; nimirum quia aer in folliculo contentus addensatur propter aquæ frigiditatem; tum quod aqua in aerem specifice minus gravem actione sua nititur.

Nunc de igne disserimus; an ne ignis gravis potius vel levis dicendus sit? Est enim plurium Recentiorum sententia, ignem esse gravorem cæteris omnibus elementis. Ita P. Casati, de Igne, dissertat. 3. P. Pace part. 2. tract. 6. cap. 1. Ita & legitur in Republica Literaria, tom. 6. Boyles autem multis experimentis tradit ignem esse gravem, in capite, cur titulus est: *Detecta penetrabilitas vitri à ponderabilibus partibus flammae.*

Aliorum autem opinio, & quidem vulgaris etiam, & communis fert, ignem levem esse. At cum levitas vel absolute spectari possit, quo sensu nistum rei sursum præ se fert; vel relative, quatenus minor gravitas est, unde minus grave respectu majoris rite dicitur leve, locumque superiorum sibi proprium habet; ictice non est modo imorandum, existat-ne illa absoluta levitas in igne, Sat erit investi-

gare , sit-ne ignis gravior cæteris elementis , aut aliquo saltem eorum , ut proinde ubi corporis aliuscujus poros excusso aere occupaverit flamma , pondus illi addere possit.

Dicimus igitur ignem respectu saltem ad alia elementa esse levem , adeo ut nec ipso aere sit gravior. Ita sane fert communis opinio , ac veluti ab Naturæ Auctore in ditta notio.

Probatur 1. Nulla sunt experientia , quæ ignis majorem gravitatem ostendant : quemadmodum argumentorum enodatio declarabit. At vero ignis sursum ascendit , undecumque hujusce ascensus causa procedat. Quemadmodum igitur terram dicimus graviorem aere , coquod illa hujus profunda petat , ita consequens est ut ignem fatemur aere leviorem , quia supra aerem ascendit. Atque adeo ignis respectu aliorum elementorum est levis.

An vero ignis ex se se gravis sit , etsi non cæteris elementis , non dis putamus. Corpus sane est , & ex materia compactum. Id unum sufficit explorare nos hic non posse ignis gravitatem. Unde Esdræ lib. 4. cap. 4. vers. 5. Angelus Uriel hanc inter alias de rebus naturalibus quæstionem insolubilem Esdræ proponebat: *Pondera mibi pondus ignis.*

Dices quemadmodum ignis flamma sursum igitur , ita ignis carbo , & ferrum ignitum descendit. Immo

Tom. II.

experientia compertum est , non nullas flamas è sublimi decidere & alias in subterraneis specubus , consistere , nec sursum ferri. Quare eatenus flamma sæpe ascendit , quod ex rarissimo vapore , & ex igneis particulis , in vicem contex tis volumen coalescit specifice lexius aere. Vapor autem ille secum trahit sursum igneas particulas , quomodo aqua cœnosa secum trahit peregrinas terræ particulas , quæ nihilominus specifice graviores sunt aqua.

Respondetur , non camdem esse rationem de flamma , & de ferro cadenti , & carbone ignito. Nam ferrum , & carbo , etsi plura in suis poris contineant ignea corpuscula , non tamen sunt substantialiter ignis , quemadmodum est ipsa flamma. Quare ferrum , & carbo propria sua gravitate deorsum feruntur , & secum evanescunt igneas particulas , quas continent. Sic etiam ratione gravis , & terreæ materiæ descendunt ignes in sublimi accensi , ubi materia illa fit densior , & contractior , unde volumen habet gravius æquali volumi ne aeris. Quæ in locis subterraneis flammæ consistunt , à materia detinentur , quam depascuntur : & tamen sæpe maximo impetu foras erumpunt : ut apparet in ignibus Ætnæ in Sicilia , & Vesuvii in Campania.

At vero vapor ille , qui flammæ admixtus est , semper in illa extat. Quare jam sequitur flammæ volu-

N men

men accedente illo vapore esse specificē levius aere. Non erit adeo ignis aere gravior. Qamquam & scintillæ ascendunt, quin vaporem permixtum habeant, à quo sursum trahantur. Terreæ autem particulae, ubi cessat externa violenta actio aquæ concitatæ, subsidunt, ut scintillæ sursum feruntur. Ergo illæ sunt aqua graviores, istæ sunt aere leviores.

Probatur 2. Experientia ostendit ignis gravitatem præ gravitate aliorum elementorum nullam esse, seu ignem esse leviorem aere. Ut enim refert etiam P. Pace: Duæ virgæ cujuscumque metalli, pondere primum æquales, quarum una candens fiat, altera frigida permaneat, in bilance positæ sic se habent, ut æquipondium tollatur: Posterior nempe cadenti gravior est. Id ipsum sæpe nos experti sumus in pilis ex ferro nondum bene expurgato compactis. Ubi enim una ignem continebat, levior erat altera; cuius pori ab aere implebantur. Evolatis autem postea à poris pilæ igneis particulis, agnivimus nihil ponderis deperiisse; & utramque ferream pilam frigidam ejusdem ut antea gravitatis esse. Ergo ignis levior est aere. Alioquin cum æquale aeris, & ignis volumen in poris metallorum extat, deberet gravior esse virga, vel pila cadens. Quod falsum est.

Respondent ignem in virga contentum expellere ab ea vapores humidos, terreas particulæ, & crassi-

siorem aerem: rarefacere etiam aerem incumbentem in virgam ipsam, & subjectam scutulam. Unde levior fit virga, ac antea fuerit, quando vaporibus, exhalationibus, & crassiore aere opplebantur illius pori, & in illam incumbebat aer densior, & gravior. Id ipsum confirmare nituntur, quia si depressæ scutulæ ignitus carbo approximet, brevi spatii intervallo, tunc statim cum altera rursus æquilibratur.

Verum si hæc responsio vim habet, contra statutam ignis gravitatem pugnat, & in ipsos recidit Recentiores, qui majorem ignis gravitationem tuentur. Nam si ignis actione sua eos habet exhibere effectus, nimirum crassiorem aerem vaporesque, & exhalationes depellere, atque incumbentem aerem rarefacere, & ejusdem pondus immuinere; id sane præstabit ignis semper, etiam in iis omnibus experimentis, quibus Recentiores utuntur, ut majorem ignis gravitatem probent, quoniam pleraque corpora igni applicata accrementum ponderis acceperunt. Ut enim in illa virga metallica, aut pila ferrea ignis imminuit gravitatem, quoniam depellit aerea, aquæ, & terrestria corpuscula, & incumbentem aerem rarefacit; ita & in aliis eadem effecta necessario præstat, atque adeo gravitatem illorum deberet immuinere. Quod si reipsa aliquando augetur gravitas corporum ad ignem applicatorum, non ab ig-

igne profecto , sed aliunde repetenda erit ratio: ut postea declarabimus.

Equidem ut ignis poros implet cuiuslibet corporis , depellere ab isto debet aqueos vapores , exhalationes terreas , & crassum aerem.Ubi vero poros corporis implet, semper calore suo incumbentem aerem rarefacit. Ergo eadem semper est ignis actio sive in virga & pila , sive in aliis omnibus corporibus. Cur ergo virgæ , & pilæ pondus immunit , aliorum autem corporum gravitatem auget; & quod illis detrahit , istis attribuit? Immo cum uberior utique sit ignearum particularum copia , ubi metalla fuerint diu igni applicata , quemadmodum in aliis Recentiorum experimentis factum est , profecto major habetur aeris rarefactio tunc , quam in experimentis illis , quæ nos retulimus.

Hinc si verum est quod dicitur , carbonis nimirum igniti approximatione super scutulam frigidæ virgæ restitutum fuisse æquilibrium; id contradictam responsonem vallet. Nec enim carbo tantam potuit aeris incumbentis rarefactionem facere , quantam totus ignis in virga cadenti contentus. Quamquam idipsum coincidere videtur cum eo experimento , quod retulimus prope finem præc. quæst. Quare si approbandum est , in aeris commotionem refundi debet.

Objicies primo. Boyle cupræ laminae fructum ad ignem sulphu-

ris in crucibulo exposuit , laminamque postea invenit ad quintam partem prioris ponderis crevisse , moleque auctam fuisse. Quin etiam stannum , & plumbum in vitreis vasis hermetice sigillatis fusa ad ignem , & calcinata , ponderis non-nihil acquisiere ultra illud , quod habebant ; atque calx illa ut candidissimus pulvis apparuit : ex quo infertur , non à fuligine , sed ab igne auctum fuisse illud pondus. Præcipue cum ejusmodi augmentum obtentum fuerit adhibitis carbonibus , & spiritu purissimo vini accenso , qui fulliginem non emittunt. Sexenta sunt alia in idipsum experimenta. Et tegula ipsa (ut omnibus compertum est) ad ignem excocta acquirit majorem gravitatem , etiamsi tot amittat humida corpuscula. Igitur ignis est aere gravior.

Respondetur igni permixtos esse , & ab eodem continuo emitti plures fumos , terreosque halitus , qui & crassiores sunt , & in majori copia , ubi materia inflammabilis crassior est. Quod si materia hæc sit subtilior , ac purior , subtiliores etiam , ac puriores sunt illi halitus , ita ut quandoque visum nostrum effugiant; neque tamen inde negare debemus halitus illos reperiiri , etiam in spiritu vini accensi. Multa etiam in quacumque inflammabili materia reperiuntur corpuscula nitrosa , & sulphurea , quæ minutissimas ignis particulas in se excipientia , tum ab impetu

virtute ignis impresso , tum ratio-
ne propriæ subtletatis sursum avo-
lant. Ab his sumis, halibus, sul-
phureisque , & nitrosis corpusculis
augetur pondus illorum corporum,
quæ igni admoventur ; tunc enim
major copia halituum emititur,
ita ut exinde halitus illi in poris
eorumdem porum pervadentes ,
ibique recepti , & propria figura
invicem se se implicantes , con-
crecent in moleculas. Ex ipsa e-
tiam diutina ignis actione fit , ut
particulae illæ in moleculas con-
crecentes albicanter induant col-
orem. Adnotare autem luet in
ferro non bene expurgato non posse
tam facile eos halitus , vapores
que , aut sulphureas , nitrosasque
particulas concrescere in molecu-
las ; quoniam laxiores pori ipsius
ferri liberiorē relinquunt ingressum ,
& egressum externo aeri,
cujus actione illæ particulae dividunt , & evolare coguntur. Et quem-
admodum aquei vapores ubi rario-
res sunt , & dispersi , volumen spe-
cifice levius aurco volumine æqua-
li obtinentes , sursum evehuntur,
at quando densiores fiunt , & invi-
cem collecti gravius habent volu-
men , & descendunt ; ita halitus
in moleculas concreti graviores
sunt acre , invicem vero disjuncti
sunt acre leviores. Eadem de cau-
sa augetur pondus tegulæ.

Quod diximus sulphurea , & ni-
trosa corpuscula ingredi poros cor-
poris ad ignem expositi , augere-
que illius pondus ; obsimare possi-

sumus experimento , quod recen-
setur à Patr. Regnault exercit. 17.
ex Historia Regiæ Academiæ,
1677. Visa enim fuere corpuscu-
la quædam cinericii coloris adhæ-
rescere Regulo Antimonii inflam-
mati. Idipsum vero ostendit , ignem
attrahere ad se se corpuscula
circumiacentia : sive id conti-
ngat , quoniam ignis circumstantem
sibi aerem , & vapores depascit , unde
actio alterius partis aere auget
ignem versus : sive qualibet alia
ex caussa idipsum oriatur. Hanc i-
tidem responsionem probavit Do-
ctor Taglini in sua Epistola Philo-
sophica , pag. 106. ubi etiam hanc
reddit rationem. Quia nimurum
ipse Boyle docuit , propter ignis
violentiam ampliari poros corpo-
rum , & aptiores reddi ad excipiendā
ea corpuscula , quæ per aerem
disparsa sunt. Addit P. Regnault
nonnulla alia experimenta inter
quæ recenset aquam frigidam esse
graviorem tepida.

Objicies 2. Metallum quolibet
innatæ metallo ejusdem speciei li-
quato ad ignem : ergo metallum
igne fusum gravius est non fuso ; &
hoc ipsum nonnisi ab igne obtinet.
Tum si ignis levior est aere , debe-
ret sursum trahere secum materiam
inflammabilem , quæ illi connecti-
tur. Demum saltem igneæ particu-
lae deberent evolare à poris ferri ,
si leviores sunt aere. A quo enim
detinentur ? Igitur &c.

Respondetur metallum solidum
innatæ fuso , quia una cum aere ,
quem

quem continet in poris, levius volumen habet subjecto metallo fuso: quemadmodum in Hydrostaticæ Principiis de Navi diximus. Quod si metallum fusum evaderet gravius, non ab igne, sed aliunde ratio repetenda est: ut antea dicebamus.

Eadem de causa ubi volumen flammæ, & materiæ inflammabilis est gravius aereo volumine. Ignis non potest secum trahere materiam. Res in scintillis è contrario evenit.

Ad tertium. Experientia manifestat plurimas ignis particulas è ferri poris evolare. Scintillæ enim sursum evehuntur. Quia tamen plures aliae ignis partes continentur intra cavitates, & anfractus igniti corporis, ibique cuspidata sua figura infixæ, invicem impllicantur, siccirco impediuntur ab iisdem cavitatibus, ne recta possint sursum moveri: & cum egredi non possint, nisi per motum lateralem, interdum ibi delitescunt, donec vel aeris actione excussæ cogantur egredi, vel violentia, aut deficientia extinguantur.

QUÆSTIO QUARTA.

Quænam figura adscribenda sit particulis minimis singulorum Elementorum?

UBI

De Ignis, & Terra natura spe-
ciatim disserimus.

Inter eas affectiones, ex quibus elementorum naturam colligimus, una specialis est configura-
tio, seu figura minimarum partium, quæ elementa componunt. Inde enim fas est eorumdem effe-
cta explicare. Porro corpora omnia ex quibusdam minutissimis particulis conflari, quas dicimus Minima Physica, & propria figura donamus, compertum omnibus est. Hæc ipsa tamen figura cuius-
modi sit, difficile dignoscitur, eam-
demque non nisi ex effectis licet nobis cognoscere. Proinde illa erit figura aptior Minimis Physicis aliqui-
corporis, qua concessa obti-
neri, & explicari poterunt ipsis effectus. Nam etsi figura non fit activa quædam virtus, plurimum tamen confert velut dispositio ad exercendos motus, & operationes.

Quænam igitur figura minimis particulis cuiuslibet elementi ad-
scribenda sit, impræsentiarum in-
quirimus: qua in re Philosophi pro modo dissident. Veteres Peri-
patetici cum Aristotele arbitrati sunt,

sunt, omnia elementa eamdem habere figuram, ipsamque sphæricam esse, seu rotundam. Quod vero ad Ignem attinet, Gassendus cum Epicuro docuit armorum ignearum figuram esse rotundam. Quam sententiam inter alios Recentiones tuerit etiam P. Fortunatus à Brixia in *Dissertatione Physica Theologica, de Qualitatibus corporum sensibilibus*, n. 96. & alibi. Cartesius ex ramosis tertii sui elementi particulis ignem componit, à primo suo elemento abreptis. At Plato in Timæo tradidit pyramidatam, sive cuspidatam esse figuram particularum ignis.

Variæ quoque extant sententiæ de figura partium minimarum aeris. Primo enim nonnulli putant, aerem corpus esse nulla propria figura peditum: quod Cartesius de suo primo elemento docuit. Aliis particularum aeris figura rotunda est. Alii vero ramosam esse aeris figuram dicunt. Postremo spiralem esse particularum aeris figuram plerique tradunt: nempe ad Spiræ modum convolutas esse aeris particulas docent. Est autem Spira revolutio quædam, sive circulus, qui in se ipsum non recurrat. Sic Serpentes in Spiræ modum convoluti esse dicuntur, cum in orbem contracti quosdam quasi circulos imitantur. Ita & funes nautici in orbem convoluti, Spirarum modo dispositi sunt.

Neque minor est opinionum varietas de figura minimarum par-

ticularum aquæ. Gassendus, sect. 1. Physicæ, lib. 6. post Democritum, Epicurum, & Lucretium, aquæ quemadmodum & ceterorum liquorum, naturam in particulis lævibus (seu politis), ac rotundis, aut certe ad sphæricam figuram accendentibus constituit: quæ particulæ crebris interstitiis, seu vacuolis discretæ tactui facile cedunt, cumque lubrica sint, nisi continentur, disfluunt. Platonis sententia fuit in Timæo, octaedricam esse figuram particularum aquæ, nempe octo facierum triangularium. Quam opinionem ita secutus est Borellus, in libro, *de motibus naturalibus à gravitate pendentibus*, ut etiam aquæ illis particulis exterius adnexa putaverit subtilissima quædam filamenta vario modo inflexa, & arcuum instar contorta, quæ ubi corporibus externis adnectuntur, antequam ab illis vi facta separantur, protrahuntur, & aliquantulum distrahuntur, tum in se se contorquentur, & contrahuntur ubi extranea illa vis ab actione cessat. Aliis cubica est figura particularum aquæ (Cubus enim est figura ex omni latere quadrata); & Boerhave in libro Instit. & experim. Chemicæ t. 1. tit. 3. de aqua, n. 9. cubos aquam componentes putat esse intus excavatos. Cartesius vero, 4. parte Princip. minimas aquæ particulæ cylindricas esse conjicit, seu teretes (Cylindrus namque dicitur quidquid rotundum, & oblongum est);

qua-

quatenus in illis anguli circumquaque, quasi torno videantur esse detriti. Plerique demum Philosophi arbitrantur, aquam ex diversis corporibus esse compactam, quorum aliqua sint sphærica, seu lœvia, alia viscida, & rarae contexturæ.

Figura autem minimarum particularum terræ communi sensu ramosa statuitur.

Dicimus, minimas Ignis particulas verisimilius esse pyramidatas; aeris particulas esse figuræ spiralis; aquæ particulas esse oblongas, & anguillarum instar efformatas, multiplici tamen asperitate præditas; terræ autem particulas ramosa constare figura.

Probatur prima pars. Ea figura est igneis particulis tribuenda, quæ maxime conferr effectibus ignis explicandis. Ejusmodi sane est pyramidata figura. Hinc enim optime intelligitur, quomodo Ignis lignum destruat; nam vi sua veluti cuspidatus ensis partes ligni penetrans dissolvit; hinc & duriora dividit corpora, dum cuspidatis particulis suis, veluti totidem cuneis locum sibi facit. Aliorum item effectum Ignis erit postea hinc aptior exhibenda declaratio. At si ramorum instar Ignis particulæ se haberent, non adeo facile possent penetrare maxime ubi minutissimi sunt corporum pori, implicant enim potius se se invicem. Ita & difficile partes corporum pervadent illæ particulæ, si rotundæ fo-

rent. Igitur dicendum est, Ignis particulas potius esse pyramidatas quam rotundas, vel ramosas.

Objicies 1. Ex Taglini in epistola philosophica ad Marchionem Gabrielem Ricardi. Ignis velocissime movetur, nec detineri potest, sed effugit. Ergo illius particulæ nullis potius angulis constant, atque adeo rotundæ sunt, unde & facile reflectur.

Respondetur, spectare nos etiam in igne quamdam partium colligationem, quam sine ulla angulis vix possumus concipere. Ex ipso motu velocissimo Ignis fit, ut detineri nequeat, & effugiat; nec necessarie est ad ejusmodi motum particulas Ignis esse rotundas, sat enim est, si duræ sint, & rigidæ, quod fatemur, ex quo etiam repetitur reflexio.

Objicies 2. Ignis acuminatur, eo quod ab aere circumambiente comprimitur. Unde ratio producitur duæ flammæ continguae in eumdem conum, non secus ac duæ guttulae aquæ in eumdem globulum coeant. Quippe æquabilis aeris circumambientis pressio utrumque procreat effectum. Ergo pyramidata figura convenit Igni ab extrinseco, atque non est illi naturalis.

Respondetur, non eatenus nos colligere particulas Ignis pyramidatam habere figuram, quia hæc toti Igni conveniat. Ejusmodi enim ratiocinationis modum à toto ad partes in accidentariis affectionibus ine-

ineptum esse jam diximus q. 2. præcedentis disputationis. Esto ergo aer externus plurimum conferat cuspidatae totius Ignis figuræ, non inde licet argumentari, eam figuram non esse igneis particulis con-naturalem; quippe quod quænam sit earum particularum figura, unice ex effectis colligitur.

Objicies 3. ex P. Fortunato. Quod divisionem efficere debet, necesse est, angulorum altero impingat in corpus divisibile. Nam si in illud incidat secundum planam superficiem, pervadere non posset. Atqui pyramidalis figura ad id præstandum idonea non est. Ergo cum ignis particulæ dividant corpora, figura potius constant rotunda. Minor probatur. Si corpuscula ignis pyramidata sunt, ut secundum angulos recta impinge-rent, necessarium esset principium, quo recta perpetuo dirigantur. Principium hoc declarari non pos-tet. Igitur &c. E contra vero ro-tunda corpuscula circumundique, & omnibus etiam suis partibus apta sunt admotum, & ad penetratio-nem.

Confirmatur ex eodem. Pyramidalis figura impedit potius effecta ignis. Ergo &c. Probatur antecedens. Pyramidalis figura figit, & implicat corpusculum pervadens inter partes corporis discindendi. Ergo motum præpedit, atque adeo ignis effecta, & corporum divisio-nem, discussionemque potius pro-hiberet. Antecedens patet ex iis,

quæ Cuneo contingunt in Mechani-cis. Ergo &c.

Respondetur. Nego minorem. Ad cujus probationem, nego rur-sus minorem. Tum enim ex ipsa pyramidali figura, tum ex ignis natura patet principium, quo cor-puscula ignis recta diriguntur. Quippe cum ignis corpuscula inte-stino motu concitata sint, & le-viora sint corpusculis aeris, (quod in p. q. docuimus) hinc fit, ut se-cundum angulos potius recta fer-rantur. Nam ea, quæ sursum mo-ventur, si pyramidata sunt, cus-pide directa moventur, plana su-perficie ad centrum conversa. Illa etiam, quæ in alieno fluido agi-tantur, & ab eodem ad motum præpelluntur, si cuspidata sint, basi depresso, & acie erecta proce-dunt; quacumque ex parte direc-tionem à fluido sortiantur: in ba-si enim majorem habent gravita-tem, ac in acie. Cum igitur Ignis & proprio intestino motu conci-teter, & ab aere itidem pellatur, atque hac, & illac circumundique, praesertim vero sursum moveatur; inde appareat ratio, cur basi depres-so, cuspide autem erecta, ignis corpuscula, in objecta corpora im-pingat. Rotundam vero figuram divisioni efficiendæ non adeo aptam esse declaravimus.

Ad Confirmationem. Nego ante-cedens. Ad probationem, dico, compertum etiam esset ex Mechan-i-cis, Cuncorum multiplicatione par tes corporum discendi, &, quan-

quando *cuneus* aliquis in iisdem implicatus fuerit, aliorum ope extricari. Plurima porro ignis corpuscula actionem ignis efficiunt, & corpora objecta discindunt; atque adeo &c.

Probatur secunda pars de minimis particulis aeris. Supponimus autem, ætheream substantiam, seu aerem subtiliorem præsentim (de quo in seq. quæst.) tum facile pororum in corporibus extantium configurationi se se accommodare, tum minutissimum adeo esse, ut spatiola quæque implere valeat. Figura illa minimis particulis aeris adscribenda est, quæ maxime confert explicandis phænomenis, seu effectibus ab aere provenientibus. Atqui ejusmodi est Spiralis figura. Igitur &c. Minor probatur. Aer comprimitur, & elastica virtute, ut in quæst. seq. declaravimus, restituit se se, & dilatatur, sublata vi comprimente: maxime fluidus est, ac mobilis; ejusdemque particulae invicem sibi met aliquatenus cohærescent, & adhærent etiam corporibus illis, quæ tangunt. Sed hæc omnia per solam spiralem figuram aptius explicari possunt. Ergo &c. Major quoad priores aeris affectiones postea patebit; quoad illam autem adhæsionem ostenditur. Nam si diversa salia, seu mineralia in aquam, vel in aliud menstruum dissolvenda injicias, eorumdem superficie adnexæ apparent bullulæ quædam aeris, quæ minores salium particulas secum trahunt, aliquando usque ad deter-

Tom. II.

minatam altitudinem, ac tum cader eas sinunt, si major ipsarum particularum gravitas obsistat, dum interim aeris bullulæ egrediuntur; aliquando usque ad superficiem liquidi; aliquando autem à majori particularum gravitate & ipsæ aereæ bullulæ in fundo detinentur. Apparet etiam, crassiores bullulas aeris gravibus salium moleculis annexas, ab altitudine versus fundum oblongari, quoniam moleculæ sua gravitate separari nituntur. Unde etiam compertum fit, minimas aeris particulas, quæ in bullulas crescunt, invicem cohærere. Probatur igitur minor. Ubi aer comprimitur, contrahuntur aeris spiræ, & postmodum, sublata vi premente, spiræ istæ resiliunt, extenduntur, ac dilatantur. Adhæsio etiam illa particularum aeris ad invicem, cum externis corporibus, ex spirali figura satis apte explicatur. At vero figura rotunda non satis congruit elaterio, & adhæsioni aeris: figura autem ramosa tum eidem elaterio, tum maxime aeris fluiditati, ac motui non apte respondet. Igitur &c.

Probatur tertia pars de minimis particulis aquæ. Si minimæ particulae aquæ dicantur oblongæ, & anguililarum instar efformatae, multiplicitatatem asperitate præditæ, apta redditur ratio motus, & fluiditatis, aliorumque effectuum aquæ: tum expendi potest adhæsio, quam aquæ partes invicem habent, & cur aqua comprimi nequeat, de quibus

O quæst.

quæst. 8. dissenseremus. Hæc vero omnia aliis sententiis non satis congruunt, immo plurima adversantur. Igitur &c. Antecedens probatur, rem ipsam, & effectus declarando. Si enim oblongæ sint aquæ particulae, & anguillarum instar configuratæ, ac multiplicem habeat asperitatem; hinc motus ipse, & fluiditas aquæ facile intelligitur, per hoc quod illæ particulae alia aliis more anguillarum incumbentes supponantur, & lubricæ sint; atque adeo per plana inclinata præsertim facilius ruant. Ex eadem illa configuratione continuitas habetur partium aquæ, & illarum invicem adhæsio, quæ maxime ab illarum asperitatibus fovetur.

Inde etiam liquet, cur aqua facilis in vapores abeat, quam oleum, quia nempe oblongæ aquæ partes facilis à se mutuo discedunt, & avolant: ramosi vero, atque intricati oleorum ramuli inter se tenacius implicantur. Cum vero aqua facile diffuat, & pannorum, ac linteorum meatus trajiciat, hinc fit eam aptissimam esse ad sordes abluidas; quas secum trahit, tum ratione figuræ oblongæ, tum maxime ratione asperitatum. Non item oleum hanc aptitudinem habet, cum illius partes ramosæ tum sibi mutuo, tum aliis corporibus magis adhærescant, nec tam facile abscedant. Sed cum tenuissimæ sint aquæ particulae, ut erit postea dicendum, neq; linteorum sordes, plerumque oleosas, & pingues, incidere valeant, hinc in

lixiviis adhibentur cineres, qui multum salis in se continent, & ex quibus proinde per aquæ affusionem eliciuntur salinæ particulæ, quæ cum rigidæ sint, ac penetrantes, pinguedinem omnem incident, ac dividunt, & à panno, vel linteis, quibus erat implexa, separant, & evellunt; quamobrem cineres ligni in aqua diu jactati, ex quo sales omnes fere ab ipsis expressi sunt, lixiviis conficiendis parum utiles esse inveniuntur. Saponem quoque ad ablueda linta utiliter adhiberi experientia comprobat. Cum enim ex lenta, seu viscosa materia, nempe ex olei fæcibus, & multo sale componatur, hinc accidit primo, ut sordes, quæ pingues sunt, & ramosis partibus instructæ, hujusmodi viscosis, lentisque partibus facilis implicantur: deinde ut salinis veluti pugiunculis incisæ, ab ipsa aqua subeunte simul avellantur.

Ex eadem particularum aquæ figura recte intelligitur, cur salis communis grana in sartagine cum oleo, vel butyro fuso posita ad ignem non dissolvantur. Etenim ramosæ olei, vel butyri particulæ subire nequeunt salis istius poros. Sed si parum aquæ affundatur, tum aquæ partes oblongæ salem penetrabunt, illiusque particulas disjicient, ac dissolvent. Rursus aquæ vix oleo misceri potest, quia partes olei ramosæ sunt tenaciores, quam ut facile à tenuissimis aquæ particulis minutim dividantur. Aqua vix penitus avium adhærescit, quod

quod hæ leniores sint; unde corporibus tantum asperis, quæ scilicet partes fossulis, & monticulis inæquales habent, aqua solet adhærescere: in plano autem polito, & lubrico facile fluit.

Quia partes aquæ sibi mutuo incumbunt anguillarum more, habetur ratio, cur aqua facile quidem vi externa dilatetur: vix tamen, ac ne vix quidem comprimi queat. Hinc fit etiam, ut aqua calida, cum frigescit, vix extensionem suam mutet, aut sensibiliter condensetur. Ita etiam cum aquæ particulæ sali admixtæ, salis spicula involvant, aqua cum sale arctissime conjungitur, & sale imbuta vix eum dimittit. Mixta corpora, quorum minus firma est concretio, aqua permeat, & solvit, atque ex iis veluti quædam ramenta, & minutias delibat, atque hoc facilius, quo aqua est calidior, & mixta sunt laxiora; nam aqua igne acuitur. Sales, ut diximus, in primis exsolvit; vegetabilium pene omnium vires induit; tincturas, & tenuiores partes longa infusione, & decoctione elicit; ne metallis quidem parcit, maxime cum salium aculeis armatur. Inmo vero & duriora pervadit corpora, si continuo in illa cadat, vel illa percurrat. Tunc enim motu suo, oblonga figura, & asperitatibus, paulatim ramenta abripit illorum corporum. Unde experientia compertrum est celebre illud.

Gutta cavat lapidem, non bis, sed saepe cadendo.

Exposita pariter aquæ figura rationem aperit, cur aqua vitro adhærescat, nempe suis maxime asperitatibus. Quod si vas vitreum pinguedine oblineatur, aqua illi non adhæret ob eamdem illam rationem, qua fit, ut aqua non possit oleo permisceri. Cum autem oblongæ illæ aquæ particulæ propter asperitates non apte jungantur invicem, sed spatiolis quibusdam locum exhibeant, quæ spatiola æthere replentur, vel alio subtili corpore, si illud aquæ permisceatur; Iccirco inde intelligimus, qua ratione odoribus suscipiendis apta sit aqua nam odores non nisi halituum diffusione communicantur externis rebus: ut erit suo loco dicendum. Etenim subtilissimi odorum halitus pervadunt ea spatiola, quæ inter aquæ partes extant. Sæpe etiam odoriferi corporis partes aquæ permiscentur, atque hoc modo odor aquæ communicatur; sed tunc turbida redditur aqua pro ratione qualitatis, ac multitudinis corporum, quæ illi permiscentur.

Itaque ex dictis apparet, optimam in nostra sententia rationem reddi eorum effectum, quos ab aqua exhiberi compertum est. Non ita profecto res se habet, si aliorum Philosophorum placitatemneas. Etenim si sphærica est figura particularum aquæ, illarum

invicem , & cum externis corporibus adhæsio explicari non potest, nec ratio redditur eorum effectuum, quæ ab aquæ adhæsione , & asperitatis repetuntur. Id ipsum urget, si cylindrica , & omnino teres dicatur aquæ figura.

Rursus si sphærica est , aut cylindrica aquæ figura , nullum daretur corpus duplo gravius aqua in volumine æquali cum illa. Atqui experientia compertum est Aurum , in volumine æquali cum volumine aquæ , decem & novem vicibus esse gravius aqua. Ergo figura partium aquæ non est sphærica , nec cylindrica. Probatur major. Etenim sint sphæricæ partes aquam componentes : quæ autem aurum constituunt , cubicam dicantur habere figuram. Profecto ejusmodi partes cubicæ cum aptissime inter se suis superficiebus jungantur , vixque spatiolum ullum inter se se relinquant, efficient corpus longe pravius cæteris omnibus; quippe specifica corporum gravitas proportionalis est quantitati materiæ sub æquali extensione comprehensæ , ut docet Newtonus libro tertio , prop. 6. Princip. Phys. Mathem , & Hugenius , de Caussa Gravitatis ; vel ut arridet Cartesio in epistola ad Elisabeth Principem Palatinam , proportionalis est quantitati meatum , qui inter æqualium corporum partes extant. Nihilominus aurum , etiam in ista hypothesi , quod nempe illius partes sint cubicæ , non po-

terit in volumine æquali esse duplo gravius aqua , si istius particulae sphæricæ sint. Nam cubus ad spheram , cuius diameter est æqualis uni lateri ipsius cubi , se habet ut 21. ad 11. quemadmodum demonstrat Archimedes in libro de Sphæra , & Cylindro , prop. 38. quæ utique proportio minor est dupla. Id ipsum eveniret etiam si particulae aquam componentes sphæroidi similes dicantur. Quippe si Sphæroides cum suo conferatur Parallelepipedo (Parallelepipedum autem est solidum ex quadrilateris ex adverso parallelis comprehensum,) Parallelepipedum ad Sphæroidem habet eamdem proportionem , ac Sphæra ad Cubum.

Quod si partes aquæ supponantur cylindricæ , quoniam cubus ad Cylindrum se habet ut 14. ad 11. quemadmodum ostendit Archimedes in libro de Dimensione Circuli , propositione octava ; nam & diameter basis cylindri est unum ex lateribus ipsius cubi , & cylindrus æqualem habet cum cubo altitudinem : Ita profecto & pondus auri esset ad pondus aquæ juxta proportionem eamdem , nempe ut 14. ad 11.

Ita etiam si partes aquæ dicantur octaedricæ , aurum seu aliud corpus cubicum , quod idem habet latus cum octaedro , esset sextuplum aqua gravius ; cum cubus ad octaedrum sit in sextupla proportione: ut apparet in propositione 21 , libri 16. Elementorum , quem

quem Candalla addit Euclidianis. Si demum cubica sit aquæ figura, ipsa aqua vel cæteris gravior esset corporibus, vel saltem nullo alio levior; quemadmodum ex dictis apparet. Atque hic etiam urget, quod cubica figura solido magis corpori accommodata sit, quam fluido, & movili.

At ex data nostra sententia facile occurrit responsio præallatis argumentis, si contra nos proponantur. Quippe cum multæ sint in aqua asperitates, hæ locum faciunt spatiolis, atque adeo inde repetitur minor aquæ gravitas animadvertisimus autem aurum poris nequaquam esse destitutum, cum hydrargyrum in illud penetretur. Ex quo etiam possumus colligere non esse cubicam particularum aurii figuram, etiamsi aurum sit longe gravius aqua. Erit ergo ratio disparis adeo gravitatis, diversa longe spatiolorum insensibilium quantitas.

Neque vero propositas contra sphæricam, vel cubicam aquæ figuram difficultates effugere poterit qui cum Boerhave affirmet imminui pondus sphæricarum, aut cubicarum partium aquæ, ex quo istæ intus sint excavatae instar fornicis. Nam id ipsum vero minus simile videtur. Quippe si res ita se habet, posset utique aqua compressionem pati, quoties externa vis urgeret partes aquæ; tunc enim istis liberum intus spatium responderet, in quo convolvi possent.

Nec probabile est globulos illos, vel cubos aquæ omnibus prorsus carere meatibus, eorumque materiam adeoque compactam esse, & duram, ut densari nequeat, & comprimi: quemadmodum idem Dominus Boerhave opinatur; Quippe certum est dari posse talem, ac tantam vim, quæ firmitatem illius materiae valeat superare. Rursus experientia ostendit aquam vi caloris rarefieri, & in vapores dissolvi, qui leviores sunt aere, unde & sursum elevantur, atque in aere consistunt. Ergo affirmare oportet partes aquæ constare meatibus quibusdam; saltem juxta Recentiorum sententiam, quæ rarefactionem depromit ex subtilis materiae penetratione. Demum ipsa cubica figura ineptior est motu; & cubi, aut globuli, qui intus excavati sint, difficilius, tardiusque per plana inclinata descendunt, ac cubi, vel globuli; qui interiori cavitate destituantur, & majoris sint ponderis. Ex quo colligitur non rite Dominum Boerhave judicasse, aquam facilime moveri ob internam illam cavitatem cuborum aquam componentium.

Infertur etiam ex dictis non oportere multiplicem in partibus aquæ figuram constituere, cum ex nostra sententia expendi rite possint omnia aquæ phenomena, & aliunde similibus omnino partibus aqua videatur constare, ut proinde dissimilares in illa partes gratis conficitæ sint.

Objicies. Si cubica non est fi-

gura partium aquæ , nulla suppetit ratio , cur aqua comprimi nequeat , nec in minorem reduci locum : de quo erit postea dicendum. Rursus explicari non potest , quomodo aqua æquilibrium servet , ita ut semper ad libellam constituta videatur. Igitur &c.

Respondetur ex dictis optimam horum effectuum patere rationem , si oblongam dicamus , & asperitatibus donatam aquæ figuram. Inde enim fit , ut partes invicem incumbentes compressionem non sustineant. Nec oportet cubicam hic advocare figuram , quæ solido , non autem fluido corpori accommodata est , & cæteris gravius reddit corpus , cui convenit. Ita & æquilibrium haberi intelligimus , quod nempe aquæ partes tum minimæ sint , tum sibi mutuo incumbant , & æquabiliter ab aere premantur.

Probatur denique pars quarta nostræ assertionis , de minimis terræ particulis. Partes terræ invicem validius cohærent. Sed hoc ipsum facilius intelligitur , ubi ramosam illis inesse figuram dicamus : inde enim fit , ut ipsæ invicem se se firmiter complectantur , nec facile locum præsent divisioni. Ergo minimis terræ particulis figura ramosa adscribenda est. Compertum est etiam , easdem fixas admodum esse , & solidas , unde etiam ignis vi difflari in auras terra non potest. Neque tamen oportet , Epicureas atomos , quas ramosas dicunt , vel tertium Cartesii elemen-

tum , ramorum instar figuratum , hic approbare ; cum ramosa figura etiam sine illis consistat , immo vero atomis indivisibilibus nequam convenire possit.

De aliis affectionibus , & natura Ignis.

Altera ignis proprietas est Motus. Atque intestino motu partes ignis agitari , & sursum etiam moveri , experientia ipsa omnibus ostendit. Quare ignis est in continuo motu sursum versus , & statim ac acceditur , constat ipsum evolare ; unde & in carbonibus ignitis , & in ferro candenti contingi , ut ignis actione plures illorum partes evolare cogantur & dissipentur.

Notat tamen Philosophus in libro de Juventute , & Senectute , capite 3. quod *Ignis perseverat semper fiens , & fluens , sicut fluvius.* Cujus ratio est levitas ignis major , quam obtinet , unde & supra aerem elevatur : Hinc ut in fluvio aqua aquam trudit , ita in igne unius partis motus aliam movet partem , & ex levitate flammaflammam trahit. Tractio autem ista fit ex eo quod cum ignis oleosum humidum depascatur : partes vero humidi sibi mutuo cohærent ; pars inflammata , jam jam abcessura , dum se à sequenti divellere conatur , eam interea attenuat , & accedit , quæ proinde statim post priorem abit. Ad hæc

cor-

corpus humidum sicco insinuatum, ut oleum ellychnio multas circa se habet flammæ partes brevi tempore commorantes, quatenus satis est ad alias humidi partes disponendas, incendendasque; hinc necessarium est siccum corpus, quod philtri rationem habeat, & per quod sensim diffundatur humidum ad flamمام continendam diutius, & paulatim alendam.

Hinc intelligitur, cur ventus, & insufflatio candelæ flamمام extinguat, carbonem vero magis accendat. Flamma quidem candelæ, violenter ab humido separata, non potest illum amplius accendere, & hinc flamma illico tota perit. At in carbone ex duplice causa per insufflationem fit major accensio, tum quia in eo extat multo major accensa jam materia in poris latens, quæ dum ab insufflante egredi prohibetur, pergit alias partes accendere, tum quia in carbonis superficie plurimæ extant cinereæ partes liberam igni respirationem prohibentes: iis proinde flatu discussis, augetur per dilatationem pororum exitus, adeoque actio Ignis.

Constat iterum estque consequens ad nuper dicta, Ignem respiratione & pabulo indigere, nec consistere sine alterutro posse. Respiratione est illa ipsa perennis partium materiae ignitarum evolatio, quæ ubi liberum aditum non inveniunt, condensantur à loci constrictione per suum ipsum impe-

tum: & ex hoc circutariter reflexæ compriment, & occludunt materiae inflammabilis poros; hinc non possunt reliquæ partes rarescere, & propterea ab accensione prohibentur; atque ideo si ignis non respirat, non ardet: & si parum respirat, parum ardet.

Ex hoc ipso est pabuli necessitas, ex quo scilicet novas subinde, ac novas partes attenuet, & educat in avolantium supplementum. Propterea Philosophus loco citato duplicem ignis destructionem assignat. Una fit violentia, quando vel respiratio prohibetur; ita ubi in camino partes aliquæ ignoscunt, si linteum aqua imbutum ad exitus camini applicaveris, cum aeri liber non patet aditus, & exitus, fulginis accensio non dilatatur, sed suffocatur; vel quoties maximam copiam aquæ, vel aliorum liquorum sulphureis partibus minime abundantium, in ignem injicimus, iis enim motus ignis imminuitur, tum difficilior redditur ignis in materiam penetratio; Quod si Ignis violentus maxime fuerit, adspersis aquæ guttis accensio augetur, quia istæ ignitorum corpusculorum dissipationem præpediunt: hinc Fabri carbones jam ardentes guttulis aquæ adspergunt, ut magis accendantur. Alio modo Ignis destruitur, nimirum deficientia, quando pabulum, seu materia deficit; dissipatis enim ignis partibus ex motu, cum alia non sit præsto inflamm-

ma-

mabilis materia , necesse est ignem deficere , ut omnes norunt.

Hinc est , cur ignem non destruit , sed servat occultatio sub cinere ; quia scilicet , ut ait Philosophus , *respirare non prohibetur propter raritatem cineris* , & obstat ei , qui in circuitu , aeris , ne extinguitur , copia existentis in se ipso caliditatis ; tum quod lenta tunc sit respiratio , unde ignis serius materiam attenuans , diutius perseverat.

Constat denique pabulum ignis esse humidum , non aqueum , sed viscosum , oleaginosum , ac pingue ; quare ignis depascitur oleum , ceram , picem , resinam , sulphur , & similia. Ex lignis vero ea sunt igni concipiendo aptiora , quæ crassioribus partibus abundant. Hinc ubi totum corpus humidum resolutum fuerit in ignem , non amplius materia , quantumvis calidissima , ignitur. Unde Aristoteles sectione tertia Problem. 25. dicebat *calorem in senibus , alimento deficiente , marcescere ; humor etiam alimentum caloris est ; senectus autem sicca est.*

Ex dictis nonnulla alia experimenta declarantur. Primo Carbo vix flamمام concipit , cum tamen lignum ipsum partibus aquosis refertum tam facile inflammetur ; Nimis quia humidæ , & volatiles ligni partes , dum avolant , non solum illius veluti claustra referant , & solidiores divellunt particulas , quo facilius ignis ,

& aer subeant , sed etiam cuna impetu ex infinitis velut æolipylis , & follibus erumpunt ; unde cum citius , & vehementius ligni partes dissolvantur , materia combustibilis magis disponitur. In carbone autem particulæ ignefactibiles cum crassioribus , & humidis luctantes in flamمام non abeunt , nisi tenuis aer cum impetu irrumpens ignis pabulum exagitet , ac dissolvat.

Secundo assignatur ratio , cur ferrum candens , si nitro fuso immergatur , id non incendat nisi forte ferrum multum incanduerit : carbo autem nitro fuso injectus statim flamمام præbeat. Id enim evenit eo quod ferrum est quadam compactius , quam ut ex eo partes sulphureæ eliciantur , aut acri subeundi præbeat aditum. At nitrosa spicula à calore agitata carbonis meatus facilius pervadunt , & sulphureas , pinguesque partes exagitant ; unde fit ut magis disponantur tum pabulum , tum ignis ipse , qui agere debet.

Tertio difficile est faciem ad maiorem flamمام accendere , eo quod major flamما totum aerem sibi proximum ad se rapiat , ac forte aer sua tenuitate halitum pinguem atterit : unde in cella vinaria , quam ferventis musti crassiores halitus implet , & in crip-tis subterraneis , in quibus humidus aer torpet , fax accensa vix settetur.

Quatuor stamma in basi cœru-

rulea est, & obscura, immo etiam in medio flammæ circa ellychnium conus quidam subobscurus, exterio-re, & candidiore flamma conclusus, cernitur, eo quod humor o-leosus nondum bene subactus in parte flammæ infima cæruleum præbet colorem; quo enim purior est flamma, eo est candidior; hinc ceræ albæ flamma splendidior, quam flavæ. Apex flammæ sub-ruber est ex fumi admixtione. Quo ellychnium est longius, eo flamma est obscurior, quia in lon-giore ellychnio humor subactus multas particulas terreas, & aqueas secum vehit; hinc flamma obscurior, major fumus, & in ip-so apice longioris ellychni veluti fungus succrescit, ex nimia scili-cet fulgine concretus. Lamella altius inflammam accensæ candelæ immersa, fuligine obducitur, non item si flammæ apicem tangat; eo quod in medio flammæ humor non bene concisus, & subactus, multa fuligine abundet: sed pars summa flammæ plurimum exte-nuata, crassæ illius fuliginis magis est expers. Cum flamma primum accenditur, tenuem, & cæruleam lucem præ se fert, quod humor nondum sit bene concisus.

Quinto halitus ille, qui flam-mæ pabulum est varios status induit. In extincta face crasior est, sed multo igne pregnans; nam admota flamma facile accenditur, immo vero subtile particulas ignis admoti trahit, etiam antequam

Tom. II.

ab ipso tangatur. Dum vero ille halitus subtilis admodum, & rarus efficitur, cum aere permiscetur, In nigrante, & interiore cono nondum satis est extenuatus. Ubi flamma deficiente pabulo extin-guitur, flamma ultima altius se attollit, tum ut pabulum sibi acquirat, quantum ipsi possibile est, tum quod ab aere facilius ele-vatur, cum non est pinguiori ma-teriæ adhaerescens.

Sexto Nittrum nondum contu-sum, si vivo imponatur carboni, primo liquefit, carbonemque ea parte, qua insidet, more aquæ extinguit: mox egrediens è confi-niis nitri, & carbonis vapor, vel aér, veloci motu carbonem unde-quaque, & vehementer difflat; tum carbo rursus ignescit totus: inve-nitur autem ad latera carbonis ni-trosa substantia quædam alba, quæ in ignem rursus injecta rursus can-descit, sed non amplius nisi au-cto igne dissipatur. Evidem pri-mo cum vappidæ, seu aqueæ par-ticulæ intra nitri poros contineantur, ubi prima nitri liquefactio contingit, violentia ignis oprimitur, & extinguitur in ea parte, cui insidet nitrum. At ignis in aliis partibus extans dissipat aqueas hasce particulas, easdemque cogit avolare maximo impetu, unde est illa vehemens difflatio. Separata jam vappida illa substantia, aper-tus patet aditus aeri, & igni ap-tior respiratio; quare carbo totus ignescit. Porro cum superstes illa-

nitrosa alba substantia admodum
sicca sit, nonnisi aucto igne dissipatur.

Septimo flamma quandoque fortior est, quandoque debilior, seu aliquando majori agit vi in externa objecta, aliquando minori. Quo enim compactior est materia inflammabilis, crassiores quoque evadunt partes flammæ, unde actio major est; & quo subtilior est materia, minor est actio. Ita flamma in spiritu vini accensa in chartam discurrat, quin illam comburat: ita si digitum intingas in spiritu vini, admota candela spiritus ille ignescit, & tamen hic ignis vix sui sensum præbet. Subtiliores namque flammæ partes, nec invicem adeo conjunctæ, non possunt tanta vi agere, ut crassiores partes digitii, & papyri dividant. Actionis etiam majoris, vel minoris ratio repetiti potest ex majori, vel minori resistentia materiæ inflammabilis, unde major, vel minor habetur ignearum particularum reflexio.

Octavo Ligna, quæ diutius demersa fuerunt in mari, quoniam maximam suorum salium copiam amiserunt ex continua dilutione: salium autem soliditas ignis actionem retardat; siccirco facilius accenduntur. Ex illa salium amissione fit, ut cineres ligni diutius antea in mare demersi lineis pannis detergendi non multum idonei sint. Lignum autem siccum facilius accenditur, quoniam illius poros oc-

cupat aer, qui & facile cedit igneis particulis, & rarefactione, ac elasticitate sua, ignis actionem promovet. Secus accidit in ligno viridi, cuius pori replentur aqueo humore, qui & magis resistit igneis particulis earumque actionem retundit, & retardat.

Nemo ex affrictu silicis, & calybis ramenta quædam ipsorum separantur: ut Microscopii ope videri possunt, si in alba charta excipiantur. Ea porro ramenta, metallica & sulphurea cum sint, propter aeris rarefactionem, ejusdemque elaterium, facile accenduntur ex agitatione, & motu. Hinc non quælibet actio sufficit, sed exquisita rarefactione, & motu opus est. Id ipsum contingit ex collisione arundinum Indarum, aut lignorum lauri, vel mori, aut hederæ, ut notat P. Casati, de Igne, dissertat. 7. Ita & in sacchari comminutione, & ex felium pilis manu rudius loco obscuro perfricatis; exhalatione nimirum sicca, & calida vehementius commota: quomodo fulmen in aere cuditur, & accenditur. Ita si fœnum adhuc humidum coadunetur, fermentatio partium, & ebullitio habetur, qua fit, sulphureæ partes ignescant, & fœnum comburatur.

Decimo majorem exhibet calorrem ignis hyemali tempore, quoniam densior aer & humidior, ignem circumambiens, ejusdem particulastardius dissipari, seu avolare facit. Cuspis flammæ eam vim ha-

haber, ut si vitrum tangat, illud liquefaciat, cum pyramidata figura in vitri poros insinuat se se ignis. At si folium chartæ extendo supra cuspidem flammarum, quamvis flamma illud tangat, vix tamen ab illa semiustulatur. Et quamquam diutius ibi servatum accenderetur, si tamen insufflo in eam partem chartæ, quæflammam tangit, tunc fit, ut minime comburatur, quippe frigidus, humidusque aer insufflatione in poros chartæ ingrediens retundit vim flammæ, nec sinit eam agere in chartam. Extinctus titio majorem fumum emitit, quam ubi accensus erat; crassioribus enim partibus, quæ ignis actionem effugiebat, adjunguntur aliæ, quas ignis fuisset depastus, si permansisset. Hæ porro partes sursum attolluntur actione ignis intra ligni poros permanentis, tum ex partium ligni interna commotione.

Postremo dicendum est de corporibus illis, quæ igni resistunt. Nam si sulphureis partibus non content, aut superficie sua contexturam habeant densiorem, ignea corpuscula penetrare nequeunt in ea corpora. Hinc Pyropus per dies quinque resistit calori ignis; & Adamas per dies novem, observant. P. Casati, dissertatione quinta. At vero illustrior est experientia celeberrimi illius lapidis, ex quo telæ conficiuntur, cum tamen igni resistat; unde Antiqui saccos efformabant, in-

quibus collocabant mortuorum corpora comburenda, ut cineres servarent. De eo sic Dioscorides, libro quinto cap. 113. *Amiantus lapis in Cypro nascitur, stissimæ alumini similis, è quo elaborato, utpote flexili, telas conficiunt, quæ in ignem conjecta accenduntur quidem, tantum flammas, sed nulla pax et nitidores evadunt.*

& aliud genus lini incombustibilis, quod appellatur *Asberinum*: ex quo itidem telæ efficiebatur, & Veteres linæ mensæ inquinata ex eo lapide compacta, in ignem conjiciebant, ut absque ulla læsione mundarentur. Videatur Plinius libro 19. Kircherius tomo secundo Mundi Subterranei, libro octavo. Aldrovandi libro quarto de Metallis cap. 26. Schotti in Magisterio Universali, parte 4. lib. 2. In Indiis quoque nascitur arbor, vulgo *Torra*, cujus radix igni resistit, & ex ea telæ formantur incombustibles. Londini tentatum fuit experimentum, ut refertur in Diario Eruditorum, 1685. & recenset P. Regnault tom. 1. exercit. 26. Injectum fuit etiam oleum in telam illam, ut ignis actio augeretur, & tamen tela sine læsione permansit, etsi non nihil suæ gravitatis amiserit. Porro mirabilium horum effectuum difficilis sane ratio est, nec aliud fas est dicere, nisi texturam partium ejusmodi corporum igni resistere, ut cuspidata figura ignis pe-

netrare non possit : tum eadem sulphurei nihil , aut parum contine-re, ut subinde ignis actio exerce-ri in illa non queat , pabulo ignis deficiente.

Jam hinc non est difficile iis assentiri , quibus Veteres nonnulli tradidere quædam esse animacula, quæ in igne conservantur. Ut cumque tamen res se habeat , in Dia-rio Eruditorum 1667. 25. Aprilis, proditum est , Salamandram aliquandiu in igne vivere , sic tamen ut è suo corpore emitat humorem quendam , quo ignem extinguit. At ubi humoris copiam superat actio ignis , profecto Salamandra perit , & accenditur : ut notat P. Schotti Phys. Cur. par. 11.

Aliæ ignis proprietates omnibus notissimæ sunt caliditas , & siccitas. Unde Aristoteles in libro secundo de Generat. cap. 3. Ignem per notoria utcumque describens, ait : ignis est elementum calidum & siccum. Ignis enim, ut idem Philosophus dicebat lib. 2. Metaphys. tom. 4. calidissimus est , & causa caliditatis. Caliditatem tamen & siccitatem non æquali gradu, seu intensione igni inesse diximus: sed caliditas dominatur : unde igni exquisitissimam caliditatem concedimus, siccitatem vero citra ex-cellentiam. At hæc satis percipi & declarari non possunt , nisi in quarta disputatione, ubi illarum affectionum notio erit exhiben-da.

Nunc potissima emergit difi-

cultas , quæ in explicanda ignis natura versatur. Id enim contin-git , ut quorum extantia facilius nobis occurrit , tanto illorum intima natura mentis nostræ aciem effugiat : ut jam sæpe diximus.

Primum ecce Gassendus post Epicurum occurrit , ignis naturam in atomis rotundis , tenuissimis, & summe mobilibus constituens. Quando igitur igneæ atomi prius dispersæ simul coeunt , & quæ prius in ligno delitescebant , & à se se mutuo procul aberant, simul conglomera ntur , ac turmatim e-rumpunt ; tunc ignem putat de novo generari. Ex ea porro summa celeritate , qua igneæ atomi abripiuntur , & in omnes partes vibrantur , disperguntur , & in-cidunt obvia quæque corpora.

Chymicis nihil aliud est ignis, nisi sulphurea , seu oleosa cor-pora.

At vero Cartesius, parte quar-ta Principiorum , numer. 80. do-cet ignem excitari , quando ma-teria prima sui Elementi , seu sub-tillissima scobs , semper jam un-de ab ipso Mundi exordio in mo-tu perseverans, terrestrium corpo-rum meatus tanta copia pervadit, ut vires suas exercere , & terrestres, seu tertii sui Elementi, id est ramo-sas particulas secum abducere , ac contorquere possit. Tunc enim ignem dicitur excitare , qui mate-riam globosam , sive secundum Cartesianum elementum quoquo-versus impellens , fulgorem pro-creat,

creat, & obvia quæque divellendo comminuit, atque consumit. Nam quemadmodum materia tertii elementi secundo innatans (ait ipse Cartesius) aerem efficit, ita eadem materia, ubi à primo arbitritur elemento, ignem producit.

Addunt tamen plerique hujus opinionis Sectatores sententiam hanc veram esse; sed crassiores tertii elementi particulas intelligi debere præsertim illas, quæ sulphureæ sunt, & nitrosæ; ita ut ignis constare dicatur ex partibus sulphureis, & nitrosis, à materia subtilissima exagitatis.

Res declaratur ex tormentis bellicis, & cuniculis. Nam neque aer, neque ullum aliud circumstans corpus sensibile, tantas per se strages edere, tot molimina subvertere potest. Unde materiam quamdam insensibilem, & rapidissimo, perennique motu agitatam excogitare necesse est, cui omnes isti effectus, tanquam caussæ proximæ, sint attribuendi. Sed cum ea materies incredibilis sit tenuitatis, ac mobilitatis, corporumque omnium vel angustissimos meatus facillime traiicit, si sola moveri intelligatur, nullum plane effectum sensibilem producit. Ubi vero crassiores, & duriores tertii elementi partes (vel ubi nitri, seu salisperæ, & sulphuris partes, ex quibus pulvis pyrius constat) secum abducit, & rotat, tum magna vi in obvia corpora incurrens, vehementer concutit, ipsorumque

partes diruit, & à se se mutuo divellit: eo ferme modo, quo aqua liquidissima, & tenuissimis ex partibus constans, se sola nullum ponti detrimentum, aut ruinam sensibilem inferre observatur; sed si trabes, vel navigia mercibus onusta, aut glaciei moles, simul secum velociori cursu devchat, tunc pontem ipsum tam vehementer quandoque commovet, & quatit, ut ipsum funditus subvertat. Apparet adeo ex his, quid sit in Cartesii sententia ignem generari: & qua ratione expendat ille effectus ignis.

Jam vero multa quidem in istis opinionibus continentur verissimas, quæ ad ignis naturam declarandam conferunt; neque tamen ea satis apta sunt ad ignis naturam constituantur.

Et primo quidem opinio Chymicorum à vero distare convincitur. Distingui siquidem debent sulphureæ, sive oleosæ partes ab ipso igne, cui sunt pabulo. Licet enim hæ partes sint cum igne conjunctæ, nam quæ oleosa sunt, aut pinguis facile inflammantur, sed quæ terra, aut aqua abundant, vix incendi possunt, ut cineres; tamen longe diversa est ignis natura à partibus illis sulphureis. Sed & oleosæ particulæ, cum molles sint, & flexiles, ramosaque potius figura donatæ, tantam vim habere profecto non possunt, quantum in igne experimur; nec proinde durissima corpora pervadere,

dis-

discindere, atque consumere. Oleosæ etiam particulæ facile adhærescent corporibus; Secus accidit in igne.

Ex præcedenti rursus disputatōne rejicitur Gassendi assertio. Etenim si ignis tum procreatur, cum atomi antea dispersæ in unum coeunt, cur ex quovis corpore ignis non elicetur? Nam ex atomi in aqua, & terra calefactis inveniuntur. Difficile etiam captu est, qua ratione atomi ex singulis, & quandoque ex remotissimis corporibus inflammabilis partibus in unum locum confluant ad ignem producendum. Sæpe etiam contingit pene omnem materiæ inflammabilis partem in ignem converti. Quod si in hoc ipso nihil aliud habetur, nisi extractio, & coadunatio ignearum atomorum, profecto affirmare oportet pene totam illam materiam ex igneis atomis esse compactam. Porro si res ita se habet, quomodo atomi igneæ delitescebant, & veluti conseptæ erant, quando longe major erat illarum moles, ac cæterarum particularum?

Illustrius vero ad rem nostram id est, quod evenit in pulvri pyri accensione. Pulvis pyrius est aggregatum quoddam, quod ex decem nitri, seu salis petræ, tribus sulphuris, & quinque carbonum partibus contusis, & simul permixtis, tum cribrorum ope in granula sphærica formatis confi-

citur. Quodlibet autem hujus pulveris granum, dum inflammatur, notabiliter plus spatii longe latet que occupat, quod non defuerit qui ad calculum revocarent, ita ut si Snellio credimus, unum granum concepto igne rarum æquum extensionem 125000. seu centum viginti quinque mille granorum. Rursus ita in flamمام abit totum, ut vix sit ullus cinis superstes. Ita quidquid est partium non inflammabilium ab incensis rapitur, & dicitur. Hæc porro dilatatio tanto impetu fit, ut, si pulvris ejusmodi notabilis sit copia, quæ incenditur, non modo in bellicis tormentis plumbeas pilas plurium librarum jaculetur, quarum vi muræ urbium solo sensim æquantur, sed in cuniculis solidæ turres, ac propugnacula urbium uno impetu diruantur: quasi ibi fulmina, hic terræmotus ingenio æmulante. Jam vero non educi in hoc casu in apertum præexistentem in occulto flamمام, inde constat, quod flamma ingens, quanta in accensione perspicitur, non poterat alterius generis particulis veluti carcere prohiberi, quominus facto impetu eas per se se perrumparet, atque avolaret. Quid enim tantum flammæ, cuius vi ingentia corpora loco moventur, non posset tenues atomos, quibus ambiabantur, à se amoliri, & libertatem suam sponte nancisci? Sané si totum ignem ex una parte cum terra, & propugnaculo, quod disjicit, com-

partes: ex altera parte atomos flam-
mæ cum atomis alienæ materiæ,
quibus involvi supponuntur, de-
prehendes plus virium habere ato-
mos cum atomis compositas, quam
flammarum integrum, cujus vires
sunt illæ ipsæ atomi, cum mole,
quam eruit, comparatam.

Ad hæc, rotunda illa ignearum
atomorum figura non satis confert
penetrandis dissolvendisque duris-
simis corporibus.

Eadem argumenta pugnant etiam
contra Cartesianam hypothesim.
Rursus in Cartesii Systemate Sub-
tilissima Scobs movetur circulari-
ter ab Occasu in Ortum. At vero
Ignis in bellicis tormentis quaqua-
versum movetur. Tum ignis pa-
bulum, & ignis motum cum ipsa
ignis natura confundunt Cartesiani-
ni, cum tamen illud in ignem
transmutetur, hic vero sit affectio
consequens ignis naturam. Difficil-
le est etiam captu, quomodo sub-
tilissima illa scobs possit secum
trahere crassiores tertii elementi
particulas, cum illa & propter sum-
mam subtilitatem minutissimos
quoscumque poros pervadat, li-
berumque aditum semper obtine-
re debeat, & quia nullam habet
propriam figuram, & figuræ ab
extrinseco acceptæ nullatenus te-
nax est, jam cedere debeat, nec
loco movere crassiores tertii ele-
menti particulas, quarum certe
maxima copia esset necessaria, ut
illi effectus exhibeantur, quos à
pulvere pyro præstari diximus.

Ea itidem ramosa tertii elementa
figura non est satis idonea perva-
dendis, discindendisque durissimis
corporibus, ut jam antea diceba-
mus. Postremo dum in pulveris
pyri accensione magnum adeo sub-
tilissimæ scobis motum adstruunt
Cartesiani, vel motum hunc re-
ctum esse putant, vel perturba-
tum? Rectum sane constitui de-
bere motum illum ostendit pilæ
directio, & lucis propagatio, quæ
in motu recto consistit ex ipso-
rum Cartesianorum sententia. Per-
turbatum vero eum motum esse
evincit caloris diffusio, cum Car-
tesiani dicant calorem esse motum
perturbatum. Porro duo hæc si-
mul pugnant: ut erit pressius de-
clarandum in quarta disputatione,
quæstione tertia. Et enim, ut ad
rem præsentem attinet, prorsus
impossibile, globulos secundi ele-
menti recta moveri à subtilissima
scobe: quod est lucem efficere jux-
ta Cartesium, & simul ab eadem
illa subtilissima scobe perturbato
motu abripi, & contorqueri par-
ticulas ramosas tertii elementi. An
non enim istæ in globulos impin-
gent, eorumque rectilineum co-
gent deflectere? Sed de hoc ar-
gumento alias erit dicendum.

Nunc quæ verissima sunt in
illis Recentiorum sententiis secer-
nimus, ut jam pridem diximus. Nem-
pe concitato motu agitantur parti-
culæ ignis, quo fit, ut acceden-
te cuspidata illarum figura, po-
ros objectorum corporum perva-
dat,

dat, motum in illis procreet, partes eorum concidat, divellat, segreget, disperget. Sed Ignis sulphureas præsertim pinguesque partes depascitur; unde oleosæ, seu sulphureæ, aut pingues partes sunt igni necessariae. Hæc omnia autem, & ignis generationem jam declaravimus in præcedenti disputatione, quæstione prima, in expositione Peripatetici Systematis.

Ergo cum nobis non liceat rerum definire naturam, nisi ex illarum perspectis proprietatibus; jam ex dictis colligimus, Ignem sic rite describi posse: *Ignis est elementum, cuius natura exigit pingue, oleosum, & crassum alimentum, quo nutriatur; figuram pyramidatam, qua disponatur ad operandum; intestinum motum suarum partium, quo objecta corpora dissolvat; siccitatem demum, & potissimum summam caliditatem.* Quare harum proprietatum radix intimior, quam clare, & distinætæ assequi nobis minime datum est, erit ipsius Ignis natura, sive essentia. Sic tamen omnia ad Ignum pertinentia declaramus, ut nihil melius exponant Recentiorum hypotheses.

De aliis affectionibus, & natura Terra.

Terra sicca est unde in Sacris Literis Arida nuncupatur. Frigida etiam per se se asseritur communi Philosophorum sententia; fri-

gus enim aptius videtur infimo, tardissimoque clemente, quam calor. Hinc ab Aristoteles, libro secundo de Generatione, & Corruptione, capite tertio dicitur *elementum frigidum, & siccum.* Terra porro non solum aquæ, aeris, & ignis particulis referta est, ac permixta, sed in super innumeris fere abundat substantiarum generibus, nitro nimurum, sulphure, sale, cæterisque similibus; immo & semina rerum omnium continet, unde omnium rerum dicitur Mater.

Primo igitur hoc terræ elementum habet diversa species terræ; Secundo succos condensatos Tertio mineralia. Et de mineralibus quidem erit alias dicendum. Nunc pauca subjicimus de terræ speciebus, succisque densatis.

Terræ duæ extant species. Nam altera macra est, alia pinguis. Prima una absolute est sterilis, ut sabulum, quod nihil aliud est, quam acervus arenularum, & fragmentorum vitreorum, quæ dura suat, & indissolubilia per aquam, adeoque siminali vegetabilium facultati famulari nequeunt: aspera etiam sunt, & inæqualia, adeoque corrosiva, & sordium abstersiva. Alia vero terra, utcumque apparenter macra, & infœcunda, cum aqua permixta, efformat lutum fertile, & interiori quadam pinguedine donatum. Unde sale, & nitro abundat; hic enim solutus humiditate, & moderato calore tepefactus, fermentatio nem

nem adjuvat, & fœcunditatem promovet. Nec alia ratione cineres, accidente pluvia nimiam eorum siccitatem temperante, fœcundant terram, nisi quia abundant salibus. Unde terra, ex qua vitrum fuerat compactum, quia omni sale destituta remanet, infecunda est.

Similiter terra pinguis alia viscosa est, tenax, ac densa, ut Argilla, quæ ex hoc ipso magis est apta, ut ea utantur Figuli ad vasa effingenda, quam Agricolæ ad vegetabilium fœcundationem. Alia vero rarer est, facileque solubilis, unde ferax est; nutritio enim plantarum fieri nequit, nisi terra docilis sit ad solutionem, quæ promovetur à fermentatione per salem. Quoniam autem non omnis terra ejusmodi est, nec eadem viget ubique temperies, nec eadem semina in omni terra extant; siccirco non omnis fert omnia tellus.

Ex Succis porro densatis alii pariter sunt macri, alii sunt pingues. Sub prima specie comprehenduntur sales. Sal communis distinguitur in salem mineræ, & fontis, licet iste non aliunde fortassis ducatur, nisi ab illo primo, quem aquæ transeuntes per mineras in Tellure dispersas ehibunt, & sibi permiscent. Unde aqua non est salsa, nisi ex permixtione salium, qui ab illa etiam separari possunt per evaporationem actione caloris effectam. Aliæ extant notabiles salium species, quorum differentia

Tom. II.

duci solet vel per ordinem ad res, à quibus eliciuntur, vel respectu locorum, ex quibus extrahuntur. Ex his licet Nitrum videatur diversis generis à sale petræ, si attendatur locus originis, vel diversitas inflammationis, & actionis metallæ; adhuc tamen sales istos nullatenus invicem differre est sati verisimile, nisi penes majorem, ac minorem subtilitatem, adeo ut sal petræ sit pars subtilior, quæ exhalans à petris adhæreat partibus.

Duo alii sunt Succi, qui ut sal solvuntur in aquam, scilicet Alumen, & Vitriolum. Pollent autem vi adeo penetrante, ut ex ipsis contritis, permixtis, & ignis activitate in liquorem conversis resulteret Aqua Fortis, at Regia, cuius tanta vis est, ut metallæ valeat penetrare, ac dissolvere; quamvis servetur in vitro illæso, nec penetret ceram, qua obduci solet lamina ænea stylo incidenda. Quod quidem à conformitate, vel difformitate figuræ partium aquæ fortis cum prædictorum corporum poris oriri valde est probabile.

Succi vero pinguis, & facile inflammabilis præcipuæ species sunt Sulphur, & Bitumen. Hoc porro duplex est. Nam aliud, licet à terra emanet, sub specie liquoris, & congregetur ut oleum in superficie aquæ, cui innatæ, adhuc tamen concretum, & induratum truditur ad ripas, & littora; aliud vero ad instar olei semper innatæ

aquæ, & dicitur, Petreolum, quatenus ex locis petrosis emanat.

His itaque, pluribusque aliis corporibus terra est repleta. Quare ex dictis rite sic describitur: *Terra est elementum siccitate, & frigiditate donatum, ramosis partibus compactum, diversasque, ac pene innumeratas rerum species continens.*

QUÆSTIO QUINTA.

Utrum Aer gravis sit, & elasticus?

UBI

De Aeris natura speciatim differimus, & principia quædam Aerometria exhibentur.

DE aeris gravitate, & elaterio dicendum suscipimus, tum de ejusdem natura, cæterisque proprietatibus disscremus. Porro quid sit gravitas ex præc. quæst. liquet. Elaterium autem vis est, qua corpus pressum resilit, & sublata vi comprimente, se se restituit: cuius specimen in ramo viridi apparet, & in lamella chalybis. Quærimus ergo, an aer gravis sit, & elasticus; tum alias ejusdem affectiones, & naturam denique investigari nitemur. Omnibus porro inconfesso est, fluidum esse & spirabilem aerem, illius interjectu Terram cum Cælo veluti commercia sua exercere, lumenis esse susceptivum, corporum meatus subire, animalium denique vitam sovare. Liquet etiam, cras-

sum, & caliginosum aerem Telluris globo circumfusum multis esse permixtum vaporibus, ut omnium penne corporum exhalationes, & spiritus excipiat; hinc non ubique sui similis est; sed alibi purior, alibi crassior; interdum salubrior, aut pestilentior, proindeque sanitati corporum, & mentis accumini plurimum confert.

Præter aerem crassiorem, subtilissimam ætheream substantiam existere, sequenti quæstione probabimus. Nunc animadvertisimus, nos de aeris elaterio, impræsentiarum differentes, aerem ipsum, ut ab aquæ vaporibus secretum, considerare; hi enim elaterio carent, ut de aqua statuemus in quæst. 8.

Ut vero tum aeris affectiones, tum ejusdem effectus distinctius explicitur, præstat nonnulla Aerometriæ principia exhibere. Est autem Aerometria scientia quædam, quæ vires, & affectiones aeris metitur.

Itaque *Compressio corporis* est coarctatio massæ, seu materiæ ejusdem corporis in minus volumen, seu in minorem extensionem, facta per in pulsum, aut præssuram alterius corporis. Idem est *Condensatio*, quæ vi frigoris efficitur. *Dilatatio corporis* est expansio massæ in majus volumen, quam facta compressione corpus habuerat. Quod idem es *Rarefactio* vi caloris effecta.

Dicimus, aerem gravem esse, & elasticum.

Probatur prima pars tum ex di-

Etis

Ctis in q. 3. tum ex iis experimentis, quæ mox referemus, tum maxime ex illis, quorum rationem & causam in q. 7. declarabimus.

Probatur secunda pars, & simul aeris gravitas, tum ipsius compressio, & condensatio; dilatatio quoque, & rarefactio demonstrantur. Si in globum metallicum, syringis ope, plus aeris intrudas, quam in illo antea haberetur; autem globi pondus animadvertes: quod aeris compressionem significat, ut sub eodem volumine aucta sit massa, adeoque & gravitas. Ubi vero quidquid aeris vi intrusum fuerat, exire permiseris; idem, ut prius erit globi pondus: quo colligitur aerem antea compressum dilatare rursus se se, & vi elastica ad priorem statum se restituere, ut eadem, quæ prius, sit massa, & gravitas. Quare si aperto vasis alicujus orificio, cæteris paribus, aeris portionem quamdam egredi animadvertamus, cognoscimus etiam aerem in eo vase fuisse compressum magis, quam aer externus.

Si vessicam aere mediocriter repletam, firmiterque constrictam ad ignem admoveamus; ea non solum distenditur, sed & ingenti prorsus fragore tandem disrupitur; nimirum quia aer caloris vi rarefit. At si antequam vessica disrupatur, eamdem removeamus ab igne, statim illa flacida evadit; quia aer intra vessicam conclusus, vi frigoris coarctatur in volumen minus, & condensatur.

Eadem illa vis elastica aeris conspicua quam maxime est in sclopeto pneumatico (fig. 1. tab. 2.) nam si embolus *a b* per officium *a* in tubum *a b c* immittatur, aer omnis in spatio *b c* contentus, per valvulam *c*, quæ ipsum ingredi sinet, non regredi, magno conatu in spatium *d egg* protrudetur. Tum retracto embolo aperietur illius valvula, *b ab* aere scilicet exteriori in partem *c* impulsa; idemque aer spatium *b c* rursus adimplebit. Quapropter immisso iterum embolo claudetur valvula *b*, & aperietur valvula *c*, novusque proinde aer in spatium *de gg* per vim introire compelletur. Id tertio, & quarto ad libitum repeti poterit, donec aer in spatio *de gg* conclusus, nimia compressione laboret, & exitum querat. Tum recluso epistomio *f*, aer se per aperatum orificium *d vi* sua elastica propriet, & glandem plumbeam *e* per orificium *h* ad magnam distantiam jaculabitur.

Eadem est ratio fontis artificialis. Sit enim in artificiali fonte (fig. 2. tab. 2.) Canalis AC ad fundum pene vasis pertingens, & epistomio B instructus. Per hunc canalem aperito epistomio B aqua in vas DD ope syringis magna vi intromittatur, & clauso epistomio exire prohibetur: idque pluries, si opus fuerit, repetatur. Aqua intromissa aerem in angustius coget spatium, scilicet à superficie DD ad vasis summum. Ad si epistomium rursus aperiatur, cum aer se se continuo explicare vi

sua elastica contendat, & aquam in superficie D D valide comprimat, eam per orificium C in tubum A C remittet, atque ad magnam quandoque altitudinem efferet. Et tanta quidem in aere est vis elastica, ut aer, postquam compressus fuerat per sexdecim annos, intensiorem semper elasticam vim servaverit: ut ex Historia Academæ 1695. notat P. Regnault t. 1. pag. 113. Eadem aeris affectiones ex effectis in machina Pneumatica contingentibus distinctius apparebunt q. 7. ubi etiam adversantia argументa dissolvemus.

Circa Elaterium autem aeris, hæc lex certissima est. *Elater nec pe aeris inferioris æquatur ponderi totius superioris ipsi incumbentis.* Quod sic ostenditur. Aer superior pondere suo, ut diximus, premit inferiorem. Elater vero æquatur ponderi prementi. Quandiu enim corpus elasticum adhuc ulterius comprimi, aut tendi potest, nec tamen comprimitur, aut tenditur: tanta vi resistit, quanta comprimitur, vel tenditur: alioquin magis comprimeretur, vel tenderetur. Ubi autem nisus, & renisus duorum corporum fuerint æquales, motus nullus haberi potest, sed corpora se mutuo impellentia juxta se invicem quiescunt. Porro aer resistit vi elaterii. Ergo elater est æqualis vi comprimentis, aut tendentis.

Quoniam vero pondus aeris superioris inferiori incumbentis æquatur ponderi columnæ aquæ, cu-

lus sit eadem basis cum volumine aeris, sed altitudo sit 31. pedum vel æquatur etiam columnæ hydrargyri, cuius altitudo sit 28. digitorum; hinc sequitur Elaterium aeris inferioris æquari eidem columnæ aquæ, vel mercuriali.

Ita & elater aeris inclusi, si cætera cum ambiente extero paria sint, æquatur similiter ponderi totius superioris aeris incumbentis. Quo fit, ut inclusus aer eadem vi premere debeat, ac pondus totius aereæ columnæ; & proinde, ut diximus, suspendat mercurium in tubo ad altitudinem 27. aut 28. digitorum, & aquam ad altitudinem 31. pedum.

Altera elaterii lex est. *Elater aeris nititur quaqua versum secundum quamlibet directionem.* Hoc porro satis apparet ex dictis. Sed inde etiam evidens fit; nam si aer in vase comprimatur, portio quædam aeris aperto orificio, ex vase iterum expirat, in quacumque orificii directione. Animadvertere autem oportet, dilatationem aeris tantummodo fieri per vim elasticam, nec quidquam dilatationi conferre gravitatem: ut tradit optimus Wolfius in Aerometria, cap. 2. num. 42.

Tertio Aer Telluri circumfunditur, nec uno in loco altior esse potest, quam in altero. Probatur pars prior. Si aer non circumfunditur Telluri, super aliqua Telluris parte dabitur spatium ab aere vacuum.

Por-

Porro aer, qui huic spatio contiguus existit, expandetur necessario per spatium illud. Quippe cum sit compressus, elastica virtute sua nititur se expandere, & quidem quaquaversum. Ergo aer expandens se se repletet vacuum illud. Ergo dicendum est, aerem circunsundi Telluri. Secunda pars hinc etiam descendit. Si enim aer in uno loco est altior, quam in altero, aer ille, qui vacuo continuus est, statim expandetur; adeoque non quiesceret, nisi undequaque eamdem habuerit altitudinem. Quare si cætera sint paria, duobus corporibus eamdem basim habentibus, in æqualibus à centro terræ distantiis, æqualia aeris pondera incumbunt: adeoque ab aere incumbente æqualiter premuntur. In æqualibus proinde à centro terræ distantiis, si cætera fuerint paria, aer eamdem densitatem habet; adeoque sub æqualibus voluminibus massas æquales continet; consequenter æqualia volumina ejusdem gravitatis existunt.

Quarto *Calor Elaterem aeris intendit*. Nam vessica propter calorē magis distenditur, quo sit, ut internus aer majori vi premet.

Demum *aer inferior densior est superiore*. Majore enim aeris quantitate incumbente magis premitur, quam superior.

Dices. Si aer comprimi posset, videtur dicendum eo usque posse comprimi, ut spatium occupet infinite parvum respectu illius spa-

tii, quod ante compressionem obtinebat. Pondere scilicet in infinitum aucto. Quippe *densitates aeris proportionales sunt ponderibus comprimentibus*. Quod ipsum ex adverso affirmari posse videtur in aeris dilatatione, ut nempe in spatium infinitum respectu illius, quod antea replebat, possit aer dilatari, ponderibus omnibus sublati. Quæ duo absurdâ sunt.

Respondetur, neutrum ex allatis absurdis consequens esse. Aer enim nonnisi finitæ compressionis, finitæque dilatationis est capax. Comprimitur itaque aer, quantum determinata illius configuratio, & natura patitur. Ubi vero aer ad summum compressionis gradum pertingit, si ultra pondus, quod ad summam compressionem efficiendam sufficit, aliud etiam pondus aeri incumbere supponamus; excessus ponderis, sive alterum istud pondus, non amplius ad comprimentum aerem, sed ad compressum loco pellendum impeditur. Ita & cum aeris particulae determinata gaudeant magnitudine, & contextura, non nisi in determinatum, finitumque spatium dilatari possunt.

Ex prædicta aeris compressione vi ponderum prementium, nec non & ex illius dilatatione per elaterium facta, expenditur, quomodo parva hominis statua (fig. 7. tab 4.) intra vitreum tubum aqua repletum immersa ascendat modo, nunc descendat, per aquam vario

motu agatur, & aliquando vel in ipsa aquæ medietate quiescat. Statua porro illa aere plena est, & in crure parvam quamdam eminentiam habet, quæ ex interiori parte ad inferiorem perforata est. Primo itaque immersa statua supernatat, quoniam aer in illa inclusus efficit cum ipsa levius volumen æquali aquæ volumine. Secundo si comprimas pollice orificium tubi, statua ad fundum tubi, descendit. Nam aqua per actionem pollicis compressa ingreditur parvum illud foramen in crure statuæ existens, & internum aerem comprimit; unde per aquæ ingressum volumen statuæ, aeris, & aquæ gravius redditur, & descendit. Tertio si pollicem supra tubi orificium teneas, sed aquam minime comprimas, statua illa rursus ascendit. Cum enim aqua non amplius comprimatur, siccirco necessario cedit elaterio interni aeris, qui restituit se se, & dilatatur, atque è crure repellit aquam, & egreditur. Unde & volumen statuæ, & aeris, expulsa aqua, fit levius, & ascendit. Quod si dum statua ascendit, nonnihil comprimas aquam, statua quiescere cogitur, subeunte parte aliqua aquæ in foramen cruris, ut statua in æquilibrio constituatur. Jam ubi actiones illas pollicis alternatim exercueris, ac suspenderis; aqua, & aer vicissim in cruris foramen ingredientes, & egredientes, hinc inde statuam dimovent, quæ sub-

inde ad unam modo, nunc ad alteram declinat partem, & saltare videtur. Varios igitur illos motus pro nutu nostro sequitur statua, potissimum ab aeris elaterio pendentes. Quoties autem digitus cessat à compressione aquæ, sic tamen ut ingressus non pateat aeri externo, & statua ex dictis ascendet, comitantur ipsam plurimæ aeris bullulæ, quæ eo ampliores fiunt, quo magis aquæ compressio minuitur, ut magis subinde vi sua elastica possint dilatari: quemadmodum si aqua comprimatur, insensibiles redundunt, quoniam ab aqua maxime comprimuntur, & in angustum insensibile spatiū constringuntur.

Utrum vero aer sit ex sui natura calidus, vel frigidus; antiquior est lis inter Peripateticos, & Stoicos, cum illi calidum aera, frigidum isti contendant, si natura ipsa aeris spectanda est. Sed cum aer pro varia exhalationum, & vaporum commixtione, aut radiorum Solis præsentia, vel absentia, nunc calidus existat, nunc frigidus; Quæstio præsens parvi admodum momenti videtur.

Nihilominus calidum potius aer ex sui natura, quam frigidum esse dixerim. Est enim, aer maximæ raritatis, hac illac continuo agitatur: quæ duo calori congruunt, non frigori. Quod si nocturno tempore, & in altissimis montibus aer est frigidus; hæc affectio aliunde quam ex ipsius natura repeti de-

debet. Nimirum ab aqueis vaporibus ducitur, qui & in maxima copia elevantur in Provinciis Äquatori subjectis propter majorem Solis actionem; unde nocturno tempore collecti frigidissimam efficiunt tempestatem: nam calidiores exhalationes altius à Sole elevantur, & vapores aquei sub illis in aer subsidunt.

Dices. Crepusculum vespertinum diutius perdurat, quam crepusculum matutinum: quod etiam valet de crepusculo aestivo, & hiberno. Hujus porro ratio est, quia halitus per diem calefacti, & rerefacti altius ascendunt, deinde vero per noctem refrigerati, densatique fiunt humidiores, indeque matutinum crepusculum redditum brevius. At crepusculum non est nisi dici artificialis appendix orta ab atmosphera, & halitibus, seu exhalationibus reflexione, refractioneque Solarem lucem ad Telluris superficiem transmittentibus. Ergo halitus omnes per aerem dispersi, nocturno tempore frigescunt & densantur, ac descendunt. Id porro non nisi ab aere repeti debet, cum halitus illi suapte natura sint calidi. Ergo aer est natura sua frigidus.

Respondetur, non satis compertum esse, quod halitus in supra aeris regione consistentes nocturno tempore frigescant. Cum halitus locum teneant supra partem illam aeris, quam vaporis occupant; ideo dum vapores frigore densan-

tur, & descendunt, quoniam aer medius inter vapores, & halitus levior tunc redditur, tunc halitum massa & ipsa deprimitur. Sed inde non evincitur halitus ipsos frigefieri.

Postremo de aeris natura celebris est Stoicorum sententia; qui aerem Telluri circumfusum ex solis vaporibus, & fumis constare docuerunt. Unde apud Ciceronem, libro secundo de Natura Deorum, Balbus Stoicus de aere sic loquitur: *Ipse vero aer, qui natura est maxime frigidus, minime est expers caloris. Ille vero & multo quidem calore admixtus est. Ipse enim oritur ex respiratione aquarum, earum enim quasi vapor quidam aer habendus est.* Cartesius vero quarta parte Principiorum, n. 45. docet aerem non esse aliud, nisi particulas tertii sui elementi exiguae, & invicem disjunctas, quæ facile trahuntur à globulis secundi sui elementi, in quibus nantant.

Sed neutra ex his opinionibus arridet. Etenim aer, ut ostendimus, insignem habet vim elasticam. Vapores porro, & fumi carent ejusmodi elastica virtute. Nullis enim experimentis prodit se se hæc virtus in vaporibus, & fumis. Quamvis igitur vapores plurimi, & terrestres multi halitus per aerem dispersi habeantur, qui etiam in grandiusculas moleculas densati ad terram rursus decidunt; non inde tamen credendum est, ad spirandum,

dum, vivendum, totque alias operationes exercendas, nihil aliud nobis Naturam aptasse, quam corporum etiam vilissimorum unas expirationes.

At contra sententiam Cartesii jam diximus in prima disp. quæst. 1. Nunc valet etiam, quod ramosa figura non satis apta sit effectis illis exhibendis, quæ ab aere præstari jam diximus. Tertium pariter elementum Cartesii terrestribus potius exhalationibus accommodatum est, quam aer. Rursus tertium illud ramosum elementum, utcumque in particulas exiguae, invicemque disjunctas concisum dicatur, præpediret motum rectum globulorum, & maxime lucis propagationem.

Quæ cum ita sint, aeris naturam utcumque nos venari possumus ex recensitis illius proprietatibus: quemadmodum de igne diximus. Aer itaque sic apte describitur: *Aer est Elementum, grave; elasticum; capax compressionis, & dilatationis; densitatis etiam, ac raritatis; summe mobile, ac fluidum, & calidum; cuius particulae spirali gaudent figura, & nonnihil adhesionis habent inter se se, & cum aliis corporibus.*

Animadvertisimus ultimo ex effluviis terrestribus, salinis, & nitrosis repetendam esse vim illam aeris adeo dissolventem, qua ferum, & cuprum exedit, eaque in rubiginem, aut æruginem convertit. Hinc experientia compertum

est, terram nitrosam, aut aluminosam, & vitriolicam aeri expositam, nitro, aut alumine, aut vitriolo, quibus fuit orbata, iterum imprægnari, eo quod particulae nitri, aluminis, vel vitrioli, in aere dispersæ ibi relinquuntur. Ab iis etiam exhalationibus oritur, ut corpora in libero aere citius corrumpantur. Aer motu suo linea exsiccat, dum fluidi particulas ab illis separat, & secum trahit. Nihil autem est aere fluidius, unde fluidus est, seu humidus in summo, quoniam id humida est, quod facile se se accomodat continenti, & alieno termino facile continetur, difficile autem suo. Fluidum porro, & humidum omnino sunt idem: ut patebit in 4. disp. q. 4. Calor vero aeri convenit citra excellentiam.

QUÆSTIO SEXTA.

An præter aerem crassiores admittenda sit subtilissima ætherea substantia?

A Erem crassiores existere summis vaporibusque refertum, omnibus compertum est. In præsenti porro quæstione de subtilissimi aeris existentia disserimus, quem æthercam substantiam appellare consueverunt, quod purior sit, ac sublimior, & per totum spatium à Cælo ad Tellurem circumundique diffundatur. Gassendus tamen, & Newtonus in cælesti regione æ-

the-

theream substantiam extare insificantur, nec aliud in regione illa admittunt, nisi radios Syderum vel tenuissima quædam fila, qua quaversum libere diffusa; unde & cælestia corpora in vacuo moveri docent. An igitur ubique admittenda sit subtilissima ætherea substantia, nunc inquirimus. Tum de ipsis affectionibus agemus.

Dicimus, admittendam esse subtilissimam ætheream substantiam, quæ ubique diffusa sit.

Probatur. In Machina Pneumatica (ut quæst. seq.) extracto aere crassiore, nihilominus subtilissima quædam substantia poros vitri permeat, per quos aer crassior trahere non potest. Ergo revera existit subtilissima ætherea substantia. Antecedens probatur. In vitro prædictæ machinæ apparet lux vivida, quæ circumstantium oculos commovet. Atqui lux vel substantia est, ut docent Recentiores; vel si accidens est, nonnisi in substantia existit. Ergo in eo vitro habetur subtilissima ætherea substantia. Aerem autem crassorem ibi non extare, manifestum fit, quia animalia, quæ eundem aerem ad suæ vitæ conservationem necessario exposcunt, ibidem constituta moriuntur. Idipsum evincitur etiam, quia cujuscumque corporis partes, etiam subtiliores, ita sunt inter se connexæ, ut infinitos prope meatus admittant. Requiritur ergo subtilissima ætherea substantia, quæ meatus illos re-

Tom. II.

pleat. Neque enim crassior aer, marmoris, aut vitri, aut metalli subire potest cæca feramina adeo exigua. Gassendus autem, & Newtonus existentiam hujuscem subtilissimæ substantiæ fateri coguntur, ut lucis naturam, ejusque diffusio nem tueantur. Nam Gassendus docet, lucem esse corpus, & substantiale effluvium: ut tradit etiam Newtonus, quæst. 28. Opticæ. At qui hinc probamus, etheream substantiam in cælesti regione circumundique diffusam esse. Quippe lux Solis illustrat immensa cælorum spatia, nec eorum pars aliqua assignari potest, quæ luce non sit affecta.

Porro minimæ particulæ ætheris figura spirali constant, nam & elasticae sunt: ut experimenta jam relata probant, & ex dicendis in quæstione sequenti etiam patet. Sunt autem tenuissimæ; ac fluidissimæ, & maximam raritatem habent, unde quibuscumque meatibus se se adaptant, & facile cedunt.

Objicies 1. Ideo admittitur subtilissima ætherea substantia, ut replete valeat poros, seu meatus omnes corporum adspectabilium. Atqui ea substantia non est satis idonea huic muneri exhibendo. Ergo &c. Minor probatur. Sicut corpora adspectabilia habent poros, ita etiam subtilissima ætherea substantia poros habet. Ergo si ad replendos corporum poros admittenda est substantia ætherea,

R

ad

ad hujusce poros implendos aliam substantiam subtiliorem admittere oporteret. De hac rursus idem instituitur argumentum; atque adeo in infinitum progrediemur. Antecedens probatur. Nam & ipsa ætherea substantia propriam habet figuram, & corpus est, suisque partibus constat. Ergo partes ipsius nequeunt ita invicem conjungi, ut omnino exakte se tangant, meatusque ad instar aliquum corporum non intercipiant. Igitur &c.

Respondetur. Nego minorem. Ad probationem, nego antecedens. Ea enim ratione, qua colligimus corpora adspectabilia poros intercipere, cognoscimus substantiam ætheram non habere poros. Ideo enim primum illud asserimus, quia partes corporum, adspectabilium crassiores sunt, & plurimum tenaces propriæ figuræ, unde fit, ut invicem arctissime cohærere non possint. Igitur è converso, quia partes ætheris tenuissimæ omnino sunt, & non adeo tenaces propriæ figuræ, ipsius partes invicem perfecte adaptari possunt, nec poros intercipiunt.

Objicies 2. Si in cælesti regione existeret substantia ætherea, quantumvis ea tenuitatis, rari-tatisque maxima dicatur, aliquo saltem modo resisteret motui corporum cælestium: tum lucis radios reflecteret, ipsiusque rectilineum impediret. Hoc absurdum

est, & experientia adversatur, quæ motum cælestium corporum velocissimum esse, & rapidissimum ostendit. Igitur &c.

Confirmatur. Aer circumambiens Tellurem efficit opacitatem quamdam prope Horizontem, eo quod ipsius corpuscula à Sole magis distantia, magis, ac magis successive occupant ea spatiola, quæ à primis, & Soli propinquioribus inania relinquebantur. Idem ergo, immo multo amplius efficeret tanta substantia æthereæ copia in pene immensa distantia, quæ inter nos, & Stellas fixas reperitur. Ergo &c.

Respondetur. Nego majorem. Cum enim ætherea substantia sit subtilissima, fluidissima, & rarissima, atque subinde aptissime ad motum, nullatenus obsistit cælestium corporum motui, & facililime ab isto vincitur; & cum diaphana sit, lucis radios non reflectit, nec ejus impedit rectilineum. Quenadmodum ergo, Newtono ipso consentiente, subtilissima lucis corpuscula non retardant, nec impediunt motum Planetarum, ita de ætherea substantia dicendum. Sed & Newtonus, quæst. 22. Optica docet, quod, si existeret substantia 700000. vicibus magis elastica, quam aer, & eo etiam 700000. vicibus magis rara, illius resistentia 600000000. vicibus minor foret resistentia aquæ, ac proinde adeo exigua, ut si in hujuscemodi substantia moverentur Planetæ,

decem mille annorum spatio vix eorum motibus , variationem ullam induceret , quæ sensu percipi posset. Summa ergo ætheris raritas , & maxima elasticas non poterit impedire motum Planetarum. Hinc vero patet , diversam longe habendam esse rationem de substantia ætherea , ac de nostro aere ; non enim mirum est , aerem nostrum habere opacitatem quamdam , nam quo terræ propinquior est , eo magis resertus est aqueis , terrestribusque vaporibus , quorum densitas ne comparari quidem potest cum raritate , & subtilitate æthereæ substantiæ.

Hæc ad argumentorum solutionem attinent. Nunc animadvertemus , subtilissimæ æthereæ substantiæ existentiam Veteribus invisam non fuisse. Hanc enim Aristoteles Ætherem appellavit , eidem perpetuum motum attribuit , lib. I. Meteor. cap. 3. ubi etiam disserte scribit : *Quod enim est sursum , & usque ad Lunam , dicimus esse corpus alterum , & ab aere , & ab igne diversum. Attigua his aer , & quod propter consuetudinem vocamus ignem , non est autem ignis.*

QUÆSTIO SEPTIMA.

De effectibus ab aeris gravitate , & elaterio provenientibus.

U. B I

Machina Pneumatica describitur , & principia quedam Hydraulica exhibentur.

Multa mira , & portentosa phænomena contingunt in *Machina Pneumatica* , qua mediante aer crassior ex vasibus educi potest. Experientia etiam compertum est liquores in tubis ascendere , aut in illis suspensos hærcere , aquam itidem quorundam instrumentorum ope sursum attolli , contra ac naturali gravitate nitatur ; & pleraque alia similia sæpe occurrunt. Horum nos effectum physicam efficiētēm caussam investigare intendimus. Quamobrem *Machinam Pneumaticam* primo exhibebimus , tum nonnulla principia *Hydraulica* declarabimus. Est autem *Hydraulica* scientia motus fluidorum , præsertim aquarum.

Porro *Machina Pneumatica* fig. 3. tab. 2. duabus potissimum partibus constat , nimirum vase vitro A B , quod *excipulam* , seu *recipiens* appellatur , & antlia EFLG. Recipiens sustinetur ab orbe æneo H I , cui interposita pelle vervecina maddida sic conjungitur , ut externus aer in ipsum irrepare non possit. Ex

R 2

Re-

Recipiente autem in antliam datur additus ope canaliculi BC, cui aptatum est epistomium D, ut aditus iste claudatur, vel aperiatur ad libitum. Antlia vero parvum habet foramen E, quod valvula tum occludit, cum embolus F manubrii dentati, & rotula, seu cylindro L crenis excavato circumacti deprimitur. Usus porro Machinæ est ejusmodi. Tracto embolo aer ex vase vitro, seu Recipiente AB per tubum BC irrumpit in antliam, si modo recluso epistomio D ipsi pateat aditus. Quo semel facto, inverso epistomio prohibetur aer, ne in recipiens redeat; antliae foramen aperitur, & aer ex antlia repellitur. Talis autem exsuctio, seu extractio aeris toties reperitur, donec Recipiens AB omni fere aere erassiore fiat vacuum.

Dicimus pene omnes effectus, qui in Machina Pneumatica exhibentur, tum etiam gravium liquorum in tubis suspensionem, nec non & pleraque alia, quæ ad Vacuum dicuntur pertinere, ex aeris gravitate, & elaterio, veluti à causa efficiente, rite repeti posse: etsi quandoque ad illa præstanda accedant circumstantiæ configurationis liquorum, corundem motus, & tuborum dispositio.

Probatur. Id recte constituimus, si ex aeris gravitate, & elaterio optima reddatur ratio eorumdem effectuum. Atqui ex aeris gravitate, & elaterio optima redditur ratio illorum effectuum. Ergo &c.

Major evidens, est, & omnium consensu obsfirmata. Neque enim physicam efficientem phænomenorum caussam aliunde cognoscere fas est, nisi ex ipsius cum phænomenis proportione, & consonantia. Minor probatur tum eorumdem effectuum explanatione, tum postea dissolutio ne adversantium argumentorum.

Primo igitur si vas vitreum, seu recipiens machinæ pneumaticæ, planis superficiebus constet, exhausto aere crassiore confringitur cum impetu. Etenim illæ crassioris aeris partes, quæ in vas incumbunt, à superioribus præssæ, tanta posse explicare nituntur, ut elasticitate sua confringant latera vasis. Atque in id confert etiam ipsius vitrei vasis fractilitas, quæ & passioni aptior est ubi planæ sint superficies, interiorisque aeris minor sit restituendi vis ad eam comparata, quam exerunt partes superioris aeris in vas incumbentes, & gravitate, atque elasticitate sua in illud agentes. Præstat etiam animadvertere, partes humani corporis tum graviores esse æquali volumine aquæ, durioresque, & magis inter se compactas, tum aut rotundas esse, aut ad rotundam figuram proprius accedere, si ad omnem superincumbentis aquæ columnam comparentur; unde fit, Urinatoris corpus sub aquis existens non percipere gravitatem aquæ, ipsiusmet aquæ partibus, se se invicem sustentantibus: ut diximus in quest. 3. in sol. ad obj. 1. Ita & vas

vas vitrum, seu Recipientis Machinæ Pneumaticæ, si rotundum fuerit, exhausto aere crassiore illæsum nihilominus permanet, quia circumambientis aeris partes. Quod si vas vitreum fuerit rotundum, illæsum manet, quia circumambientis aeris partes, in modum circuli, aut instar arcus, vel fornicis compressæ, vas æquabiliter premunt, nec illud possunt amplius constringere, nisi magis etiam comprimantur. At vero aeris partes tunc facile se se mutuo sustentant.

Secundo si vessicula pene vacua, collo illigato, in recipiente ponatur, exhausto aere adeo intumescit, ut plerumque disrumpatur, quippe ea est vis elastica aeris in vessica residui, ut cum ea ab incumbente externo aere non prematur, se se in magnam mollem explicit; tum quod concitus nunc in recipiente subtilis aer vessicæ poros pervadit, eademque dilatat. Ita & pomum rugis contractum, & pene flacidum, exhausto aere crassiore, complanatis rugis, quasi recens ex arbore decerptum appetet. Dilatatur enim cessante crassioris aeris pressione, subtilis aer intra pomi poros, & rugas contentus, easdemque elaterrio suo distendit. Quod si nimia fiat aeris exsuctio, pelle disrupta, pomum spumescit, quasi igni admoveatur. Eadem nimirum ex caussa, ob quam vessica disrupitur. Ubi vero aer crassior rursus permittatur ingredi in recipientis,

vessica, & pomum ad priorem statum redeunt. Quippe densior, & crassior aer agit in aerem tunc dilatum, & subtiliorem, & in ipsas partes vessicæ, & pomi, in quibus non extat nisi dilatatus ille subtilis æther.

Tertio si ovi extremitatem perforaveris, & ita illud collocaveris in recipiente machinæ pneumaticæ, ut pars perforata sit alteri parti inferior; exhausto aere crassiore, liquida ovi pars pene tota exit; ubi vero crassiori acri rursus patet ingressus, ea quoque ovi pars iterum priorem suum locum repetit intra ovum ipsum. Primo autem exit, quia cessante crassioris externi aeris pressione, subtilis aer intra ovi latera contentus, eademque permeans, elasticitate sua materiam illam dilatavit & exire coegit; E converso dum crassior aer rursus ingreditur, comprimit dilatum subtiliorem aerem, & liquorem, eosdemque cedere loco cogit; quare liquor rursus ingreditur.

Quarto si vas aqua repletum, spongiamque aqua imbutam in ipsius superficie positam, in recipientæ machinæ pneumaticæ constituamus; exsucto crassiore aere, spongia aliquatenus elevatur: nimirum quia cessante externi aeris pressione, aer intra poros spongiae contentus dilatatur, augetque spongiae volumen, illudque reddit levius: quemadmodum in Hydrostaticæ principiis explanavimus; unde spongia aliquatenus elevatur.

Jam

Jam si crasiorē aerem sinamus regredi in recipiens, spongia demergitur. Is enim crassior aer debiliorem, dilatatumque aerem in spongia contentum comprimit, volumenque spongiæ coarctat, graviusque reddit, proinde spongia descendit, quia volumen illius gravius est æquali aquo volumine.

Quinto fructus, flores, carnes, & corpora fere omnia, quæ aeri exposita cito putrescunt, post aeris crassioris excussionem diutius conservantur; eo quod aer crassior est veluti quoddam universale dissolvens, unde corruptionem, ut etiam vegetationem corporum promovet, quoniam innumeris pene exhalationibus terrestribus, salinique particulis refertus est. At vero subtilissimus æther in recipiente contentus, ut istis particulis non abundat, ita nec corruptioni, nec vegetationi plurimum confert. Hinc fit etiam, ut aves, nec non & alia animalia, quæ crassiore aere indigent, in recipiente posita, dum aer crassior educitur, paulatim deficiant, ad demum exsucto illo aere moriantur.

Sexto pulvis pyrius in recipiente positus, exsucto aere crassiore, ægre incenditur ope speculi ustori; Nec contagio quodam Ignis ab uno ad aliud pulveris granum diffunditur: immo sulphur tantum pyrii pulveris incenditur salis petræ aciculis vasi ipsi adhærentibus. Id vero in defectum aeris crassioris refundi debet, ac subinde in

dissipationem, dilatationemque maximam tum subtilioris aeris, tum particularum ignis. Animadvertis autem sulphur, si solum sit, nequaquam accendi, quoniam sulphuris partes violenter agitatæ, cesseante externi aeris pressione, nimis dissipantur. Ubi vero sulphuri adjungitur sal petræ, sulphur acceditur, ut diximus, quia sal impedit sulphurearum partium dissipationem. Candela accensa in recipiente constituta; exhausto aere crassiore extinguitur, quod tunc illius partes facile dissipentur, nec aer crassior materiam inflammabilem ascendere cogat per ellychnium.

Septimo aqua in recipiente posita, exantlato aere; per horas 26. successivas, emittit plurimas aeris bullas, quæ tamen post aliquod tempus semper minores apparent tum mole, tum numero. Cum enim exsutione crassioris aeris comprimentis, aer intra partes aquæ contentus possit se dilatare, elasticitate sua commoyer, ac elevat aquæ partes. Volumen porro bullarum aeris augetur, quo magis ad aquæ superficiem accedunt; quia nimirum quanto plus ascendunt, minoris semper aquæ massa, minorique pondere premuntur, unde & magis possunt se dilatare. Neque tamen credimus calidam tunc aquam fieri, etiamsi ebullire videatur, plus quam ardenti igni exposita. Quod si aqua jam tepida in exhausto ponatur, majores bul-

bullas emitit, quippe jam vi caloris rarefactus erat internus aer, unde & facilius egreditur. Ubi vero crassiorēm aerem ingredi rursus permiseris, bullæ illæ constringuntur, ac tandem evanescunt, & aqua ab ebullitione cessat. Quod si aqua exquisite calida in recipiente constituatur, non amplius extrahitur aer: ut habetur t. 150. Diarii Eruditorum Transalpinorum. Educto enim per vim caloris aere crassiore, poros aquæ occupavit subtilissimus æther, quia exitum & ingressum habet, quin bullas sensibiles efficiat. Ab Hydrargyro etiam, à sanguine, à vino, à spiritu vini extrahitur aer, ut prius diximus de aqua: etsi magis, vel minus pro diversa eorumdem qualitate.

Octavo. Fumus in machina Pneumatica exsucto aere crassiore, deorsum descendit, ut animadvertisit Borelli in libro de motionibus naturalibus à gravitate pendentibus. Id ipsum se vidisse testatur Doctor Taglini. Hujus porro ratio repeti debet vel ex eo quod fumus ut pote crassior attrahatur extra, unde & cogatur descendere, cum subtilis aer continuo per vitri poros ingrediatur; vel quod sit dilatato subtiliore aere gravius, id est volumen fumi gravius sit aequali volumine ætheris, proinde que huic debeat subsidere. Et si autem verissimum sic accensam flamman in exhausto recipiente extingui; tamen si parvus sclopus

explodatur in illo recipiente, quando jam fuerit exsuctus crassior aer, accenditur pulvis, flammamque efficit. Ratio est, quia pulvis prius multum aeris intra se continet, quo flamma movetur, & promovetur, perinde ac si externus aer ad eam brevem conflagrationem præsto esset.

Nono in recipiente machinæ Pneumaticæ, exhausto aere crassiore, sonus adhuc haberi potest, & percipi, quam languidior sit. Ita tradit P. Pace p. 1. Physicæ tract. 3. cap. 12. Boyles quoque id ipsum testatur, & Thomas Hobbes, & Hauksbee in experimentis Physico Mechanicis, sect. 5. exper. 3. Unde colligimus etiam aerem subtiliorem sufficere ad soni propagationem.

Decimo quando aer crassior extrahitur à recipiente, exit cum strepitu sensibili, quoniam à spatio ampliori cogitur in angustius. Ubi autem primo embolum trahimus, facillime id ipsum præstatur, quia aer crassior tunc in recipiente contehutus, aequali vi deorsum premit embolum, ac aer externus resistat. At quo plus interioris aeris educitur, eo augetur difficultas in emboli tractione, quoniam internus aer quo plus dilatatur propter alterius extractionem. minori vi embolum premit: minusque resistit aeri externo. Post unam, vel alteram emboli tractionem per exigua quedam veluti pluvia in recipiente apparet, qua illius la-

tera intus obducuntur. Aer enim intra recipiens conclusus, cum subito dilatetur, impellit, atque à se excutit insensibiles vapores, qui intra ipsum dispersi erant. Quare vapores colliguntur, & ab aere exquisitus dilatato minime sustinentur, unde deorsum pluviae instar cadunt. Plurimi autem vapores in latera recipientis à concitato aere projecti, vitro adhærescunt, nebulæque instar illud obtenebranti, lucis in eo diffusionem impedientes. Quod si postquam quis embolum descendere fecit, illud detinere cesseret, atque sibi ipsi relinquit; embolum ex se se ascendere videtur, atque in antlia corpus se recipit: nempe ab externo aere sursum truditur, cum ex altera parte subtilis aer dilatatus non æquali vi resistat pressioni aeris externi. Cum aer crassior educitus est à recipiente, istud separari non potest à machina, nimirum quia incumbens recipienti externus aer separationi resistit, cum non æqua sit vis in dilatato interno aere. Quare ubi aer crassior rursus subjerit in recipiens, nulla occurrit separationis difficultas.

Hæc de effectis in Machina Pneumatica contingentibus; Nunc ad alia transeamus.

Celebre autem occurrit in primis phænomenon lacrymarum vietrearum, quæ lacrymæ appellantur Bataviae, aut Prussiae. Igitur si vitrum colliquescens ex tubo aliquo guttatum sinatur cadere in

vas repletum aqua, quoniam materia illa plurimum glutinosa est, ejusdem inferior pars spissior, & gravior fluit, & in formam lacrymæ potrahitur, & cum exquisite calida in aquam cadat, de repente infrigidatur (fig. 1. tab. 3.) Crassiorem hujus lacrymæ partem (d) si malleo percutias, ea minime cedit, nec frangitur. Quippe fornicis instar dispositæ partes lacrymæ, invicem sustentant se se, & ictuum vi resistunt. At si subtilior pars (b), seu cauda lacrymæ frangatur; statim cum strepitu tota lacryma exilit, & in minutissimum pulverem comminuitur: tanto etiam impetu, ut pulvisculus ad duos, vel tres pedes diffundatur: ut scribit Mariotte in libro, de aeris natura. Hujus effectus ratio sic recensenda videatur. Etenim exteriores partes lacrymæ repentina frigore correptæ multum indurere, nec tamen ita apte sibi mutuo adhærescunt, ac si paulatim calor remississet. Interniores quoque partes dum refingerantur, ac minus spatium exigunt, male sibi cohærent, ac plus æqua tensæ se se evolvere data occasione moluntur; sunt enim instar fornicis curvatae. Atque ut in fornici lapides se se mutuo sustinent, sed ubi unum, aut alterum detraheris, facile reliqui collabuntur; ita fere evenit in lacrymis illis, quarum qualibet speciem habet ac structuram fornicis. Nam quando luxantur partes extimæ, quæ su-

subito frigore rigescentes texturam habent intortæ spinæ similem , & meatus angustos , aer interior exquisitæ rarefactus primo cedit subeunti aeri crassiori , tum elasticitate sua illi renitur , & ab eodem repercutitur ; unde fit ut tota lacryma in tenuissimum album pulvrem comminuatur , semel ac una & altera fornicis ejusmodi pars loco dimota fuerit . Quare istius phænomeni caussa & ex aeris externi pressione , & ex interni aeris rarefactione , ac elaterio , nec non & ex ipsa partium lacrymæ structura repeti debet .

Idipsum sane confirmari ex eo videtur . Nam lacrymæ in aere sensim concrescentes non disrumpuntur , nec eumdem effectum procreant : Non alia profecto de causa , nisi quia illarum partes ab aeris frigore sensim constrictæ , invicem magis cohærent atque internus proinde aer eamdem fere densitatis rationem obtinet , ac externus , unde huic subeunti æqua vi resistit . Idem ille effectus in lacrymis habetur , si amplior illarum pars pertundatur , aut limetur : aliquando etiam postquam acu tentaveris lacrymam perforare , nec tunc effectus prodierit ; postea etsi nulla tunc externa vis acus urgeat , velut suapte sponte disrupitur : ut notat Mariotte , loco citato ; quod sane indicat aeris externi actionem . In machina etiam pneumatica lacrymæ illæ majori impetu in pulvrem abeunt , adeo ut aliquando

Tom. II.

lucem emittant , ut Mariotte animadvertisit ; nimirum aucta subtillioris externi aeris agitatione , & elasticitate , qua interni aeris vim retundere potest , ut ex unius in alterum actione procedat lacrymæ disruptio .

Folles aerem aspirantes , & vehementius expirantes , occlusis omnibus foraminibus , quibus aerem intra sua latera excipiebant , & quo subeunte intumescebant , non nisi vi maxima deduci possunt ; immo solito franguntur , si nimio cum impetu devellantur , etenim superincumbens aeris moles premit follē , ejusdemque diductioni resistit , cum altera aeris pars subire non possit intra follē ipsum . Quare ut follis aperiatur , necessaria est magna vis , quæ vincere valeat pressionem , & gravitatem aeris follē incumbentis . Ita & duæ tabulae levigatae nequeunt æqualiter disjungi ob eamdem illam incumbentis aeris pressionem . Idipsum contingit in lamina ferrea super saxum perfecte explanatum , ac tersum posita . Jam si marmora illa summe levigata , invicemque conjuncta suspendas (figur . 4. tabul . 2.) marmor inferius trium digitorum latum sustinebito citra separationem pondus sexaginta & amplius librarum : aut notat Du Hamel tractat . 2. Physicæ Generalis , cap . 8. Tanta enim vis est aeris prementis marmor superioris , quantum aeris , qui premit marmor inferius . Pariter duo He-

misphæria Magdeburgica , (fig. 5. tab. 2.) divelli non possunt à duobus equis hinc inde in rectum nitentibus ; extracto nimur ab illis interno aere per foramen C, quod in altero hemisphærio relinquitur. Etenim illa hemisphæria circumdique ab externo aere præmuntur, nec intra eorum latera extat aer, qui resistere possit huic pressioni. Est autem longe major vis externi aeris hæc hemisphæria prementis, quam in aliis experimentis marmorium, follis, aut laminæ ferreæ. Quippe aer hic secundum omnes lineas premit, & rectas, & obliquas, & omni ex parte æqualiter propter sphæricam hemisphæriorum figuram, unde circa eadem hemisphæria fit quædam veluti concameratio externi aeris undique circumambientis. Quare multorum equorum vi opus est ad hanc aeris pressionem vincendam, & hemisphæria dividenda ; nam ubi pauci equi adhibentur, cum isti nunquam vim totam exerant trahendo, sed paulatim tantum, magnam adeo aeris resistantiam superare non valent.

Hæc de Hemisphæriis, ubi aer crassior eductus ab illis est. Jam si crassiore aere sint repleta, facile separantur, cum æqua vi internus aer exteriori resistat. Ubi vero densior aer circa hemisphæria etiam aere communi repleta colligatur, cum in aere interno non sit æqua vis resistendi aeris densiori, maximo etiam pondere hemisphæria

non poterunt separari. Expertus est idipsum Hauksbee, ut refert in suis experimentis Physico-Mechanicis, sectione 3. Itaque duo Hemisphæria auricalci (bbbb) (fig. 2. tab. 5.), communi aere repleta, & molli corio conjuncta, in valido viti recipiēti (aaaa) ab Hauksbee constituta fuerunt. Illorum porro diameter erat trium digitorum cum dimidio. Tum vero aeris copiam circa illa intromissit per locum, in quo clavis g extat ; aeremque ita addensavit, ut veluti circumambiens atmosphæra esset, aere illo, qui prius hemisphæria ambiebat, non nisi spatii dimidium occupante. Exinde evenit, ut inferius hemisphærium dividì non posset à superiori, nisi adhucito pondere 140. librarum, quarum quælibet ex sexdecim uncisi constabat. Animadvertis autem predictus Auctor æquale pondus fuisse necessarium ad separanda hemisphæria illa, quando exsuctus fuerat ab illis aer crassior, & communi aere ambiebantur, ac quando communi erant aere repleta, & densata illa aeris atmosphæra eorum exteriorē superficiem premebat. Extracto postea ab hemisphæriis aere crassiore ; & eadem illa aeris atmosphæra in illorum superficiem immissa, duplex pondus non erat sufficiens iis separandis, nempe 280. libras sustinebat inferius hemisphærium, quin à superiori disjungeretur. Attamen si ponderis non nihil additum fuisse, hemisphæria tum forent dividenda. Porro experimentum istud simul per-

perspicue ostendit hemisphæria propter aeris circumambientis gravitatem majorem permanere conjuncta. Nec alia profecto potest rite constitui causa, quæ æquam illam proportionem effectus cum interno & externo aere valeat explicare.

Ex eadem aeris gravitate alia hæc experimenta declarantur. In dolis vini, & in clepsydris irrigatoriis, si superius illorum orificium occludatur; aqua, vel vinum non effluit. Cum enim externus aer gravitate sua in orificium inferius apertum nitatur, & premat; aer vero internus non æquam habeat vim superandi pressionem exterioris; sic circa impeditur aquæ, vel vini egressus. Quod si clepsydra sit majoris altitudinis, ut optime notat Gassendus, aqua non remanet suspensa, sed effluit. Nimirum quia tunc aeris, & aquæ in clepsydra contentæ gravitas, & vis longe superior est pressione externi aeris, proindeque istius actionem vincit, eumque cedere loco cogit, & aqua in ejus locum pervadit à clepsydra egrediens. Ita & in Cucurbitulis medicis aer intra easdem conclusus, ardente igne rarefactus est; extincto postmodum igne, aer, qui carnem hominis circa cucurbitulam premit, tum etiam aer ille, qui sanguini, & carni permixtus est, vim suam exerit; & cum non æqua sit vis resistendi in aere rarefacto intra cucurbitulam, hinc fit ut caro elevetur, & sanguis rarefactus per carnem illam dilatetur; at-

que caro, & sanguinis in locum densati aeris, intra cucurbitulam propellantur. Similia quoque sunt alia experientia, quibus eadem adhibenda est ratio.

Nunc alia sunt recensenda, quæ ad liquorum suspensionem in tubis, elevationumque pertinent. Impletatur tubus hydrargyro, & simul sit hydrargyrum in vase (fig. 6. tab. 2.) Tubus sit 36. unciarum & superior illius apertura sit hermetica sigillata, vel ope riatur vessica suilla. Inferior tubi apertura dito occludatur, & in hydrargyrum in vase contentum immergatur. Sublato dito hydrargyrum in tubo contentum descendit, atque post varias librationes suspensum hæret ad 27. aut 28. unciarum altitudinem. Quod ipsum continet, etiamsi tubi majoris sint altitudinis, aut etiam inclinati. Idem experimur in tubis majoris, vel minoris latitudinis. Si vero tubus non excedat altitudinem 27. unciarum hydrargyrum totum hæret suspensum, nec effluit, nisi ea pars, quam digitus sublatio motione sua coegerit descendere. Hujuscem porro experiimenti hæc ratio est. Hydrargyrum primo descendit gravitate sua, atque acceleratione motus, quam descendendo acquirit, evincit pressionem columnæ externi aeris, cum quo postmodum, cessante motu, æquilibratur. At ubi aeris columnæ ab hydrargyro cadente compressionem patitur, vi sua elastica resilit, & renititur in hydrargyrum,

illudque repellit , & supra statum sui æquilibrii cogit ascendere. Hæ vero actiones mutuae repetuntur, donec excessus virium in hydrargyro, & aere paulatim amittuntur; atque adeo cessant librationes , seu vibrationes, quæ æquilibrium præcedunt. Sistit igitur hydrargyrum ad eam 27. aut 28. unciarum altitudinem , quoniam tunc perfectum obtinet æquilibrium cum externa aerea columnæ. Quoniam autem aer modo magis, modo minus est gravis, prout majorem, vel minorem vaporum copiam resert, aut magis, minusve à ventis comprimitur ; ideo hydrargyrum, æquilibrii leges perpetuo servans, majorem modo , modo minorem obtinet in tubo altitudinem.

In locis altioribus hydrargyrum minus ascendit , quam in locis inferioribus ; quoniam ibi brevior est aeris columnæ , atque adeo minus est gravis : in locis autem inferioribus altior est columnæ aerea , atque adeo gravior. Id expertus est D. Perier prope Clarum montem in celsissimo Alvernæ monte ad instantiam D. Paschali : ut pene Recentiores omnes scribunt , etsi Cartesius epistola 77. tom. 3. dicat se primum fuisse , qui hujus experimenti, effectusque exhibendi auctor fuerit. Ita & uter mollius , ac semiplenus aere , & obtutatus, dum ex loco inferiore transfertur in locum multo superiore, verbi gratia , ex valle in montem excelsum, paulatim magis, magis-

que inflatur , & distenditur , prout ad altiores , altioresque montis partes transferuntur : in ipsoque montis fastigio ita inflatur , & contenditur , ut aer per vim intromissus videatur ; è contra vero dum idem uter rursus demittitur in vallem, denuo se se restituit paulatim pristino statui. Nimirum major in valle , minor in monte est aeris columnæ , & gravitas ; unde minor ibi , major hic est vis elasticæ , & expansio aeris in utre conclusi.

Jussit etiam D. Paschalius sibi elaborari tubum inflexum A B C D E F (figur. 8. tabul. 2.) hermetice clausum in A , & pertusum in D , sed vesica suilla ibidem obductum. Hic , ubi hydrargyro impletus fuit , & solito modo in vas subiectum F immersus, hydrargyrum quidem ad punctum E in tubo D E F descendit : sed quod in tubi ipsius flexu B C fuit comprehensum , ibi remansit , utpote quod ab aere minime deprimeretur , & aliunde curvamine B C sustineretur. Verum statim atque vesica , quæ orificium D obtinebat , acu fuit perforata , repetente aer per foramen subiens hydrargyrum F E in vas subiectum depresso ; alterum vero in curvamine C B comprehensum , in punctum A sustulit. Nimirum primo hydrargyrum in punto E suspensum hæsit , quoniam æqua vis erat aereæ externæ columnæ. At ubi perforata vesica , aer in-

ingressus est in tubum , cum ista aerea columnæ pares haberet vires pressioni alterius columnæ aereæ externæ , hydrargyrum gravitate sua decidit, sublato per ingressi aeris gravitatem æquilibrio. Hydrargyrum autem in curvamine contentum , pressioni ingredientis aeris non valens resistere , ab istius aeris gravitate sursum ascendere coactum fuit.

Quod autem diximus , hydrargyrum ad 27. aut 28. unciarum altitudinem in tubis suspensum hærere , propter aeris exterius incumbentis gravitatem ; ex eo maxime confirmatur , quia si experimentum illud in tubo capiatur aqua replete , inverso tubo aqua non effluit , nisi tubus altitudinem excedat 32. pedum. Quippe cum aqua sit mercurio , seu hydrargo levior , aeris externi gravitas aquam ad 32. pedum altitudinem librat. Tantumdem enim ponderis est in columnæ aquæ , cuius altitudo sit pedum 32. ac in columnæ hydrargyri , cuius altitudo sit 27. aut 28. unciarum.

Hinc vero aeris ipsius pondus metiri fas est. Exempl. gr. metiamur pondus columnæ aereæ super tubum aliquem descendantis (fig. 3. tab. 3.) Sublata lance altera bilancis , eidem appendatur tubus A , qui semper eamdem hydrargyri quantitatem sustinet. In altera porro lance , cuius gravitas æquatur gravitati ipsius tubi , si spectetur sine hydrargo , pona-

tur pondus libræ unius. Jam si bilancem ex medio C sustineas , omnia erunt in æquilibrio perfecto. Pondus illud libræ non cogit tubum ascendere. At vero tubus detineri immobilis non potest , nisi à pondere columnæ aereæ D , quæ in tubi superiori extremitatem descendit. Ergo illa columnæ aereæ unius libræ pondus habet. Siquidem æqualis est gravitatis , ac columnæ aeris incumbentis hydrargyro in vase existenti : nec alia habetur differentia , nisi quantum ad tubi altitudinem. Porro columnæ illa , quæ in hydrargyrum vase contentum premit , unius libræ pondus habet ; quoniam libram unam hydrargyri in tubo suspensam hærere facit. Ergo columnæ quoque illa superior pondus obtinet libræ unius ; Unde ipsa æquilibrium facit cum pondere unius libræ in alia bilancis lance posito , nec sinit istud pondus sursum cogere tubum hydrargo repletum.

Quare ex dictis possumus etiam metiri pondus aeris humanum corpus circumundique prementis. Columnæ hydrargyri , cuius altitudo sit 28. pollicum , ejusdem ponderis est , & æquilibrium obtinet cum columnæ aquæ , cuius diameter æqualis sit cum columnæ hydrargyri , & altitudo sit 32. pedum. Porro columnæ aquæ 32. pedum cubicorum , plus ponderat , quam 2000. libræ. Ergo columnæ aereæ ejusdem diametri , quia æquiponde-

derat illi aqueæ columnæ; pondus obtinet plusquam 2000. librarum. Igitur si corpus humanum omni ex parte latitudinem habet pedis unius; oportet affirmare, plus quam 2000. libras ponderis eidem incumbere. Quod si aerem spectemus, quo humanum corpus circumduumque ambitur, & premitur; mirabile quidem est, & tamen verum, nostrum corpus pressionem pati librarum duodecim mille circiter, ac quindecim mille. Nihilominus pressionem hanc minime sentimus, ob eamdem illam rationem, qua diximus in quæstione tercia, Urinatores sub aquis non experiri pondus aquarum incumbentium, & undequaque prementium; quoniam fluidi natura est, ut partes se se mutuo sustineant; Tum quod humanum corpus æqualiter premitur omni ex parte, sive intus, sive extra; unde organorum dispositio nullatenus immutatur: & aer intra corpus humanum contentus resistit aeri exteriori prementi.

Aptissima itaque ex dictis apparet ratio suspensionis liquorum gravium in tubis. Quemadmodum autem diximus in tubis aquam ad altitudinem 32. pedum elevatam sustineri ab aeris externi gravitate; Ita in antliis aspirantibus ob eamdem caussam nonnisi ad eam altitudinem aqua elevatur. Quare locus hic exposcit, ut Antiarum notionem exhibeamus. Porro Antlia est *machina aquis sursum effe-*

rendis idonea. Et quidem duplicitis generis sunt antliæ: alia prementes dicuntur, alia aspirantes, quæ magis ad presens argumentum pertinent.

Antliam prementem exhibet (fig. 3. tab. 4.) Sit tubus inflexus ABCDE, cuius orificium A in aquam fit immersum, & embolus B, modo attollatur, modo deprimitur ope manubrii F, vel rotæ ipsi applicatae, & ab aqua fluente perpetuo circumactæ. Dum embolus ad tubi orificium A adducetur, aqua intus per foramina, vel aperturas, quæ sunt in B, subibit, & spatium inter B, & D comprehensum implebit. Quare embolus in tubum depresso eamdem aquam comprimet, ac per valvulam D coget ascendere. Hæc autem valvula ex multiplici corio composta est, & tubo sic aptata, ut in partem E aperiatur, & aquæ in eam partem tendenti transitum præbeat, sed redditum in partem C intercludat. Quamobrem continua emboli compressione nova semper aqua in tubum truditur, quæ aliam aquam impellit. Cumque valvula eam ascendere sinat, non descendere; necesse tandem est, ut aqua ad supremam tubi partem attollatur, & in aliquod receptaculum effluat, ex quo in omnes vel domus, vel civitatis partes potest distribui. In hujusmodi igitur antliis aquæ ascensio non ab aeris gravitate repetitur, ut appareat, sed ab impulsu embo-

boli in aquam, & ipsius aquæ compressione, quæ cum penetrari nequeat, nec densari, cogitur sursum ascendere.

At vero in antliis aspirantibus ascendit aqua ab aeris gravitate pressa. Illarum usus, & fabrica ejusmodi est. Cum adducitur embolus B (fig. 5. tab. 3.) ope manubrii A, aer sursum evehitur. Quocirca externus aer aquam subiectam in EE comprimit, eamdemque cogit ascendere per orificium F, cum aer intra antliam contentus non resistat pressioni aeris externi, quoniam sursum attrahitur. Igitur aqua cum nullam resistantiam in orificio F inveniat, pressa ab aere sibi incumbente sursum cogitur. Nam valvula D ipsius ascensui nullatenus obstat, sed descensum solum impedit; non secus ac in antlia premente ostensem est. Si ergo sapienter aspiratio, continuo ascendet aqua, quæ alteram valvulam in embolo aptatam aperiet; ultraque ipsam progressa remeare non poterit; sieque per superiorem tubi partem in receptaculum paratum effluet, ex quo ad libitum in singulas domus partes poterit derivari. Quantumvis autem antlia longior sit, atque embolus sursum magis adducatur, putat ad 50. vel 60. pedum altitudinem, tamen aqua non nisi ad 32. pedum altitudinem elevari poterit; quam constantem aquæ ascensionem primus observasse refertur agricola quidam Flo-

rentinus, qui caussæ ignarus rem Galilæo indicavit. Illius porro determinata altitudinis non alia suppetit ratio, nisi quod aeris pondus impar sit majori aquæ columnæ sustinendæ, atque tunc æquilibrium inter aquam, & aercam columnam habeatur: quemadmodum in 28. digitis hydrargyri evenit. Et animadversione dignum est, 28. uncias hydrargyri, & 32. pedes aquæ æquali fere pondere constare, ut diximus. Hydrargyrum enim quatuordecim viciis est gravius aqua, unde una unica hydrargyri æquilibrium facit cum 14. unciiis aquæ.

Duo illa antliarum genera in una eademque machina sæpe conjunguntur, ut antliæ aspirantes effundant aquam in alias antlias prementes; iisdemque multiplicatis, evehatur aqua pro libito ad qualcumque altitudinem, cum tamen semper in unaquaque antlia aspirante non nisi ad predictam 32. pedum altitudinem efferri possit. Ejusmodi compositam machinam exhibit (fig. 6. tab. 3.) Dum enim manus A sursum trahit embolum B, aer embolo incumbens sursum quoque effertur, ac motu pene circulari in aquæ superficiem GG irruit, eamque premit. Quapropter aqua per orificium D ascendit in tubum C D, ac per valvulam C in tubum B C E intromittitur. Depresso autem embolo B, comprimitur aqua; clauditur valvula C, & aperitur valvula E, quæ aquæ

aquaë descensui obstat, non ascensui. Simili operatione sæpius repetita impletur receptaculum F ab antlia, quæ aspirans est in tubo DC, & premens in tubo BCE.

Hæc igitur omnia ob aeris gravitatem, & elaterium eveniunt in antliis, & tubis communibus. Nunc effecta in siphonibus contingentia oportet explendere.

Sit Sipho, seu tubus recurvus, cuius unum crus sit altero brevius. Tum illius crus brevius in aquam mergatur, nullum in aqua varium motum perspicies. At ubi ex alio crure aerem attraxeris, statim aqua per illud exit: ut in (fig. 3. tab. 4.) Etenim ante aeris exsuctionem æqua vis erat inter pressionem aeris externi aquam comprimentis, & in siphonem cogentis, ac pressionem, seu resistentiam aeri intra siphonem contenti. Quare aqua immota manebat. At per exsuctionem aeris in siphone contenti, rarior fit aer iste, unde & illius resistentia imminuta est. Quo fit, ut externi aeris columnna vincat pressione sua, & aquam cogat ascendere, quæ postea in alterum siphonis crus descendit, tum vi acceptæ pressionis, tum vi propriæ gravitatis. Nam & aeris columnna longiori siphonis cruri exterius respondens superatur à majori quantitate liquoris, unde & cedere cogitur, & aqua descendit. Eadem ratione si crus longius siphonis in aquam mergatur, aqua non ascendet; quo-

niam non potest tunc altera aeris columnna vincere resistentiam aeris in longiore crure contenti.

Explicatur inde hoc aliud experimentum. Impleatur Sipho hydrargyro, & unum illius crus in vas B immergatur, alterum vero in vas C. Erit tunc in utroque crure æquale vacuum hydrargyri, & æqua ejusdem hinc inde suspensio ad D E: ut in (fig. 1. tab. 4.) Quod si paulisper attollatur vas B, remanente immoto siphone, ascendet hydrargyrum in crure illo ad altitudinem D (fig. 2. tab. 4.) cum tamen hydrargyrum in alio crure existens permaneat immotum. Horum ratio ex dictis descendit. Ut enim in tubis sic & in siphone suspensum hinc inde hydrargyrum manet propter externi aeris pressionem, & gravitatem. Quando autem vas attollitur, ascendit hydrargyrum ex commotione, qua vas, & sipho, & hydriargyrum ipsum succutiuntur, unde & facilius cedit aeri prementi.

Ex iis, quæ de Siphone recurvo paulo ante diximus, facile est exhibere figuram Tantali, basi incumbentem, & ad bibendum pronam, quæ tamen voti compos nunquam efficiatur, quod aqua in vas infusa ad summa Tantali labia perducta repente diffluat. Si enim intra basim BCFE (fig. 5. tab. 4.) tubus inflexus BHCG recondatur, cuius alterum crus patentem habeat intra vas aperturam B: alterum infra ipsius basim producatur;

tur; ubi aqua in vas ABCD infundetur, ea per aperturam B ascendet in tubum. Sed cum pervenerit ad punctum H, tum per longiorem tubum HC apertum infra vasis pedem, seu basim emittetur. Adeoque totum vas evacuabitur, nec aqua in eo ultra punctum A, quod figuræ labii respondet, efferetur: sive Tantalus ad bibendum pronus spe sua semper frustrabitur.

Objicies 1. Suspensio fluidorum in tubis non est adscribenda gravitati, & elaterio aeris, si huic ipsa non correspondet. Ita est. Ergo &c. Major evidens est, quippe potissima nostræ assertionis ratio dicitur ex æquilibrio, quod habetur inter pondus columnæ aereæ, & pondus hydrargyri ad 27. vel 28. digitorum altitudinem suspensi, seu pondus columnæ aqueæ, cuius altitudo sit pedum 32. ut diximus. Minor probatur. Sæpe contingit, hydrargyrum in tubo Torricelliano suspensum hærere ad altitudinem 75. digitorum, etsi hydrargyrum perfecte expurgatum esset ab aere. Atqui pondus columnæ hydrargyri ad altitudinem 75. digitorum elevati non correspondet ponderi columnæ aereæ. Ergo &c. Minor patet. Pondus illius columnæ hydrargyri plus duplo excedit pondus columnæ ejusdem hydrargyri ab aere nondum expurgati ad altitudinem 27. aut 28. digitorum elevatae. Sed columnæ aereæ æquilibrium facit cum ista, ergo longe ab alia superatur; adeoque &c.

Tom. II.

Major probatur celeberrimo Hugenii experimento, quod in Transactionibus Philosophicis Societatis Regiæ Britanicæ, tom. I. sic expressum est. Cum juxta Torricellianum morem tubus (fig. 7. tab. 2.) hydrargyro repletus esset, & antequam tubus inverteretur, atque in hydrargyrum in vase contentum immergetur, hydrargyrum ipsum esset ab aere perfecte expurgatum; evenit, ut cum tubis inversus in hydrargyrum subjecti vasis immergetur, suspensum hæserit hydrargyrum usque ad tubi summitatem, ad altitudinem septuaginta quinque digitorum. Testatur etiam Du Hamel idem experimentum repetitum saepius fuisse in Regia Academia Parisiensi; aliqui celebres Viri id ipsum tradunt. Immo Vallisius, Hydrostaticæ prop. 13. & Newtonus, in quæstionibus Opticis, asserunt, etiam in vacuo Machinæ Pneumaticæ experimentum illud prope similiter ac in libero aere observari. Quod idem contingere, si experimentum capiatur in aqua expurgata, tradit Du Hamel. Experimentum istud proinde certum est, etsi in Italia res pro votis non contigerit.

Sed & hinc alterum hoc conficitur argumentum. Hydrargyrum hæret suspensum ad altitudinem 75. digitorum etiam in recipiente Machinæ Pneumaticæ, exhausto aere crassiore. Ascensus etiam aquæ per siphonem contingit in illo vacuo, ut idem Hugenius testatur se exper-

Tum

tum fuisse, & in laudatis Transactionibus refertur. Ubi pariter traditur, duas lances metalli, aut marmoris perfecte levigatas, & in vicem conjunctas, etiam in exhausto Machinæ Pneumaticæ sibimet adhæscere, ut in aere libero: quod Thomas Hobbes pariter se exper-tum fuisse testatur. Id ipsum in duobus Hemisphæriis auricalci contingisse narrat Hauksbee, sect. 3. His itaque constitutis sic ratiocinamur. Prædicti effectus contingunt etiam ubi non extat aer crassior. Ergo adscribendi non sunt gravitati, & elaterio istius aeris, velut caussæ efficienti. Neque tunc fas est eos attribuere aetheri subtilissimo. Istius enim longe minor gravitas est, quam aeris crassioris: ergo vi sua non potest huic æquivalere. Igitur aliam oportet caussam designare pro iisdem effectibus.

Respondetur. Nego minorem. Ad probationem, concedo majorem, & explicò relata experimenta. Omnes expositi effectus oriuntur à gravitate, & elaterio aeris vel crassioris, vel subtilioris. Sed hæc gravitas, & elaterium, actione que ab illis proveniens aliquando major est, aliquando minor, prout major, vel minor est resistentia, & vis elastica liquidorum in tubis extantium. Diximus enim, æquilibrium fieri mutua actione, & resistentia fluidi, & aeris, eorumque mutuis vibrationibus. Porro cum in hydrargyro vel peregrina, vel nulla pene sit vis elastica, nisi ab aere

intra poros illius inclusa; hinc fit, hydrargyrum ab aere crassiore expurgatum, minori gaudere partium motu, minusque resistere pressione à gravitate, & elaterio externi aeris impressæ, adeoque ab illa posse ad majorem altitudinem suspensum detineri; exsuctione etiam aeris partes hydrargyri sibi mutuo magis accedunt, ac proinde subtilis aer in minori copia pervadit poros hydrargyri, atque partes illius minus exagitat, minuitque in illo resistentiam. Secus contingit, dum hydrargyrum non est ab aere expurgatum; tunc enim quia majorem aeris copiam continet, majori gaudet elaterio, adeoque partes suas magis agitatas habet, magisque resistit externæ pressioni: nam etsi augmentum vis elasticæ imminuat pondus; tamen ipsa vis elastica plurimum confert ad augendam resistentiam pressioni exter-næ. Hinc ut experientia com-pertum est, in phænomeno Hugeniano paullulum succussa machina ad consuetam altitudinem hydrargyrum descendit; eo enim motu partes hydrargyri concitantur; augeturque resistentia pressioni exter-na, & uberior aditus aperitur aeri subtiliori, qui ad hoc ipsum confert. Effluit autem tunc hydrargyrum non gradatim, sed subito, quia successione partes illius omnes commoventur. Idem de aqua dicimus, quæ ex se se elastica non est, ut in sequent. quæst. probabimus.

Eadem ratio redditur experi-
menti in exhausto Machinæ Pneu-
maticæ. Nam defectus elasticitatis
in hydrargyro , & aqua , & gravi-
tas , atque maxima elasticitas aeris
subtilioris , qui in recipiente illo
magnopere concitatus est , cau-
sam phænomeni exhibent ; hinc
succussa machina totum effluit tunc
hydrargyrum , quia ea partium ip-
sius commotio vincit subtilioris æ-
theris resistantiam , locumque facit
ingressu ejusdem ætheris in poros
hydrargyri . Quamvis autem subti-
lis æther minorem tunc habeat gra-
vitatem , ac aer crassior , majori
tamen pollet elasticitate , quæ re-
sistentiam , & vim adauget , ut di-
ximus .

Atque hinc expendimus , cur
duo marmora levigata , aut duo he-
misphæria exsucto aere crassiore ,
conjuncta permaneant in exhausto
Machinæ Pneumaticæ , ut in libe-
ro aere . Subtilis enim æther in re-
cipiente exhausto contentus , atque
à vaporibus , & fumis , qui elasti-
ci non sunt , expurgatus , in mar-
morum , & hemisphæriorum super-
ficies exteriores tum elasticitate
sua , tum gravitate connititur ,
easdemque premit . Æquivaler au-
tem pressioni aeris crassioris tum
majori sua elasticitate , ut diximus ,
tum quod subtilis æther in recipiente
existens communicat continuo cum æthere externo poros vi-
tri facile permeante ; at intra mar-
mora pere exigua est ætheris copia ,
& intra hemisphæria æther est ex-

quisite rarefactus : crassior autem
marmororum , & hemisphæriorum sub-
stantia longe difficiliorum reddit
interni ætheris cum externo com-
municationem . Idem dicendum est
de ascensu liquoris in siphone con-
tra exhaustum Machinæ Pneumati-
cæ constituto .

Hæc ad argumenti solutionem
proposuimus . Animadvertere autem
oportet , quod antea diximus ,
hydrargyrum nempe in Hugeniano
experimento jam fuisse ope Machi-
næ Pneumaticæ perfecte expurga-
tum ab omni aere crassiore intra
illius poros antea contento ; quod non
contingit in communi , & usi-
tato Torricelli experimento , unde
in isto hydrargyrum magis resistit
subtili aeri in tubi summitate exi-
stenti , & , ubi ad consuetam alti-
titudinem pervenit , ibidem con-
sistit .

Aliorum responsio petitur vel
ex adhærescentia hydrargyri cum
vitro , propter fæces hydrargyro
permixtas , aut propter vitri asperi-
tates . Alii tubum capillarem , seu
strictiorem fuisse dicunt . Sed ne-
mo Virorum illorum , qui expe-
rimentum confecerunt , tubum fuis-
se capillarem tradit , & figura , quam
ex laudatis Transationibus exhi-
buimus , oppositum ostendit . Hy-
drargyrum autem non adhædere vi-
tro , immo illius effugere contactum ,
adnotat Wallis , ut ibidem legimus ,
& docet etiam Regnault tom . I .
pag . 338 .

Objicies 2. Sereno cælo hydrar-

gyrum altius ascendit in tubo Torricelliano, quam cælo nimboso, aut pluvio. Atqui serenus aer levior est aere pluvio. Ergo hydrargyrum magis ascendit, dum aer levior est; minus ascendit, dum aer est gravior; adeoque non ab aeris gravitate ascensus ille oritur, &c. Major Philosophorum omnium consensu sensus ille oritur &c. Major Philosophorum omnium consensu firmatur, etsi Borellus contrarium putaverit. Minor probatur. Serenus aer minus refertus est crassioribus vaporibus, quam aer nimbosus, aut pluvius. Ignoratur &c.

Respondeatur. Concedo majorem, & nego minorem. Ad probationem, distinguo antecedens: Serenus aer minus refertus est crassioribus vaporibus, quoad sensus nostros, concedo: re ipsa, nego antecedens, & consequentiam. Major dubio procul vaporem copia in aere extat, sereno cælo, quam cælo nimboso, ac pluvio. Nam sereno cælo flumina, & fontes minorem habent aquarum copiam, terra aridior est, plantæ, flores, & fructus languent; vi enim caloris Solaris maxima tunc vaporum, & exhalationum copia è Tellure attrahitur, & intra atmosphærā recipitur. Sed cum vapores illi à Solaribus radiis, & Telluris calore attenuati sint, & subtiliores effecti, in magnos disperguntur atmosphæræ circulos, minusque impediunt radiorum lucis propagationem, unde fit,

ut sensibus nostris non appareant; neque tamen consequens est, re ipsa eos minime extare, aut gravitate sua pondus aeris non augere. At nimboso cælo vaporess longe in minori copia è Tellure attrahuntur, unde & minorē addunt aeri gravitatem; sed cum non adeo attenuati sint, atque in minores atmosphæræ circulos nobis propinquiores distribuantur, iccirco lucis propagationem præpediunt, nobisque fiunt conspicui. Ergo sereno cælo gravior est aer, quod maxima in eo tunc sit copia vaporum.

Dices. Nimboso cælo, cum aer ad pluviam inclinat, vaporess in magnis atmosphæræ circulis prius expansi descendunt, & in minores circulos colliguntur. Ergo magis comprimunt subjectum aerem, & pondus eidem addunt; proindeque hydrargyrum deberet attollī.

Respondeatur, in primis longe minorem esse vaporum copiam nimboso cælo, quam sereno, quoniam eorum attractio longe minor tunc est, ut diximus. Deinde antequam pluvia cedat, maxima vaporum insensibilium copia descendit, unde & atmosphæræ pondus immunitur.

Objicies 3. Si suspensio hydrargyri in tubo orietur ab aeris gravitate, & elaterio, non tam alte sustineretur hydrargyrum in cubiculo clauso, quam in platea, seu loco alio aperto, & patenti. Quippe aer

aer minus gravis est in cubiculo, ac foris; ibi enim brevior est aeris columna. Atqui compertum est, eamdem esse hydrargyri altitudinem, sive experimentum capiatur in cubiculo clauso, sive in loco patenti. Igitur &c.

Respondetur. Nego majorem. Etenim vel cubiculum illud, in quo experimentum, non sic accurate est clausum, quin aer exterior introire possit; vel perfecte clausum supponitur, ita ut nullus aeri externo pateat aditus? quod tamen vero minus simile videtur, cum subtilis æther quorumcumque corporum poros continuo pervadat. Utraque autem data hypothesi ad eamdem debet altitudinem in cubiculo hærente mercurius, quam obtinet in loco patenti. Primo sane in casu cum certum sit, ex dictis in Hydrostaticæ principiis, liquores omnes æque per lineas obliquas, ac per lineas perpendicularares gravare, hoc est, in liquidis actionem gravitatis quaquaversum diffundi: unde in vase, cuius figura sit instar coni, laterales columnæ, etsi breviores sint columnis intermediis, non minori vi fundum premunt, ac istæ quoniam ab his columnis etiam illæ comprimuntur; Iccirco etsi columna aeris in cubiculo contenti longe brevior sit columnis exterioribus, non minori tamen vi in mercurium in vase stagnantem agit, quoniam exteriores aeris columnæ internam illam premunt; quare &

mercurius ad consuetam altitudinem 25. aut 28. unciarum, seu pollicum hærebit suspensus. Placet autem experimento hic confirmare quod diximus, aerem, & alios liquores, non minus secundum lineas obliquas, quam secundum perpendicularares premere. Sit vas vitreum A B C D E (fig. 6. tab. 4.), cui exiguis tubis A B, ex utraque parte apertus, aliquo glutine, vel ferrum conjugatur in C, & foramen aperiatur in D, paulo altius, quam infima pars tubi B. Impletatur vas illud aqua, partim per foramen D, ope infundibili, posito scilicet digito in A; partim per orificium A; opposito itidem digito in foramine D; ut nihil effluat. Ubì digitus ex D fuerit renotus, aqua existens in tubo A B, ex ipsis summo, seu puncto A ad punctum E descendet è regione foraminis D. Tumque præterea nihil effluet, quoniam aeris columna quæ per orificium A in partem E incumbit, æqualis omnino est columnæ, quæ in puncto D resistit. Porro in hoc experimento prior aeris columna perpendiculariter, posterior oblique tantum in aquam agit: & tamen ambæ aquam in æquilibrio sustinent: Apparet igitur aerem, & cæteros liquores, non minus secundum lineas obliquas, quam secundum perpendicularares, esse ponderosos. Quod si secunda hypothesis habeatur, hoc est, cubiculum, in quo experimentum in arguento alla-

allatum capit, ita clausum dicatur, ut nullus sit aeri, sive ad ingrediendum, sive ad egrediendum transitus, tunc aer intra cubiculum conclusus, parietibus, & tabulatis cubiculi innexus, eademque vim habet premendi, ac aer externus; non quod idem sit illius pondus, sed eadem manet vis à pondere impressa, seu eadem manet vis elastica, quæ descensum hydrargyri prohibet: quemadmodum in horologii portatilis tympano eadem est vis convoluti chalybis, qua pressus antea fuit. Non enim potest hydrargyrum descendere, quin aerem repellat. Aer autem recedere nequit, cum nullus ipsi ad recessendum locus præbeatur. Quam obrem aer iste vi sua elastica sustinere debet hydrargyrum ad altitudinem consuetam. Alioquin si aer intra cubiculum inclusus minori vi deberet agere, rario utique evaderet: quod fieri non potest, cum locus egrediendi non pateat, quo se recipere aer dilatatus queat, nec una pars inclusi aeris aliam densiorem reddere valeat, quæ æquali prorsus vi, & actione eidem resistit.

Objicies quarto. Si liquorum in tubis suspensio est ab aeris pondere, & elaterio repetenda, explanari non posset tanta irregularitas, quæ in Barometris invenitur, aliisve in tubis hydrargyro repletis. Quippe immutatio aere externo, majorem modo, modo minorem conspicimus hydrargyri

altitudinem: maxime juxta regionum diversitatem. Tum nulla est ratio, cur vinum in tubis ad maiorem altitudinem hæreat suspensum, quam aqua. Sturmius autem expertus est, eam aeris columnam, quæ sustinere valet triginta & unum pedem aquæ, sustinere triginta, & unum pedem vini, cum dimio: ut in Collegio Experim. Diario Eruditorum 1678. & refert P. Regnault exerc. 21. pag. 282. Tertio si parva ampulla, vel tubus, cuius medietas tantum sit aqua repleta, invertatur in subjectam aquam, suspensa hæredit aqua in illo contenta. Jam si ab aeris gravitate id proficiscitur, deberet potius alia aquæ portio ex subjecto vase in ampullam, seu tubum cogi, cum parva illa columna aquæ in tubo præexistens longe minor sit, ac columna aquæ 32. pedum, quæ dicitur æquilibrium facere cum externi aeris pressione. Quarto si in tubum Torricellianum ingrediatur vel minimum aeris, totus mercurius effluit. Non efflueret autem, si aer externus gravitate sua urgeret in mercurium in subjecto vase stagnantem. Aer quippe effluxui illi deberet obsistere. Igitur &c.

Respondetur ad primum, eas irregularitates ex varia tuborum compactione, nec non & liquorum multiplice natura, aut facum in illis abundantia majori, vel minori, potissimum vero ex calore, aut frigore externo, esse rependetas,

das. Neque tamen inde consequens est, aeris gravitatem, & elaterium non esse caussas suspensionis liquidorum: quemadmodum aliis etiam in motibus, puta gravium deorsum, irregularitates variæ, quæ propter figuræ, vel mediæ diversitatem eveniunt, non infirmant eam opinionem, quæ illorum motuum principia constituit.

Ad secundum. Ratio illius effectus optima est ex ipsa aeris gravitate. Quippe vinum specifice levius est aqua; unde & major vini portio æquilibrium facit cum externi aeris pressione.

Ad tertium responsio patet ex dictis in solutione secundæ objectionis. Qui enim aer, inverso tubo, vel ampulla, superiores illius partes occupat, vi sua elastica contranititur pressioni aeris externi. Quare nec aqua vasis sursum detрудi in ampullam potest.

Ad quartum. Effluit mercurius, semel admisso aere per rimulam aliquam, quoniam æquilibrium afferatur. Quod si continuo per rimulam illam aer ingredi sinatur, jam totus mercurius descendit; quippe intromissus aer vi sua, & pondere æquivalet pressioni aeris exteriori: ut sæpe diximus.

Objicies quinto. Si vel minimum aeris ingrediatur inter latera follis, vel inter duo marmora, aut hemisphæria, quorum antea mentionem fecimus; pene nulla est visioni resistantia. Jam vero imperceptibile videtur, per exiguum

illam aeris columnam æquivalere posse majori columnæ, quæ follis latera, aut marmora, vel hemisphæria premit. Tunc enim æqua esset vi in minori parte, ac in majori. Secundo cum ipsa solida corpora non æqua vi per lineam obliquam operentur, ac per lineam rectam; quanam ratione fluidorum æqua vis est secundum lineas obliquas, ac secundum perpendiculares? Tertio cum aer continua fluat, perpetuoque motu concitus sit, & in unam modo, modo in alteram partem; nunc sursum, nunc deorsum agatur maxima ventorum vi; quomodo poterit semper in Tellurem pondere suo contenti? Quarto quod diximus in recipiente exhausto lances servari conjunctas, & mercurium hærente suspensum ob subtilioris aeris gravitatem, & elaterium; id vero minus simile videtur. Nam subtilis aer intra duo hemisphæria Magdeburgensia contentus, vi sua non æquivalet aeri crassiori; alioquin nulla esset difficultas in illorum divisione, quemadmodum facile separantur, quoties aer crassior in illis extat. Ergo subtilis aer in recipiente exhausto contentus, non poterit æquivalere pressioni aeris crassioris, & lances conjunctas, ac mercurium suspensum servare; ut præstat crassior aer. Ita & in locis altioribus subtilior est aer, & tamen altitudo mercurii longe minor est, ac in locis inferioribus, subtil aer crassior habetur. Ergo ex-

pe-

perimentum illud Hugenii, quo constat mercurium suspendi ad 75. digitorum altitudinem, etiam in exhausto recipiente, non rite explanatur per aeris subtilioris actionem. Igitur &c;

Respondetur ad primum. Diximus quæstione quarta in principiis Hydrostaticæ, liquorum gravitatem æstimandam esse secundum ipsorum altitudinem. Quare pere exigua licet columna aeris subeuntis latera follis conniti poterit pro suæ altitudinis ratione, & resistere pressioni alterius majoris aereæ columnæ, quæ & vim premendi potissimum exercet secundum suam altitudinem. Valet vero quam maxime ad argumenti solutionem, quod ingressus aer intra latera follis, adinstar aeris in cubiculo oclusi operatur, & ab externo aere sibi respondentे urgetur, & impellitur: quo fit, ut æqua sit illius vis, ac majoris columnæ super follem incumbentis; æqua nempe sit vis illius pro majori alia sibi respondentе exteriori columna, à qua premitur.

Ad secundum. In solidis, ubi actio ex una in aliam partem communicatur, si non recta procedit, infringitur actio ipsa. In fluidis autem quæ linea insipientibus nobis obliqua est, ea propter undequaque similem fluidorum naturam est respectu fluidi recta. Quod maxime valet in aere. Cum enim aer æqualiter Telluri circumfundatur, quemadmodum respectu Tellutis

nulla pars est prior, aut posterior, nulla obliqua, sed omnis recta; Ita & in aere dicendum, qui circuli instar Tellurem ambit, unde omnis illius pars in directum tendit, & recta Tellurem afficit, ac premit.

Ad tertium. Si quis situlam aqua plenam capiti suo impositam ferat, & intra aquam existat animal aliquod eamdem vario concitans motu; profectu ex ejusmodi motione non minor erit situlae, & aquæ gravitas. Ita & in aere contingit variis motibus percito, ut inde nenter nihilominus in Tellurem gravitet. Quorum omnium ratio hæc est, quod ubi una aquæ, vel aeris pars in transversum, vel sursum agitur, altera in ejus locum succedit, quæ ejusdem cum illa est ponderis, servatque continuata totius aquæ, vel aeris pressionem in subjectum vasis fundum, vel in subjectam Telluris partem.

Ad quartum responsio patet ex dictis ubi illorum effectuum causam exhibuimus. Per recipientis poro facile penetratur subtilis ætherea substantia, & quidem in maxima copia; unde & continuatio quedam actionis servatur inter externum aerem, & aerem internum, sive intra recipiens existentem. At crassior hemisphæriorum materia, oclusis omnibus foraminibus, obsistit uberiori ætharis penetratori. Tum ubi crassiore aere repleta hemisphæria facile dividi queunt, opor-

oportet ut foramen in eorum medio positum sit apertum, & suscipiat inde aer internus actionem, pressionemque aereæ externæ columnæ per medium illud foramen pervadentis, ac prementis. Jam vero in locis altioribus brevior est sane aerea columnæ premens. Quare cum liquores in fundum nitantur maxime secundum altitudinem, minor tunc est columnæ aereæ gravitas, & minor adeo mercurii elevatio. At aer subtilis intra recipiens contentus communicat cum externis longioribus columnis aeris per vitri poros: ut diximus.

Objicies 6. Si tubis, in quo mercurius manet suspensus, paululum elevetur, sic tamen ut orificio illius inferius maneat adhuc intra mercurium in vase stagnantem: sentietur pondus, non solum tubi, sed etiam mercurii in tubo extantis. Atqui id minime eveniret, si mercurius in tubo sustineretur ab extrinseca vi aeris prementis. Ergo &c.

Confirmatur argumentum. Sumatur vas cum tubis, in quibus mercurius hæreat suspensus, & ponderetur vas illud cum tubis. Sit autem pondus totius vasis cum tubis, & mercurio, ex. gr. quatuor librarum. Constituatur in una lancea totum illud pondus, ad quod æquilibrandum oportebit ponere in altera lancea plumbum quatuor librarum. Nunc sit ratiocinatio. Pondus mercurii suspensi æquilibratur à plumbo existente in alte-

Tom. II.

ra lance. Ergo non potest æquilibrari etiam ab aere externo incumbente supra mercurium stagnantem. Consequentia patet. Etenim impossibile est, idem pondus eodem tempore æquilibrari à duobus ponderibus adæquatis, & totalibus. Porro id contingere in casu: quippe tam plumbum existens in altera lance, quam aer superincumbens mercurio stagnanti, adæquate, & totaliter æquilibraretur cum eodem mercurio suspenso in tubis. Igitur &c.

Respondetur. Distinguo majorem: sentietur pondus mercurii, quatenus sentitur pondus aliud mercurio æquivalens, concedo: quatenus ipsum revera mercurii pondus sentitur, nego majorem. Eademque ratione minorem propositionem distinguo, & nego consequiam. Itaque dum elevatur tubus, sentimus non pondus: non jam ipsiusmet mercurii, qui ab externo aere sustentatur, sed illi æquale; nempe sentimus pondus columnæ aereæ superincubentis tubo, quod pondus à nobis est superandum, & sustinendum. Jam columnæ illæ aeris æquale pondus habet, ac mercurius in tubo contentus. Quare columnæ illæ tantumdem premit deorsum tubum, quantum alia columnæ aereæ superincubens mercurio stagnanti illum premit, & pressione ista mercurium in tubo elevatum sustinet. Sed cum nos tubum ipsum elevamus, columnæ aereæ eidem incum-

bentis pressio percipitur.

Hinc responsio patet ad confirmationem. Nam quæ pressio est aeris in mercurium stagnantem, velut pars ponderis est, quæ debet à plumbo in altera lance posito sustineri. Columna aerea, quæ tubis incumbit, æquilibratur cum aerea columnâ, quæ superincubit plumbo in altera lance posito. Sed plumbum debet sustinere vas, tubos, mercurium, & columnam aeris prementem, quæ omnia complexum unum efficiunt ponderosum. Ita si dum in aquæ catino immersum truditur sursum ab aqua, ponas in statera illud vas, in quo sursum truditur lignum, certe totum illud complexum vasis, aquæ, & ligni erit majoris ponderis, ac vas, & aqua sine ligno: nempe quia licet lignum ab aqua sursum elevetur, tamen totum complexum vasis, aquæ & ligni in stateram premit, & ponderat. Eodem modo licet aerea columnâ in stagnantem mercurium incumbens elevet mercurium in tubis contentum, tamen totum illud conflatum vasis, tuborum, mercurii, & aereæ columnæ ad instar unius ponderis in subjectam nititur lancem, & à plumbo debet sustineri.

Objicies 7. Omnis pars aeris dicitur gravis, & elastica. Quare dum superior aer pondere suo inferiorem premit; tantundem hic illi resistit vi sua elastica. Ergo pressio superioris aeris non poterit nisi in aerem inferiorem; nec adeo in Tellurem ipsam. Quod magis decla-

ratur. Sit centrum Terræ A (figur. 4. tab. 4.) & aer, seu etiam Atmosphæra circuli instar Tellurem ambientat. Pars superior aeris B C D E non potest premere subjectum aerem minori expansione gaudentem. Nam si premeret, cum omnis gravitatio sit ad centrum Terræ, niteretur pars illa superior in triangulum AFG. Sed in istud descendere non valet. Neque enim potest descendere, nisi faciat rectas lineas A F. A G divergere, ut major illa aeris superioris copia in locum inferiorem recipiatur, quin penetretur. Hoc ipsum vero est impossibile; quippe quantum superior aer contendit divergere lineas A F. A G, tantumdem illas convergere facit alia pars aeris H F. I G. Idemque valet in aliis omnibus partibus Tellurem ambientibus: ut ratiocinati pater. Ergo propter maximam copiam non potest aer superior descendere; atque adeo nec premere, seu gravitare. Secundo gravitatio est conatus ad centrum Terræ per lineas rectas. Appendantur autem in aere duo marmora levigata invicem conjuncta. Tunc marmos superius ita suspensum est, ut in Tellurem reipsa non premat. Porro columna aerea eidem superiori marmori incumbens, in illo jam sistitur, & cum incidentes perpendiculariter reflectantur, jam aera illa columna è superiore marmore per lineam rectam resiliet sursum. Non ergo illa potere potest superficiem inferiorem inferioris

ris marmoris; atque adeo non ab aeris pressione conjuncta tenentur marmora. At vero aer ille, qui recta quidem ex atmosphæra, sed lateraliter in marmor inferius, vel subtus illud incidere hinc inde intelligitur; nihil proficere valet ad marmorum conjunctionem servandam. Quippe ea aeris columnna, quæ ex una parte profluit, in aliam incidit æqualis potentiae, ac virtutis. Quare neutra operabitur, sed altera in alteram contendet, quin ab ea vincatur. Nec proinde poterit impetrare inferiorem marmoris inferioris superficiem; atque adeo nec marmora servabit conjuncta.

Respondetur ad primum. Ut ea, quæ de aeris gravitatione exhibui-
mus, cum & argumenti solutio, fa-
cilius percipiatur oportet nos con-
cipere totum aerem, qui terram
ambit, quam cumulum esse corpus-
culorum, quæ aliæ aliis superjacen-
tia lanam referunt, cuius pili exiles,
& flexibles veluti totidem
elastra tum facile flecti, & con-
volvi possunt, tum etiam perpetuo
conantur se se extendere, & restituere. Veluti si quis lanam manu
undeaque comprimeret, unum-
quodque tamen filum ejus vi præ-
ditum est elastica, qua dilatare se
potest, & laxata manu, sponte
sua se se distendit, & restituit. Ita
& in aere contingit. Superior pars
inferiorem comprimit, & hæc
vicissim elastica vi illi resistit;
sed tamen tota massa aeris in

Tellurem incumbit, & premit; ad instar solidorum corporum, quorum unum alteri subjectum comprimi ab illo non patitur, cum omnia simul in subjectam terram indesinenter gravitent. Jam si circulum illum, qui Tellurem in medio constitutam ambire intelligitur, rotundis pilis, vel laneis filamentis repletum esse dicamus (figur. 4. tab. 4.); tota utique massa inter lineas A B. A C. A D. A E constituta indesinenter in Tellurem gravitat, & pars superior in inferiorem, nec tamen locum istius petit, cum eamdem æqua gravitate præditam dimovere loco non possit. Propagatur autem omnis ista gravitatio à summo usque ad terram per lineas rectas, nec ultra pars aeris superioris incumbit in lineas illas AB. AC. AD. AE; aliquin non amplius recta procederet, quemadmodum evidens est. Id enim circuli notio præse fert, ut ab illius centro ad circumferentiam sic duci queant rectæ lineæ, ut nusquam una alteri commisceatur. Quamobrem nec superior aer locum inferioris subire contendit, nec ulla pars aeris superioris in lineas obsignatas incidit; sed tota aeris superioris, & inferioris massa in Tellurem gravitat, & omnis pars aeris recta gravitare intelligitur. Et quemadmodum si plura sint solida, vel plures pilæ, aut plurima linea filaments, quod superius est nequit locum occupare inferioris, & tamen omnia simul in subjec-

tum fundum gravitat; ita dicendum est in re nostra.

Ad 2. Ea utique aeris pars, quæ in marmor superiorius incidit, recta resilit, nec afficit marmor inferius. Et tamen premit semper superiorem marmoris superioris superficiem. At quæ lateraliter marmori inferiori respondent lineaæ aeris, & sub illo in Tellurem fetri intelliguntur, recta & ipsæ procedunt: nec una linea aeris aliam sibi adversam respicit, ut basim, in quam incidat, sed unaquæque in Tellurem immediate, & recta fertur. Tum quæ pars aeris inter inferiorem superficiem marmoris inferioris, & terram extat, ipsa profecto ab aliis aeris columnis hinc inde ambientibus sic premitur, ut vim suam exercere non possit, nisi versus terram, & versus superficiem inferiorem illius marmoris. Quo sit, ut illa columnna, adjuvantibus etiam gravitate sua, & pressione aliis aeris columnis circumambientibus, premat marmor inferiorius in superiorius: & ita duo illa marmora levigata ab aeris gravitate, & elaterio conjuncta serventur: ut dictum est.

Hæc dicta sint, ut argumentorum enodatione magis appareat illa naturalium effectuum explicatio, quæ ex aeris gravitate, & elaterio repetitur. Nunc alia addimus experimenta, quæ id ipsum rursus manifestant.

Ut refert Boyle, articulo undecimo, experientia nona: Vas vitreum una extremitate hermetice sigilla-

tum aqua communi repletum, inversuntque ex alia aperta parte in vase aqua consimili pleno: tum in machinæ pneumaticæ recipiente positum ab ipso fuit, antliamque exercuit. Evenit autem, ut cum bona pars aeris exsugeretur è recipiente, tubus plenus adhuc aqua, sicuti primum erat, permanserit. Post hoc facta omni crassioris aeris exsuctione, aqua inferius paulo descendit. De novo autem immisso aere externo, aqua visa fuit ascendere. Nimirum post unam, vel alteram aeris suctionem non contigit sensibilis mutatio pressionis, quippe aer crassior superstes nitebatur maxime elaterio. At extracto aere crassiore immunita est actio gravitationis in aquam, & ideo aqua tubi nonnihil descendit, & eadem ratione ascendit, cum de novo intromisso aere aucta fuit vis gravitationis.

Secundo si tubum, in quo suspensus manet mercurius, tantumdem educas ab horizonte mercurii stagnantis, ut effluat gutta una mercurii, reliquo mercurius impetu magno refluit ad summitem tubi, adeo ut aliquando tubum ipsum confregerit. Evenit nempe tunc quod contingit in bilance, sublatto enim pondere ex una parte, statim illa pars sursum elevatur. Ita & mercurius, prævalente tunc exteriori aeris pressione, sursum cum impetu agitur, quoniam sublatum est æquilibrium.

Ter-

Tertio si supra inferius hydrargyrum Barometri , vel alterius vasis effundantur quatuordecim unciae aquæ , statim hydrargyrum in tubo ad unciam unam elevatur . Quippe uncia una mercurii æquale pondus habet cum quatuordecim uncii aquæ .

Quarto ex dictis de causa conjunctionis marmorum levigatorum ratio redditur alterius experimenti , quod recesserat P. Lana-Sumpcio enim æneo mortario sexaginta octo circiter librarum , fundum ejus planum , ac probe levigatum ita desuper convertebatur , ut situm horizontalem obtineret . Tum supra planum fundum cruda panis pasta ita extendebatur , ut illud quidem tegeret , sed eidem non adhæreret , aut adglutinaretur . Demum vitræ cucurbitulæ , qua uti solent Medici , ut diximus , in ægrotorum cura , consueto more stappa inflammabatur , & statim applicabatur pastæ : qua cucurbitula manu apprehensa , postquam fuerat refrigerata , non solum pasta cucurbitulæ , & mortario interjacentes , sed etiam mortarium cucurbitulam sequens evehebatur .

Quinto ex iis , quæ de dolis vini , & clepsydris irrigatoriis exhibuimus , expenditur , quare ex lucerna Turrita , seu ad modum turris fabricata , quam Cardanus invenit , non descendat oleum per foramen inferius , utcumque apertum . Impeditur enim oleum , ne descendat , à gravitate , & elaterio aeris su-

perincubentis orificio quam quidem pressionem oleum non potest vincere , cum ex superiori parte non pateat ingressus aeri crassiori . Hinc si lucerna illa constituantur in exhausto machinæ pneumaticæ , cum per exsuctionem crassioris aeris imminuat istius resistentia , superat pondus olei , & oleum descendit . Similiter si oleo congelato lucerna exponatur ad ignem , descendit oleum , quia calore ignis aer externus sic rarefit , ut non amplius habeat vim , & elaterium sufficiens ad resistendum . Quod si in summitate lucernæ contingat fieri vel minutissimum foramen , unde aeri externo aditus pateat , statim magno impetu descendit oleum ; quia major est vis aeris ingredientis simul cum olco gravitante , quam sit contranodus aeris externi .

Sexto quando hydrargyrum hæret suspensum in tubo , si pannus calidus circumponatur illi parti , quam hydrargyrum in descensu reliquit ; hydrargyrum deprimitur infra altitudinem 27. digitorum . Idem contingit , si parti illi admoveas ferrum candens . Si vero nix , aut glacies illi parti approximetur , tunc hydrargyrum supra consuetam altitudinem ascendet . Primo enim in casu calor rarefacit aerem , qui locum illum ab hydrargyro relictum occupat ; quare aer dilatatur , & cogit hydrargyrum aliquantulum subsidere . At in secundo casu frigus densat aerem

rem illum , & ideo hydrargyrum magis ascendit.

Septimo si sumatur tubus utrumque apertus , & digito claudente unum orificium impleatur tubus mercurio. Deinde solito more invertatur in vas mercurio stagnante plenum descendente mercurio experimur digitum deorsum trahi. Quippe superincumbens digito columna aeris non æquam vim resistendi reperit in rarefacto aere extante sub ipso digito. Unde aer intra digitum existens dilatatur , & digitus intumescit : eo ferme modo quo carnem in cucurbitulis diximus elevari.

Colligite , non semper aeris mutationem hydrargyri mutationibus apprime respondere. Peculiares enim caussæ diversitatem aliquando efficiunt , ut venti peculiares locorum , tempestates , excessus caloris , & cætera similia. At si speciales istæ circumstantiæ diversæ non occurant , constans est proportio inter hydrargyri elevationem , & aeris gravitatem : ut diximus.

De Tubis Capillaribus.

Tubi Capillares appellantur , qui strictissimi sunt , cavitatem nempe subtiliorem habentes. In ipsis liquores ascendunt , aut aliquando suspensi hærent supra consuetam altitudinem , nedum in libero aere , verum etiam exhausto Machinæ Pneumaticæ , etiamsi tubi sint utrinque aperti : ut tradunt Regnault , Hauksbee , & alii passim. Liquo-

res etiam diversi magis , vel minus ascendunt. In siphonibus pariter capillaribus ascendit aqua , & egreditur. Frustā quoque panni eadem effecta exibent , & capillaribus tubis , strictissimisque siphonibus repleta esse intelliguntur.

Horum porro effectuum caussæ non est aeris gravitas , etsi hæc aliquando non nihil conferre possit ; sed potior ratio ducitur ex adhæsione liquoris cum vitro : ut aqua vitro adhærere conspicitur , pluribusque aliis corporibus. Adhæsio autem liquoris partibus tubi capillaris major est , ac in tubo latiori ; quippe cum liquoris columnna sit in illo subtilior , tangit partes tubi secundum majorem superficiem relatione facta ad ipsius liquoris massam. Insuper adhæsio illa partibus tubi imminuit gravitatem relativam columnæ adhærentis , nam ex illa adhæsione fit , ut partes liquoris non adeo premant in vasis fundum. Columna igitur illa non nihil sui ponderis deperdit , proindeque cedit elaterio aeris , quem in suis poris continet : tum cedit etiam columnis exterius prementibus , atque adeo amplius attollitur , donec ad illam majorem pervenerit altitudinem , per quam æquilibrium obtineat cum exterioribus prementibus columnis.

Ita sane adhæsione illa sublata , tollitur quoque , vel saltem immutatur ascensus liquoris in tubo capillari. Etenim si sevo vel leviter obliniatur interior tubi pars , aqua

aqua non altius ascendit, quam consuetum sit; si id fiat in sola libellæ parte, aqua supra libellam evehitur; si denique una tantum tubi pars obliniatur sevo, ex hac parte aqua non transcendit consuetam suam altitudinem, & tamen ex alia parte sursum magis attollitur. Hydrargyrum autem non transcendit libellam in tubis communicantibus capillaribus, quoniam, ut supra diximus, nullam habet cum vitro adhesionem; immo etiam sub libellâ manet, quoniam quando à latiori spatio in angustius permanere debet, & elevari, longe difficilius dividitur, quam aqua. Quia vero aqua ascendit, etiamsi tubis utrinque apertus sit, & ingressus pateat aeri per superius tubi orificium, inde manifestum fit, caussam non esse aeris gravitatem, & professionem.

Neque tamen contendimus, liquorum ascensum omnino proportionalem esse eorumdem adhaerentiae vitro. Immo tenacitas major obsistere quandoque potest, ne per subtilissimam vitri cavitatem altius attollatur liquor, cum ad id necessaria sit ejusdem liquoris attenuatio. Quandoque etiam major subtilitas partium liquores componentium deseruire potest eorum elevationi. Tum si liquidæ partes inter se se non adeo nectantur, faciliter cedunt motui exteriori aeris, à quo elevatio promovetur. Caloris quoque, vel frigoris, tum interni, tum externi ratio haben-

da est, nam & ab istis liquorum attenuatio, & elevatio pendet. Hinc nonnulla explicari poterunt experimenta, quibus compertum fit, liquores dissimiles aliquando ad eamdem altitudinem elevari, similes vero magis minusve attolli. Nec oportet occultam vim attractionis constituere, ut effectuum illorum caussa, & ratio habeatur.

QUÆSTIO OCTAVA.

Vtrum Aqua sit elastica, ejusdemque particulae minime invicem sibimet adhaerescant?

UT Aquæ naturam declarare possumus, duo potissimum in hac quæstione discutienda propinquimus. Primo an aqua per se se elasticam virtutem habeat, unde comprimi possit, & cessante extera vi restituat se? Certum autem est, multum aeris intra aquam contineri, unde ratione aeris contenti videtur aliquando habere elaterium. Secundo quærimus, utrum minimæ particulae aquam componentes sint invicem consociatae, & continuæ, & sibi mutuo adhaerescant, an non? Est enim Galilæi opinio in Dialogo 1. de duabus novis scientiis, aquam non solum in minima, seu in atomos, sed etiam in puncta mathematica sic esse divisam, ut ista nullo glutine invicem soientur, & adhaerescant.

Dicimus, aquam per se se non gau-

gaudere clastica virtute: ejus autem particulas minimas invicem adhærescere, & consociari.

Probatur 1. pars. Experientiis compertum est, nullam esse in aqua elasticam virtutem. Ergo &c. Probatur antecedens. Joan. Baptista Malmedit (ut habetur in Diario Eruditorum Transalpinorum titulo 167.) in sua Disquisitione Physico-Medica de Natura aquæ, refert, concavam pilam auri, exæte repletam aqua, validissimis resistere ictibus mallei, quin aliqua ex parte complanetur. Quod ipsum Du Hamel sæpe se expertum fuisse testatur. Ita & dum aquam vase plumbeo inclusam conati sunt alii comprimere, contigit, ut subtilliores spiritus aquæ exitum sibi fecerint per plumbi poros. Ergo aqua comprimi non potest. Sed quod compressionis incapax est, nec dilatari, nec se elaterio restituere vallet. Igitur &c. Hinc in Transationibus Philosophicis Societatis Regiae Britanicæ legimus: *Aqua non habet elasticitatem, nisi ratione aeris in se contenti; nam experientiis non constat elasticitas aquæ.*

Objicies. Si aqua globo plumbeo concavo includatur, cui apparatus sit canalis cum epistomio, ac globus iste malleo contundatur; recluso epistomio aqua repente exiliat. Ergo per globi contusionem compressa fuit, & rursus cessante externa vi, per eam partem resilit, per quam exitus patet.

Respondetur, allatum à nobis

de pila aurea experimentum huic alteri adversari. Quamobrem dicendum videtur, aquam in plumbeo globo percussione mallei sursum trusam fuisse, atque tunc fuisse compressas aeras particulas in aqua latitantes; unde istæ, recluso epistomio, & sublata vi externa, dilatantes se se, aquam fecerint exilire.

Probatur secunda pars. Multis experimentis compertum fit, minimas aquæ particulas invicem adhærescere, consociari. Igitur &c. Probatur antecedens. Si ex tenui fistula, quæ utrimque aperta sit, & aquis repleta, guttatum aquam decidere sinamus: gutta aquæ primo elongatur, & pendula suam cum aqua reliqua, debilem licet, cohærentiam clare demonstrat; quamvis demum glutinæ victo per gravitatem, gutta abrumpatur, & cadat. Ita & Ros (nam hic substantia sua ab aqua non difert, ut suo loco erit dicendum) dum in arboris frondem, aut oleris cadit, adeo illi hæret, ac simul in se recipitur, & rotundatur, ut non nisi violenter inde abstrahatur; quin etiam, leviter deorsum inclinata fronde, elongatur nonnihil gutta, tum iterum in se redit, & congregatur, fronde elevata. Ex quibus evidentissime patet aquæ particulas sibi mutuo cohærere. Quid enim simile unquam in pulvere alabastrino, aut alio solutis partibus cōstante, deprehensum est?

Aursus experientia ostendit sæpe aquam,

aquam, non nisi adhibita vi, & maxima cum difficultate, quorundam corporum subire meatus. Atqui si aqua omnino resoluta est in sua ultima componentia, atque interiore quolibet glutine suis in partibus caret; nulla profecto suppetit ratio, cur expedita non sit ad quoslibet poros pervadendos. Ergo inde falsitatis convincitur Galilei opinio. Ita etiam quid-nam in caussa est, quod aquæ stillatæ fluidiores sunt aliis aquis, nisi quia ignis vi, & actione, partium eorumdem interna tenacitas attenuata est, ac dissoluta? Non itidem alia ratio suppetit, cur aquæ, etiam puriores, quoties interno motu concitentur, in spumas abeant, nisi quia partes illarum nonnihil habent viscidæ, quo sensibiles bullæ efformantur, unde istæ bullæ invicem collectæ spumam efficiunt. Hinc si viscidum aliud, ac glutinosum corpus aquæ admisceatur, adaucta tenacitate ampliores etiam bullæ efformantur, dum partes aquæ in filamenta, membranasque subtilissimas extenduntur, & aer intra illas per artem introducitur: quemadmodum sapone aquis permixto ludentes pueri exhibent.

Quod si, ut in quæstione ex observationibus Domini Petit constituimus, aer ipse sic compactus est, ut illius partes mutuo sibimet adhærescant; id ultro, multoque magis de aqua fatendum est. Hinc aqua magis motui, & divisioni resistit, quam aer; & longe crassior

Tom. II.

est isto, ac facilius, & tenacius a liis corporibus externis adhæret.

Objicies. Nisi aqua in minutissima puncta omnino resoluta sit, & divisa, explicari non potest, cur tam æquabilis ubique sit aquæ superficies, adeo ut nullibi altior sit, aut depressior, atque ad libellam omnino constituta videatur. Nam acervus tritici cum ex granis masculis constet, in cumulum facile congeritur: Minutissima etiam arenæ granula longe minus assurgent, & tamen propter angulorum inæqualitatem, & qualemcumque magnitudinem assurgunt in magnas moles. E converso igitur cum aqua nullum hiatum pati possit, sed si quis fiat, in hunc statim delabatur, omnino in atomos, seu in minutissima puncta videtur concisa. Quod vero aqua in guttulas assurgat, ut diximus; id pressioni aeris adscribi potest, ut Galilæus censet, & antipathiæ, quæ inter aquam, & aerem intercedit: aut à communis rerum propensione oriri cum Magnano credendum est, qua nempe se se tueri & conservare res omnes affectant. Ita etiam adhæsio aquæ externis corporibus videtur ab externo aere impellente aquæ partes esse repetenda: ut opinatur Galilæus.

Confirmatur. Aquæ gutta dum aliam tangit, statim cum ea conjungitur: immo si vinum attigerit, statim effunditur, & complanatur. Ergo palam est non alia ratione a-

X quam

quam conglobari aeri expositam, nisi quia inter aerem, & aquam quædam est naturalis dissensio, vel antipathia. Unde & se ipsam colligit, ut minus aeris pateat injuriis.

Respondeatur æquabilitatem illam aquæ ex minutis quidem particulis aliqua ex parte educi; sed non oportere, ut aqua in extremas atomos, vel puncta mathematica sit resoluta, & disecta. Primo enim partes aquæ oblongæ, & asperitatis præditæ, ac ipsius aquæ gravitas hunc effectum procreant: cui etiam plurimum consert aeris æquabilis pressio.

Quod de aeris, & aquæ dissensione, & antipathia dictum est, voce sola continetur, & à mechanica philosophandi ratione alienum est. Ita & cum dicitur, unamquamque rem se se tueri, verissimum id est, sed non satim ad rem nostram, cum expetamus modum, quo aqua se se tueatur, & conservet, in guttulas concrescens: quæ res optime ex partium illius tenacitate declaratur. Nec inficiamur, aquam cadentem circum rotatione sua in guttas formari, adjuvante ad id maxime aeris pressione. Sed cum aquæ particulæ minutissimæ sint, ut mox dicemus, aer potius in illas pervaderet, easdemque omnino dissiparet, nisi illæ glutine quodam interno invicem cohærent: quemadmodum profecto contingit in spiritu vini, cuius partes sunt tenuissimæ, & vix invicem adnexæ; si enim in aere sursum projectus, si

exquisite sit rectificatus, & purissimus, evanescit, & ab aere in milles guttulas pene insensibiles dividitur, antequam decidat. E contra vero si liquor partibus constet crassioribus, arctisque meatibus, ut hydrargyrum, non multum dissipatur ab externo aere intus subeunte, & in guttas majores concrescit. Quod quidem, servata proportione, etiam de aqua dicendum est.

Falsum est à pressione sola externi aeris eam aquæ in guttulas conformatiōnem haberī, aut ejusdem cum externis corporibus adhæsionem. Quippe in exhausto machinæ pneumaticæ aqua, etiam antea ab interno aere expurgata, eadem nihilominus gaudet tenacitate, qua fit, ut facile vitro, aliisve corporibus adhærescat.

Ad confirmationem. Cum in re præsenti naturalis suppetat ratio, cur aqua in guttulas concrescat, non oportet dissensionem ullam vel antipathiam invocare. Sane id commune est omni liquori, & fluido cuilibet corpori, ut rotundam figuram induat, cum à circumfuso corpore æquabiliter premitur; ut cernere est in aeris ipsius bullulis, quæ ex aqua erumpunt, & in olei guttulis per aquam diffusis. Quod autem aqua liquoris contactu, cum eo statim uniatur, aut alteri guttæ proxima in majorem guttam confluat; id ex aquæ fluiditate, & partium exilitate, ac figura repetendum est, tum etiam cum in

in puncto contactus nulla sit aeris ambientis pressio , in eam partem gutta propellitur à circumfuso aere , ubi minor est resistentia .

De aliis affectionibus , & natura aquæ?

Postremo recensendæ sunt aliæ affectiones aquæ . Et inter has potissimum habentur frigiditas , & humiditas ; unde ab Aristotele , libro 2. de Generatione , & Corruptione , cap. 3. Aqua dicitur *Elementum frigidum , & humidum* . Evidem extant in aqua plures sulphureæ , terræ , calidæque particulae ; proindeque tot animalia in aqua nutriuntur , & vivunt , & plantæ etiam augeri possunt solis aquis pluvialibus . Hinc fit , ut varii effectus ab aquis exhibeantur , & dispar sit aquarum gravitas pro multitudine , virtute , ac pondere corporum : quæ aquis immixta sunt . Frigidam vero esse aquam ex sui natura inde colligitur , quod aqua in maris penitissimo fundo , ubi maxime remota est à contrario calefaciente , ad summum frigus reducitur . Testatur id Robertus Boyle in Tractatu , de Tempervie submarinarum regionum ; ubi resert plurimos nautas , & urinatores à se interrogatos de hac ipsa re , omnes unanimi consensu tradidisse , intolerabile frigus percipi in maris imo , eoque majus esse frigus , quo ad fundum magis acceditur . Idipsum constat ex quo aqua

calida , si cesset externa actio , propriam frigiditatem recuperat . Neque vero glacies frigiditate sola perficitur , ut possit quis hinc reponere , non esse summe frigidam aquam ex sui natura , sed solum quando in glaciem concrescit . Etenim glacies siccitate potissimum fit , quæ à nitrosis particulis provenit : ut in secunda Physices parte erit dicendum . Aquam itidem humidam esse certum est : quemadmodum de aere diximus in quæstione , & declarandum erit in quarta disputazione , ubi de Humiditatis natura dissereremus .

Gravis porro est aqua , & in ipso maris alveo gravitat , ut diximus in quarta quæstione ; immo mille vicibus , est gravior aere . Nilominus ascendit aqua supra libellam suam in tubis capillaribus , & strictioribus siphonibus , etiam velut sponte sua : ut in præcedenti quæstione declaravimus . Ita & aqua in tubum cinere repletum ascendit , tam in libero aere , quam in recipiente exhausto : quemadmodum etiam ascendit inter duo plana marmoris , vel aurichalei invicem conjuncta ; ut à se comprobatum recenset D. Hauksbee sectione quinta Experimentorum Physico-Mechanicorum . Quæ quidem omnia in aquæ figuram refundere oportet : ut jam pridem docuimus .

Corpora autem , quæ aquæ merguntur , Hydrostaticæ servant leges illas , quas quæst. 3. exhibuimus , nec repetere hic vacat . Ju-

vat tamen nonnulla declarare, quæ cum illis congruere non videntur, ut subinde illorum rationem reddamus.

Itaque acus ferri, vel calybis, et si octo vicibus majori pondere gaudeat, quam similis aquæ quantitas, attamen si diligenter, atque omnino æqualiter super aquam ponitur, supra illius superficiem manet, nec mergitur, aut descendit. Id vero repetendum est, partim ab adhæsione particularum aquæ inter se, unde & divisioni resistunt, & partim ab adhæsione aliquarum moleculorum aeris superficie acus ex ea parte qua aquam respicit, cum altera superficie acus pars veluti deferatur in vase aeris. Quocirca aer inter acum, & aquam interceptus acum quodammodo sustinet. Porro caussa hæc est potius; unde acus vitræ, & exiles non innatant aquæ, quod vitrum aquam immediate tangat. Quare ut acus ferri, vel calybis mergatur, sat est vel imminuere adhæsionem partium aquæ, eam calefaciendo; vel aerem, qui acum ambit, expellere, acum madefaciendo; statim enim acus ad fundum aquæ ruet.

Subtilissima variorum metallorum folia, quorum superficies sit multum ampla, supra aquam manent, nec in eam merguntur, nisi pondus aliquod super illa ponamus. Porro hujus effectus caussa non est resistentia, quæ ampliores subiectæ partes aquæ divisioni oppo-

nuntur. Siquidem illa metalli folia, ad aquæ fundum extranea vi compellantur, statim cessante vi ascendunt, atque in aquæ superficie consistunt. Erit ergo effectus repetendus ex adhæsione aeris superficie metallorum, atque minori ipsorum relativa gravitate, habita semper ratione superficie. Unde si folia complicantur, & superficies minuantur, folia illa fundum petunt, nec ab aqua sustentantur. Anmadversione etiam dignum est, quod si folia vi ponderis in eorum medio positi ad fundum trudantur, ipsorum anguli aliquatenus attolluntur, quoniam minus aguntur à vi extrinseca ponderis illius.

Ficus Ægypti mergitur in aquis, & cum in imo aliquandiu deliterit, ad aquæ superficiem rursus assurgit, quando madefactum debuit humoris pondere prægravari. Præter Sanctum Augustinum Plinius, lib. 13. cap. 7. de ea sic scribit: *Cæsa statim stagnis mergitur; hoc est ejus siccari.* Et primo sedit, postea fluitare incipit, certoque suggit eam alienus humor, qui aliam omnem rigat. Cum innatare ceperit, tempestive habet signum. Ubi etiam Joannes Harduinus, nota octava ibidem ex Theophrasto, lib. 3. Historiæ, cap. 18. ait: *Cæsum etiam nunc viride lignum, fundum petit; protinus in stagna injiciunt, madefactum porro in profundo siccatur, cumque siccum fuerit, innat, emergitque.* Hujusce porro effectus ratio inde est, quod salium, vel ter-

terrestrium particularum multitudo sit primo gravior. Ficus illa, tum per aquæ actionem deperditis paullatim salibus ascendit, & sursum algitur, quia fit relative levior.

Si in tubo vitro ponas tres digitos olei vitrioli, & tres digitos aquæ, deberet sane columna olei, & aquæ spatiū accupare sex digitorum; nec tamen ita contingit: ut animadvertis D. Petrus Musschenbroek, & refertur in Diario Eruditorum Transalpinorum, tom. 201. Etenim partes aquæ pervadunt vitrioli partes, & aerem depellentes istius locum occupant, & densum corpus efficiunt, minoremque subinde occupant locum, ac tenerent si aqua, & oleum seorsim spectentur.

Aqua permeat quo aer penetra non potest. Nam si superiorem Barometri extremitatem cooperias vessica, aer non poterit in illam penetrare, & tamen aqua per illam permeat: ut refertur etiam in Memoriis Academiæ 1714. Hinc vero plerisque aridet asserere, partes minimas aquæ subtiliores esse particulis aeris. Aliis ratio hæc est, quia particulae aquæ emolliunt fibras vessicæ, easque distendunt soliditate sua. Majores autem esse mole particulas aquæ, quam aeris, inde colligunt, quoniam aquæ particulae, quæ in vessicam permeant, secum vident aeras non nullas partes in Barometrum ut habetur in Historia Academiæ 1714.

Unde compertum fit, aquæ partes in se se continere particulas aeris; adeoque istis esse majores.

Si vinum aqua mixtum in vas hederæ infundas, aqua guttatum exhibit per poros vasis: ut notat etiam P. Regnault, tom. I. exercit. 4. Si in vas vitreum aquam infundas, ac super istam ponas subtilem bucellam, atque in istam guttatum, demittas vinum; tunc istud per panis meatus subtiliter permeans majorem vis illius partem amittit, quam cadendo acquisierat; unde pondere suo non potest in aquam pervadere, sed ab illa separatum manet.

Demum etsi solidum corpus aquæ immersum tantumdem penderis deperdat, quantum mole sua occupat, ac respondet æquali volumini aquæ; tamen animadvertis Hauksbee in Experimentis Physico-Mechanicis, pag. 148. penderis imminutionem non semper correspondere superficiebus solidi, si idem solidum nunc integrum, nunc in frustra divisum aquæ immergatur. Quod in solidi subtilitatem, ac pororum amplitudinem refundi debet.

Ergo ex dictis sic possumus describere elementum aquæ. Aqua est elementum, cuius natura exigua est summa frigiditatis, nec non & humiditatis citra excellentiam. illius partes minima figuram habent oblongam, & asperitatibus donatae sunt, atque invicem sibi met adhaescunt, sic tamen ut null-

nulla vi comprimi possint , nec elas-
tica polleant virtute.

DISPUTATIO TERTIA.

De Essentia corporis naturalis , ejus-
demque integritate.

QUÆSTIO PRIMA.

In quo constituenda sit essentia
corporis?

DE Corpore impræsentiarum
disserimus omnino genera-
tim considerato , prout id omne
complectitur , quod materiale est,
& à spirituali distinguitur. In quo
igitur constituenda sit corporis es-
sentia , quatenus à spiritu secer-
tur , inquirimus.

Pythagoras , Epicurus , & Stoici
existimarent essentiam corporis
sitam esse in triplici dimensione ,
quæ extensio dicitur in longum ,
latum , & profundum. Cartesius id-
ipsum tradit 1. p. Principiorum ,
num. 53. ita tamen rem declarat ,
ut extensionem ipsam omnino uni-
versim acceptam dicat esse corpus ,
& spatiū omne esse corporeū
affirmet , & realibus partibus con-
stare. Hinc negat , mundum esse
finitum , & vacuum esse possibile ,
& spirituales substantias virtute
solum , & operatione esse in loco
docet. Audiatur Cartesius ipse. In
epist. 69. part. 1. ad Henricum
Morum , ait Repugnat conceptui
meo , sive quod idem est , puto im-

plicare contradictionem , ut Mundus sit finitus , vel terminatus , quia non possum non concipere spatiū ultra quoslibet præsuppositos Mundii fines : tale autem spatiū apud me est verum corpus. In epist. 36.
ejusdem partis scribit : Neque vero potest spatiū ullum dari omnino vacuum , hoc est , quod nullam contineat materiam , quia tale spatiū concipere nequimus , quin tres basce in illo dimensiones , ac proinde materiam concipiamus. Et ibidem in epist. 67. asserit , nullas substantias incorporeas proprie esse extensas : sed eas (inquit) intelligo tamquam virtutes , aut vices quasdam , que quamvis se applicent rebus extensis , non ictice sunt extense.

Cum autem ex Peripateticorum
sententia extensio alia sit entitati-
va , alia localis ; & hæc in circum-
scriptivam , seu formalem , & de-
finitivam , seu virtualem distribua-
tur : ut exposuimus in 2. parte Lo-
gicæ , disp. 4. quæst. 4. & in 2.
parte Metaphysics , disp. 1. post
quæst. 3. §. *Inmensus etiam est Deus* &c. utramque illam exten-
sionem complexus est Cartesius , atque eas ut unam habet , inficiaturque corpus esse posse in loco
sine formalī , seu circumscriptiva
extensione , quæ partes plures cor-
poris dicit totidem loci partibus
correspondentes. Hinc Antonius
le Grand , part. 9. Physicæ , art.
3. num. 4. sic scribit : *concipi*
non potest res aliqua esse virtuali-
ter

ter extensa , nisi eo ipso concipiatur partis extra partes , & quorum una sit extra aliam posita .

Alii Recentiores Philosophi eam solam extensionem localem pro essentia corporis habent , quæ partium pluralitatem re ipsa præ se fert ; atque duplex spatium discernunt ; alterum , quod partes habeat , & partes ; alterum , quod partibus sit destitutum : ut proinde illud reale sit , hoc autem imaginarium , seu fictitium . In quo , ut apparet , ab opinione Cartesii dissentiantur .

Newtoniani docent essentiam corporis sitam esse in soliditate impenetrabili . Nonnulli Philosophi in ipsa impenetrabilitate naturam corporis constituant ; alii in actuallim penetracione .

Nostra demum sententia extensionem *entitativam à locali* secerit . Illa dicitur extensio in ordine ad se , & præ se fert partium realium pluralitatem . Hæc in ordine ad locum appellatur , & loci occupacionem significat , quod vel *circumscriptive* , vel *definitive* contingere potest , ut alias diximus . Essentiam corporis in sola *entitativa* extensione constituimus , & hanc à *locali* secernimus , contra ac docuit Cartesius , à cuius opinione utroque ex capite dissentimur , quemadmodum ab aliorum Recentiorum doctrina recedimus , quia *localem* extensionem ad essentiam corporis nullatenus pertinere arbitramur .

Dicimus , essentiam corporis sitam non esse in extensione actuali in longum , latum , & profundum : quocumque modo id accipiatur ; sed in extensione ejusdem corporis in ordine ad se .

Probatur 1. universim assertio nostra . Nulla res existere potest sine essentia sua , ne quidem per diuinam virtutem . Atqui corpus cœxistere potest sine actuali extensione in longum , latum , & profundum . Ergo ejusmodi actualis extensio non est essentia corporis . Major evidens est . Nam si res existeret sine sua essentia , esset simul , & non esset , nec Deus potest mutare essentia rerum , ut probavimus in prima parte Metaphysices , disp . 3. quæs 1. Minor probatur . Corpus Christi in Venerabili Eucharistia Sacramento existens , ex definitis ad Ecclesia in Concilio Generali Constantiensi est verum corpus , & illud idem , quod fuit in Cruce . Atqui Corpus Christi in Eucharistia existit sine actualli extensione in longum , latum , & profundum . Ergo &c . Minor probatur . Sacrosancta Trid . Synod . ses . 13 . cap . 3 . sic definit : *Totus , & integer Christus sub panis specie , & sub quavis ipsius speciei parte existit .* Ergo Christi Corpus in Eucharistia totum est in toto hostiæ loco , & totum sub qualibet loci parte ; atque adeo existit ibidem sine propria actualli extensione in longum , latum , & profundum . Ergo extensio illa , sive juxta Cartesii doctrinam ,

sive juxta aliorum Recentiorum sententiam, non est essentia corporis.

Probatur 2. Essentia alicujus rei est prædicatum primum, & intimus ejusdem rei; adeoque nullum aliud prædicatum præsupponit in ipsa re. Atqui extensio actualis in longum, latum, & profundum, præsupponit partes, quæ locum hoc modo replere possint. Ergo extensio illa non est essentia corporis. Deinde extensio actualis pertinet ad actum secundum: omnis autem actus secundus præsupponit actum primum, seu potentiam, & hæc essentiam rei supponit, cui conveniat. Ergo &c.

Hinc vero etiam convincimus, corporis essentiam non esse impenetrationem actualēm, quia ex dictis partes Corporis Christi in Eucharistia existentis penetrantur in eodem loco. Neque essentia corporis statui potest in soliditate impenetrabili. Etenim idea soliditatis, & impenetrabilitatis supponit ideam extensionis, & partium pluralitatem. Hinc Samuel Clarke in notis ad Rohaultium, part. 1. cap. 7. facit, essentiam materiae à Newtono traditam non præ se ferre propriam, metaphysicamque ejusdem materiae essentialēm notionem. Impenetrabilitas autem est quantitatis essentia: ut diximus in secunda Logices parte, disp. 4. quæst. 4.

Quamobrem extensio in ordine ad se dicenda est essentia corporis. Hæc enim præcedit divisibilitatem,

soliditatem, & impenetrabilitatem, nam istæ supponunt partes, quas afficiant. In eo etiam corpus à spiritu differt, quod corpus pluribus partibus constat, unde & dividi potest, ac impenetrabile fit per quantitatem; non ita spiritus, qui cum partibus careat, omnino est indivisibilis, & penetrabilis.

Respondeatur Cartesiani ex Cartesio, epistol. 4. partis 2. Concilium Tridentinum definisse quidem præsentiam realem Corporis Christi in Eucharistia, non tamen modum istius præsentiae, immo docuisse, cap. 1. illud ibi esse ea ratione, quam verbis exprimere vix possumus. Non ergo affirmare possumus, Corpus Christi ibidem existere sine sua actuali extensione.

Contra est. Concilium Tridentin. cap. 1. citato affirmat, *Salvatorem nostrum sacramentaliter præsentem sua substancia nobis adesse, ex existendi ratione, quam et si verbis exprimere vix possumus, possibilem tamen esse Deo, cogitatione per fidem illustrata assequi possumus, & constantissime credere debemus.* Censem ergo Concilium, mente per fidem illustrata nos percipere posse modum præsentiae Corporis Christi in Eucharistia, etsi solum naturale lumen id assequi non valeat: quod ultro fatemur. Modum autem ipsum ex fidei doctrina à Concilio tradita aperite cognoscimus. Quid enim est, totum, & integrum Christum sub

sub panis specie, & sub quavis ipsius speciei parte existere, nisi Christi Corpus esse totum in toto hostiae loco, & totum in qualibet loci illius parte? Quod nos dicimus esse in loco *definitive*, & ad modum præsentiae pertinet. At data Cartesii sententia, modus iste essendi in hostia nullatenus intelligi potest; immo manifestam præse ferret contradictionem, quia Corpus Christi in Eucharistia haberet suam essentiam, adeoque actualem extensionem in longum, latum, & profundum: non haberet autem essentiam suam, quia hac extensione actuali careret.

Aliam proinde responsionem tradidit Cartesius, ep. 114. ut vim propositi argumenti dissolveret. Ait enim, totum Christi Corpus sub qualibet speciei panis parte contineri, quia qualibet sensibilis pars illius speciei informatur anima rationali Christi; quatenus in instanti fit, ut panis informetur anima Christi: quemadmodum id eveniret; quando juxta consuetum naturæ cursum, particulæ panis, aut vini post multiplicem alterationem miscendæ essent in Christi visceribus, & peculiari ratione disponendæ, ut ipsius corpus fierent, & anima ejus informarentur. Putat autem Cartesius hominis corpus fieri humanum per animam rationalem, qua informatur. Quare in Eucharistia cum panis transubstantietur in Christi Corpus; ideo Christus dicitur continere.

Tom. II.

ri sub qualibet speciei parte, quia panis conversus informatur anima ipsius Christi.

Sed hæc responsio commentitia prorsus est. Primo enim laudatum Concilium cap. ter. cit. docet statim post consecrationem verum Domini nostri Corpus, verumque ejus sanguinem sub panis, & vini specie una cum ipsius anima, & divinitate existere; sed corpus quidem sub specie panis, & sanguinem sub specie vini, & sanguinem sub specie panis, animamque sub utraque, VI NATURALIS ILLIUS CONNEXIONIS; ET CONCOMITANTIAE, qua partes Christi Domini inter se copulantur. Ex hac porro doctrina cognoscitur in consecratione panis Corpus Christi fieri præsens immediate ex vi verborum, animam vero solummodo mediate præsenti fieri ratione conjunctionis cum corpore. Atqui si hominis corpus est humanum per animam, anima immediate ex vi verborum præsens fieret in Excharistia; Ex quo enim dicitur: *Hoc est corpus meum*, jam corpus humanum ex vi verborum designatur, ac subinde anima ex vi verborum fieret præsens, si hæc constitueret corpus humanum, uti humanum. Ergo allata Cartesii doctrina non congruit decretis Tridentinæ Synodi.

Secundo Concilium tradit to-
tum Christi Corpus sub qua-

Y | li- |

libet parte speciei panis contineri. Ergo ut locum habeat Cartesii doctrina, oporteret quamlibet panis partem in totum Christi Corpus converti. Sed Cartesius putat in instanti fieri conversionem illam panis in Corpus, quæ successione temporis per naturæ cursum contingere: Hæc vero conversio non est ejusmodi, ut vel minima panis particula in totum corpus convertatur. Ergo ex data Cartesii responsione non subsistit totum Christi Corpus existere sub qualibet speciei parte. Rursus aliud est transubstantiatio, qua panis convertitur in Christi Corpus: aliud vero continentia Corporis Christi sub specie panis, & sub quavis speciei parte. At Cartesius utrumque confundit.

Respondent 2. Corpus Christi existere quidem sub quavis etiam minima parte hostiæ; at inde non colligi, Christi Corpus ibidem esse sine sua actuali extensione; Siquidem Sapientissimo, & Omnipotenti Deo non deest modus, quo corpus vere extensum exhibeat sensibus nostris sine extensione. Quod si hæc satis non intelligimus, reminisci nos oportet infirmitatis nostræ, ac magnitudinis potentiae Dei. Hinc S. Augustinus, ep. 138. alias 3. c. 2. respondens Volusiano rationem sciscitantι, quomodo B. Maria remanserit virgo post partum, non jam nititur rem explicare, ut postea Scholastici consueverunt, sed ait: *Hic si ratio queritur*

tur, non erit mirabile; si exemplum poscitur, non erit singulare. Demus Deum aliquid posse, quod nos fateamur investigare non posse. In talibus rebus tota ratio facti est potentia facientis. Hinc præ cæteris Constantinus Grimaldi contendit fateri debere, & Corpus Christi manere minima parte hostiæ, & essentiam corporis sitam esse in actuali extensione. Illud enim fide divina constat. Hoc naturalis ratio demonstrat per ideam claram, & distinctam corporis. Fides autem, & idea sunt duo certissima media & infallibilia, cum à Deo sint, quibus veritatem edocemur.

Confirmant responsionem. Ut enim ait Cartesius par. 1. Princip. n. 41. etsi divina præscientia non satis componi possit cum creata libertate: neutrum tamen negandum est. Ut scribit Mallebranche lib. 3. de inquirenda veritate c. 8. Quamvis Mysterium Trinitatis non satis conciliari possint cum eo principio: *Qua sunt eadem uni tertio, sunt eadem inter se*: utrumque tamen ut verum admittimus. Idem ergo in re nostra dicendum.

Contra 1. Ineffabile & impossibile sunt duo invicem longe diversa. Atqui sententia Cartesianorum de essentia corporis reddit prorsus impossibile Sacramentum Eucharistiae: ratio autem ducta ab Omnipotencia Dei, & à nostra infirmitate concludit tantummodo, Sacramentum illud esse ineffabile. Ergo ratio ista nihil prodesse potest

test Cartesianis. Major evidens est. Nam Mysteria Fidei ineffabilia esse Catholici omnes fatentur, quod ea per lumen naturæ satis intelligi nequeant: ea tamen non esse impossibilia, sed possibila, certo certius tenemus. Minor probatur ex dictis. Ea enim sunt impossibilia, quæ præ se ferunt contradictionem. Sed si vera est Cartesiana sententia corporis essentiam constituens in actuali extensione, manifesta haberetur contradictio, dum Christi Corpus in Eucharistia totum, & integrum esset sub panis specie, & sub quavis speciei parte, adeoque existeret sine extensione sua actuali. Ergo Cartesianorum opinio reddit prorsus impossibile Sacramentum Eucharistiae. Falsa igitur est Cartesianorum doctrina.

Contra 2. Ut in 1. parte Logicæ, sect. 3. c. 7. diximus, ea quæ Fidei contradicunt, vera non sunt secundum Philosophiam; nam veritas est una, & verum non opponitur vero, quemadmodum docuit Conc. Later. V. sess. 8. Atqui Cartesiana idea, quæ corporis essentiam actuali extensione definit, pugnat cum Eucharist. Sacramento. Igitur idea illa, utcumque clara, & distincta dicatur, vera non est etiam secundum Philosophiam. Nec ergo à Catholicis Viris constitui potest: quemadmodum nefas est, principium ullum approbare, quod Mysterio Trinitatis aduersetur, illudque reddat impossibi-

bile. Ex nostra autem infirmitate rite concludimus, ineffabilia esse revelata Fidei Mysteria, & Deum longe plura posse, quæ imbecilla mens nostra percipere nequit; sed non inde subinfertur, nos affirmare oportere, Deum posse impossibilia, aut contradicentia. Modus adeo presentia Corporis Christi in Eucharistia, ineffabilis est, nec à nobis clare distinque percipitur; non tamen est impossibilis, nec talis appetit nobis, qui cogitatione per fidem elevata, atque adeo subobscura, assequi illum possumus: ut docet Concil. Tridentinum.

Contra 3. Idem Concilium cap. 1. tradit Corpus Christi diversa ratione existere in cælo, ac in Eucharistia; & ait: *ut ipse Salvator noster semper ad dexteram Patris in calis assideat JUXTA MODUM EXISTENDI NATURALEM;* & *ut multis nibilominus aliis in locis SACRAMENTALITER presens sua substantia nobis adsit.* Atqui si Corpus Christi in Eucharistia suam haberet actualem extensionem, eodem modo ibidem existaret, ac in cælo, ubi circumscripitive est, & cum sua extensione actuali. Igitur ut diversa ratione utrobique sit, hanc extensionem actualem in Eucharistia re ipsa non habet.

Contra 4. S. Augustinus loco citat temerariam hominis curiositatem reprimit, qui divina intropicere contendit, credendum-

que esse Dœō scribit in iis etiam, quæ satis consequi mente non possumus: quod ultiō & nos fatemur. Sed aliud est, mysterium esse ineffabile, aliud vero mysterium esse impossibile: ut diximus. Præscientia Dei non reddit impossibilem libertatem creatam. Vide quæ diximus in parte Logicæ, disp. 5. in solut. ad 1. Ob. Illud etiam principium: *Quæ sunt eadem uni-ter-tio &c.* neutiquam pugnat cum Sacrosancto Trinitatis Mysterio: ut declaravimus in 1. part. Logicæ, sect 3. cap. 3.

Respondent 3. Cartesiani: Corpus Christi totum existere, quidem sub quavis etiam minima parte hostiæ: at inde non colligi, quod Christi Corpus ibidem sit sine sua actuali extensione in longum, latum, & profundum. Siquidem Sapientissimo, & omnipotenti Deo non deest modus, quo corpus vere extensum exhibeat sensibus nostris sine extensione.

Contra est. Nos impræsentiarum non jam loquimur de Christi Corpore, ut sensibus nostris, vel etiam conceptui nostro, appareat; sed illud spectamus, uti se habet re ipsa, & est in se se. Porro Sacrosancta Synodus docet Christi Corpus re ipsa totum esse in tota hostia, & totum sub qualibet hostiæ parte. Ergo Corpus Christi sic se habet re ipsa, ut localem suam extensionem minime obtineat. Hinc Concilium in laudato capite primo tradit longe diversa ratione existere

Corpus Christi in Cælo, ac sit in Eucharistia; ait enim: *Ut ipse Salvator noster semper ad dexteram Patris in cælis assideat, JUXTA MODUM EXISTENDI NATURALIEM;* & ut multis nihilominus aliis in locis *SACRAMENTALITER præsens sua substantia nobis adsit.* Atqui si Corpus Christi in Sacramento Eucharistiae suam habet actualem extensionem in longum, latum, & profundum; eodem modo esset ibidem, ac in cælo. Ergo &c.

Respondent proinde tertio Cartesiani, Corpus Christi totum, & integrum sub minimo hostiæ fragmento contineri: ut parva queræcus in glande, ut pullus in ovi cicatricula continetur; nam hostiæ pars debet esse extensa & sensibilis ut sub ea existat Corpus Christi, siquidem Sacmentum omne debet esse sensibile. Docent autem essentiam Corporis physici non consistere in tanta, vel tanta extensione, sed solum in extensione simpliciter, seu generatim, & universim accepta, ut ubi aliqua sit etiam minima extensio, tunc corporis habeatur essentia. Hinc idem homo dieitur senex, aut puer; etsi major modo fit, modo minor corporea moles. Cum ergo Christi Corpus sub qualibet hostiæ parte extensionem habeat aliquam, & sensibilem; hinc putant subsistere posse, quod corporis essentia sita in actuali extensione in longum, latum, & profundum. Hac porro res-

responsione sibi plaudunt Cartesiani, atque totum caussæ suaæ robur in ea constituunt.

Conabimur itaque hanc ipsam doctrinam funditus evertere: quod ut præstare possimus, sic ratiocinamur. Si vera est Cartesii sententia, quæ essentiam corporis tripliæ extensiōne definit; quælibet, vel minima, pars materiae sibi vindicat pro essentia sua extensionem aliquam minimam sibi respondentem: ergo decem minimæ partes materiae expostulant pro essentia sua decem minimas extensiones: ergo centum minimæ partes materiae exigunt pro sua essentia centum minimas extensiones: ergo mille minimæ partes materiae petunt pro essentia sua mille minimas extensiones. Rursus, non potest una minima pars materiae existere sine una minima extensione: ergo non possunt decem minimæ partes materiae existere sine decem minimis extensionibus: ergo nec centum minimæ partes materiae sine centum minimis extensionibus; nec mille minimæ partes, sine mille minimis extensionibus. Quemadmodum profecto rite sic argumentamur. Unus homo vindicat sibi pro essentia sua unum corpus, & unam animam: ergo decem homines expostulant pro essentia sua decem corpora, & decem animas: ergo centum homines exposcent pro sua essentia centum corpora, & centum animas: ergo mille homines petunt pro sua essentia mil-

le corpora, & mille animas. Atque adeo sicut unus homo non potest existere sine uno corpore, & una anima; ita nec decem homines sine decem corporibus; & decem animabus; nec centum homines sine centum corporibus, & centum animabus; nec mille homines sine mille corporibus, & mille animabus. Quod similiter aliis exemplis possumus suadere. Jam vero singulas spectemus minimas partes Corporis Christi Domini: quæ profecto plus quam mille sunt. Non poterunt sane omnes simul istæ minimæ partes sub unica minima extensione consistere, cum hæc sit essentia unius minimæ partis fide constat. At, ut diximus, omnes simul partes Corporis Christi sub unica extare minimæ parte hostie. Ergo responsio illa nihil proficit Cartesianis.

Rursus si essentia corporis consistit in tria extensiōne, jam hac extensiōne mutata, mutari etiam debet corporis essentia; ac proinde non poterit corpus idem, & essentialiter immutatum habere diuersam extensiōnem localem. Sed Christi Corpus in Cælo est circumscriptive, id est, totum in toto loco, & secundum partes in singulis loci partibus: in Eucharistia autem est definitive, totum nempe in toto hostiæ loco, & totum in singulis hostiæ partibus. Ego &c. Nec allata exempla quidquam juvant Cartesianos. Quippe non est idem.

idem homo adæquate vir , & adul-tus , qui fuit puer , & infans , quo-niam per nutritionem novæ semper adduntur partes substantialis , quæ in ipso quamdam distinctionem numericam inadæquatam efficiunt . Idemque valet de aliis exemplis . Cum igitur è converso Christi Corpus sit omnino idem in cælo , ac in sacramento , eamdem utrobique habere debet essentiam , & exten-sionem .

Dices . Si Corpus Christi in Eu-charistia non habet extensionem suam actualem in longum , latum , & profundum , nulla gauderet ex-tensione . Extensio enim entitativa percipi non potest sine locali . Ex-plicari etiam non potest aptitudo partium corporis ad se se in loco extendendas , tum earumdem ex-tensio in loco . Imperceptibile pa-riter est , partes corporis simul pe-netrari in puncto loci ; tunc enim multitudo perciperetur esse in uni-tate , & unitas in multitudine . Igi-tur &c .

Respondetur , Corpus Christi in Eucharistia habere extensionem suam entitativam , nempe suas partes , & quidem recte dispositas , ut caput collo , & collum humeris adhæreat , non autem pedibus ; est enim ibi integrum , & perfectum in se se . At non habet extensionem localem sibi connaturalem , ni-mi-
rum circumscriptivam : quæ omnia satis jam antea declaravimus ; sed ibi extat definitive . Aptitudo illa partium corporis aliud non est , ni-

si potentia corporis ad locum re-plendum : sicut aptitudo ignis ad comburendum est ipsius ignis po-tentia ad id præstandum . Partes di-cuntur extendi in loco , quatenus locum replent . Cum autem multi-tudo sit partium , & unitas sit loci ; illa intrinseca , ista extrinseca ; ni-hil evincit , fieri non posse , ut di-vina virtute plures partes in eodem uno loco existant . Sed hic mirandum est , Cartesianos , qui usque adeo Divinam magnificant Omnipotentiā , ut velint eam absolute posse facta reddere prima principia , essentiasque rerum mutare , nunc nulla etiam adhibita ratione con-tendere , Deum non posse consti-tuere Mundum in punto loci .

Hæc universim diximus adver-sis Recentiores Philosophos . Nunc speciatim tria argumenta ex lumi-ne naturæ petita Cartesio opponi-mus .

Et primo quidem . Ratio ipsa naturalis declarat , Mundum non esse infinitum , nec infinitos Mun-dos existere . At si essentia corpo-ris sita est in extensione in longum , latum , & profundum , eo sensu , quem Cartesius docet , aut Mun-dus esset infinitus , aut infiniti Mun-di existerent . Ergo ex ipsa natura- li ratione opinio Cartesii falsa con-vincitur . Major evidens est . Ratio enim naturalis evincitur , nihil esse admittendum pro arbitrio , & sine sufficien-
ti probatione : nihil autem probat rerum creatarum infinita-tem . Minor probatur . Spatiū , &

Cor-

Corpus in Cartesii sententia sunt omnino idem; quippe spatium, cum sit extensum, est corpus. Atqui ultra quoscumque conceptus Mundi fines, adhuc concipimus spatium. Ergo Mundus nullos habet fines. Sed infinitum illud est, quod fine caret. Ergo Mundus est infinitus. Rursus spatium, & corpus omnino sunt idem. Sed extra Mundum possumus imaginari infinita spatia invicem distincta, & sejuncta. Ergo infiniti extarent Mundi. Vidimus enim initio quæstionis, Cartesium ea spatia realia habere, quoniam clara, & distincta idea sc̄ spatia illa percipere dicebat.

Cartesius ut vim argumenti effugeret, Mundum dixit *indefinitum esse*, p. 1. Princip. n. 26. & seq. quatenus ipsius terminos adinvenire non possumus. Sed voce illa *indefiniti*, Cartesius illud, non philosophatur. Non enim hic loquimur de Mundo quoad nostram notitiam, sed illum ut in se se spectamus. Vel igitur Mundus in se ipso terminos habet, vel non? Si primum, ruit opinio Cartesii de essentia corporis, nam extensio ultra eos terminos percepta non esset corpus. Si alterum, ergo re ipsa Mundus est infinitus. Indefinita autem dicitur multitudo, non in se, quia suos in se ipsa terminos habet: sed tantummodo respectu nostrum, qui numerum, aut quantitatem illius ignoramus.

Secundo, ratio naturalis ostendit, nullam creaturam esse necessa-

rio æternam, & Deum libertate sua creasse quidquid condidit. At si vera est sententia Cartesii, Mundus, seu materia necessario extitisset ab æterno. Igitur sententia Cartesii, per naturalem rationem falsa convincitur. Major evidens est, & patet ex dictis in Metaphysica. Minor probatur. Spatium, & corpus, ut Cartesio placet, sunt omnino idem. Porro antequam crearetur Mundus, fas est concipere spatium, quod à Philosophis imaginarium, à Cartesio verum corpus, & reale dicitur. Ergo spatium illud ante Mundi creationem erat corpus. Ergo semper fuit. Ergo corpus, seu materia necessario extitit ab æterno. Deinde extensio, quam extra cælos concipimus, Cartesio teste, verum est corpus. Ergo extensio, quam concipimus ante Mundi creationem, & ab æterno, est verum corpus.

Quod autem reponunt Cartesiani, hanc nos sola phantasia concepire, & falsam esse; illam intellectu percipi, & esse veram; jam satis refutavimus in 2. part. Logice, disput. 1. Manifesta enim habetur petitio principii, cum nulla ratio proponatur, cur una falsa sit, & non altera? cur una sit per ideam phantasticam; altera per ideam intellectualem? Immo Cartesius in 2. med. scribit: *Imaginari nihil est aliud, quam contemplari figuram, imaginemve rei corporeæ*. Figuram porro patii, tam ante Mundum, quam extra cælos contemplamur.

Ter-

Tertio , ratio naturalis probat; Deum esse substantia sua immensum , & ubique diffusum : ostendit etiam , Deum esse spiritum , non corpus : ut diximus in 2. Metaphysics parte , disp. 1. At si vera est sententia Cartesii , aut Deus non esset immensus, aut Deus esset corpus. Ergo ratio naturalis probat, sententiam Cartesii esse falsam, Minor probatur. Ea substantia immensa est , quæ ubique præsens est, & secundum se est ubique diffusa. Atqui Divina Substantia nullam haberet diffusionem , sive extensionem sui ipsius ; omnis enim extensio Cartesio docente est corpus. Ergo Divina Substantia non esset immensa. E converso omnis illa substantia , quæ aliquo modo diffusa est , & extensa , si Cartesio credimus, est corpus. Atqui Divina Substantia ratione suæ immensitas est aliquo modo diffusa , & extensa. Ergo divina Substantia , si est immensa , est corpus. Igitur &c.

Nequæ solvitur argumentum ex doctrina Cartesii in epist. 67. dicendo ; corpus esse extensionem secundum varias partes determinatae magnitudinis , & figuræ : quæ extensio non convenit Divinæ Substantiæ. Etenim , ut initio quæstionis declaravimus , Cartesius non aliam extensionem agnoscit, sed extensionem ipsam universim acceperat tam putat realem esse , & partibus constare. Negat etiam extensionem virtualem , qua substantia aliqua sit tota in loco , & tota in aqua-

libet parte loci. Hinc re ipsa facit Deum Mundo præsentem, non entitatem , & substantia sua , sed virtute , & vi , ut ejus verba citata manifestant. Nullam vero extensionem à Cartesio approbari sine partium multiplicatione , & extensione patet. Quippe Cartesius ex eotantum concludit spatia extra cælos esse corporis , quia extensa sunt: nec usquam nitorit ostendere , talem spatiis illis extensionem convenire , quæ partes habeat , & partes. Qualemcumque igitur extensionem habet ille pro essentia corporis , & putat , extensionem sine partibus ne intelligi quidem posse.

Hæc tria absurdæ , quæ Cartesio opposuimus , Fidei etiam Divinæ adversari, compertum est omnibus,

Objicies 1. SS. Patres agnoverunt , corporis essentiam sitam esse in triplici extensione. Etenim S. Augustinus in libro de Quantitate animæ , cap. 4. ait : *Prius abs te quaro , utrum corpus ullum esse putas , quod non pro modo suo habeat aliquam longitudinem , & latitudinem , & altitudinem? Si hoc demas corporibus , quantum mea opinio est , neque sentiri possunt , neque omnino corpora esse recte existimari.* Et c. 14. *Si corpus nullum est , ut ratio ostendit , quod longitudine , latitudine , altitudine caret , nihilque horum nisi cum aliis duobus esse in corpore potest.* Et in libro septimo de Genesi ad litteram capite vigesimo-

pri-

primo inquit: *Si hoc dicunt corpus, quod & nos, id est, naturam quamlibet longitudine, latitudine, altitudine spatium loci occupantem, neque hoc est anima.* Ac libro octavo, capite vigesimo secundo scribit: *Quidquid autem per loci spatia distenditur, corpus est.* Epistola itidem 28. nunc 166. ad Hieronymum ait cap. 2. *Porro si corpus non est, nisi quod per loci spatium aliqua longitudine, latitudine, altitudine, ita sistitur, vel movetur; ut majore sui parte majorem locum occupet, & breviore breviorum minusque sit in parte, aquam in toto non est corpus anima.* Et epist. 187. n. 18. alias 57. inquit: *Spatia locorum tolle corporibus, nusquam erunt: & quia nusquam erunt, nec erunt.* Censem ergo Augustinus non posse corpus existere sine triplici extensione in longum, latum, & profundum; atque hanc esse corporis essentiam. Unde & probat animam non esse corpus, quia ejusmodi extensione caret. Ita & Basilius eodem ex capite colligit Deum non esse corpus; & in libro primo adversus Eunomium ait de ipso Deo: *Incorporeum significat non esse ipsius essentiam triplici dimensione mensurabilem.* Igitur &c.

Respondetur. Nego antecedens. Augustinus itaque laudatis in locis non jam definit corpus, nec intimam illius essentiam exquirit, sed illud describit per affectiones omnibus notissimas: cuius-

Toyn. II.

modi est tria illa extensio. Modum insuper designat, quo corpus replet locum, atque illum discernit à modo, quo anima est in corpore. Cum igitur corpus sit naturaliter in loco circumscriptive, id est, totum in toto loco, & secundum partes in partibus loci: nec innescat nobis, nisi per extensionem illam triplicem, velut per notissimam illius affectionem; iccirco Sanctus Doctor ex hisce notissimis affectionibus, & affectionibus corporis probat animam non esse corpus, quoniam anima illis caret, nec est in corpore extensa circumscriptive, sed definitive, id est, tota in toto corpore, & tota in singulis partibus corporis: ut ipse docet in epistola vigesima octava, & erit suo loco probandum in tertia Physics parte. Ostendit autem Augustinus se disserere de eo, quod naturaliter contingit. Nam in priore laudato loco inquirens, utrum anima rationalis sit corpus, ait: *Res subtilissima est, & longe alios mentis oculos querit, quam humana consuetudo in quotidiana vita attibus habere solita est.* Subjicit postea recitata verba de corpore, utique secundum humanam consuetudinem disserens. Hinc Sanctus Doctor nusquam dixit, corpus esse longitudinem, latitudinem, & altitudinem, sed affirmat corpus esse id, quod habet longitudinem, latitudinem,

Z

&

& altitudinem, quod hisce exten-
sioribus locum occupatur, & illis
distenditur, ac in loco asistitur, &
movetur. Hoc ipsum vero signifi-
cat triplicem extensionem illam es-
se affectionem corporis, quæ na-
turaliter ab eo separari non potest:
quod ultro fatemur, & significat i-
dem S. Doctor lib. 5. de Trinitat.
cap. 10. ubi à corporibus substantia
magnitudinem, seu extensionem
aperte distinguit dicens: *In rebus,
quæ participatione magnitudinis mag-
na sunt, quibus est aliud esse, aliud
magnas esse, sicut magnus mons,
& magna domus. In his ergo rebus
aliud est magnitudo, aliud quod ab
ea magnitudine magnum est, & pror-
sus non est hoc magnitudo, quod est
magna domus.*

Basilii sententia sic expressa est:
*Incorporeum significat non inesse ei
(nimirum Deo) trinæ dimensioni obi-
noxiam essentiam.* Quamobrem ab
opposito dicendum est, corpus es-
se illam essentiam, quæ capax est
trinæ dimensionis, non vero esse
ipsam trinam dimensionem; quippe
esse obnoxium denotat poten-
tiā, non actum. Addit etiam Basilius
*Incorrūptibile non inesse Deo
corruptionem significat, & invisi-
bile omnem oculorum comprehensio-
nem eum excedere, & immortale
numquam dissolutionem ipsi futu-
ram.* Quemadmodum ergo ex ver-
bis istis non colligitur, corruptibile
essentialiter constitui per corrup-
tionem actualem: visibile per a-
ctualem visionem, mortale per a-

ctualem dissolutionem: ita nec ex
verbis præcedentibus infertur, cor-
poreum constitui per actualem ex-
tensionem.

Objicies 2. Illud est rei alicujus
essentia, quod primum in ea concipi-
tur. Sed trina extensio est id, quod
primum concipiatur in corpore,
quodque ab eo ne cogitatione qui-
dem separari potest: nec aliam pro-
fecto corporis notionem habemus,
quam ipsius extensionem. Hinc reli-
quis detractis, ut calore, duritie,
sapore, ac similibus, dummodo res
in longum, latum & profundum pa-
teat, corporis habebit rationem: u-
bi vero dimensiones à corpore su-
stuleris, jam spiritus, non corpus fu-
turum est. Igitur trina extensio est
essentia corporis.

Respondeatur hæc omnia vero es-
se de corpore mathematico, non
de corpore physico. Itaque Carte-
siani mali confundunt corpus ma-
thematicum cum physico. Unde il-
lad Cartesium in errorem induxit,
quod extensionem, motum, & alias
corporum affectiones, ut Geome-
tra expenderit, hoc est, ut à ma-
teria cogitatione ipsa separantur.
Igitur idea trinæ extensionis est,
idea corporis mathematici. At si
quæ in nobis est idea corporis phy-
sici, hæc non sola extensione con-
tinetur; nam ut major sit, aut mi-
nor corporis extensio, non iccirco
natura illius diversa à nobis con-
cipitur. Accedit ideam corporis,
quam Cartesiani tradunt, ex sen-
suum præjudiciis esse formatam,
quod

quod nimirum corpora , quæ videntur , omnia triplici constent dimensione. At Cartesianis ipsis consentientibus , non tanta sensibus tribuenda est auctoritas , ut ex iis intimam rei alicujus essentiam habemus exploratam ; alioquin sicut nullum corpus conspicimus , quod dividi in partes non possit , quod non sit impenetrabile , quod aliqua figura non sit comprehensum , ita in uno , vel altero istorum , vel in hisce omnibus simul , essentia corporis pro cuiuslibet placito posset constitui. Quamobrem dum extensionem concipimus , non exinde corpus physicum concipimus. Immo , & concipere possumus corpus etiam abstrahendo ab extensione actuali in longum , latum , & profundum : licet ejusmodi extensio naturaliter à corpore separari nequeat , sitque prædicatum in corpore præcedens actualem impenetrationem , & figuram.

Instabis primo. Non magis corpus sine extensione concipi potest , quam triangulum sine tribus angulis. Ergo sicut in hoc conceptu exprimimus trianguli essentiam , ita & in primo corporis essentiam significamus.

Respondetur , antecedens à nobis tam facile negari , quam facile asseritur. Illud quidem ad naturam corporis pertinet , ut exigat extensionem ; sed esse re ipsa extensem non est de illius essentia.

Instabis secundo. Extensio non est modus , aut accidens corporis.

Est enim de ratione modi , ut concipi non possit sine re , cujus est modus ; & vicissim res sine suo modo recte concipiatur. Atqui lapis , verbi gratia , concipi nequit sine extensione ; quamvis extensio ipsa sine lapide optime percipiatur. Ergo esse lapidis est potius modus , aut accidens superveniens extensiōni , quam vicissim. Ergo tria extensio est essentia corporis.

Respondetur extensionem physicam substantiæ alicui insidere , ut figuram , & alias corporis affectiones ; unde & extensio universim concipi potest sine lapide , ut figura sine circulo. Verum hinc minime sequitur extensionem ipsam esse rem corpoream , sed illius potius aut attributum , aut proprietatem , aut accidens , aut modum : quemadmodum cognitio non est essentia animæ , sed illius modus , ut diximus in 2. Metaphys. parte , disp. 3. q. 3. Cum autem cognitiones nostræ pendeant à sensibus , siccirco corpus sine extensione concipere non valemus.

Instabis tertio. Atqui extensio tria est essentia ipsius corporis. Ergo nulla responsio. Minor subsumpta probatur. Illud est essentia corporis , sine quo corpus extare non potest ne quidem per divinam potentiam. Sed corpus ne quidem per divinam virtutem existere potest sine tria extensione. Ergo &c. Minor probatur. Si corpus divina virtute existeret sine tria extensione , esset in loco de-

finitive, id est, totum in toto loco, & totum in qualibet parte loci. Atqui corpus non potest esse in loco *definitive*. Ergo &c. Probatur minor. Non potest spiritus esse in loco *circumscriptive*. Ergo non potest corpus esse in loco *definitive*. Hæc consequentia probatur. Sicuti spiritus est indivisibilis, ita corpus est divisibile. Sed spiritus indivisibilis non potest, ne quidem per divinam potentiam, replere locum modo divisibili. Ergo corpus divisibile non potest, ne quidem per divinam virtutem, occupare locum modo indivisibili; Atque adeo tria extensio nullatenus separari potest à corpore; proinde que est illius essentia.

Respondetur. Nego minorem subsumptam. Ad hujus probationem, nego minorem: ad cuius probationem iterum nego minorem. Ad probationem istius minoris concedo antecedens, & nego consequentiam. Patet enim latissima discriminis ratio. Certum est actum secundum haberi non posse sine actu primo: ut operari non potest id, quod potentiam non habet operandi. Certum est etiam actum primum extare posse sine actu secundo: ut qui potentiam operandi habet, aliquando potest non operari. Porro si spiritus esset in loco *circumscriptive*, haberetur actus secundus sine actu primo. At ubi corpus sit in loco *definitive*, haberetur solum actus primus sine secundo. Enim vero si spiritus lo-

cum repleret *circumscriptive*, esset totus in toto loco, & secundum partes in singulis loci partibus; haberet subinde extensionem secundum partes sine partibus ipsis, extensionem localem divisibilem sine extensione secundum se se, ac sine ullo divisibilitatis principio. Cum autem corpus locum occupat *definitive*, atque totum est in toto loco, & totum in qualibet loci parte; habet quidem partes, quibus extendi potest in loco, atque principium obtinet divisibilitatis & extensionem secundum se: sed caret actu secundo divisibilitatis localis, extensionisque divisibilis in loco. Ergo spiritus non potest esse in loco *circumscriptive*, & tamen corpus potest esse in loco *definitive*. Ad probationem alterius consequentiae in argumento propositæ, dicimus modum illum, quo corpus aliquando per divinam virtutem est in loco *definitive*, esse tantummodo indivisibilem ex parte spatii, divisibilem vero ex parte subjecti, seu corporis; Unde & differt à modo, quo spiritus in loco est *definitive*: hic enim modulus est indivisibilis, & ex parte spatii, & ex parte subjecti.

Objicies tertio. Quodlibet spatium est corpus. Ergo extensio, & corpus sunt idem, ac subinde extensio est essentia corporis. Probatur antecedens. Quodlibet spatium habet dimensiones: aliunde autem non est nihil, alioquin corpus, quod extenderetur in spatio ex-

tenderetur in nihilo. Ergo &c.
 Respondetur, ejusmodi nærias exusuflatas fuisse à Subtilissimo Præceptore jam pluribus ante Cartesium sæculis. Itaque ex ejusdem Doctoris Quolibetalium quæstione undecima dicimus spatiū non habere dimensiones positivas, sed tantummodo in spatio intelligi possibilitatem ad dimensiones positivas, cum carentia cuiuslibet actualis dimensionis. Quapropter spatiū non est omnino nihil, nec tamen est corpus. Hinc Augustinus, lib. 4. de Genesi ad litteram, & lib. 25. contra Faustum affirmat corpus esse in spacio, & spatiū à corpore occupari. Nomen autem spatiū æquivocum est. Datū enim spatiū plenum, quod est ipsum corpus; & intelligitur spatiū vacuum, quod est privatio corporis, quoniam innane cum dicitur (ait laudatus Augustinus, lib. 8. de Genesi ad litteram, capite sexto-decimo), intuendo corporis plenitudinem, privatione ejus, tamquam contrario, quid dicatur innane, intelligimus. Corpus itaque dicitur extensum in spatio pleno, hoc est, in se ipso, quatenus una pars sui non est in alia, sed immediate eamsequitur; dicitur etiam extensum in spatio vacuo, non quia corpus sit in vacuo, velut aqua in vase, sed quia corpus vacuo succedit, hoc est, suæ privationi, eamque tollit, incipiens esse ubi non erat. Quod si Cartesiani admirantur, quomodo res

extendatur in spatio, quod in se se nihil est; an ignorant primam rerum creationem, qua res in nihilo positiæ sunt?

Colligate ex dictis, nullum dari posse medium inter corpus, & spiritum, contra ac docent Mallebranche lib. 3. c. 9. & Constantinus Grimaldi. Vel enim res partibus constat, vel non? Si primum, jam corpus est. Si alterum, spiritus est. Unde Corpus, & Spiritus, seu ens materiale, & ens spirituale, in suis essentialibus notionibus prædicata invicem contradictientia præ se ferunt. Hinc S. Augustinus in lib. de natura boni, c. 1. inquit: *Omnis natura aut corpus, aut spiritus est;* & in lib. 12. de Genesi ad litteram, c. 7. ait: *Quidquid corpus non est, & tamen aliquid est, jam recte spiritus dicitur;* & in psal. 50. n. 17. scribit: *Quod non est corpus, & tamen est, videtur restare, ut spiritus sit.* Utrum vero partes corpus integrantes sint semper divisibles, vel potius aliquando ad indivisibile sit reducendo partium distinctio; disserendum erit in 3. q.

QUÆSTIO SECUNDA.

Vtrum Natura physice considerata referatur ad principium activum, vel ad passivum?

Naturæ nomen multifariam accipitur. Sæpe enim pro Deo ipso usurpatur: ut præstitit etiam

S. Augustinus lib. 15. de Trinitate, c. 1. Sæpe pro caussis secundis sumitur, aut pro rerum universitate, vel pro ordine illo, quem Deus præfixit creatarum rerum Universitati. Quandoque significat rei essentiam, & sæpe indicat illud omne, quod à creaturis per vires proprias effici potest. Quod attinet vero ad rem nostram, *Natura* dicitur *intrinsecum principium motus, & quietis*, atque intrinsecam cujuscumque rei creatæ virtutem significat, qua res nititur, seu moveretur ad perfectiones sibi congruas, unde & iisdem obtentis quiescere intelligitur.

Hinc Aristoteles notionem Naturæ exhibens, lib. 2. Physicorum, c. 1. ait: *Natura est principium quoddam, & caussa, ut id moveatur, atque quiescat, in quo primo, per se, & non secundum accidens inest.* Nempe Natura principium dicitur, & caussa, qua quidpiam positivum est, unde privatio, quam disp. 1. initio quæstionis 1. principium appellavimus compositi in fieri, non habet rationem naturæ. Est autem caussa, ut res moveatur, aut quiescat: ubi motus nomine non solum motum localem intelligimus, sed quamlibet mutationem naturalem, per quam aliqua accidentalis perfectio acquiritur; atque huic mutationi quies respondet, quæ per acquisitionem formæ, seu perfectionis convenientis obtinetur. Porro Natura est principium motus, & quietis rei,

in qua inest, quia intrinseca eidem est, atque hinc agentia extrinseca non dicuntur natura. Primo etiam, & per se dicitur, & non secundum accidens, qui naturæ nomine ipsa rei substantia intelligitur, quæ principium est primum, intimius, & radicale, ac per se motus, & quietis; quapropter principia proxima mutationis alicujus, caussæ etiam artificiales, & quæ ex accidenti ad mutationem concurrunt, notionem naturæ non obtinent.

Jam vero ex dicendis disp. 5. qu. 1. creaturæ vi pollut activa, seu principium habent activum, quo propriissibi perfectiones acquirent, & effectus procreant. Exstat etiam in illis principium passivum, seu potentia passiva, quæ perfectiones suscipiunt juxta naturalem inclinationem suam: quo sane secernuntur à violento, ut declaravimus in Ethica, disp. 2. q. 1. Creaturæ pariter per activum naturale principium tum ab agentibus liberis distinguuntur, tum à caussis supernaturalibus, quæ videlicet naturæ vires excedunt. Quandoque autem formæ, quæ rei alicui attribuitur, nec eidem repugnat, nec ab ea exposcit; sed res ipsa omnino intelligitur indifferens: qua ratione lignum indifferens est ad orbicularem, aut cubicam, aliamve figuram. Atque tunc res comparata ad formam illam, dicitur potentiam passivam neutram habere respectu illius.

Quæ-

Quærimus igitur, utrum notio Naturæ, si hæc physice consideretur, conveniat rei, quatenus hæc principium in se se habet activum motus, & quietis; an vero prout principium dicit passivum respectu formæ, quam suscipit, & sub qua intelligitur quiescere, velut sub perfectione sibi conveniente; id enim nunc quietis nomine significamus.

Dicimus, naturam physice consideratam referri ad principium passivum. Ita tradit Subtilis Doctor in 4. d. 43. quæst. 4. ubi ait: *Naturalitas aliquando pertinet ad principium activum, & tunc opponuntur sibi liberum uno modo, & alio modo supernaturale.* Nam agens naturale, vel naturaliter, dicitur, quod opponitur libero, quia agit necessitate naturali: sed voluntarium, vel liberum, quod se ipsum determinat ad agendum, & illo modo loquitur Philosophus 2. Physicorum, dividens naturam contra agens à proposito, & 9. Metaphysica c. 2. & 4. de potentiis activis irrationalibus, & activis rationabilibus, sive liberis. Alio modo ex parte principii activi naturale dicitur, quod habet naturalem ordinem activi ad passum, & supernaturale, quod excedit omnem talam ordinem naturalem, & illo modo quocumque agens caussatum dicitur naturale, & solum agens in creatum dicitur supernaturale. Ex parte autem passi opponitur naturale uno modo violento, prout

naturaliter dicitur moveri, vel pati, quod pariter secundum propriam inclinationem, violenter vero, quod patitur contra inclinationem passi.

Probatur assertio ratione, quam idem Doctor exhibet in 2. d. 18. & d. 2. q. 10. Homini connaturalis est sanitas, sive hæc ab eodem homine efficiatur, sive extrinsecus procuretur. Accidit enim homini sanando, ut ipse artem medicam calleat, & idonea sibi remedia per se ipsum disponat. Frigus etiam dicitur aquæ connaturale, etsi quandoque extrinseca caussa frigidam reddat aquam. E converso motus sursum non es homini naturalis, etsi ab intrinseco animæ principio efficiatur, ut alias dicturi sumus. Eatenus igitur motus dicitur naturalis, quia correspondet intrinsecæ inclinationi illius rei, quæ movet: ut sanitas in homine, frigus in aqua. Si secus contingat, & res formæ eidem attributa repugnet, motus erit violentus. Ergo si corpus naturale habeat principium activum perfectionis alicujus, id nihil obstat, quominus forma, seu perfectione dicatur naturalis, quoties responderet inclinationi corporis. At si desit principium istud passivum, seu inclinatio, nequaquam forma erit corpori naturalis.

Idipsum ex iis, quæ de Violento in Ethica diximus, confirmari potest. Naturale enim, prout opponitur violento, ad Physicam considerationem pertinet. Igitur quemadmodum

admodum violentum tale appellatur ex subjecti repugnantia, ita naturale est ejusmodi propter subjecti inclinationem. Quod si naturale ita accipiatur, ut libero opponitur, & supernaturali, atque subinde principium activum dicit, ad Metaphysicam refertur, quæ res à materia, & motu abstractantes contemplatur. Quamobrem jure Aristoteles ajebat, *moventia mota*, quæ movent, & moventur, esse physicæ considerationis: *moventia vero non mota*, quæ videlicet movent, sed non moventur, ad Metaphysicam pertinere. Artificialia autem; ut notat Scotus, ultimo loc. cit. à naturalibus distinguuntur dupli ex capite, & penes principium passivum, qui illi non respondet subjecti passiva inclinatio; & penes principium activum, nam naturalia habent principium intrinsecum, & determinatum ita agenti, ars vero extrinsecum principium, & liberam agentis potestatem supponit.

Objicies 1. Dum aqua active movet se se, & deperditam frigiditatem recuperat, agit naturaliter: & quidem prout naturale opponitur violento. Ergo Natura physice considerata refertur ad principium activum. Probatur antecedens. Si Deus impediret, ne aqua recuperaret deperditam frigiditatem, aqua tunc violentiam pateretur. Ergo dum agit aqua, & sibi reparat connaturalem frigi-

tatem, naturaliter agit &c.

Respondetur, tunc actionem aquæ dici naturalem, quatenus naturale distinguitur à libero, & supernaturali. At motus dici non potest naturalis, nisi relate ad passivam aquæ inclinationem, vi cuius frigiditas rite appellatur naturalis, etsi non oriretur ab ipsa aqua, sed in ipsa procreatur ab extrinseca aliqua caussa. Quod si Deus impedit illam aquæ actionem, aqua tunc pateretur, violentiam *negativam*, quatenus privaretur actione, quam virtute sua præstare vallet; non tamen dici posset violentiam pati *positivam*, quippe nihil sibi contrarium reciperet, nec aliquid ei adderetur, cui ipsius inclinatio repugnet.

Objicies 2. Ita naturale est gravi corpori moveri deorsum, sicut naturale est igni calefacere. Ergo ratio Naturæ refertur tam ad principium passivum, quam ad principium activum.

Respondetur, diverso modo utrumque illud appellari naturale. Gravi enim naturale est moveri deorsum, quatenus inclinationem habet ad eum locum, qui semper corpori gravi diceretur naturalis ex hac inclinatione, & non violentus, tametsi non acquireretur per intrinsecum principium activum motus. At calefacere est igni naturale, quatenus naturale spectatur metaphysice, & supernaturali opponitur, ac libero: ut in sol. præc. diximus.

Colligite 1. substantiis spirituallibus creatis convenire rationem Naturæ, quia plurimas suscipiunt perfectiones earumdem inclinacioni respondentes: ut in Metaphysica docuimus. Materia etiam, & forma substantialis plures acquirent perfectiones ipsarum passivo principio conformes: ut in præcedentibus diximus. Non ita se habet Deus, qui ut nullas de novo suscepit perfectiones, ita non est Natura juxta sensum physicum, sed supra Naturam.

Colligite 2. Posse perfectionem aliquam esse naturalem creaturæ, quatenus ipsius inclinationi respondet, etiamsi obtineri non possit per solas creatas vires, sed specialem Dei supernaturalem operationem supponat, à qua efficiatur. Sic Visio beatifica est menti humanae connaturalis, licet viribus naturæ obtineri non possit.

Colligite 3. Affectiones, seu accidentia appellari secundum naturam, quando correspondent passivæ inclinationi subjecti, in quo recipiuntur: accidentia autem aliqua esse supernaturalia, quæ vide-licet nulli creaturæ sunt debita ex ordine generali, quem Deus, ut Naturæ Auctor, instituit.

QUÆSTIO TERTIA.

Utrum Continuum componatur ex partibus semper divisibilibus, an vero ex indivisibilibus?

Celebris est, & multo ingeniorum dissidio agitata præsens hæc Quæstio, de Continui Compositione, seu de Corporis Integritate; Sit-ne Continuum, seu Corpus ex partibus ita compactum, ut istæ semper dividiri queant in infinitas alias partes, quarum ultima nusquam valeat assignari: quemadmodum asseverant Peripatetici cum Aristotele in sexto Physicorum libro: quod & approbavit sæpe Scotus, præsertim in 2. d.2.q.9. An vero partes Continuum componentes resolvantur tandem in puncta indivisibilia, sive indivisibilia etiam mente, hoc est, mathematica, ut Zenoni placuit, seu indivisibilia solum re ipsa, ut Atomistis arridet, quorum opinionem exposuimus in prima disp. qu. 1.

Cartesius autem præsentis difficultatis vim maximam effugere natus est. Quippe cum Continuum non ex indivisibilibus constare judicaret, nec ex partibus in infinitum divisibilibus compactum velet assentiri; illud appellare maluit *Indefinitum*. Qua tamen voce, ut in hac ipsa disputat. quæst. 1. notavimus, lectoribus suis illudit, atque solitas artes, & præstigia adhibet, ut imperitis, ac minus acutis, vel

Aa

ac-

accuratis talium inquisitoribus suum faciat. Non enim hic de Continuo loquimur, ut respectu nostrum se habet, sed de illo potius ut est in se se: quod sensu vel indivisibilia velut terminos habet, vel partibus constat in infinitum divisibilibus.

Itaque ut rem ipsam aggrediamur, & certa primo ab ambiguis separemus; omnibus notum est, quocumque Continuum, sive Corpus ex minimis physicis, seu corpusculis minimis compactum esse. Id sane ostendit experientia ex corporum resolutionibus. Sic verbi gratia, pulvis excussus à vestibus, aut contusa aridæ terræ gleba in quamdam veluti pulvereum nubem abit. Hoc etiam pacto dispersus fumus ex ardentí pice, vel ligno totas ædes, & plateas replet: quem fumum evidenter deprehendimus ex particulis minutissimis, re ipsa separatis constare. Sic & grana frumenti, & aromatum in pulveres farinaceos conteruntur. Idem apparet ex suffitibus, & odoramentis, quæ subtilissima nobis suppeditant corpuscula, dum halitu suo diffunduntur. An vero minima hæc corpuscula ex indivisibilibus compacta sint, vel partibus semper divisibilibus constent; hoc opus, hic labor est, investigare.

Illud etiam pro certo habendum est, quod, si Continuum ex partibus in infinitum divisibilibus coalescat, partes istæ debent re ipsa inesse Continuo, atque realiter

invicem discerni. Quippe nihil dividit potest, nisi in ea quæ in se se continet, nec separari queunt illa, quæ realiter invicem non sunt distincta. Putant autem Peripateticī infinitas quidem esse in quolibet Continuo partes, sic tamen ut ex illis aliquæ sint non communicantes, & certam habeant, ac determinatam magnitudinem: ut duo palmi in ulna; aliæ vero sint communicantes, quæ nullam habeant determinatam mensuram, sed secundum aliquam proportionem semper minores, & minores, ac indeterminatæ magnitudinis ab æqualibus, & non communicantibus detrahantur. Partes demum omnes punctis quibusdam indivisibilibus invicem copulari, & terminari, communior Peripateticorum opinio fert.

Verum sententia hæc fidem omnem nostram longius exceedere videtur; unde non facile eidem possumus assentiri. Ubi vero ad Epicureorum placita convertimur, gravissimas etiam in eorum opinione invenimus difficultates. Quamobrem nostrum erit pro utraque parte rationes omnes exponere, tum & argumenta, ac responsiones, quas iisdem adhibent.

Si itaque primum argumentum pro sententia Peripateticorum. Si Continuum constaret ex solis indivisibilibus, non haberet extensionem, ac magnitudinem. Atqui Continuum gaudet extensione, ac magnitudine. Non ergo constat ex

solis indivisibilibus. Major probatur. Indivisible additum indivisi- bili, etsi faciat plus, non tamen facit majus, nec magis extensem. Ergo &c. Antecedens probatur. Ut ex duobus unitis fiat aliquod majus, quam ex uno solo, debent illa duo ita inter se uniri, ut unum sit extra aliud aliqua sui parte; Si enim palmus non sit extra pal- mum, profecto non facit bipal- mare. Atqui punctum additum punto non est aliqua sui parte extra illud; etiam si plura, & plura puncta simul ponantur; Quippe punctum non habet partes, secundum quas possit esse extra aliud punctum: adeoque dum punctum unitur punto, tangit illud secundum se totum; & penetratur cum illo; ac subinde non est extra il- lud. Igitur &c.

Rursus Atomii indivisibiles de- bent esse figuratae, & extensa, ut valeant constituere aliquod exten- sum. Porro asserere Atomos esse simul indivisibiles, & extensas, ac figuratas, est affirmare contradic- toria. Siquidem extensio ne quidem intelligi potest sine partibus, qua- rum una sit extra aliam: nec fi- gura haberi potest, nisi extent partes, quæ per figuram disponi possint. At punctum sine partibus est, ut doctiores Epicurei docent: quemadmodum diximus in lauda- ta disputatione prima, quæstione secunda; Et punctum mathemati- cum ab Euclide definitur, *cujus nulla pars est.*

Respondent Epicurei, quod li- cet unum punctum non faciat ex- tensum, tamen ex quo plura, & plura puncta simul uniuntur, fa- ciunt extensem, quia se specten- tur, v. g. tria puncta, A, B, C, etsi B tangat A secundum se to- tum, non tamen C tangit A secun- dum se totum. Aliunde autem unum punctum tangit aliud secun- dum se totum, sed non fataliter, nec se penetrant, sed immediate unum sequitur post aliud: quem- admodum se habent extremæ su- perficies, in quibus corpora se tan- gunt, cum tamen superficies fa- ciant extensionem. Hinc alii in unoquoque punto eamdem, & simplicem admittunt entitatem, non tamen eamdem faciem, & su- perficiem; ex diverso enim adspe- tu, & relatione ad spatium, diversa etiam dicitur puncti facies, ac su- perficies. Aliis placet puncta esse quidem formaliter indivisibilia & tamen esse virtualiter divisibilia: eo modo quo Spiritus secundum se indivisibilis, est virtute sua divisi- bilis, quatenus occupare potest spatium divisibile.

Urgent tamen Peripatetici. Ex quo punctum in se se extensem non est, ne quidem ex unione cum aliis punctis potest facere ex- tensum. Etenim punctum per unio- nem cum aliis non acquirit exten- sionem. Hinc punctum C tange- ret punctum A secundum se to- tum. Quippe vel punctum B me- dium tangitur à puncto C. secun-

dum illud idem , in quo tangitur ab A ; vel secundum aliud ? Si hoc posterius dicatur , ergo punctum non erit amplius indivisibile , quia dividi poterit in id , in quo tangitur ab A , & in id , in quo tangitur à C. Igitur primum illud oportet affirmare ; atque adeo punctum C tangit punctum A secundum se totum , & secundum omnē id , in quo tangit punctum B. Ex hoc ipso puncta se penetrant , nec in illis distingui potest *totum* , & *totaliter* ; quippe argumentum probat punctum penetrari cum alio , illudque totaliter tangere. Quemadmodum autem infinitæ superficies secundum profunditatem indivisibles non possunt constituerre aliquod divisibile secundum profunditatem ; Ita nec infinita puncta possunt efficere corpus extensum , & divisibile.

Rursus ubi nullæ sunt partes , ibi nulla est facierum diversitas. Siquidem hæc intelligi non potest sine partibus , quæ per figuram disponantur. Quamquam autem Epicurei dicant se diversas facies , & multos angulos intelligere in ea atomo reperiri , quam ne divina quidem virtute dividi posse affirmant ; Tamen id nunquam aliis persuadere poterunt , quod revera contradictionem apertam præ se fert.

Demum chymerica omnino est virtualis illa punctorum divisibilitas , & nulla prorsus ratione probata , ac pro libito conficta. Sed nec quidpiam confert ad rem.

Quippe cum Continuum sit formaliter extensum , partes illud componentes debent esse formaliter extensæ , ut Continuum ex illis compositum per easdem quoque extenderetur ac dividi possit.

Secundum Peripateticorum argumentum. Si Continuum ex punctis indivisibilibus constaret ; mobile tardissimum , ut Testudo , eadem omnino velocitate moveretur , ac mobile velocissimum , ut Aquila. Hoc absurdum est. Ergo Continuum non ex indivisibilibus componitur. Major probatur. Incipient simul moveri Aquila , Testudo , & neutra ex illis cesseret à motu ; initio sui motus Aquila non nisi punctum spatii pertransiret : debet enim incipere à punto. Atqui etiam Testudo tunc pertransiret punctum spatii , nam si movetur simul cum Aquila , non posset transire aliquod minus punto. Ergo si perseverent ambæ in motu , tunc utraque semper punctum spatii conficeret. Ergo &c.

Respondent Epicurei suas atomos indivisibles esse tamen extensas , in quo differunt à punctis Zennonicis , quæ omnino inextensa sunt. Unde fieri potest , ut Testudo medium tantummodo partem atomi percurrat , dum Aquila plures atomos pertransit. Alii vero Epicureorum affirmant motum omnem quibusdam esse morulis interruptum : ita ut motus Aquilæ catenus sit velocior , quia paucioribus morulis interruptus est , at motus Te-

studinis sit tardior ; quia plures interjectas habet morulas.

Instant Peripatetici. Cum dicunt atomos esse indivisibiles , ac simul extensas , duo invicem contradictientia statuuntur. Nam si atomus extendi potest , dividi etiam poterit saltem per divinam virtutem. Quare hæc responsio atomistarum recidit in argumentationem primam. At adversus confictas illas morulas inevitabile fuit semper argumentum illud de ingenti rota ænea , vel marmorea , cuius partes superiores , velocius moventur , quam inferiores , quæ centro viciniores sunt. Siquidem æquali tempore plus spatii conficiunt illæ , quam istæ. Numquid enim partes inferiores aliquando quiescunt , dum superiores moventur ? Quod si ita est , quomodo non discontinuantur ? non enim possunt duo continuari , si ita se habent , ut uno quiescente , aliud moveatur. Quod si manus movetur quiescente brachio , cui continuatur , hoc accidit , quia licet manus , aut brachium non discontinuantur , nihilominus per talen motum inflectuntur , sive ex superiori parte etiam aliqualiter discontinuantur , aut extenduntur. At imperceptibile est per motum caussatum à puerō circumvolvente rotam , discontinuari , aut inflecti vel distendi partes illas , quæ ne ferrei quidem mallei multiplicatis ictibus disontinuari , aut inflecti , aut distendi possunt. Demum qui mo-

rulas istas confingunt non dubitant easdem admittere etiam in motu , quo mola asinaria è concavo Lunæ rueret ; nec scilicet cogantur admittere motum omnium velocissimum , nullis videlicet morulis interpolatum. Sed hæc ipsa assertio ridicula omnino est : quasi ingens illud saxum , ab itinere fatigatum , pluries pensile extra proprium centrum quiescat.

Tertium argumentum Peripateticorum plurimas continet Geometrarum demonstrationes ex quibus putant Peripatetici se ostendere posse infinitam continui divisibilitatem. Si continuum ex punctis constaret , tot forent puncta in minori circulo , quot sunt in majori. Describantur enim ab eodem centro duo Circuli (fig. 4. tab. 8.) , tum ab isto centro ducantur lineaæ ad singula puncta majoris circuli ; hæ lineaæ per minorem circulum sic transibunt , ut singulæ in uno pariter puncto ipsum sint secturæ. Erunt ergo totidem puncta in minori circulo , quot sunt in majore ; quod profecto absurdum est. Secunda linea diagonalis BC quadrati ABCD (fig. 6. tab. 5.) vel ipso aspectu appareat major latere A C , vel B D. Atqui si continuum ex punctis componitur , linea illa non esset major latere. Nam si à singulis punctis lateris AC ducantur lineaæ ad singula puncta lateris A D , hæ quidem lineaæ totam aeream quadrati implebunt , adeo ut nihil vacui remaneat ; & singulæ dia-
na-

nalem B C in uno duntaxat puncto secabunt: neque adeo plura futura sunt puncta in diagonali, quam in latere. Cum igitur hoc sit absurdum, dicendum manet, continuum non componi ex punctis. 3. in triangulo Isoscele (figur. 7. tabul. 5.), nempe cujus duo latera aequalia sunt, si basis ponatur esse viginti punctorum, & utrumque latus quadraginta punctis constare cogitetur; si item ab unoquoque puncto unius lateris ad punctum lateris oppositi ducantur lineaæ, eo istæ erunt breviores, quo longius à basi distabunt: & quæ linea basi prior erit, saltem uno punto longior futura est, quam linea remotior, quæ ipsam proxime sequitur: sicque linea vicesima prima minor erit punto physico, nam erit basi brevior viginti & uno punctis. Hoc ipsum porro absurdum est. Ergo continuum non constat ex punctis, seu atomis physicis. 4. Quantitas aliqua definita, & certa, verbi gratia, unius unciae seu pollicis, in infinitum minui potest, nec unquam penitus exhaudiri. Ergo continuum est divisibile in infinitum. Assumptum sic probatur. Concipiantur C D (figur. 8. tab. 5.) esse mare indefinite extensum, in quo navis moveri incipiat, primum à punto C. ad R, tum à punto R ad S, ad T. Sit præterea Spectator aliquis in A, qui ex edita quadam turri in litore maris extructa, per vitrum EO nayim illam abeuntem spectet. Dum ipse recta intuebi-

tur, radius illius visualis erit A E B, qui parallelus est superficie maris CD, quo radio navim nunquam cernere poterit. Nam cum navis futura est in R, eam videbit radio A L R, cum erit in S, radio AIS; cum in T, radio AFT adeo ut, quo longius navis illa progredietur, eo radiis vicinioribus lineaæ AEB cernenda sit. Cumque infinite produci possit linea CD, quæ mare representat, infiniti quoque duci poterunt radii per lineam EO in vitro exaratam, qui radii semper proprius accident ad punctum E, nec unquam tamen ad id pervenient, cum fieri nunquam possit, ut recta linea à punto A ducta, simul & punctum E & lineam CD attingat. Quare spatium E O; licet valde angustum, potest tamen in infinitum minui, nunquam exhaudiri. S. Demonstratur ab Euclide lib. 10. propositione 1. lineam in infinitum dividi posse. Et propositione ultima ostendit lineam diagonalem quadrati, quæ nempe ab uno quadrati angulo ad oppositum dicitur, ut diximus, esse lateri incommensurabilem: adeo ut utraque per mentem divisa in partes æquales, quantumvis minutias, nunquam ad eam pervenias divisionem, ex qua communis utriusque mensura inveniri possit. Ergo continuum est divisibile in infinitum. 6. Omnis linea dividi potest bifariam in partes æquales. Porro si continuum ex punctis componitur, non omnis linea sic dividi posset; quippe si li-

nea

nea constet punctis imparibus, æqualiter bifariam dividi non potest. Ergo continuum non constat ex punctis. Majorem propositionem demonstrat Euclides, lib. I. propositione 10. dicens: *Sit data recta linea terminata A B (figur. 9. tab. 5.) Constituatur in ea triangulum equilaterum ABC, & secetur ABC angulus bifariam per rectam lineam C D. Dico A B rectam lineam in punto D equaliter secari.* Et postea id ipsum probat ex eo quod recta linea CD, cum dividat bifariam angulum ACB, non potest non secare æqualiter A B, nisi deflectat magis ad unam partem, quam ad aliam: & sic nisi desinet esse recta. His itaque & similibus argumentis ex Geometria petitis pugnant Peripatetici adversus Epicureos, & Zenonistas.

Verum & istis ratiocinationibus suas adhibent responsiones illi, qui continuum ex punctis compactum esse sentiunt. Quippe & nos in Præfat. Physicæ animadvertisimus, non legitimam esse ratiocinationis vim à statu mathematico ad statum physicum. Geometricæ igitur demonstrationes legitimæ sunt, ut à Geometra proponuntur: nimirum si extensio sola spectetur, non res extensa; si lineæ, & puncta considerentur, ut sint in mente Geometræ, non uti sunt in rerum natura; si denique rem ex hypothesi, non absolute judicamus. Quippe Geometra non rem extensam, sed extensionem ipsam considerat, non

ut est in rerum natura, sed ut ab eo concipiatur: eamque modo ut in infinitum sectilem, modo ut ex punctis conflatam examinat. Hinc lineam, ut puncti fluxum, sed ut vestigium, quod punctum post se relinquit: superficiem vero quasi lineæ fluxum, definit; punctumque esse non demonstrat, sed præsupponit, quod ea hypothesi ad demonstrationes suas indigeat. Sed longe aliter se habet res, si physicam naturam spectemus. Ea enim puncta, quæ Mathematici concipiunt, re ipsa extare nemo probare potuit. Nec fas est ex iis quæmente concipimus, ad rerum naturam transire. Proinde arbitramur demonstrationes Geometricas neutri circa continuum opinioni favere; non is, qui continuum ex punctis constare volunt, neque iis, qui illud in infinitum dividi posse contendunt. Etsi autem Geometria certissima sit, non inde colligitur eam esse scientiam realem secundum id, quod considerat: quemadmodum nec certitudo Arithmeticæ ostendit ipsam esse scientiam realem, aut numerum formaliter acceptum quidam esse reale.

Itaque ad primam demonstrationem reponunt Epicurei, non posse infinitas lineas physicas ab eodem puncto, seu circulorum centro duci; immo inquiunt lineas physicas confundendas esse in minori circuli, quatenus aliæ alias, saltem secundum aliquam partem ob-

obducent. Ejusmodi enim physicæ lineaæ non sunt omnis latitudinis, & crassitudinis expertes, sed quamdam habent soliditatem.

Ad secundam. Lineæ illæ, si physicæ sumantur, latitudinem quamdam habent. Proinde diagonalis non recte, sed oblique ab iis secatur. Unde fit, ut singulæ majoris spatium in diagonali tegant, quam in alterutro latere, quod recta, & ad perpendicularum secant.

Ad tertiam. In illa hypothesi duo latera trianguli non ad se mutuo accident unius puncti physici, sed tantum mathematici quantitate. Nec alibi ea hypothesis, quam in mente Geometræ subsistit.

Ad quartam. Infiniti radii, seu lineaæ dividentes longitudinem viti E O, possunt à punto A duci, si mathematico sensu accipientur, quatenus omnis latitudinis, & crassitudinis expertes esse intelliguntur. Ad si physicæ spectentur, soliditatem habent, & confundentur in linea perpendiculari E O; hoc est aliæ ab aliis saltem aliqua parte operientur. Deinde linea C D, quæ marc repräsentat, in infinitum extendi nequit; nec infinitæ actu lineaæ physicæ, ac solidæ à punto A possunt protrahi. Præterquamquod ambo puncta B, & D, è loco remotiori spectata, in unum punctum collecta videri debent: ut ex Opticæ Principiis declarabimus in tertia Physics parte.

Ad quintam. Demonstrationes illæ fiunt ex hypothesi, quod quan-

titas continua in infinitum dividi possit: uti numerus post semper multiplicari. Id vero nusquam demonstratur, sed supponitur. Et quod in ideis Geometræ locum habet, ad physicam rerum naturam transferri non debet.

Ad sextam. Admittunt in primis omnem lineam secari posse in duas partes æquales sensibiliter; non tamen si res ipsa spectetur. Tunc hæc in mente Geometræ vera esse docent, sed non reipsa.

Audiamus modo quidnam obijciant indivisibilium defensores contra sententiam Peripateticam: ut libratis hinc inde rationum momentis judicium suum ferre possit prudens rerum aestimator.

Hoc itaque modo instituamus primum Epicureorum argumentum. Si continuum, sive corpus, est infinitum divisibile, corpus exiguum, ut granum tritici, vel arena maris, aut etiam minutissimum illud Animalculum, quod oculo nudo est invisibile, & in cera solet manere, atque Acari nomen habet, infinitas actu partes in se contineret; nam corpus in ea tantum, quæ continet, divisibile cogitatur. Atqui omnino est imperceptibile, infinitas partes contineri in tam exiguo corpore; adeo ut si Deus per totam æternitatem illud divideret, numquam deveniret ad ultimam divisionem, sed semper alia, & alia pars accipienda permaneret. Ergo continuum non constat ex

par-

partibus semp̄ in infinitum divisibilibus.

Confirmatur primo. Quis credit minutissimæ arenulæ granum sic per totam æternitatem secari posse ut partes illius numquam exhauriantur, sed plures ex continua divisione prodeant, quam sint arenae grana in toto Oceano; immo plus quam totum Universum capere possit? Aut unam alam muscæ in tot partes dividi posse, quot terrarum globo tegendo sufficient? Id autem affirmare debent quotquot continui infinitam divisibilitatem constituant.

Confirmatur secundo. Infinitæ partes, etiam communicantes, cum suam semper habeant extensionem, quantumvis minimam, non nisi magnitudinem infinitam facere possunt. Quantuncumque enim dicantur minimæ partes illæ, ac proportionales, quatenus certa proportione decrescant; attamen semper extensæ sunt. Proinde minima illarum extensio in infinitum multiplicata magnitudinem facheret infinitam.

Respondent huic maxime difficultati Peripatetici, imaginationi quidem videri hæc omnia imperceptibilia, non tamen ita esse. Etsi enim illæ partes sint numero infinitæ, tamen in infinitum decrescent, ideoque non possunt facere extensionem infinitam; sed cum sint partes communicantes, aliam extensionem non habent, nisi quam obtinet totum continuum, cuius sunt partes. Hinc putant nihil ab-

Tom. II.

surdi affirmare, dum concedunt unum arenulæ granum, aut oculum etiam Acari dividi posse in partes infinitas. Sane Rohaultius 1. part. Physices, capit. 9. exemplum supeditat auri, quod ita deduci potest, ut fidem omnem superet. Sic uncia auri in folia tenuissima, & quadrata, plus quam ducenties milles, ab Artificibus contunditur. Idque multo est illustrius in massa argenti cum foliis auri contusa, & deducta in tenuissima folia ubique deaurata: adeo ut, si rem ad calculum revoces, cubus auri quinque linearum altitudinem habens, in sexcentummile, & amplius partes æquales, & sensibiles dividatur. Quod cum homines, qui instrumenta adeo rudia adhibent efficere possint: an dubitamus, quin Naturæ subtilitas, & Dei potentia ultra omnem imaginationis vim excurrat? Evidenter hoc isum apparet, si naturæ minutissima opera paullo acriori animo contemplemur. Missis porro innumeris aliis, conjiciamus oculos in ea animalcula, quæ microscopio in caseo deprehendimus. Quam apte animalcula illa paries omnes habent conformatas? Crurum juncturas, & articulationes, immo & pilos persæpe licet intueri. In ipso etiam Acaro venæ sunt, arteriæ, nervi, musculi, ossa, ventriculus, & intestina: quarum partium quælibet subtilissimis fibris compacta est. Immo id ipsum dicendum est de aliis animalculis longe Acaro mino-

Bb

ri-

ribus: si enim credimus Domino Malezieu, ipse microscopio deprehendit animalcula quædam vi- ventia, quæ per viginti-septem mil- liones vicium minora erant Acaro; nam microscopium totidem vici- bus augebat objecti apparentiam, & ea animalcula sic representavit, ut æqualem cum Acaro molem præ se ferrent. Refertur id in Historia Academiae Regiæ, anno 1718. Idem compertum fit ex tincturis, adeo ut Boylius observaverit, u- num granum cupri, aut æris, in spi- ritu salis amoniaci dissolutum, tan- tam aquæ copiam viridi colore im- buere, ut illa sic colorata constet ducentis quinquaginta sex millibus, octingentis, & sex partibus, qua- rum singulæ sua magnitudine æ- quabant molem ipsius grani cupri. Adeo dissoluti cupri partes commi- nuuntur, & per aquam diffusæ sen- su ipso se produnt. Hoc etiam pacto unicum granum incensi thuris to- tum cubiculum suis corpusculis ex se visibiliter egredientibus replere potest: adeo ut si cum Patre Lana calculum instituas, & cubiculum in longitudinem, & latitudinem 20. pedes, in altitudinem 15. pedes ex- pansum sit, ac mille tantum particu- las fumosas contineri in spatio u- nius, verbi gratia, nisi supponas; tunc prodibunt corpuscula numero septing. quinq. bimillionum: quæ tamen omnia in uno exiguo thuris granulo erant conclusa.

Verum, Epicurei rursus urgent. E- tenim ex ejusmodi responsione col-

ligitur quidem non ita esse sensibus indulgendum, ut naturæ subtilitati, aut materiæ divisioni terminos facile præscribamus. At doctrina illa nullatenus evincit talem divisionem in infinitum posse protendi. Non e- nem in cæteris naturæ operibus progressum in infinitum usquam animadvertisimus, nec verisimi- le est in sola continui divisione infinitum à natura ipsa affectari. semper etiam prorsus impercepti- bile est, arenulam ex partibus in- finitis componi, quippe quantum- vis illæ dicantur communicantes, propriam semper aliquam habent extensionem; adeoque si infinitæ sunt, non nisi in infinitam corpo- ream molem possunt concrescere.

Alterum argumentum adversus Peripateticos hoc est. Si corpus per- fecte sphæricum volvetur, aut tra- hatur per planum, tunc semper tan- get planum in puncto. Ergo cum succe- sive, & continuo corpus illud super Planum moveatur, jam totum planum constabit solis punctis. Quippe semper sphæra illa tangit aliquod indivisibile. Assumptum est Aristotelis, lib. 1. de Anima, tom. 13. ubi asserit, quod, si cor- pus perfecte sphæricum tangeret a- liud corpus perfecte planum; tan- geret illud in puncto. Ita & Scotus in 2. dist. 2. quæst 9. sub litter. T, admittit globum perfecte sphæri- cum, & ex illius contactu in pla- num probat dari in continuo indi- visibilia. Geometræ pariter affir- mant rectam lineam contingere cir-

circulum in puncto omnis extensis experte, & perfecte planum tangi à globo perfecte sphærico in puncto indivisibili, & admittendum esse circulum perfectum, qui tangat rectam lineam in puncto; alioquin circulus ille non esset vere perfectus. Igitur &c.

Respondent nonnulli Peripatetici globum perfecte sphæricum in plano subsultare. Sed cum nulla sit in perfecte plano asperitas, nulla in globo perfecte sphærico inæqualitas; iccirco ineptissima est responsio ista: & qui ea utuntur, saltant potius ipsi, ut argumentum prætereant. Alii docent globum in instanti temporis tangere planum in puncto: in parte vero temporis tangere planum secundum partem. Quæ tamen doctrina contra hypothesim pugnat, & notionem destruit globi perfecte sphærici: ut evidens est. Proinde illi, qui puncta indivisibilia inter continui partes, vel tanquam continui terminos admittunt, sane difficultatem evadere non possunt.

Quamobrem dicendum est cum aliis, allatum argumentum obtinere vim suam, prout à Geometris asseritur. Etenim globos perfecte sphæricus, & corpus perfecte planum, circulus perfectus, & linea, quæ tangat circulum in puncto; non sunt nisi in mente Geometræ. Quæ autem linea realiter existit, non est latitudinis expers, aut soliditatis; nullus extat re ipsa circulus omnino perfectus, sed ad

sensem tantummodo nostrum perfectus est. Ita & quodcumque planum, ac quilibet globus sphæricus in rerum natura non eam obtinet perfectionem, quam Geometræ imaginantur, sed asperitatibus plurimis sunt inæqualia. Adeo ut merito affirmare possimus hæc ipsa, quæ à Geometris supponuntur, & non probantur, prorsus esse impossibilia, si rerum naturam spectemus.

Ergo partium continui copulatio non est punctis repetenda, quæ cum partibus sint destituta, nihil habent unde invicem necant continuum ipsum, aut se partibus continui adjungant. Quare illa copulatio partium continui ab ipsarum figura potissimum attenditur. Ita & per suas partes quodlibet continuum dicitur terminari.

Tertio opponunt Peripateticis Zenonistæ, infinitum pertransiri non posse; proindeque nihil moveri posse, si continuum ex infinitis partibus constat; pertransiri enim istæ non possunt; Rursus si continuum quodlibet ex infinitis partibus coalescit; tot fore partes in ligno, v. gr. palmari, ac in toto mundo; utrobique partes forent infinitæ

Sed difficultates istæ ad primam reducuntur. Unde reponunt Peripatetici. Continuum petransiri secundum partes non communicantes, quæ finitæ sunt, non autem secundum partes communicantes, quæ sunt infinitæ. Ita etiam respon-

dent non repugnare unum infinitum majus altero; quatenus utrumque sine termino sit, sed unum magis accedat ad perfectam infinitatem, quam alterum.

Igitur argumenta in utramque partem proposuimus. Quid autem nobis sentiendum videatur, sequenti assertione proponimus.

Dicimus probabiliorem videri posse Peripateticorum opinionem, quæ continuum componit docet ex partibus semper divisibilibus; attamen ut verum fateamur, nostra sententia tenet, continuum esse arcanum naturæ usque modo ignotum.

Probatur 2. pars. Inter duas opiniones contrarias ea dubio procul est probabilior, atque facilius intelligibilis, quæ constituit actum primum sine actu secundo, quam illa, quæ statuit actum secundum sine actu primo. Atqui Peripateticorum sententia constituit actum primo sine actu secundo; Epicureorum autem opinio statuit actum secundum sine actu primo. Ergo Peripateticorum sententia est probabilior, & facilius intelligibilis, quam opinio Epicureorum. Major evidens est. Potest enim actus primus intelligi sine actu secundo; hoc est, potentia potest effectu suo carere. At nechaberri potest effectus sine potentia, seu vi ipsius effectrice, nec mente assequi possumus actum secundum ab eo præstari, qui actum primum, seu potentia ad illum non habet. Vide quæ diximus in q. 1. in sol. ad 3. instantiam object. 2. Minor prob.

Peripateticorum sententia constituit infinitas partes in continuo finitam extensionem habente; Epicureorum opinio statuit continuum extensum fieri ex partibus inextensis, seu ex punctis indivisibilibus. Sed prima sententia præ se fert capacitatem ad extensionem infinitam sine ista actuali infinita extensione; altera autem opinio actualem extensionem dicit sine principio ad extensionem faciendam idoneo, seu sine partibus extensionem habentibus. Ergo Peripateticorum sententia constituit actum primum sine actu secundo; Epicureorum autem opinio statuit actum secundum sine actu primo. Igitur &c.

Idipsum patet etiam argumenta superius relata conferentibus, tum etiam colligitur ex majori Sapientum numero, qui Peripateticorum adoptavere sententiam.

Probat. 2. pars. Quamquam enim rationes Peripateticorum multum roboris habere videantur; si tamen objecta cum ipsorum responsionibus conferantur, haec plane infirmæ adeo apparent, ut mens nostra quiescere in illis non possint. Quamobrem ingenue fatendum est, humanam rationem huc velut ad scopulum allidere, ut iis, qui sëpe curiosius Omnipotentiæ Divinæ arcana, aut Fidei mysteria scrutantur, & quia illa capere non valent, respuunt, ac contemnunt; obvio ac facili exemplo persuasum esse possit, quam obtusa sit mentis nostræ acies, quam limitata intelligendi vis,

vis, quæ vel in tenuem arenulam impingat, ac deficiat.

Dices. Ex duabus propositionibus contradictoriis una necessario vera est, & altera falsa. Igitur aut demonstrabile est, *Continuum componi ex indivisibilibus*; aut demonstrabile est, *Continuum non componi ex indivisibilibus*. Atque adeo non licet hic assensum omnem cohibere. Tum nos in quæstione diximus, essentiam corporis sitam esse in partium pluralitate, seu extensione in ordine ad se. Ergo cum quælibet data Continui pars sit corpus, ea semper aliis, & aliis partibus in infinitum divisibilibus constant.

Respondetur ad primum, duas ibi exaratas propositiones non esse vere contradictorias; nam modales sunt, & modales non sunt contradictoriae, nisi negatio afficiat modum ipsum. Quare primæ aliae propositioni hæc sola contradicit: *Non est demonstrabile, Continuum componi ex indivisibilibus*. Porro hæc propositio verissima est, altera autem falsa.

Ad secundum. Jam diximus loco cit. Corpus compositum esse ex minimis physicis, seu moleculis, & partium multitudinem pertinere ad Corporis essentiam. Sed illud etiam professi sumus ignorare, quæ tandem habenda sit partium illarum resolutio; utrum nempe partes semper in infinitum accipiendæ permaneant, an vero tandem in indivisibilia resolvi debeant,

quæ extensa sint, & materialia, sed dividi nullatenus possint?

Ut initio quæstionis notavimus, Peripatetici, communi saltem consensu, puncta admittunt in Continuo. Aliis enim partes Continui invicem copulari docent, unde Continuum per unionem istam ab iis secernitur, quæ contigua dicuntur, quatenus unum est prope aliud, sed inter se nexa non sunt. Aliis autem punctis continuum ipsum terminari arbitrantur, adeo ut corpus, quod positivum est, positivo etiam termino circumscribatur. Puncta illa appellantur *continuativa*, hæc vero *terminativa*. Porro puncta, etsi indivisibilia, dicuntur materialia, quatenus spectant ad integratatem corporis, ut corpus est: diversa longe ratione ac anima rationalis pertinet ad integratatem corporis, ut vivens est.

DISPUTATIO QUARTA.

De Affectionibus, seu Qualitatibus Corporis Naturalibus.

QUÆSTIO PRIMA.

Utrum ex Venerabili Eucharistia Sacramento rite colligatur existentia Accidentium absolvitorum in sensu Peripatetico?

Affectiones Corporis naturalis. A *Accidentia* vulgo nominantur. Porro Peripatetici uni formam

mam substantialem docent esse ab solutam, non vero relativam (disp. i. q. i.), ita affectiones corporis naturalis arbitrantur esse formas accidentales, seu accidentia physica absoluta, qualitates nempe, seu reales absolutasque corporis modifications, ab ipso corpore realiter distinctas, & entites quasdam substantiae superfusas. At Recentiores Philosophi omnem rerum materialium mutationem sola forma relativa definiunt, & affectiones corporis naturalis in sola relatione, seu varia materiae dispositione constituunt. Unde Lucretius lib. 2. de rerum natura dicebat: *Intervalla, via, connexus, pondera, plaga (Concursus, motus, ordo, positura, figura)*, Cum permutantur, mutari res quoque debent.

De hujusmodi Affectionibus, seu Accidentibus speciatim postea disseremus. Nunc de eorumdem Existenti universim loquimur, & investigamus, an admittenda sint Accidentia, velut entites absolute corporibus naturalibus superadditæ, & à substantia realiter distinctæ: quod Peripatetici tradunt? utrum vero accidentia aliud non sint, nisi materiae dispositiones variæ, ac configurationes, & motus illius: ut præ ceteris Recentioribus tueri nititur P. Fortunatus à Brixia in *Dissertatione Physico-Theologica, De Qualitatibus Corporum Sensibilibus*.

Cum autem veritas una sit, in-

congruum non erit Christiano Philosopho eamdem hac super re ex Fidei Catholicæ purissimis fontibus repetere: si illa quidem hinc colligi possint, ut Peripatetici arbitrantur. Quærimus ergo, utrum ex Ecclesiæ Definitionibus circa Venerabile Eucharistiæ Sacramentum rite colligi possit existentia Accidentium absolutorum, quantum nempe ex definitionibus illis, velut ex antecedenti, quod ad fidem pertinet, Sententia Peripateticorum, veluti consequens, subinferatur, quod tamen expressum dogma non sit? Contendunt enim Peripatetici, Ecclesiasticas illas definitiones ex sola ipsum opinionem rite exponi posse, atque Recentiorum sententiam non satis apte cum illis cohærere.

Porro si id ipsum statuamus, non inde consequens est, aut Peripateticam sententiam dogma esse Fidei, aut Recentiorum opinionem damnari posse, ut hæreticam. Etenim distinguere oportet ipsam Ecclesiæ definitionem ab iis consecutionibus, quas ratiocinando videmur nobis colligere. Quippe definitio ipsa eluet per Ecclesiæ testimonium infallibile. At in re nostra nullum extat irrefragabile testimonium, quod declareret, consecutiones illas rite, recteque esse deductas: ut Theologi sæpissime docent. Quemadmodum enim sapienter nos admonet Subtilis Doctor in i. d. 26. qu. unica §. *Ad primum, Si pro-*

positio aliqua sit dogma fidei , quod ex ea quis tamquam consequens necessario inferre putat , ad fidem &que non pertinet. Cujus rei ap-tissimum addit exemplum n. 30. Si enim (inquit) Judæis erat tra-ditum , ut crederent Deum esse unum , & de Trinitate nihil expli-cite ; non solum minor reverentia , sed irreverentia , & falsitas esset asserere , hunc articulum non posse esse verum , nisi Deus esset unus personaliter , sicut est essentialiter : & tamen hoc videretur tunc esse magis consonum verbis articuli eis traditi , quam oppositum.

Neque tamen abnuimus natu-ralis rationis vim explorare , cu-jus ope Philosophi Recentiores pro-mittunt , se posse demonstrare , qua-litates Peripatetico sensu absolutas esse impossibilis. Hic autem uni-versim omnino disserentes , con-tendi erimus adversantia argumen-ta ex ratione naturali deducta eno-dare , nec metaphysicis rationibus probare nitemur existentiam acci-dentium absolutorum , cum Recen-tiores iis rationibus non con-sen-tiant : ut alias diximus.

Dicimus , ex Venerabili Eucha-ristiæ Sacramento rite colligi ex-i-stantiam accidentium absolutorum in sensu Peripatetico.

Probatur 1. Concilium Generale Constantiense à Martino V. con-firmatum , sess. 8. damnavit hanc Joannis Wicleffi propositionem. Acciden-tia panis , & vini non ma-nent in eodem Sacramento sine sub-

jecto. Et sess. 15. reprobabit aliam hanc propositionem Joannis Hus: Cum mendacium hæreticum de ho-stia consecrata inter hæreses singu-las teneat principatum , ut ipsa ab Ecclesia extirpetur , secure de-nuncio modernis hæreticis , (loquitur impius ille ad Doctores Ca-tholicos , quos per calumniam no-ta Hæreticorum inurit) quod non possunt declarare , nec intelligere Accidens sine subjecto. Damnatur etiam hæc ejusdem Joannis Hus propositio : Fructus istius demen-tie , qua singitur accidens sine subjecto , foret blasphemare in Deum , scandalizare Sanctos , & illudere Ecclesiæ per verba Acciden-tis. Nunc igitur ita ratiocinamur: Concilium Constantiense , dam-nando prædictas propositiones , re-probare voluit sensum Joannis Wi-cleffi , & Joannis Hus , atque istis adversantem sententiam con-stituere. Atqui Hæretici illi nega-bant accidentia realia & absolu-ta existere in Sacramento Altaris , & sententiam Peripateticorum res-puebant. Igitur Concilium inten-dit , accidentia realia , & absoluta juxta Peripateticam doctrinam per-manere separata à subjecto suo , si-ve à substantia in Sacramento Al-taris. Atque adeo hæc accidentia existunt. Major certissima est. Quippe Conciliorum definitiones sensum Hæreticorum respiciunt , & damnant. Minor probatur. Ut refert Thomas Waldesis , qui con-tra Wicleffi errores pugnavit , de Sa-

Sacramento Eucharistiae cap. 78. & seq. Wicleffus ajebat: *Quam est impossibile, idem simul esse, & non esse; tam est impossibile, Accidens permanere sine subjecto.... Nullum Accidens ponit rem, quæ possit per se existere, ultra suum subjectum, sed solum modum subjecti. Unde omnis res est substantia.. Ecclesia non est oneranda novitate tali insolita; sic enim coloretur abominationis desolationis, quia coloretur Accidens sine subjecto, tanquam Deus. Eodem sensu loquebatur Joannes Hus, ut ex realis ipsius verbis apparet. Ergo hæretici illi negabant &c. Igitur &c.*

Ex damnatione prædictarum propositionum facile colligimus. Cartesium à veritate deflexisse, dum illis similia docet, Ait enim in responsione ad quartas objectiones: *Non potest humana mens cogitare, accidentia panis esse realia, & tamen absque ejus substantia existere... Illa opinio, quæ ponit accidentia realia, à ratione aliena est, & incomprehensibilis, & parum tuta in fide.*

Respondent Recentiores ac præsertim P. Fortunatus diss. cit. Concilium Constantiense damnassee propositionem illam: *Accidentia panis &c. relate ad substantiam panis, quam Wicleffus ajebat permanere, nec in Christi corpus converti. Hanc responsionem (inquit Purchotius part. I. Physicæ, section. 5. cap. I.) nobis suppeditat Petrus de Alliaco, Doctor Theologus Pari-*

siensis, & Episcopus Cameracensis, in lib. 4. Magistri Sententiarum, qu. 6. ar. 3. Nec quisquam eo melius nosse potest, que fuerit mens Conc. Constantiensis cum ipse ei adfuerit.

Contra I. Concilium Constantiense inter alias Wicleffi propositiones damnavit tres sequentes. I. *Substantia panis materialis, & similiter substantia vini materialis manet in Sacramento Altaris. II. Accidens panis non manet sine subjecto in eodem Sacramento. III. Christus non est in eodem Sacramento identice, & realiter, in propria praesentia corporali.* Prima propositio errorem Wicleffi refert communem aliis etiam Hæreticis, qui iecirco *Impanatores* appellati fuerere, generatim sumpto vocabulo, quatenus panis substantiam cum Christi Corpore in Eucharistia permanere autumnant. Tertia propositio alterum Wicleffi errorem continet, quem alii etiam Hæretici tenent, dicti subinde *Sacramentarii*, quod realem Corporis Christi præsentiam inficiuntur: qua assertione ab *Impanatoribus* secernuntur. Secunda autem propositio potissimum significat Wicleffi opinionem. *Quamquam enim prædicti etiam Heretici realium accidentium existentiam sine subjecto negent; tamen Wicleffus speciatim contra eorumdem accidentium existentiam blaterabat: ut indicant ipsius verba, quæ in probatio- nate retulimus. Porro cum tres in Con-*

Concilio expressæ fuerint propositiones, totidemque iis adhibitæ damnationes, ut primæ, ac tertiaræ propositionis damnatio *Impanatores* impedit, & *Sacramentarios*, eorumque specialem doctrinam refellit, qua ad invicem distinguuntur; sic proscriptio secundæ speciatim impedit Wicleffum ipsum, qui præalilis sæpe blateraverat adversus existentiam accidentium realium, & absolvitorum à Catholicis Doctoribus constitutam. Jam vero si secunda Wicleffi propositio eo tantum sensu proscripta fuit, quo coincidit cum prima, omnino supervacanea fuisset distincta illa propositionum expressio, ac triplex damnatio. Immo Patres consulto abstinere debuissent ab expressa damnatione secundæ illius propositionis, ne proscriptio istius, quæ in suis terminis, ac sensu diversa apparet à prima, occasionem erroris cuiquam aliquando præberet, judicandi nimirum utrique propositioni duplum subesse sensum, cùm tamen re ipsa unus omnino, & idem esset. At qui Patres Constantienses id non præstitere. Non igitur reprobarunt secundam Wicleffi propositionem eatenus tantum, quia substantiam panis permanere connotat, quo sensu cum prima coincidit.

Confirmatur. Secunda illa propositio diversa est à prima, non voice tantum, sed terminis suis principiis, eamdemque essentialiter constituentibus. Itenim considerari potest vel secundum id, quod

Tom. II.

essentiiliter dicit: vel secundum id, quod *connotative* præ se fert. Hinc in *complexam* resolvitur, quæ duabus istis enuntiationibus constat: *Accidentia panis non manent in Sacramento Altaris*: *Accidentia panis in Sacramento Altaris manent, non sunt sine subiecto*. Priore sensu omnino distincta est à prima: posteriore sensu primam utique includit. Et quamvis Wicleffus accidentia insciaretur, ut substantia permanentiam impie concluderet, tamen distincte animadvertebat in doctrinam accidentium, & in doctrinam substantiae: eadem sane ratione, qua licet niteretur adstruere permanentiam substantiae, ut realem Corporis Christi præsentiam de medio tolleret, tamen distinctus appareret ipsius error in prima, & in tercia propositione. Ergo duplex illa damnatio primæ, & secundæ propositionis duplicem errorem in illis expressum indicat.

Contra 2. Catholici Theologi ostendunt Lutheranis, substantiam panis in Eucharistia non permanere una cum Christi Corpore, quia Concilium Constantiense damnavit primam illam Wicleffi propositionem. Inde enim manifestum fit, errorem, qui transubstantiationem negat, ab Ecclesia fuisse jam pridem proscriptum. At hoc Catholicorum argumentum, data Recentiorum interpretatione, à Lutheranis eludi facile posset. Ergo &c. Minor probatur. Reponere

Cc pos-

posset Lutheranus damnatam fuisse primam Wicleffi propositionem, non secundum se, sed quatenus cum tertia coincidit: quemadmodum Recentiores ajunt, secundam proscriptam fuisse, non secundum se, sed quatenus coincidit cum prima. Igitur &c.

Contra 3. Tomo 16. Conciliorum Labbæ pagina 846. referatur Theologorum Constantiensium brevis censura 45. articulorum Wicleffi, anno 1415. in Concilio prodita. In ea porro propositio prima Wicleffi declaratur falsa, erronea, & heretica. Secunda autem propositio dicitur falsa, & erronea, & sapiens heresim universaliter intellectam. Docent etiam Theologi illi, accidentia, & species panis in Eucharistia esse sine ullo subjecto: ubi de subjecto receptionis loquuntur, dicendo, species panis non posse esse in alio subjecto, nec in Christi Corpore, nec in aere; atque eo tempore communis Theologorum sententia Peripateticam opinionem tenebat. Igitur ita argumentatur. Secundam Wicleffi propositionem Constantienses Patres damnarunt eo sensu, quo à Conciliis Theologis fuit intellecta. Theologi distinctum sensum arbitrati sunt inesse primæ, ac secundæ propositioni. Ergo distincto sensu utraque proscripta fuit. Minor patet. Theologi diversa censura utramque propositionem notarunt. Ergo in utraque diversum errorem, &

distinctum sensum intellexere.

At inquit Pater Fortunatus. Theologi in censura diffusa (ibidem pagin. 846.) 45. articulos Wicleffi dixere hereticos, & addunt: Secundus articulus est directe contra transubstantiationem. Ergo aperte docuerunt secundum articulum, aequo prorsus ac primum, esse directe contra transubstantiationem. In brevi autem Censura superius citata ita locuti sunt Theologi, ut diximus, non quia utraque propositio minime aduersetur transubstantiationi, sed quia huic dogmati non aduersantur ambæ eodem modo; prima si quidem immediate, secunda vero media te tantum, sive illative illi contraria est.

Verum cum, ut diximus, secunda Wicleffi propositio complexa sit, & in duas facile resolvatur, hinc appareat, cur possit eadem notari aliquando velut sapiens heresim universaliter intellectam, aliquando ut heretica. Si propositio secundum se, & essentialiter accipiatur, sapiens heresim rite dicitur; si consideretur connotatio, heretica est. Hinc facile est non colligere utriusque censuræ discrimen. Quod si prima propositio immediate contraria est transubstantiationi, secunda vero media te tantum, sive illative, nemo non videt, falsum esse, secundum articulum, aequo prorsus ac primum, esse directe contra transubstantiationem.

Con-

Contra 3. Testimonium Petri Alliacensis nullatenus favet responsi Recentiorum, nam nostram sententiam loco citato docet, & unice ait adversam nobis opinionem non esse hæreticam: quod & nos ultro fatemur. Ineptissime autem velut testis ocularis assumitur ad mentem Patrum Constantiensium interpretandam ex iis, quæ docuit in quarto Sententiarum, nam hæc Commentaria editit 21. annis ante celebrationem Concilii Constantiensis: ut etiam P. Fortunatus agnovit, & fatetur.

Sep instat P. Fortunatus. Petrus Alliacensis ignorare non poterat, impiam Wicleffi doctrinam in examen vocatam fuisse ann. 1376. Londini in Anglia à Simone Subduensi Archiepiscopo Canturiæ, & paullo post damnatam à Gregorio XI. Nihilominus absolute scribit, non esse definitum ab Ecclesia, qualitates panis ab illius substantia distingui. Id porro affirmare non potuisset, si contraria assertio inter Wicleffi errores recensenda est. Quod si postea Concilium Constantiense quidpiam declarasset opinioni illi contrarium, Alliacensis saltem retractasset, quod prius dixerat, nempe opinionem illam non esse hæreticam.

Facilis tamen est responsio, quia, ut sæpe diximus, non contendimus Peripateticorum doctrinam ab Ecclesia expresse declaratam fuisse, velut fidei dogma; sed eamdem ex consequenti rite colligi arbit-

tramus, ut magis consonam doctrinæ Ecclesiæ: quod ipsum Alliacensis affirmat. Hinc non debuit retractare, quæ scriperat ante Concilii Constantiensis celebrationem. Sed nec omnes Wicleffi propositiones velut hæreticæ damnatae fuerunt. Aperta autem, & expressa damnatio articulorum Wicleffi, ac maxime publica in solo Constantiensi Concilio primum contigit; & ideo Alliacensis ante celebrationem hujusce Concilii scribens, nihil hac super re ab Ecclesia definitum dixit, nec argumenta pro sua, & nostra sententia confirmanda ex damnatione Wicleffi proposuit.

Objicies 1. ex Andrea Pissini. Concilium Constantiense damnando illam Wicleffi propositionem. *Accidentia non manent sine subiecto*, equidem veram habuit propositionem illi contradictoriam. At propositio, quæ expositæ illi contradictorie opponitur, hæc sola est: *Accidentia non manent cum subiecto*. Quippe cum illa propositio sit modalis, & in modalibus contradictione se teneat penes ipsum modum; siccirco tota contradictione attendenda est relative ad subiectum, quod à Wicleffo permanare dicebatur, subindeque à Concilio negatur existere in Sacramento Altaris; unde Patres non aliud voluere, nisi declarare quod *Accidentia non manent cum subiecto*. Istius porto assertionis veritas subsistit, siue dentur *Accidentia*, sive non:

sat enim est, subjectum non existere; siccirco Concilium nihil determinavit circa accidentia, sed tantummodo circa subjectum. Ergo ex Concilio Constantiensi nihil colligitur pro sententia Peripatetica.

Respondetur, ridiculam omnino esse subtilitatem istam Andreæ Pissini, quæ nihil eidem profuit, quo minus palinodiam canere cogeretur: ut erit postea dicendum. *Enim vero Tyrones ipsi*, qui vel prima salutavere Logices limina, agnoscunt profecto, modalem esse tantummodo propositionem illam, in qua modus afficit connexionem prædicati cum subjecto. *Ubi vero modificatio vel solius subjecti est*, vel solitus prædicati, absoluta manet semper propositione, nec modalis esse potest, ut ex ipsa propositionis modalis notione liquet. Porro in exposita Wicleffii propositione: *Accidentia non manent sine subjecto*; ea modificatio, *sine subjecto*, non jam ipsam propositionis connexionem afficit, sed prædicato adjungitur, ut hoc modo sit resolvenda: *Accidentia non sunt manentia sine subjecto*. Ergo illi contradicit hæc tantummodo assertio: *Accidentia manent sine subjecto*. Atque adeo hoc ipsum volucere Patres Constantienses.

Et sane propositiones contradictoræ sic se habent, ut una sit necessario semper vera, & altera falsa; unde ex veritate unius colligitur falsitas alterius, quoniam in

una propositione negatio tollit quidquid affirmatio in altera ponit: Hinc duæ propositiones affirmativæ, aut duæ propositiones negativæ, nullatenus sunt contradictoræ. Atqui duæ illæ propositiones: *Accidentia non manent sine subjecto*: *Accidentia non manent cum subjecto*; ambæ profecto sunt negativæ. Quippe negativa dicitur ea propositio, in qua negatio afficit connexionem prædicati cum subjecto. In illis autem duabus propositionibus negatio afficit connexionem prædicati cum subjecto, cum in utraque dicatur: *Accidentia non manent*. Ergo primæ allatae propositioni, quam Wicleffus dicebat, hæc sola vere contradicit: *Accidentia manent sine subjecto*.

Quod si Recentiores contendant, in duabus illis propositionibus: *Accidentia non manent sine subjecto*: *Accidentia non manent cum subjecto*; contradictionem omnem se tenere penes particulas illas: *sine subjecto*: *cum subjecto*; animadvertant ex ipsorum sententia duas illas propositiones simul esse veras; quia cum per ipsos accidentia nullatenus existant, profecto, nec manent cum subjecto, nec manent sine subjecto; Atque ateo in opinione Recentiorum duæ propositiones contradictoræ erunt simul veræ. Rursus si tota contradictione appellat illas particulas, jam dicendæ erunt contradictioniæ hæc duæ propositiones:

Accidentia manent sine subiecto:
Accidentia manent cum subiecto.
 Porro duæ istæ propositiones sunt affirmativæ, & juxta Recentiorum opinionem ambæ sunt falsæ, cum per ipsos accidentia nullatenus existant. Ergo duæ propositiones affirmativæ, & falsæ rite dici poterunt contradicitoriae. Quæ omnia sunt omnino absurdæ.

Denum hic urgent ea, quæ diximus contra Recentiorum responsionem. Siquidem duæ damnationes duos connotant errores: & Wicleffus ea sua propositione, de qua nunc agimus, speciatim impletæbat Scholasticorum doctrinam asserentium existere in Sacramento Altaris accidentia realia, & absolute sine subiecto; unde impius illa blasphemabat, *stercus esse melius Sacramento Catholicorum;* quia stercus est substantia, Sacramentum autem Catholicorum tantummodo est accidens.

Objicies 2. ex Constantino Grimaldi. Concilium Constantiense non intendit, accidentia realia, & absolute existere in Sacramento Altaris. Etenim dum fidei articulos proponit, accidentia vocat *species,* & *Velamina:* ut videre est in Bulla Martini V. Rursus in eadem Bulla interrogations exhibentur facienda iis, qui quoquo modo habiti fuerint suspecti de hæresi, ut veritatem subinde profiteantur. At circa secundum illum Wicleffii articulum: *Accidentia panis non manent in eodem Sacra-*

mento sine subiecto; non proponitur specialis interrogatio. Igitur ex Concilio Constantiensi nihil colligitur pro sententia Peripatetica.

Respondetur, nomen speciei, & velaminis non excludere rationem accidentis realis & absoluti, cum hoc ipsum accidens in Sacramento Altaris vere sit species, & velamen, sub quo Christus latet. Quare rite possumus affirmare, Ecclesiam aliquando utentem nomine specierum, aliquando autem nomina accidentium, declarare se idem omnino significare, dum species nominat, quod notio ipsa accidentis præ se fert. Quemadmodum expresse docuit particolare Concilium Coloniense primum, anno 1536, celebratum, dum parte 7. capite 15. inquit: *Quid enim panis, & vi species aliud sunt post consecrationem, quam species sacramentales, & accidentia sine subiecto.*

Cum autem in Bulla Martini V. explicite recenseantur omnes quadragintaquinq; articuli Joannis Wicleffi, profecto omnes itidem à Romano Pontifice damnati intelliguntur. Et quamquam circa articulum illum Wicleffi, de quo nunc disputamus, proposita non fuerit specialis interrogatio; nihil inde possunt Recentiores colligere. Sane sextus hic Wicleffii articulus: *Deus debet obedire Diabolo,* procul dubio proscriptus fuit, & errorum continet ab aliis diversum;

Ne-

Neque tamen Romanus Pontifex specialem pro illo interrogationem expressit. Immo vero 45. articuli Wicleffi, adjunctis triginta articulis Joannis Hus, omnes sunt septuaginta quinque: Interrogationes autem sunt solum triginta, & octo. Non ergo cuilibet damnato articulo correspondere debuit specialis interrogatio. Sed qui suspectui habebantur de hæresi, interrogandi erant speciatim solummodo circa principales articulos: atque circa alios sufficere judicavit Pontifex, si generatim interrogatio proponeretur. Unde in laudata Bulla sic legimus: *Item specialiter interrogetur Litteratus, utrum credit, sententiam Sacri Constantiensis Concilii super quadraginta quinque Joannis Wicellef, & Joannis Hus triginta articulis superius descriptis latam, fore veram, & catholicam; scilicet quod supradicti 45. articuli Joannis Wicellef, & Joannis Hus 30. non sunt catholicæ: sed quidam ex eis sunt notorie heretici, quidam erronei, alii temerarii, & seditiosi, alii piarum aurium offensivi.*

Probatur 2. Concilium Tridentinum sess. 13. can. 2. sic definit: *Si quis dixerit, in Sacramento Eucharistiae remanere substantiam panis, & vini, una cum Corpore, Sanguine Domini Nostri Jesu Christi, negaveritque mirabilem illam, & singularem CONVERSIONEM TOTIUS SUBSTANTIÆ PANIS IN CORPUS, ET TOTIUS SUBSTANTIÆ*

VINI IN SANGUINEM, MAREN-TIBUS DUM TAXAT SPECIEBUS PANIS, ET VINI: quim quidem con-versionem Catholica Ecclesia TRANSUBSTANTIATIONEM appellat; anathema sit. Et can. 3. inquit: Si quis negaverit, in Venerabili Sa-crimento Eucharistiae SUB UNA-QUAQUE SPECIE, ET SUB SIN-GULIS SPECIEI PARTIBUS, SEPA-RATIONE FACTA, TOTUM CHRIS-TUM CONTINERI; anathema sit. Tum c. 2. dixerat: SUMI voluit (Salvator noster) SACRAMENTUM HOC. Et c. 3. Commune hoc quidem est Sanctissime Eucharistiae cum ceteris Sacramentis, SIMBOLUM ESSE rei sacrae, & indivisibilis gratia FORMAM VISIBILEM. Et c. 5. Ut in processionibus reverenter, & honorifice ILLUD (SACRA-MENTUM) per vias, & loca pu-blica CIRCUMFERRETUR. Et c. 6. Consuetudo ASSERVANDI IN SA-CRARIO SANCTAM EUCHARIS-TIAM adeo antiqua est, ut eam sa-culum etiam Nicæni Concilii agnoverit. Porro DEFERRI ipsam Sacram Eu-charistiam ad infirmos &c.

Ex quibus omnibus tale insti-tuimus argumentum. Concilium Tridentinum docet, fieri conver-sionem panis in Corpus Christi, species panis post consecratio-nem manere, speciebus istis at-tribuit partes, & partes, tradit sub illis speciebus Christum conti-neri, affirmat easdem separari, su-mi esse simbolum rei sacrae, esse formam visibilem, circumferri, as-ser-

servari in Sacrario, & deferri. Atqui hæc omnia rite dici non possunt, nisi de speciebus realibus, & absolutis, hoc est, accidentibus sensu Peripatetico. Ergo ex Concilio Tridentino rete colligitur existentia accidentium realium, & absolorum in sensu Peripatetico, Minor probatur. Conversio ex sui notione præ se fert necessario manere aliquid ex iis, quæ prius erant in re illa, quam dicimus converti. Atqui in ista conversione, quæ *transubstantiatio* est, non remanet materia, nec aliquid substantiale. Ergo ut subsistat conversionis notio, reliquum est manere accidentia panis. Ergo accidentia iste realia sunt, ac prius fuerunt in substantia panis, quia non dicitur manere, destructis aliis, nisi id, quod fuit prius. Sic etiam habere partes, continere aliud sub se, dividi posse, sumi, esse formam visibilem, circumferri, asservari, deferri, ejusmodi sane attributa sunt, quæ non nisi entitatibus realibus, & absolutis aptari possunt. Ergo species illæ, de quibus loquitur Concilium Tridentinum, sunt accidentia realia, & absoluta.

Respondet Cartesius, in response ad quartas objectiones: *Non video quidnam possit intelligi per speciem panis, præter illam superficiem quæ media est inter singulas ejus partes, & corpora ipsas ambientia.* Proinde Cartesiani docent panem sic per consecrationem in-

Christi Corpus converti, ut eadem non solum totius hostiæ, sed etiam tenuissimarum, ex quibus panis constabat, particularum figura remaneat, idem situs, & ordo, ut eadem, quæ prius exciteatur subinde in nobis sensatio. Affirmant ergo omnia panis, & vi ni accidentia post consecrationem extra proprium subjectum in hostia remanere. Nam primo superest quantitas, id est, mensura, seu modus extensionis; cum constet eamdem esse longitudinis, latitudinis, & profunditatis mensuram, idemque pondus ante, & post consecrationem panis. Secundo, alia etiam supersunt accidentia, nempe color, sapor &c. cum eadem supersit partium dispositio, per quam eadem prorsus ratione sensus nostri afficiuntur. Hæc Purchotius parte prima Physices, sect. I. cap. I.

Alii vero rem ita declarant. Etenim specierum nomine intelligunt quasdam veluti apothecas, quæ continebant particulæ panis per consecrationem detracti: quemadmodum quando rosa exsiccatur, substantia rosæ recedit, remanent tamen species rosæ in foliis, quæ fuerunt apothecæ succi rosacei, qui evanuit. Aliis placet, remanere species panis post conversionem substantiæ panis, hoc sensu, quatenus pereant particulæ, constituentes substantialiter panem, & remaneant particulæ aliæ, quæ non pertinent ad substantiam panis,

nis, sed in poris illius antea detinebantur. Sunt qui rem sic exponant, ut affirment, remanere species panis, id est, superficiem ipsam panis, quæ se habebat ad panem, ut cutis ad hominem: nam delecto homine, sed remanente cute, remaneret species hominis.

Verum, quocumque tandem modo rem exponant Cartesiani, adversatur certe doctrina ista Fidei Catholicae decretis, vel solius vocis illusio est. Quæso enim primo, quid est illa superficies? Profecto quidpiam erit reale. Aut igitur substantia, aut accidentis est reale, & absolutum? Si posterius affirmet Cartesius; existunt adeo realia, & absoluta accidentia: quod ipse inficiatur. Ergo illud prius debet asseverare, nimur substantiam remanere. Etenim superficies media inter singulas panis partes, & corpora ipsas ambientia, proculdubio substantia est. Immo vero cum illa superficies sit quantitas, & mensura, seu extensio; atque Cartesius corporis essentiam in extensione constituat, & extensionem ipsam doceat esse primam rerum materiam, admittit sane permanere materiam ipsam panis. Manet etiam, addunt expresse Cartesiani, eadem partium dispositio, quæ prius erat. Sed partium dispositio ex eorumdem Cartesianorum sensu est ipsa substantialis rerum forma, atque nihil est ab ipsis partibus distinctum. Ergo

jam ipsa permanet substantia panis, cum illius materia, & substantialis forma permanere dicatur. Quo quid absurdius poterit unquam Vir Catholicus pronunciarer? Refugiunt sane Catholicæ aures audire ejusmodi commenta, quibus vera panis transubstantiatio è medio tollitur.

In eamdem absonam Cartesii sententiam recidunt aliorum responses allatae. Etenim apothecæ panis ad substantiam ipsam panis omnino pertinent, velut partes illius crassiores: quemadmodum apothecæ succi rosacei sunt vera substantia rosæ, pars nempe crassior illius. Ita & cutis hominis pars est humani corporis: & quidem substantia est. Quæ vero particulae non sunt ante consecrationem aliquid panis, nec dici possunt species panis, qui nihil vera panis permaneret. Sed jam de his satis.

Respondent proinde Atomistæ, specierum nomine intelligi à Concilio Tridentino apparentiam panis: quatenus Deus sic movet sensus nostros, ut prius eosdem panis vellicabat. Cum enim accidentia juxta Recentiorum opinionem constant in lucis modificatione, aut in motione, seu titillatione fibrilarum nostri corporis: qua titillatione fit, ut panis albedo representetur in oculo, panis durities in organo tactus, panis odor in organo olfactus, & sapor panis in organo gestus; Iccirco inquiunt ea-

eadem, quæ prius erant, remane-
re accidentia, quoniam eadem illa
sensuum nostrorum titillatio à Deo
solo efficitur, quam substantia pa-
nis antea præstabat. Proinde do-
cent, non remanere species reales,
scilicet accidentia realia, & absoluta:
sed species tamtummodo intentio-
nales.

Addunt, remanere species in Sa-
cramento, non ut sensibiles, sed
ut sensatas, & in pixide asservari
docent species, ut sensibiles, non ut
sensatas, atque eadem distinctione
expendere nituntur cætera prædi-
cata, quæ à Concilio Tridentino
attribuuntur speciebus Eucharisti-
cis: hinc admittunt species fuisse in
pane, ut sensibiles, non ut sensa-
tas; ut tales enim unice sunt in
sensibus nostris, ac in nostris ideis.
Quid vero sint species sensibiles, &
quid species sensatae, hac ratione
declarant. Species (ajunt) sensibiles
non aliud sunt, nisi species prout
possunt caussare in sensibus nostris
motionem, ac titillationem, ex
qua in mente nostra excitetur idea
panis; species vero ut sensatae præ-
se ferunt vel ipsam actualem nostro-
rum sensuum titillationem, vel i-
deæ panis excitationem, ex qua de-
prehendimus rem nobis observan-
tem esse panem. Igitur quia in Sa-
cramento post consecrationem ex-
tat Christi Corpus, quos easdem
potest caussare motiones, iccirco
dantur ibi species ut sensibiles, &
quia in Corpore Christi datur a-
ctualiter potentia caussandi motio-

Tom. II.

nes illas; ideo actualiter datur spe-
cies: etiamsi Corpus Christi sit in
pixide clausum. Docent insuper, in
corum sententia optime subsistere
veritatem illius propositionis, quam
à Concilio Constantensi diximus
constitutam, nemirum: *Accidentia
manent in Sacramento sine subjecto.*
Quatenus cum subjectum illorum
accidentium esset panis: non quia
pani inhærebant, sed quia ducebant
nos in cognitionem panis; talis enim
motiones excitant in nobis ideam
panis; iccirco dum postmodum à
Christo caussatae titillationes eam-
dem excitant ideam panis, & panis
revera ibidem non extat, titilla-
tiones illæ dicuntur rite manere si-
ne subjecto, hoc est, sine pane.
Quemadmodum ergo prius erant
species panis, ita & post consecra-
tionem; nec oportet adstruere acci-
dentia ulla realia, & absoluta. Peri-
patetico sensu.

Contra est primo. Si in Sacra-
mento Altaris sole manent species
intentionales, non subsistit essentia
Sacramenti, nec modus quo fit
Sacramentum, nec denique usus Sa-
cramenti. Quæ omnia absurdâ sunt,
& apertissime adversantur decretus
Concilii Tridentini. Non subsistit
primo essentia Sacramenti. Etenim
Sacramentum est signum sensibile,
est quidpiam objectivum, quod ap-
tum est, & ordinatum, ut nos in-
ducat in cognitionem alterius, &,
ut ait Tridentinum, habet formam
visibilem, unde terminare potest
nostrorum sensuum operationes.

Dd At-

Atqui species intentionales non sunt signum sensibile, nec quidam objectivum, nec habent formam visibilem, secundum quam objiciantur sensibus nostris; sed sunt ipsamēt sensuum nostrorum motiones, atque adeo existunt in sensibus nostris, nec sunt in objecto, nec videri possunt. Haec etiam prædicta non convenientur Christo Domino in Eucharistia præsenti, quia solam vim effectricem habere dicitur, qua species cauſare potest. Rursus quando Hostia consecrata asservatur in pixide, nullum tunc est signum sensibile, nulla forma visibilis. Igitur ex datis speciebus intentionalibus non subsistit essentia Sacramenti. Sed nec modus habetur in ea opinione, quo fit Sacramentum. Transubstantiatio siquidem essentiali p̄ se fert conversionis notionem. Sed conversio nulla est, ubi nihil remanet ex eo, quod erat prius. Porro species intentionales non erant prius in pane. Ergo ex illarum sola permanentia affirmare non possumus, panem fuisse conversum. Neque ad conversionem sufficit permanentia operationum. Nam si Deus deucto igne crearet Angelum qui exhiberet effectus ignis, adeo ut sensus nostri ita afficerentur, non secus ac si ignis esset illis præsens, neutiquam sane diceretur ignis in Angelum converti. Demum motio sensuum nostrorum à pane effecta, nihil est Ipsius panis. Ergo nihil omnino

panis maneret. Atque adeo doctrina illa Recentiorum non explicat modum, quo fit Sacramentum.

Uſus denique Sacramenti non subsistit per eas species intentionales. Quippe species istae non sunt divisibiles, nequeunt asservari in Sacraſio, non possunt sumi, nec deferri, nec adorari, nec denique sunt in Sacramento, sed in solis sensibus nostris. Ergo uſus Sacramenti non subsistit.

Contra 2. Ut ex ipsius verbis apparet, Concilium Tridentinum affirmat, Corpus Christi contineri sub speciebus panis; vel ergo Corpus Christi continetur sub speciebus panis, ut sensatis, vel sub speciebus ut sensibilibus? Si prium dicant Recentiores: ergo Corpus Christi sub titillationibus, motionibusque nostrorum sensuum continetur, atque sub ideis nostris: quod à fide prorsus alienum est, & veritatem nullatenus obtinet, dum Sacramento in pixide clausum asservatur. Si secundum Recentiores affirment: ergo Corpus Christi dicitur contineri sub potentia cauſandi sensations; quippe species ut sensibiles non aliud sunt, nisi id, quod potest move re sensus nostros, seu sensations cauſare. Sed, quæſo, quid est ista potentia, sub qua Corpus Christi dicitur contineri nisi vel intrinſeca virtus Deitatis, vel potestas Corpus Christi, aut vis movendi, vel motus ipse, aut decretum Dei? Igitur Christi Corpus aut sub virtute continetur Dei-

Deitatis, vel sibimet propria potestate, aut sub vi se movendi sibi propria, vel sub suo motu, vel denique sub decreto Dei. Porro nemo dicitur contineri sub se ipso: Deitas autem & ipsa continentur sub speciebus, una cum Christi Corpore. Non ergo sub Deitatis virtute, vel sub propria potestate, ac vi continetur tunc Christi Corpus. At neque sub proprio motu, tum, quod Christi Corpus in Sacramento non operatur actiones loco motivas, ac naturales, tum quod motus ille, qui proprius erat pani nullatenus Christi Corpori proprius est. Decretum vero Dei nequaquam sufficit, ut Concilii sententia subsistat, nec sub Dei decreto quidpiam vero, ac proprio sensu dicitur contineri.

Rursus species remanere ut sensibles, est remanere solummodo virtutem effectivam motionum: Causa porro non est aliquid effectus, & effectum existere in sua causa est effectum ipsum revera secundum se non existere. Ergo nihil omnino remanet, nisi Christi Corpus cum sua virtute. Neque ex illius existentia possunt absolute loquendo existentes appellari species. Alioquin absolute prolata hæc propositio: *Creatura fuit ab æterno*, vera esset, quia ab æterno existebat Deus valens producere creaturam. Jam si res ita se habet, posset quis dicere pulcherrima poma, rosasque fragrantes remanente actualiter, & existere, nam ar-

bors actualiter manet, & roserum, ac virtus effectrix.

Contra 3. Nemo unquam Veterum docuit, objectum illud, circa quod res versatur, esse itidem illius subjectum, in quo sit. Alioquin enim rite dici posset ideas nostras esse in Deo & respicere Deum pro suo objecto, in quo sint, quia non ducunt in cognitionem Dei. Gratuita igitur omnino est, atque ad libitum prorsus effecta doctrina illa Recentiorum, qui dicunt, species ante consecrationem esse in pane, quia nos ducunt ad cognitionem panis: & è converso permanere species sine subjecto post consecrationem, quia non permanet panis, quem significant. A ratione igitur aliena prorsus est illa indistincta acceptio objecti circa quod, & subjecti in quo: quæ nec ab ullo unquam tradita fuit, nec aliis exemplis suaderi potest, ac illustrari. Multo minus asseverare possunt Recentiores, hoc sensu loquutus fuisse Tridentinos Patres.

Concilium itidem Tridentinum docet Eucharisticas species dividi. Porro idipsum minime verificatur de speciebus, vel ut sensatis, vel ut sensibilibus juxta Recentiorum explicationem. Nam vero species ut sensibles aliud non sunt, nisi Corpus Christi cum potentia efficiendi motiones: Corpus autem Christi non subjacet divisioni: Species vero sensatae sunt ipsæ motiones sensuum nostrorum; quæ nul-

latenus à nobis dividuntur. Affirmant insuper Tridentini PP. Sacramentum Eucharistie habere formam visibilem. Porro nec Corpus Christi in Altari visibile est , nee titillationes sensuum nostrorum diei possunt formæ visibiles. Id ipsum vallet de aliis prædicatis , quæ à Tridentino Concilio attribuuntur speciebus Eucharisticis. Etenim ejusmodi prædicta non possunt à Recentioribus expendi juxta sensum litteralem , ac proprium , atque tunc temporis , & nunc etiam apud homines communem , & usitatum : sed solum explicari possunt metaphorice per tropos , ac figuræ. Cum veronullum habeatur fundatum ejusmodi expositio- nis ad stricte merito habetur immo ut aliena , & contraria veritati judicanda est ; nam Patres Tridentini non per tropos , & figuras , sed proprio , ac rigoroso verborum sensu loquuti sunt , fidei nostræ mysteria exponentes. Postremo dum Sacramentum in pixide clausum est , nihil re ipsa tunc habetur , nisi Corpus Christi. Quod quidem plerique Recentiores affirmare non dubitant. Ibi sane non sunt species , ut sensatae ; quippe nulla est sensuum nostrorum motio. Sed nec species extant ibi , ut sensibles ; quia Christi nihil tunc agit , ut sensus vellicet nostros , & solam tunc habet remotam potentiam movendi , quoniam nec panis nos moveret , si ibidem clausus existeret.

Contra 4. Longe aliter sane docuit perpetuo Ecclesia , tum ante Tridentinum Concilium , tum post hujus celebrationem. Et quidem Veteres PP. realium specierum permanentiam in Sacramento docuerunt : ut animadvertis Thomas Walldensis , c. 76. Nec Veterum quispiam tradidit species illas esse intentionales. Immo vero Augustinus , ut refert Gratianus , de Consecrat. dist. 2. docet Sacramentum Eucharistie ex duobus componi , videlicet ex visibili clementorum specie & invisibili D.N.J.C. carne , & sanguine ; hoc est , ut paulo post declaratur , Sacramento , & re Sacramenti : quemadmodum ait etiam Innocent. III. in capite *Cum Martha* , de Celebratione Missarum : ubi Pontifex semper tamquam certam assumit opinionem de permanentia accidentium realium panis , & vini ; unde & scribit , vinum immissum in Calicem post Consecrationem , non sanguini commisceri , sed accidentibus prioris vini. Concilium pariter Lateranense sub eodem Innocentio III. celebratum , capite primo de Fide Catholica docet , Corpus Christi Domini sub speciebus panis , & vini veriiter contineri , transubstantiatius pane in Corpus , & vino in Sanguinem , potestate divina. Et Coloniense sub Nicolao III. capit. 7. statuit credendum , quod sub forma , & specie panis sit Corpus Christi natum de Virgine. Anselmus pariter in libro de Sacramento Altaris in-

inquit: EST VERA SPECIES VISIBILIS panis, sed absque substantia sua; Et in tractatu, de Corpore, & Sanguine Domini, cap. 6. scribit manere in hoc Sacramento quædam accidentia panis, quæ subsistunt sine subjecto, quia licet ad sint Corpori Christi, non tamen illi insunt, & ea accidentia dicit esse speciem panis conspicuum, at atque visibilem. Ecclesia quoque jam per quinque sæcula in Officio Sanctissimi Corporis Christi sic legit: Accidentia autem sine subjecto in eodem Sacramento subsistant, ut fides locum habeat, dum visibile in visibiliter sumitur aliena specie occultatum, & sensus à deceptione reddantur immanes, qui de accidentibus judicant sibi notis. Ad demum Concilii Bituricense Provinciale Patriarchale celebratum an. 1584. titulo 22. De Eucharistia, inquit canone tertio: Negantes accidentia panis, & vini in Sacramento Eucharistia sine substantia panis, & vini manere, anathemate feriantur, & heretici censentur. Quibus verbis simul damnat heresim Lutheranorum, & sententiam adstruit Peripateticam. Jam vero ex Recentiorum sententia nihil reale existit in Eucharistia, nisi Res Sacramenti, nempe Corpus Christi: nihil autem extat ibidem, quod sit Sacramentum, formam habeat invisibilem, sit vera species visibilis, & accidentis sine subjecto. Igitur rejiciendæ sunt species illæ intentionales,

Respondeat P. Fortunatus, sensibilitatem Christi Domini in Eucharistia sub speciebus panis, & vini non solum esse caussalem, & mere extrinsecam, quatenus instar panis immutet sensoria nostra, sed formalem etiam esse, & objectivam; quippe Christus Dominus vere, & realiter, instar panis, existit in Eucharistia, & omni secluso sensu, non majori loco ibi præsens existit, ac fuerat hostia antea consecrationem; eodem prorsus, quo hostia, pondere gravitat; eodemque modo ex illo loco lumen regerit, movetque circumambientem aerem, ac præstabat hostia non consecrata. Sacramento autem in pixide clauso, haberi seribit species panis, ut sensibles, nempe Christum Dominum ibi existere instar panis, ea nimis ratione, ut non majori spatio Corpus Christi in clausa pixide sit præsens, ac erat hostia non consecrata; pixidem premat æque ac ab hostia ante consecrationem premebat; solaque sufficiat reseratio pixidis ad eas motiones in sensoriis nostris excitandas, quas panis sensatio naturaliter comitatur. Hinc ait, proximam ibidem haberi potentiam movendi sensus nostros, cum ad id sola sufficiat reseratio pixidis: cum è converso sola impedimentorum externorum remotio non sufficiat hyberno tempore in arbore, & in roseto ad poma, & rosas producendas.

Contra 1. Corpus Christi in Eucharistia existens diverso modo lo-

cum

cum occupat, ac illud repleret hostia con consecrata. Etenim, ut in præc. disp. quæst. 1. diximus, Corpus Christi ibi est in loco *definitive*, totum in toto loco, & totum in singulis loci partibus: hostia autem non consecrata locum replebat *circumscriptive*, id est tota erat in toto loco, & secundum partes in singulis loci partibus. Ergo diverso modo est in loco hostia non consecrata, ac Christi Corpus sub speciebus Eucharisticis. Immo Christi Corpus in minori loco existit totum, licet totum sit etiam in toto hostiæ loco.

Contra 2. Præsentia Corporis Christi in Eucharistia nobis nunc minime sensibilis est. Ergo ea non sufficit, ut sensibilitas explicetur Christi Domini sub speciebus panis, & vini; nec sensibilitas *formalis*, & *objectiva* per præsentiam illam haberi potest. Hæc etiam non intelligitur, eo quod Corpus Christi gravitet, lumen regerat, aerem moveat, sicut prius hostia non consecrata. Id enim omne, quo Christus præstat munera panis, pertinet ad cauſalitatem *efficientem*, non vero ad *formatam*. Potissimum vero illis omnibus attribui nequeunt, quæ sensibilitatem Sacramenti juxta Tridentinorum Patrum sententiam, vel constituunt, vel committantur. Quis enim dicat, virtutem premendi pixidem, & vellicandi sensus nostros, quam Christi Corpus habere dicitur, esse *formatam visibili-*

lem, habere partes, & partes, separari, dividiri?

Contra 3. Species, ut *sensibles*, ut Recentiorum opinione aliud non sunt, nisi Corpus Christi cum potentia efficiendi motiones sensuum nostrorum, eosque effectus præstandi, quos hostia non consecrata exhiberet. Porro si hæc potentia accipiatur absolute, ea semper convenit Christo, etiam extra Sacramentum Altaris existenti. Quis enim inficiabitur, Deo inesse vim sensus nostros movendi? Ergo nisi dicere velis species *sensibles* semper extare, affirmare debes, tunc solum eas haberi, cum potentia illa nititur exire in actum secundum. Igitur clausa pixide, quia Christus nihil tunc agit, ut vellicet sensus nostros, species *sensibles* ibi non subsistunt. Hoc ipso autem quod necessaria dicitur reseratio pixidis, ut Christus motiones excitet in sensoriis nostris, potentia eas excitandi *remota* sane est, non *proxima*: nisi quis velit terminis abuti, & proximam etiam appellare potentiam ambulandi, quæ homini inest catenis, vinculisque constricto, quia sola sufficit horum impedimentorum *remotio*, ut ea ambulandi potentia exerceatur. At hoc ipsum est confundere notionem potentiarum proxime cum notione potentiarum remotarum. Proxima enim potentia ea est, quæ omnibus instructa est requisitis ad operandum. Species denique intentionales non existunt, ni-

si quando re ipsa sensus nostri moventur. Ergo clausa pixide, non existunt; adeoque tunc ibi non est *Sacramentum*, & *res Sacramenti*, ut antea diximus. Quæ vero exempla arboris, & roseti retulimus, in id unice assumpsimus, ut evinceremus, sola virtute effectrice existente, rite dici non posse effectum re ipsa existere; atque ad id concludendum revera sunt idonea.

Libet autem in hanc rem subjicere Palinodiam, quam infensis simus hostis Peripateticæ Philosophiæ Andreas Pissini Lucensis cecinit in Congregatione Sanctissimæ Inquisitionis Romæ habita in Conventu S. Mariae super Minervam, coram Eminentissimis, & Reverendissimis Dominis Cardinalibus Inquisitoribus Generalibus, die 2. Decembris 1676. ut refert Pater Syri Ordinis Prædicatorum in Logica, de Prædicamentis, Syntagmate 4. art. 3.

Io Andrea Pissini confessò ec. Dichiario, che sebbene come Filosofo, seguitando l' opinione degli Atomisti, parlando degli Accidenti, e specie della SS. Eucaristia, ho dette alcune cose contrarie alle opinioni degli Aristotelici circa la natura degli accidenti, dicendo, che non sono entità distinte dalla sostanza, ma apparenze cagionate nei sensi del viso, e del tatto, ed il medesimo ho detto degli Accidenti della SS. Eucaristia, e che sono come

imagini de sognanti, ed altre simili figure; Pero non ho inteso, né intendo dire, che nella Eucaristia, oltre il Corpo, e Sangue di Cristo, non vi siano attualmente le specie, e li accidenti, sotto i quali, come insegnano i Sagri Concilii, si contengono i detti Corpo, e Sangue. Ne ho inteso, né intendo dire, che in essa Eucaristia non vi siano attualmente le due cose, come dice Innocenzo III. nel cap. *Cum Marthe, de Celebratio ne Missarum*, il Sagramento, cioè le specie sensibili, & *res Sacramenti*, che sono il Corpo, e Sangue di Cristo, perchè tengo e confesso, che vi siano attualmente. E sebbene in un mio esame ho detto, che quando non si vede, o non si tocca l' Eucaristia, allora vi è solamente il Corpo, e Sangue di Cristo, ma non vi è la cosa, che chiamasi Sagramento, perchè allora non vi sono quelle apparenze, e commozioni nei sensi, che nascono, quando si vede, o si tocca; Mi correggo, è ritratto, confessò, che sempre nell'Eucaristia, o si veda, o non si veda; o si tocchi, o non si tocchi, come nella pisside, o altrove, semper vi sono attualmente il Sagramento, ed il Corpo di Cristo..... Ho detto, che Dio nel farci comparire in quelle specie di pane, e divino qualche cosa, che rappresenti il pane, ed il vino, ci inganna, e come Autore della natura può farlo. Ho detto male, per-

perchè non vi e' inganno alcuno, ma si vedono le specie reali, ilè actuali, che si Chiamano Sacramento, quali si sentono col tatto, e gusto.

Hæc Andreas Pissini, qui plura alia etiam addit in favorem Peripatetici Systematis: ut videre est apud Patrem Syri laudatum.

Respondet Pater Fortunatus, Pissini retractionem nihil officere sententiæ Recentiorum. Ideo enim Pissini coactus fuit palinodiam canere, quia dicebat, in pixide clausa non extare actualiter *Sacramentum*, id est, *species sensibiles*, & ajebat opinionem Scholasticorum esse impiam, & manifeste hæreticam, atque Deum nos decipere in Sacramento Altaris. Hinc opinio illa in Pissino Sacris Judicibus visa est suspecta; eamdem tamen modo Ecclesia permitit, quod accurato examine discussa, deprehensa fuerit posse cum fidei doctrina componi. Ita & Galilæus retractare debuit ea, quæ docuerat circa Copernicanum Systema, & nihilominus viri catholici Sistema illud tenere permittuntur ex decreto Sacrae Congregationis S. Officii, an. 1620. Alioquin cum gravissimi Theologi negent, *species panis*, & vini esse id, quod in Eucharistia habet rationem Sacramenti, ii quoque suam deberent revocare opinionem: ut Pissini.

Verum ex prædicta Pissini retractione consequens est, maximum probabilitatem inesse Peripa-

teticorum opinioni, & Recentiorum sententiam non satis consonam videri definitis ab Ecclesia circa Venerabile Eucharistia Sacramentum. Sane vel ipse P. Fortunatus fateretur, Pissinum coactum fuisse sententiam suam de accidentium natura revocare, quia ut pote nova, & omnium ferme Philosophorum, ac Theologorum opinioni tunc contraria, Sacro Inquisitionis Tribunali vehementer suspectu videbatur. Ergo ea tempestate omnes ferme Theologi, ac Philosophi doctrinam specierum intentionalium aut ignorabant, aut rejiciebant. Proindeque arbitrabantur Concilia, Constantiense, & Tridentinum nequaquam suas definitiones ita tradidisse, ut species intentionales vellent significare: quod novissime Recentiores interpretantur. Cum autem Pissini existentiam inficiaretur specierum sensibilium, quas Theologi ex doctrina Innocentii III. communiori sensu appellabant Sacramentum; id non officit aliis Theologis, qui eas species existere concedunt, sed Sacramenti nomen iis convenire negant. Neque Ecclesia usquam declaravit, Pissini, & Recentiorum opinionem componi posse cum fidei doctrina. Permittit ergo illam, quia Catholici Recentiores profitentur omne expresse definitum dogma fidei: cuiusmodi non est quæstio præsens de existentia accidentium absolutorum. Coper-

nicanum etiam Systema velut the-sim defendi posse inficiamur: illud tantummodo hypothesis gratia te-nere, ac tueri Catholicus potest: ut in 3. parte Physics declarabimus. Quod si Pissini plura effutiebat ab-sona adversus communem Theolo-gorum doctrinam, erroresque per-miscebat Atomistarum opinioni, satius fuisset haec ab illo retracta-ri, nec Ecclesiasticum Tribunal ad ipsius opinionis retractionem illum impulisset.

Ex hucusque dictis liquido ap-paret, existentiam accidentium realium, & absolutorum in sensu Pe-ripatetico rite colligi ex Sacrorum Conciliorum decretis. Inde autem ducitur, quantitatem realiter dis-tingui à substantia. Etenim in Sa-cramento Altaris existunt vera, & realia accidentia, quæ penetrari non possunt. Accidentia porro ex se ipsis non sunt impenetrabilia, cum naturaliter penetrantur invi-cem, & cum substantia. At vero essentia quantitatis consistit in im-penetrabilitate: ut diximus in 2. part. Logicæ, disp. 4. quæst. 4. Ergo in Sacramento Altaris rema-net quantitas sine substantia. At-que adeo quantitas est accidentis realiter distinctum ab ipsa substantia: quemadmodum docet Scotus in 4. distinc. 12. quæst. 2.

Objicies 1. Sancti Patres de speciebus Eucharisticis disserentes, nunquam illas appellavere *Acciden-tia*. Sed Cyrilus Hierosolymita-nus, catechesi quarta mystagogica,

Tom. II.

appellat species, & Gregorius Na-zianzenus ipsas explicat nomen *Ty-pi*, & *Antypi*. Augustinus in lib. 3. de Trinitate, cap. 4. utitur nomi-ne *specierum*, & alibi nomine *for-mæ*, sicut Hildebertus eas dicit *ima-gines*, & Anastasius Monachus An-degavensis in epistola ad Gheral-dum contra Berengarium nomen *figuræ* illis adaptat, & Andreas Cre-tensis homilia in Dominica Palmar. easdem appellat *symbola*. Ambrosius, lib. 6. de Sacramentis, cap. 1. eas vocat *similitudines panis, & vi-ni*, quod ipsum scribit etiam Eli-gius homil. 8. Alii vero eas dicunt *signa, apparentia panis, Effigiem panis, species Eucharistica sub me-taphora Peregrini*: Ita Bernardus in sermone de Discipulis euntibus in Emmaus. Secundo Concilia ut-tuntur solo nomine *specierum*. Por-ro speciei nomen proprio sensu sig-nificat similitudinem apparentem. Ergo ex sacra auctoritate non col-ligitur remanere in Sacramento Altaris accidentia realia, que uti-que sunt similitudines reales. Et sa-ne Concilium Tridentinum ex in-tentione abstinuit à voce *accidentis*: ut recenset Cardinalis Pallavicinus in Historia ejusdem Concilii. Quare ex illius auctoritate nihil proficiunt Peripatetici; & ne quidem ex con-sequenti Philosophica ipsorum do-trina firmatur. Optime enim ex-plicatur ipsa Sacramenti notio, se-clusis omnibus accidentibus reali-bus, sic dicendo. Ante consecra-tionem, panis, & vinum erat: post-

Ee con-

consecrationem vero non panis, & vintum, sed Christus verax, & verus est, eadem præstans, quæ substantia panis, & vini præstabat, cum tamen panis, & vini substantia ibidem non existat. Quæ explicatio ducitur ex sententia S. Bernardi sermone 2. in Cœna Domini, ubi ait, *Deus enim est, & QUAMQUAM PANIS MINISTERIA HABEAT, mutatur tamen in carnem.* Tertio Cyrillus Hyerosolymitanus catechesi quarta mystagogica, Ambrosius in libro de Initianis rudi- bus, cap. 9. Theodoretus dialogo 1. aliique plures affirmant sensum errare circa species Eucharistici Sacramenti. Et S. Thomas in Rythmo inquit: *Visus, tactus, gustus in te fallitur.* Unde Jacobus de Voragine Antiquus Scriptor Ordinis Prædicatorum, sermone 4. de Cœna Domini, ait: *Cum ergo audis, HOC EST CORPUS MEUM, non aquiescas gustui, quia putaret se sentire saporem panis, nec visui, & sic de aliis sensibus, qui ibi deciperentur. Hoc significatum est in Isaac, in quo deceptus fuit visus.* Atqui si in Sacramento Altaris vera extarent accidentia realia, profecto sensus non erraret; neque enim sensus errare potest circa proprium sensibile, quale hic illi obversaretur. Igitur &c.

Respondet ad primum, urgen- ri argumento etiam ipsos Recencio- res. Neque enim ullus Veterum Patrum Eucharisticas species ap- pellavit actiones objectivas, & pu-

ras impressiones, aut species intentionales. Attamen Patres consulto abstinuerunt à nomine accidentis, quia vox accidentis præ se fert connaturaliter actualem inhærentiam subjecto, cum è converso per divinam virtutem Eucharisticae species sine subjecto existant. Sed ex aliis prædicatis, quæ Patres attribuunt Eucharisticis speciebus, fas est colligere eas species esse reales, non vero solum intentionales: quemadmodum jam antea diximus. Concilium autem Constantiense accidentis nomen usurpavit, quando declaravit manere in Sacramento Altaris accidentia sine subjecto. Postremo aliud est esse speciem, si- ve appetentiam, aut imaginem substantiæ panis: aliud est esse speciem, seu imaginem accidentium panis. Primum illud docent Patres, non vero secundum, quod opinio- ni Recentiorum congruit. Hinc Pa- tres Eucharistica accidentia appellarunt species, quoniam de iis tan- tummodo loquuti sunt, quæ exter- nam sensibilem apparentiam panis, & vini constituant. Sed illa externa sensibilis apparentia est realis, & in ipso Sacramento, non au- tem in sensibus nostris, ac mere intentionalis.

Ad 2. Diximus Constantiense Concil. usurpasse etiam nomen accidentis. Concilium vero Tridentinum abstinuit ex industria à voce accidentis, ne Philosophicam Pe- ripateticorum sententiam expresse definiret tanquam fiduci catholicæ dog-

dogma. Quod profecto nos minime contendimus. Attamen doctrina Peripatetica satis congrua apparet decretis ejusdem Concilii ex conversione, quam Concilium statuit, ex permanentia, & sensibilitate, aliisque prædicatis, quæ ab eodem Concilio attribuuntur Eucharisticis speciebus, ut jam pridem diximus. Porro Deus in Sacramento Altaris præstat ministeria panis, ut ait Bernardus, quatenus quemadmodum substantia panis ante consecrationem sustentabat accidentia, ita Deus post consecrationem illa conservat, & voluntate sua sustentat sine subjecto; sed non scribit Bernardus, Deum quoque præstare ministeria accidentium panis.

Ad tertium. In Sacramento Altaris nulla habetur sensuum deceptio. Ita sane docet Ambrosius apud Magistrum Sententiarum in 4. dist. 12. quæst. 1. ff. *Solet etiam &c.* dicens: *Nihil falsi putandum est in Sacrificio veritatis, vel sicuti fit in Magorum prestigiis, ubi delusione quadam falluntur oculi, ut videant esse, quod non est.* Id ipsum affirmat Ecclesia in Oficio Sanctissimi Corporis Christi: ut supra retulimus. Dicimus autem Patres de Sacramento Altaris disserentes non evoluisse subtilèm illam inquisitionem: Utrum sensus erret, vel non erret circa proprium sensibile; sed fidelibus unice proposuisse deceptionem illam, quæ Eucharistiam accipiens involvitur, cum ex ac-

identibus colligit ibidem existere substantiam panis. Et hic quidem error non est sensuum, sed intellectus, cum sensus nec judicii capaces sint, nec substantiam ipsam attingant: caussari tamen à sensibus dicitur, quoniam ex sensuum perceptione colligitur. Itaque in Sacramento Altaris nulla est deceptio. Nam ibi sensus proprium habet objectum, nempe realia panis, ac vini: Intellectus vero à deceptione præservatur per fidem, qua edocetur nullam esse ibi substantiam panis, nec legitimam esse consecrationem ex perceptione accidentium ad substantiæ præsentiam affirmandam, cum Deus in illo Sacramento conservet potentia sua accidentia panis sine subjecto. Quod si quis nihil de Eucharistia audierit, fallitur is simpliciter ex ignorantia mystrii: quod absurdum non est; Id enim contigit etiam Abrahamo, Loth, aliisque pluribus sanctis Viris, qui Angelos sibi aliquando sub humana specie apparentes ve-ros esse homines credebant. Sed nulla profecto falsitas re ipsa ha-betur.

Instabis adversus responsionem ad primum, ex P. Fortunato. Veteres Patres *speciei* vocabulum absolute, & absque addito sumentes, meram rei apparentiam significa-bant. Quo sane modo loquitur S. Augustinus, lib. 11. de Trinitate, c. 2. ubi *imaginem* rei visæ appellat *speciem*. Neque patres dicendi

sunt abstinuisse à voce *accidentis*, quia hæc connaturaliter præ se fert actualē inhærentiam; alioquin enim & à vocabulo *specierum* abstinere debuissent, nam & *species* naturaliter requirit objectum. Ergo *speciei* potius nomen, quam *accidentis* adhibuerunt, quia nihil prorsus reale panis, consecratione peracta, remanere arbitrabantur; adeoque &c.

Respondetur. Nego antecedens. Etenim *speciei* nomen omnino universale est, & æquivocum, atque tum ad *species reales*, cum ad *intentionales* determinari potest; quod ex iis colligendum est, quæ vel *speciei* attribuuntur, vel ex rerum serie, atque contextu significantur. Augustinus relato in loco *speciem intentionalem* intelligit, ut evidens est, quia de simplici rei repræsentatione loquitur. At Veteres Patres, dum de *speciebus* Eucharisticis loquuntur, ea prædicata illis attribuunt, quæ nomen *speciei* determinant ad *species reales*, seu *accidentia*: ut diximus. Hinc S. Thomas accidentium absolutorum pro-pugnator, aliquando tamen *speciei* nomen assumit. Nec quantum attinet ad connotationem subjecti eadem est ratio de voce *accidentis*, ac de voce *speciei*. Nam nomen *accidentis* determinatum est, & voce ipsa adjacentiam alteri præ se fert. Nomen autem *speciei* universale est, ut diximus. Et ii etiam antiqui Philosophi, qui præfracte dixerunt, non posse accidens existere, nisi subje-

cto suo inhæreat; Deum in sensibus nostris posse rei cuiuslibet speciem excitare, ea etiam re absente, satteri coguntur, ubi Dei potentiam considerent, & sensuum nostrorum excitationem, seu motionem ad genus caussæ efficientis pertinere animadvertant.

Objicies 2. Ambrosius in libro de Sacramentis, ut refert S. Thomas 3. parte, q. 75. artic. 2. scribit: *Licet figura panis, & vini videatur, tamen nihil aliud, quam caro Christi, & sanguis, post consecrationem credenda sunt.* Particula porro, nihil aliud, omnem aliam excludit entitatem, etiam accidentalem. Unde Ecclesia in Hymno post Epistolam Missæ Sanctissimi Corporis Christi canit: *Nulla fit rei scissura, signi tantum fit fractura.* Ergo non remanent in Sacramento Altaris accidentia, quæ sint vera res, & scindantur. Immo ipsa quoque accidentia panis in Christi Corpus per consecrationem transmutantur, dicente Ambrosio in libro de initianis rudibus, c. 9. *Sermo Christi mutat species elementorum.*

Respondetur verba illa non reperiri in scriptis S. Ambrosii; sed à S. Thoma fuisse collecta ex doctrina ejusdem S. Doctoris lib. 4. de Sacramentis, cap. 4. ut ex illius mente probet, nihil aliud substantiale remanere in Eucharistia post consecrationem, præter Corpus, & Sanguinem Christi. Laudatus autem Sanctus Thomas in prædicto

Hym-

Hymno, quō Ecclesia utitur, de Corpore loquitur Christi Domini; quod est revera res Sacramenti, & significatur per accidentia panis, & vini, quæ respectu Corporis, & Sanguinis Christi non dicuntur res, sed signa, & sunt *Sacramentum*, non vero *Res Sacramenti*. Eodem sensu intelligenda sunt hæc alia verba ejusdem hymni: *Sub diversis speciebus, signis tantum, & non rebus, latent res eximia.* Quibus profecto verbis S. Thomas hymni Auctor non excludit Peripateticam doctrinam, quam sæpe ex professore tradidit, & in Officio expressit, ut supra diximus.

Objic. 3. Spiritum Sanctum apparet sicut columbam, tamquam columbam, & in specie columbæ, non est aliud quam exhibere sensui nostro ea, quæ præstaret columba: nec præ se fert, Spiritum Sanctum assumpsisse reale corpus simile columbæ. Ergo Christum Dominum contineri sub specie panis, & vini, non est aliud, quam Christi Corpus apparere nobis instar panis & vini, & ea præstare sensibus nostris, quæ panis præstaret. Ita & Sacra Scriptura pluribus in locis docet. Deum, & Angelos apparuisse sub diversis rerum speciebus. Et Christus Dominus in sua transfiguratione sub speciebus diversis apparuit ac esset re ipsa in suo ordine naturali, & Magdalæ visus est sub specie Hortulanæ, ac discipulis euntibus in Emmaus sub specie peregrini. Ita &

Spiritus Sanctus apparuit sub specie ignis. Ecquis autem credat assumpta tunc fuisse sera, & realia accidentia? Hinc S. Athanasius sermone 16. contra diversas hæreses affirmat, prodigiose mentiri eos qui censem Angelos non secundum solam exteriorem apparentiam, sed etiam re ipsa epulatos fuisse. Ergo dicendum est etiam nulla esse vera realia accidentia in Sacramento Altaris.

Respondetur, disparem longe esse rationem de continentia, seu præsentia Corporis Christi sub-speciebus panis, ac de recensitis aliis apparitionibus. Neque enim speciebus Hortulanæ, Peregrini, aut Ignis, & similibus attribuuntur ea prædicata, quæ Patres, & præsertim Tridentina Synodus concedit Eucharisticis speciebus. Proinde nomen speciei æquivocum est, ac de se indifferens, ut ad species reales determinetur, vel solum ad species intentionales. Sumit adeo suam determinationem à ceteris prædicatis, quæ illi adscribuntur. Hinc Christus Dominus veritatē sui corporis ostendit exactū, & Theologi probant adversus Priscillianistas Corpus humānum Christi verum fuisse, ac reale, non autem phantasticum; id est, reales habuisse species, non vero solum intentionales. Quamquam Augustinus in libro 15. de Civitate Dei, c. 23. affirmat Angelos, qui Veteribus apparuerunt, assumpsisse vera corpora, &

in libro de Agone Christiano, c. 22. disserens de apparitionibus Spiritus Sancti inquit: *Neque hoc ita dicimus, ut Dominum Jesum Christum dicamus solum verum corpus habuisse, Spiritum Sanctum autem fallaciter apparet oculis hominum; sed ambo illa corpora vera corpora credimus: sicut enim non oportebat, ut homines falleret Filius Dei, sic non decebat, ut homines falleret Spiritus Sanctus.* Quod idipsum affirmat B. Algerus, lib. 1. c. 7. in Biblioteca Patrum. Athanasius autem de iis loquitur, qui affirmabant Angelos nutriri cibo corporeo: quod verissime absurdum est.

Instabis primo. Atqui nomen speciei, quo utitur Concilium Tridentinum, dum loquitur de Sacramento Altaris, determinari non debet ad species reales. Ergo nulla responsio. Probatur minor subsumpta. Concilium Tridentinum affirmat quidem manere species. Sed affirmatio specierum non est affirmatio accidentium. Ergo &c. Minor probatur. Negatio specierum non est negatio accidentium realium, & absolorum. Ergo affirmatio specierum non est affirmatio accidentium realium, & absolorum. Antedens appetet ex quo Christus Dominus existit in Sacramento cum propriis perfectiōibus, & accidentibus, non tamen ibidem extat sub propria specie; unde negatio propriæ speciei non est negatio accidentium

realium, quæ propria sunt Corporis Christi Domini.

Respondeatur ex dictis, nomen speciei æquivocum esse, ut proinde aliquando determinetur ad species reales, aliquando non. Itaque attributa speciebus Eucharisticis à Concilio Tridentino concessa indicant eas species esse reales. Cum autem dicitur Christi Corpus esse in Sacramento Altaris non sub propria specie, indicant Patres Corpus Christi ibidem esse integrum, ac perfectum, proindeque cum suis accidentibus absolutis; quare excluditur solum externa species, seu apparentia, quatenus cum Christi Corpus non gaudeat locali extensione, non appetat nobis uti est in se se.

Instabis secundo. Atqui Concilii Tridentini doctrina ostendit species Eucharisticas non esse reales. Ergo nulla responsio. Probatur minor subsumpta. Concilium Tridentinum docet fieri transubstantiationem. Atqui transubstantiatio non subsistit, nisi destruantur etiam realia panis accidentia. Ergo &c. Minor probatur. Si fieri debet illa conversio, quam docet Concilium Tridentinum; debet perire substantia panis, & vini, pereunte etiam sapore, odore, colore, gravitate, cæterisque affectionibus panis. Ergo &c. Probatur Antecedens. Si debet fieri illa conversio, debet converti substantia, quæ designari solet nomine substantiæ panis, & vini. Porro hæc substantia,

tia , ut talis, præ se fert in suo conceptu talem saporem , odorem, colorem &c. ut manifeste appareat; alioquin nomine substantiæ panis designaretur substantia universim accepta , quæ univoca esse intelligitur cum substantia lapidis. Igitur &c.

Respondetur. Nego minorem subsumptam. Ad probationem nego minorem. Ad hujus probationem nego antecedens. Ad aliam probationem nego iterum antecedens , & quod in isto antecedenti latet. Siquidem argumentum supponit substantialem specificam formam consistere in congerie accidentium. Hoc autem falsum apparet ex dictis in prima disputatione: immo ex hac ipsa, quam modo evolvimus , quæstione falsum rursus evincitur , cum remaneat in Sacramento collectio accidentium panis, & non remaneat forma substantialis ipsius panis , hoc est , substantiam illam particularem , quæ tamē exigit accidentium collectiōnem. Ex hoc ipso autem inepte colligitur collectionem ipsam reālūm accidentium converti.

Objicies 4. Gelasius perantiquus Scriptor , Joanni Romano Pontifici epistola ad Senatores laudatus, vocat species, quæ remanent in Sacramento Altaris, nomine substantiæ. Id ipsum videntur etiam doceare alii Patres. Ergo affirmare quis rite posset remanere substantialem panis superficiem : ut exponit Car-
esius. Ipsi quoque Peripatetici af-

firmant , quantitatem ibi existere separatam à substantia. Porro quantitas non alia ratione concipi potest, nisi tamquam vera substantia, ut pote quæ extensa sit in longum, latum , & profundum. Igitur &c.

Respondetur , similia argumen-ta ex Veterum sententiis petita ex-pendi à Theologis , ubi Transubstantiationem tutantur adversus Heterodoxos. Quamquam ergo di-cere possimus , remanere substan-tiam quantum ad externam spe-ciem , seu apparentiam : quo sen-su plerique Veteres loquuntur; ta-men re ipsa nihil permanere substan-tiæ panis certissimum est ex fi-dei decretis , quæ à Philosophis. supponuntur , & non probantur, cum id proprium sit munus Theo-logorum. Non ergo fas est Cath o-lico Philosopho affirmare , substan-tialem panis superficiem permane-re in Sacramento Altaris.

Quod vero ajunt Cartesiani, quantitatem ut à substantia sepa-ratam involvere semper concep-tum substantiæ, ipsorum unice com-mentum est , qui extensionem cum corporis substantialis essentia inepte confundunt: de quo jam disserimus in præcedenti disputatione , quæst.
1. Itaque quantitas in Sacramento Altaris sic permanet, ut actualem non habeat inhærentiam subjecto suo ; non tamen est substantia, nec per modum substantiæ concipitur; sed præcise intelligitur ut extensio impenetrabilis.

Objicies 5. Sacramento Altaris de-

debetur cultus latræ: ut docent Sancti Patres, & Tridentinum Concilium confirmat. Ergo si accidentia realia ibidem existerent, eadem accidentia adorarentur. Sed hoc omnino absurdum est. Igitur &c. Secundo pronomen *Hoc*, in forma consecrationis denotat unum concretum. Duo autem ibidem concreta existerent, nempe Corpus Christi, & Accidentia. Tertio remanentibus accidentibus non subsistit veritas formæ consecrationis, qua dicitur *Hoc est Corpus meum*. Quippe particula *Hoc*, appellat substantiam, & accidentia. At vero sola substantia convertereatur. Ergo &c. Quarto etsi per species Eucharisticas homo nutriatur, ex permanentia nutritionis non sequitur permanere substantiam panis. Ergo licet remaneat impenetratio, non rite subinfertur permanere quantitatem in Sacramento.

Respondetur ad primum, ejusmodi ridendam argumentationem olim à Wicleffo exaggeratam fuisse. Itaque idem omnino est Christus Dominus sub speciebus Eucharisticis, ac in propria specie naturali. Quemadmodum igitur sub ista naturali specie debetur ei cultus latræ, ut dicitur in capite octavo Matthæi, vers. 2. *Ecce leprosus veniens adorabat eum*; ita etiam idem cultus debetur Christo sub Eucharisticis speciebus existenti, quoniam istæ species uti identitatem non tollunt, sic nec excelleniam. Adoratio autem per se pri-

mo respicit Christum Dominum, species vero solum relative ad ipsum Christum.

Ad secundum. Adhuc unum est concretum in Sacramento Altaris, nempe Corpus Christi, ut materia Sacramenti; accidentia vero tanquam forma Sacramenti; per illam enim Sacramentum est signum sensibile.

Ad tertium, Pronomen *Hoc*, pendet à modo significandi, hoc est, à fine enuntiationis. Unde formula consecrationis hunc reddit sensum: *Hoc, quod est substantia panis, modo fit seu est Corpus meum; vel, Hoc, quod est sub hisce accidentibus panis, est Corpus meum*. Quare forma illa semper appellat substantiam ipsam.

Ad quartum. Sumptis Eucharisticis speciebus, dum istæ corrumpuntur, nova substituitur à Deo substantia, per quam habeatur nutritio, ut fides subsistat, quæ experimentis non probatur. Et ideo nutritio non est effectus specierum Sacramenti Eucharistiae, nec in ipso permanet Sacramento, in quo nihil substantiæ panis existit, ut fides docet. At vero impenetratio in ipsis Sacramenti speciebus manet; atque adeo rite colligimus permanere in Sacramento quantitatem; quæ est accidens absolutum, vi cuius habetur ipsa impenetratio.

Objicies 6. Præsertim ex P. Fortunato Conversio ex sui notione non præ se fert necessario, ut aliquid

quid maneat ex iis, quæ prius erant in re illa, quam dicimus converti. Ergo ex hoc capite non probatur existentia accidentium absolutorum. Antecedens probatur. Primo quidem, quia nulla ratio ostendit talem esse conversionis notionem, nihilque evincit, conversionem non haberi etiam hoc solo, quod Deus ad unius substantiæ destructionem alias substantias producat. Secundo, quia dum virga Mosis in serpentinum (Exodi c. 7.) ; uxor Loth in statuam Salis (Genes. c. 19.) ; & aqua in vinum in cæna Canæ Galileæ mutata est (Joannis c. 2.) ; non aliud tunc fecit Deus, nisi ad unius destructionem aliud producere; neque enim certum est, eamdem semper mansisse materiam. Tertio, quia licet conversio naturalis eam conditionem expostulat, non tamen id ipsum affirmare debemus de conversione Eucharistia, quæ supernaturalis est, & à Concilio Tridentino dicitur mirabilis prorsus, ac singularis. Demum de fide non est, aut eam conditionem necessario requiri ad conversionem, aut Concilium Tridentinum ita conversionis notionem accepisse. Alioquin debuisset etiam à voce conversionis abstinere, sicut ex industria nomen accidentis prætermisit. Igitur &c.

Confirmatur ex eodem. Scholæ Magistri, Doctores Angelicus, Seraphicus, & Subtilis eam conversionis notionem non approbarunt. Etenim Sanctus Thomas,

Tom. II.

parte 3. quæst. 75 articul. 5. hac una ratione probat manere accidentia in Eucharistia, quia sensui apparet, ea manere. Si autem putasset ad conversionem requiri, ut quidpiam permaneat, probasset ex ipsa conversionis notione permanentiam accidentium. Sanctus Bonaventura, in 4. distinction. 11. artic. 1. quæstion. 2. aperte docet, transubstantiationem Eucharisticam assimilari creationi, quia in illa nihil communne manet: tum negat illam esse mutationem, quia termini nihil habent commune. Scotus denique in 4. distinct. 11. quæstion. 1. ait. Dico ergo, quod proprie loquendo, transubstantiatio non est mutation, nec circa hoc oportet laborare ad inquirendum genus transubstantiationis. Si autem omnino velis extendere mutationem, ut dicatur de transubstantiatione, potest dici, quod sicut secundum Philosophum (5. Physic.) triplex est mutatio, scilicet à non subjecto in subjectum, à subjecto in subjectum, & à subjecto in non subjectum, & accipitur ibi subjectum pro ente positivo, & non subjectum pro privatione ejus, sic potest versio extendendo ad mutationem supernaturalem distinguai, ut illa quæ est à subjecto in non subjectum, dicatur annihilation; quæ autem à non subjecto in subjectum, creati; quo vero à subjecto in subjectum, transubstantiatio. Sed per hoc quasi

nihil habetur de genere remoto transmutationis , quod scilicet est genus versionis , nisi quod utrumque formaliter est inferius ad relationem quamdam ordinis sive successionis . Igitur &c.

Respondetur . Nego antecedens . Ad probationem quoad primum , nego antecedens , & rationem rursus expono . Si conversio non praesse fert necessario , ut aliquid maneat ex iis , quæ prius erant in re illa , quam dicimus converti consequens foret sola loci identitate , & Dei beneplacito notionem conversionis constitui . Hoc absurdum est . Ergo &c. Minor probatur . Potest Deus substantiam spiritualem , v. g. Angelum , destruere , & in ejus loco substantiam materialem , v. g. Asinum , creare . Atquitunc haberetur identitas loci , & successio unius substantiae post aliam ; neque tamen rite dici potest Angelum converti in Asinum . Igitur &c. Major evidens est ex Dei potestate . Minor quoad secundam partem probatur . Quamquam enim Pater Fortunatus dicat , nec falsum , nec absurdum esse affirmare , Angelum tunc converti in Asinum , revera tamen id falsum est , absurdum , & probo etiam in sententia Recentiorum . Localis praesentia omnino extrinseca est substantiis , spirituali , materiali , nec illis necessaria . Nam si locus sit extima superficies , ea utique carere possunt in vacuo : si vero locus dicatur esse spatium , id mera negatio est , & re ipsa

nihil . Decretum porro Dei erit quidem caussa effectrix conversionis , ubi notio ejusdem subsistat ; sed conversionem denominare non potest , nisi re ipsa eadem habeatur : veluti cum dicimus ex omnium sententia , conversionem fieri debere inter res positivas , unde decreto etiam Dei non potest appellari converso transitus rei cuiuspiam de non esse ad esse , vel è contra . Hinc vel ipsi Recentiores fatentur , sola loci identitate , ac decreto Dei conversionem non haberi ; notionem enim conversionis describunt permanentia earumdem operationum . Quo fit , ut cum Asinus etsi ad Angeli destructionem à Deo in eodem loco crea- retur , præstare non valeat Angelii operationes , iccirco rite dici non possit , Angelum in Asinum tunc fore conversum , nec quidem in Recentiorum sententia . Igitur &c.

Ad secundum . In exemplis allatis virgæ Mosis , uxoris Loth , & aquæ , materiam eamdem mansisse dicimus ; atque si contendas , nihil omnino permansisse , nec substantiale , nec accidentale veram , proprieque dictam conversionem de medio tolles .

Ad tertium . Negamus conditionem illam convenire conversioni , quatenus naturalis est . Dicimus eam esse propriam conversioni secundum suam essentialiem notionem consideratae . Accidit enim conversione , ut virtute fiat

naturali , vel supernaturali , & hoc ad modum ipsius conversio-
nis attinet.

Ad quartum. Ultero fatemur nostram de conversione sententiam non esse fidei dogma ; sed eamdem magis consonam esse Ecclesiasticis decretis , & Tridentino Concilio tuemur. Distinguere autem oportet extantiam conversionis , & ejusdem conversionis declaratio-
nem. Illa ad fidem pertinet , no-
menque ipsum expresse adhibere debuerunt Tridentini Patres ut errorem excluderent Hæreticorum transubstantiationem negantium:
ex quo apparet discriminem circa vocem *accidentis*. At quæ ad ex-
plicandam veræ conversionis no-
tionem necessaria dicuntur , ea dis-
putationem habent.

Ad confirmationem. Luce me-
ridina clarius est , laudatos Schol-
æ Coriphæos Peripateticam hac
super re uno voto tenuisse doctri-
nam ; talemque conversionem in
Eucharistia docuisse , ut reali ab
soluta accidentia permanere arbit-
rarentur. Quamquam ea , quæ de
notione essentiali conversionis di-
ximus , distinctis postea à Schola-
sticis Theologis declarata fuerint.
Et quod attinet ad Sanct. Thomam , primo quidem genus illud
negativi argumenti nihil concludit ; ut ex iis liquet , quæ in se-
cunda parte Logicæ , sectione ter-
tia , capite septimo docuimus; deinde ibi Sanctus Doctor non agit de
conversione , sed unice rationem

illam assumit , quæ primo obtutu
suadet permanere accidentia. S. Bo-
naventura , citato in loco , disputat contra asserentes , quod non to-
tus panis convertitur secundum sub-
stantiam , sed aliqua pars essen-
tialis remanet. Hoc ergo sensu ait,
nihil commune manere. Nam quod
attinet ad accidentia , prius dixerat:
Constat , quod accidentia remanent
secundum se , & operationem. Sco-
tus denique verbis laudatis substanciam considerat : nec de accidenti-
bus agit , quæ realia esse , & abso-
luta , atque in Eucharistica conver-
sione permanere , sæpe sæpius affir-
mavit. Quia vero , ex ipsius senten-
cia , non sola substantia , sed quæcumque etiam accidentaria qualitas
creari potest , & anihilari ; ic-
circo *subjecti* nomine *ens positivum*
accipit.

Objicies 7. ex eodem. Triden-
tin. Concilium species panis , & vi-
ni sub quibus Christus Dominus in Eucharistia contineri dicitur , non
appellat *species sensibiles* , sed *spe-
cies rerum sensibilium*. Nullibi ei-
tiam tradit , manere *species sine sub-
jecto*. Ait quoque plurali numero
species manere ; neque tamen Con-
cilio adversantur Peripatetici illi,
qui arbitrantur , unum tantummo-
do extare accidens absolutum , nem-
pe quantitatem : ergo incerta res
est , dum Concilii Tridentini mens
trahitur ad accidentia absoluta.

Respondetur , *species rerum sensibili-
um* dubio procul debere esse *species
sensibiles*; non enim possunt esse in-

sensibiles; quamobrem idem omnino significant: quod patet etiam ex dictis. Dum autem Concil. Trid. ait *manere species, specierum nomine accidentia intelligit, quæ à Conc.* Constantiensi *manere dicuntur sine subiecto*; Ecclesia enim sibi consona perpetuo est in fidei decretis: ergo *species illæ ex mente Concilii Tridentini sine subiecto manent.* Quod vero *species plurali numero dicantur, lis in voce est: duæ autem quantitates, omnium Peripateticorum sententia, in Sacramento Altaris permanent, & accidentia tunc existunt sine subiecto, hoc est, sine substantia, quæ est subjectum ultimum, in quo accidentia omnia recipiuntur, & cui inhærent natura-liter.*

Objicies 8. Cum Christi Corpus quantitatem habeat, colorem, saporem, odorem, gravitatem, & figuram; hæc omnia poterit Christus ita coarctare, & imminuere, ac aliquando etiam ampliare, ut nobis videatur quantitas, aut figura panis, vel color illius, aut sapor, vel gravitas, aut odor. Itaque optime explicari possunt ea, quæ ab Ecclesia definita fuere circa Venerabile Eucharistiæ Sacramentum, per hoc quod seclusis omnibus absolutis accidentibus panis, species accidentium Christi ab ipso Christi Corpore, ac Sanguine emissæ ita modificantur, ut non ipsa Christi nativa accidentia, à quibus profluunt, sed panis, & vini accidentia, licet destructa, repræsen-

tent. Ergo non oportet adstruere absoluta, & realia accidentia panis in Sacramento Altaris. Assumptum suadetur. Nam illa explicatio legitimum aperit sensum loquutionis Patrum sæpe dicentium, in Sacramento Altaris Christum Dominum tangi, frangi & comedи. Ita sane loquitur Joannes Chrisostomus, hom. 83. in Matthæum, & homil. 24. in epist. 1. ad Corinthios, Cyriillus Hierosolymit. cathechesi 4. & expressius Concil. Roman. Sub Nicolao III. ut habetur in cap. Ego Berengarius, de Consecratione, dist. 2. ubi Concilium Berengario proponit verba hæc ad fidem profitendam: Ego Berengarius . . . ore, & corde profiteor . . . panem, & vinum, quæ in Altari ponuntur, post consecrationem non solum sacramentum, sed etiam verum Corpus, & Sanguinem D.N.J.C.esse: & sensu-aliter, non solum sacramento, sed in veritate, manibus Sacerdotum tractari, frangi, & fidelium dentibus atteri. Quæ profecto verba proprio sunt, ac rigoroso sensu accipienda. Tunc explicatio illa pietatem fovet, cum tradit Christum Dominum per se se, ac immediate tangi, non vero mediis accidentibus. Consona est etiam doctrina illa, ut intelligatur verissime dici, hoc quod proponitur, esse Corpus Christi. Contra vero Peripateticorum doctrina formulam illam consecrationis ad tropos, & figuratas loquutiones trahit. Igitur &c.

Respondeatur, sensum illarum

loquutionum, quibus dicitur Christum tangi, frangi, & comedи, non aliud præ se ferre, nisi quod substantia panis & vini re ipsa non lateat sub illis accidentibus sibi connaturalibus, sed sub eis existat Christus, prorsus exclusa panis, & vini substantia. Cum autem Berengarius ad tropos, & figuratas loquutiones detorqueret Ecclesiæ doctrinam, qua dicitur Corpus Christi esse in Sacramento Eucharistiae, ictu merito coactus fuit profiteri veritatem catholicam verbis adeo emphaticis; ut nullus subesse posset locus tropo, aut figuræ. Per ea autem verba Patres unice intendunt adstruere veram, & realem præsentiam Corporis Christi in Sacramento Altaris; sed non docent Christi Corpus in se se vera scindi, unde Ecclesia in Hymno cani: *A sumente non concissus, non confractus, non divisus, integer accipitur.*

Sed & nulla ratio, nulla auctoritas ostendit, ipsum Christi Corpus immediate à fidelibus tangi; immo Ecclesia docet oppositum; cum dicit, Christum latere sub speciebus panis. Quæ vero sit significatio formæ consecrationis, patet ex dictis in solutione ad quintam objectionem.

Objicies 9. Accidens nullatenus potest separari à suo subjecto. Ergo falsa est Peripateticorum doctrina, nec subinde permanent in Sacramento Altaris accidentia realia, & absoluta sine subjecto. An-

tecedens probatur. Sanctus Augustinus libro secundo Soliloquiorum, cap. 13. inquit: *Monstruosum enim, & à veritate alienissimum est, ut id, quod non esset: nisi in ipso esset, etiam cum ipsum non fuerit, possit esse.* Quod etiam repetit Sanctus Doctor cap. 19. Id ipsum sensisse videtur Aristoteles libro primo Physicorum, tom. 3. Igitur &c.

Confirmatur. Etsi fides subjiciat sibi rationem, non est tamen contra rationem; hinc mysteria nostra fidei non possunt demonstrari impossibilia. Atqui ratio nostra ortum habet à sensu. Ergo fides non potest esse contra sensum. Porro fides repugnaret testimonio sensuum, si doceret, accidens esse sine subjecto in Sacramento Altaris cum sensus oppositum judicet. Igitur &c.

Respondetur. Nego antecedens. Augustinus autem laudato in loco non loquitur de accidente materiali, sed de scientia, & veritate, easque considerat secundum id, quod naturaliter evenit, & ex illarum immortalitate probat rationalem animam esse immortalem. *Quod si qualibet disciplina (ait Sanctus Doctor cap. 19.) ita est in animo, ut in subjecto inseparabiliter, nec interire veritas potest; quid, queso, de animi perpetua vita, nescio qua mortis familiaritate dubitamus?* Ita & Aristoteles docet, accidens non posse naturaliter separari ab actua-

li inhærentia; nec de eo disserit, quod divina valet potestas. Quod si aliter hac in parte sensit, non juravimus profecto in verba Aristotelis.

Ad confirmationem. Nego suppositum, nempe quod judicium de rerum substantia pertineat ad sensum, cum hujus objectum sint sola accidentia. Ita nec ratio sensibus inititur: ut probavimus in 1. Logices parte, disp. 1. Sensus ergo nostri percipiunt accidentia, quæ realia esse & in Sacramento Altaris extare Peripatetici docent; unde nihil pugnat testimonium sensus, nec sensuum deceptio habetur. Quæ omnia non subsistunt in Recentiorum placitis.

Objicies 10. ex P. Fortunato. Doctrina Peripateticorum ansam potius præbet heterodoxis cavilandi dogma transubstantiationis. Ergo &c. Antecedens probatur. Peripatetici dicunt, post consecrationem manere quantitatatem panis, quæ statuitur *entitas*, natura sua *extensa*, & *impenetrabilis*, atque in hac entitate asserunt manere *qualitates sensibiles* panis. Sed heterodoxi non aliud intelligunt nomine *substantia corporeæ*, nisi *entitatem ipsa sua natura extensam & impenetrabilem*, & panem vocant hanc ipsam *entitatem* cum *qualitatibus sensibilibus* panis. Igitur &c. II. Accidentia absoluta non sunt necessaria in Sacramento Eucharistiæ. Quipe Christus Dominus opus non habet aliquo *accidente absoluto*, ut *vere realiter*, & *substantialiter* sit ibi *præsens*.

III. Communis Theologorum sententia est, Corpus Christi Domini non esse in Sacramento Altaris *definitive*, sed *sacramento alter*; esse enim in loco *definitive* est taliter ibi esse, ut quod in eo est, simul non sit alibi. IV. Species non sunt accidentia. Etenim species rei distinguitur à re. Porro sola accidentia sunt res sensibles, nam substantia ex se se non est sensibilis. Ergo species distinguuntur ab accidentibus. Ita etiam quod est *quo* in aliquo genere non potest esse *quod* in eodem genere. Atqui accidentia sunt res sensibilis; id enim substantiæ ex se se non convenit. Ergo accidentia non sunt species, qua res sensibilis fiat.

V. Recentiores rite dicere possunt, Corpus Christi Domini sub titillationibus, & motionibus nostrorum sensuum in Eucharistia contineri. Ecclesia quippe nullibi contrarium definivit, & Sanctus Thomas p. 3. quæst. 76. art 8. docuit Christum apparuisse in hoc Sacramento sub speciebus carnis, sanguinis, & pueri, quatenus intuentum oculi immutabantur tali immutatione, ac si expresse viderent exterius carnem, vel sanguinem, vel puerum: quod est, ut patet, sub titillationibus, motionibusque nostrorum sensuum contineri. Igitur &c.

Respondeatur ad 1. Negamus antecedens. Ad probationem, dicimus ineptiam argumenti evidenter patere, si Peripateticorum doctrina spectetur, ut par est. Ii enim entitates distinguunt substantialia, &

accidentales. Quamobrem ex ipsorum sententia entitas illa , quæ permanet extensa , & impenetrabilis, non est entitas substantialis; proindeque hæterodoxi ineptissime argumentarentur existentiam substantiæ ex doctrina Scholasticorum.

Ad 2. Impræsentiarum nos minime disputamus de eo quod possibile Deo fuit ; an videlicet potuerit tradere nobis Corpus , & Sanguinem suum sub meritis intentionibus speciebus. Nos disserimus de eo , quod re ipse Deus præstítit , cuius voluntas , Ecclesia nos docente , innotescit. Re ipsa igitur accidentia absoluta esse necessaria contendimus , iisque solis ea prædicata attribui posse , quæ Sacrae Ecclesiæ Concilia adscribunt speciebus Eucharisticis.

Ad 3. Nego antecedens. Quid enim nostra sententia , sit esse in loco definitive satis superque declaravimus. Neque Theologi nobis hac in re adversantur ; quamquam aliqui diversa notione adverbium illud definitive accipiant , quatenus idem est ac definitive , & à loco determinari significat. Unde Tournely , de Eucharistia , qu. 2. art 5. ait *Corpus dicitur esse in loco sacramentaliter , & definitive , quod totum est in toto loco , & totum in qualibet illius parte.... quomodo Christi Corpus est in Eucharistia , totum in tota hostia , & totum in qualibet ejus parte.* Quæ nostra etiam sententia est.

Nos minime latet , P. Fortuna-

tum , aliosque Recentiores passim affirmare , in Sacramento Eucharistiae sub singulis hostiæ partibus totum quidem Christum contineri , sed separatione facta : ut Tridentinum definit can. 3. At inde tantummodo consequens est , Tridentinos Patres , id urgente Joanne Æmiliano , Hispano , Episcopo Tudensi , noluisse expresse definire , velut dogma fidei , etiam ante separationem factam sub singulis hostiæ partibus totum Christum contineri. Neque tamen iidem Patres reprobarunt , quod absolute dixerunt , in c. 3. ut in probatione retulimus. Porro hinc liquidopatet , nostram sententiam de modo , quo Christus in Sacramento Altaris est localiter præsens , longe conformiorem esse Tridentinis Patribus : quam quidem sententiam S. Thomas , par. 3. qu. 76. art. 3. diserte tradit , dicens : *Et ideo manifestum est , quod totus Christus est sub qualibet parte species panis , etiam hostia integræ manente , & non solum cum frangitur.*

Ad 4. Accidentia dicuntur species substancialiæ , quatenus ex illis naturaliter cognoscimus substancialiæ existere , quæ pro statu isto non est nobis sensibilis : ut sæpe alias diximus. Ipsa autem accidentia sensibilia sunt , quia per se se percipi queunt. Porro accidentia percipiuntur per sui speciem , quam sensibus nostris imprimunt , quæ est ipsorum effectus. Igitur accidentia quidem non repræsentant

nobis, speculi instar, substantiam istam, aliquo tamen modo eadem nobis significant. Quamobrem si nomen specie secundum varias considerationes accipiatur, facile dissolvitur argumentum.

Ad 5. Si modus ille locutionis admitti potest, dicendum etiam esset, Corpus Christi contineri in oculis intuentium. Etenim, ut placet P. Fortunato, Corpus Christi continetur in Eucharistia sub titillationibus, motionibusque nostrorum sensuum. Porro quod attinet ad sensum visus, titillationes, motionesque sunt in oculis intuentium. Ergo Corpus Christi continetur in oculis intuentium. Ecquis vero non videt absurdum hunc locutionis modum, atque Sacris Definitionibus interpretandas ineptissimum? Neque S. Thomas somniavit unquam Christi Corpus contineri sub titillationibus &c. & quod P. Fortunatus patere scribit, id nos aperte inficiamus. Quando enim S. Thomas docuit, Corpus Christi contineri sub speciebus Eucharisticis, dubio procul accidentia realia, & absoluta nomine specierum intellexit.

Colligit 1. Thomistas affirmare veram conversionem in viventium morte etsi dicant non permanere eadem numero accidentia (ut in 3. parte, disp. 1. quæst. 5. declaravimus); quippe eamdem numero materiam permanere, & ipsi admitunt. Quamobrem subsistit notio conversionis. Adnotare

etiam oportet, in Peripateticorum doctrina nullam haberi principii petitionem. Etenim accidentia realia in pane præextitis convincimus, quoniam Sacra Ecclesiæ Autoritas tradit, ut contendimus, accidentia illa remanere; ex quo colligimus eadem præextisse, cum permanentia locum non habeat nisi in iis, quæ præcesserunt.

Colligit 2. Transubstantiationem non fieri in Sacramento Altaris per actionem productivam Corporis Christi sub speciebus consecratis. Cum enim Corpus Christi vere, & physice existat, produci non potest: quemadmodum id, quod non extat, destrui non potest. Neque ea transubstantatio fit per productionem unionis substantialis Corporis Christi cum speciebus Eucharisticis. Nam vero ejusmodi unio omnino gratuita, & comunitia est, & Concilia non nisi realem præsentiam adstruunt. Quare accidentia panis, & vini dicuntur unita Corpori Christi moraliter solum, & metaphorice quatenus Corpus Christi ex decreto Dei est, & continetur sub speciebus consecratis; uade etiam ex consequenti verificatur de Corpore Christi, quod moveatur, transferatur, manducetur: non tamen in manducatione accepta juxta proprium loquendi morem, quo sensu præ se fert divisionem rei per dentes. Illa porro accidentia ibi sunt sine subiecto, & à Deo sustentantur in

Corpo Christi Domini sub speciebus, ut defendunt Theologi Scotistæ. Cum autem substantia panis convertatur, siccirco falsum est, quod ajebat Joannes Hus: *Ut homo in tunica, & anima in corpore, sic Deus in pane.* Quod merito damnatum fuit à Concilio Constantiensi, sessione 15. quoniam panis non remanet.

Hæc de accidentibus disputavimus, quatenus ex Sacra Auctoritate eorumdem existentia probari potest. Quod attinet vero ad rationem naturalem, de Qualitatibus singillatim suis in locis agemus. Nunc vero generatim tuemur, naturalem rationem non evertere sentiam Peripateticam de existentia accidentium realium, & absolorum. Id porro apperier enodatio argumentorum, quæ à Recentioribus ex naturali ratione proponuntur.

Objicies itaque 1. cum Recentioribus. Accidens absolutum dicitur à Peripateticis esse entitas accidentalis. Atqui entitas ejusmodi nec est corpus, nec spiritus. Non spiritus, ut certum est, quoniam entitas illa est materialis. Non corpus, alioquin entitas illa esset materia, adeoque substantia. Porro omne ens vel est corpus, vel spiritus. Ergo accidens absolutum omnino repugnat.

Respondeatur, hujusmodi argumentum enodatum à nobis fuisse in prima disputatione, quæst. 1. cum illud proposuimus contra formam

Tom. II.

substantialem absolutam, objectio ne 5. Itaque entitas illa accidentalis est corpus, prout corpus universim accipitur, & à spiritu discernitur per partium pluralitatem. Non tamen est corpus completum, sive substantiale, nec est materia prima, quoniam hæc ultra notio nem corporeitatis præ se fert etiam potentialitatem, & rationem substantiæ. Quamobrem cum Ens dividitur in corporeum, & in spirituale; notio corporei unice præ re fert pluralitatem partium integrantium.

Instabis ex P. Fortunato. Hæc responsio neque cum Philosophia, neque cum sancta Religione componi potest. Ergo falsa est, & absurdâ. Antecedens probatur quoad primam partem. Ex Arbore Porphyriana, quam in Logica approbavimus, omne corpus est substantia: ergo non potes accidens absolutum esse corpus, quin etiam sit substantia: sicuti nihil potest esse animal, quin sit vivens. At hoc falsum est, & Philosophiæ omnino repugnans. Deinde cum ens dividitur in corporeum, & spirituale, vel sumitur ens corporeum pro corpore, vel generatim pro omni eo, quod aut corpus est, aut corpus afficit? Si primum: ergo modalles corporis affectiones non sunt ens, quia non sunt corpus, adeoque non deberent inter prædicta menta numerari. Si alterum: ergo essentia corporis statui non potest in extensione, quæ pluralitatem

Gg par-

partium dicit, nata hæc non soli corpori convenit, sed hujus etiam modalibus affectionibus, quæ non sunt corpus. Igitur &c. Probatur antecedens quoad secundam partem. Manent post consecrationem accidentia panis absoluta: ergo si illa sunt corpus, maneret corpus panis; adeoque tollitur transubstantatio. Si autem dicas, duplex haberis corpus, alterum *substantia*, alterum *accidentium*, hæc corporis dualitas ficta videtur ad dogma transubstantiationis tutandum; adeoque ansa datur Sectariis irridendi catholicum illud dogma. Igitur &c.

Respondetur. Nego utramque partem antecedentis. Ad probationem primæ, distingo majorem: omne corpus substantiale, sive *per se* existens, est substantia, concedo: omne corpus, sive omne ens materiale universim acceptum, est substantia, nego majorem &c. Ex dictis in Logica manifeste patet, in arbore Porphyriana non constituit ens materiale, seu corpus omnino universim consideratum; in illa enim sola traditur divisio substantiarum finitæ. Ens autem materiale omnino universale est, & à Peripateticis distribuitur in substantiale, & accidentale, sive in substantiam, & accidens. Quamobrem rite subsistit, accidens absolutum, & materiale constare partibus, adeoque esse *corpus* ea generali notione, quin sit substantia. Quod attinet ad affectiones modales materia-

les patet responsio ex iis, quæ de Relationibus diximus.

Ad probationem secundæ partis, nego consequentiam ex dictis. Corpus panis est ipsa substantia panis. Accidentia absoluta sunt entitates realiter distinctæ ab omni substantia, adeoque &c. Plura autem in quolibet materiali composito extare entia, materialia, quæ corpus sunt generali notione superius expressa, omnium Scholastico-sententia tradit, materiam nempe primam, formam substantialem, & formas accidentales materiales. Videlicet in Logica, Subtilem Doctrinem materiæ tribuere pluralitatem partium. Idem asserit in 4. distinct. 54. quæst. 1. de Forma substantiali materiali. Idem dist. 12. quæst. 2. statuit de qualitate corporea. Non igitur nova est illa corporum dualitas, aut efficta pro dogmate transubstantiationis tuendo.

Objicies 2. Accidens peripateticum est quidquam realiter distinctum à substantia, & cum propria gaudeat essentia, habebit etiam propriam existentiam, quæ est realiter indistincta ab essentia: ut diximus in prima Metaphysics parte, disputatione tertia, quæstione tertia. Porro quidquid habet propriam essentiam, & existentiam ab alio distinctam, etiamsi in alio existat, est revera substantia. Ergo accidens illud absolutum repugnat. Minor probatur. Forma substantialis juxta Peripateticorum doctrinam est substantia, & tamen existit in ma-

materia. Igitur &c.

Respondetur. Nego minorem. Ad probationem, nego paritatem. Quippe forma substantialis est in materia *per informationem*, forma vero accidentalis est in materia *per inhesionem*: ut diximus in laudata prima disp, quæst. i. quando Peripateticum Systema declaravimus.

Instabis. Nullum extat revera discrimen inter *esse in subjecto per informationem*, & *esse in subjecto per inhesionem*. Ergo nulla responsio. Minor subsumpta probatur. Etenim inhærente vel significat esse in alio, sicut aqua est in vase, aut anima in corpore; vel præ se fert penetrari cum subjecto, & dependere ab illo. Porro hæc omnia convenient etiam formæ substantiali; enim vero & ipsa dependere potest à subjecto per inhærentiam, nam inhærentia sicuti non tollit entitatem, & naturam accidentis, ita nec tolleret entitatem, & naturam substantiæ, sed eam immutatam relinqueret. Proinde per potentiam inhærendi non distinguitur accidentis à substantia. Atque adeo &c.

Respondetur discrimen illud expositum à nobis fuisse in loco laudato primæ disputationis; & quidem apertissimis verbis, & intelligibilibus, quæ repetenda hic non sunt. Verum urgent, & reclamant Recentiores, & cum ipsi ex claris, distinctisque ideis omnia metiantur, discrimen illud, & eas entitates nulla idea, nullo conceptu patere sibi posse dicunt, verbaque

nos proferre, non res ipsas expōnere. At quisquis es, ò Recentior, qui hæc reponis, recogita quo sunt in qualibet Philosophorum secta, quorum nulla nobis prästo est clara, & distincta idea. Recogita vel indefinitam Cartesianæ materiæ divisionem, vel atomos uncinas, & extensas, ac figuratas sine partibus. Quæ tu minime concipere te posse dicis, ea sane intelligit Peripateticus. Quamobrem si non vis intelligere (ut assumamus verba Augustini, lib. 4. contra Julianum, cap. 6.) aut si te singis non intelligere, nolli obstrepere volentibus, & valentibus intelligere. Rationem evidentem propone, qua doctrinam nostram evertas, ne tibi merito respondeat Peripateticus verbis illis ejusdem S. Doctoris, lib. 3. Operis imperfecti, num. 139. Non laboras, ut me intelligas, quod facillime potes; sed laboras, ut me refellas, quod non potes.

Objicies 3. Non potest idem esse simul esse intra subjectum, & extra subjectum. Accidens Peripateticum si daretur, esse simul intra subjectum, & extra subjectum. Ergo eiusmodi accidens repugnat. Probatur minor. Dependere essentialiter, & quidditatiye ab aliquo, est includere in se esse illius, & ex illo constare. Sic totum à partibus dependet; nec potest alia assignari diversitas inter dependentiam essentialiem, & dependentiam non essentialiem. Atqui accidens essentialiter dependet à subjecto. Ergo

esset intra subjectum. Est autem extra illud idem subjectum , utpote quia realiter ab illo distinguitur. Ergo &c.

Respondeatur , ridiculam esse , & sophisticam ejusmodi argumentationem ab Andrea Pissini propositam , qui ut verbis utamur Augustini lib. 3. contra Julianum , c. 7. Dialecticorum quasi jaculis oneratus acutis in certamen procedit , & jactat plumbeos pugiones. Itaque nego minorem. Ad probationem , nego antecedens. Creatura sane essentialiter & quidditative dependet à Deo , nec tamen in se includit ipsum esse Dei , vel ex Deo constat , tanquam ex intrinseco constitutive. Aliud ergo est dependentia intrinseca , quæ in argu- mento describitur ; aliud vero dependentia extrinseca. Porro accidentis dependet à subjecto veluti ab aliquo extrinseco , quo pacto crea- tura à Deo dependet , quatenus si- cuti creatura non potest esse sine Deo , ita accidentis ex sui natura , & essentia petit inhærere subjecto.

Objicies 4. si admittenda sunt ejusmodi accidentia absoluta , quo- modo producuntur? quænam est il- lorum caussa ? Tum accidentia illa dicuntur capacia intensionis , ac remissionis : ut diximus in secunda parte Logicæ , ubi egimus de Qua- litate. At intensio ac remissio nul- latenus explicari , aut intelligi po- test. Igitur &c.

Respondeatur , accidentium rea- lium productionem fieri à caussis

secundis , eamdemque esse expli- candam , ut diximus disp. 1. quæst. 1. ubi Peripateticum Systema declara- vimus ; nempe eductione fit , qua- tenus accidentis in subjecto produ- citur , à quo pendet in fieri & con- servari , & quidem ex propria na- turali conditione. Caussa porro ac- cidentium , saltem ut plurimum sunt accidentia ipsa similis ordinis , ut calor calorem producit : quod quidem univocam præ se fert actio- nem. Nec tamen neganda est æqui- voca actio , qua accidentia à sub- stantiis producantur : ut sæpe di- ximus evenire.

Certum est etiam , accidentia intendi , & remitti , quatenus ac- ccretionem quamdam nunc susci- piunt , nunc deperdunt ; unde sensibiliora persæpe evadunt. Quid au- tem præ se ferat intensio ipsa , invi- eem disputant Scholastici in varias pro more distracti sententias. No- bis ea probabilior videtur opinio , quæ intensionem fieri tradit per multiplices gradus ejusdem ratio- nis cum eo accidente , quod inten- ditur , ut docet Seotus in 1. dist. 17. quæst 3. Quemadmodum e- nim augmentatio quantitatis præ se fert additionem partium secun- dum diversam subjecti partem , i- ta accretio qualitatis fit per addi- tionem graduum ejusdem quali- tatis secundum eamdem subjecti partem. Ex quibus fas est etiam explicare ipsam accidentis remis- sionem , sicuti facile intelligi- mus diminutionem quantitatis

Por-

Porro gradus illi qualitatis dicuntur homogenei, quatenus sunt omnino ejusdem naturæ, & in sua essentia similes qualitati illi, cui accedere intelliguntur; nee oportet essentialiæ quamdam comentari graduum diversitatem, ut intentionis, ac remissionis notio exhibetur.

Colligitur, naturalem rationem suadere potius ipsam realium absoluitorum Accidentium possibilitatem, & existentiam. Etenim juxta omnium consensum Substantia dicitur *Ens per se subsistens*; atque adeo ipsa ratio entis non præ se fert ex se se notionem substantiæ. Quo fit, quidpiam esse posse ens, quin concipiatur, ac sit substantia; ut definitionis illius ratio subsistat, qua Substantiæ notio exhibetur. Quod vero scribit Maignam in Philosophia entis capite 5. substantiam non esse aliud, nisi rei existentiam, id verum est, si substantiæ nomen lata significacione accipiatur, non autem ubi ipsa peculiaris substantiæ notio adtentatur. Quare ens non omnino idem est cum substantia; sed quidpiam erit universim acceptum, quod substantiæ, & accidenti intelligitur esse commune.

QUÆSTIO SECUNDA.

De Calore, & Frigore.

DE Affectionibus Corporis naturalis speciatim disserere ag-

gredimur. Et primum quidem de Calore, Frigore, Humiditate, & Siccitatem, agendum est: quod affectiones istæ velut omnium primæ merito habeantur. Etenim affectiones sensibiles vel pertinent ad sensum tactus, ut sunt gravitas, levitas; durities, mollities; lubricitas; ariditas; asperitas, lenitas; crassities, tenuitas; calor, frigus; humiditas, & siccitas. Manifestum porro est omnes illas affectiones ab ipsis quatuor ultimis provenire, vel saltem ex istorum permixtione coalescere, quatenus una, vel altera harum prædominari dicitur. Sic mollities, lubricitas, lenitas, & tenuitas ex humiditate prædominante oritur; durities, ariditas, asperitas, & crassities ex siccitate prædominante; gravitas ex frigiditate prædominante; ut levitas ex caliditate. Vel affectiones sensibiles referuntur ad sensum gustus, ut sapores: & hæ quoque ex quatuor recensis orientur; dulcedo enim refertur ad calorem prædominantem, acritas vero ad frigus. Vel pertinent ad olfactum, ut odores, atque in ipsis maximam vim habet calor, & humiditas. Quæ affectiones ad auditum referuntur, ex duritate orientur. Quæ ad visum pertinent, ex calore, aut frigore pendent. At Calor, Frigus, Humiditas, & Siccitas, non orientur ex aliis affectionibus. Unde merito dicuntur omnium primæ: maxime cum istæ ad rerum generationem sint necessariae.

Peripatetici cum Galenicis arbitrantur, Calorem esse entitatem aliquam à substantia rei prorsus distinctam, & illi inhærentem. Definitur autem ab Aristotele Calor *id quod congregat homogenea, & segregat heterogenea*. Ut in vino ebulliente partes impuriores vi caloris inter se conjunguntur, & congregantur, segregantur vero à partibus vini purioribus.

Democritus, Epicurus, Gassendus, & alii. Veteres, Recencioresque Philosophi Atomistæ Caloris naturam in rotundis, tenuissimis, maximeque mobilibus Atomis positatam esse arbitrantur, ut quanto plures ejusmodi particulas corpus aliquod in se se contineat, tanto calidius sit; quanto plures, & confertiores atomi calorificæ ex igne in lignum transeant, tanto fortius, & efficacius lignum calefiant. Plato autem ejusmodi effluvia pyramidata esse dicebat.

Longe aliter opinatur Cartesius, quippe qui Calorem in solo motu constituit, quo tertii sui elementi particulæ à tenuissimis primi elementi celerrime abripiuntur. Tunc enim in nervis fibris nostri corporis impressionem, agitationem, & affectionem illam efficiunt, quam nos caloris, & ignis nomine designamus. Ad hanc sententiam accedunt alii Recentiores, qui calorem in motu perturbato partium constituunt. Sed in Cartesii opinione Calor revera in solis est ideis mentis nostræ, nec in obje-

cto reperitur quidpiam simile illi idea, qua Calorem concipimus. In objectis igitur motus perturbatus extat, cuius occasione excitatur in nostro corpore motus à Deo, & in mente nostra excitatur idea caloris. Unde calor non est in objectis, quemadmodum in illis non extat dolor. Quæ quidem opinio erit fuse discutienda in 3. Physics parte, disp. 2. quæst. 4.

Frigus est altera Corporis naturalis affectio, de qua disputamus in ista quæstione.

Jam vero si frigoris naturam à Democrito, Epicuro, Lucretio, & Gassendo, aliisque Atomistis exquiras, qui se Naturæ arcana rimari, atque intromiscere putant, Atomos invocabunt illi frigorificas. Quam opinionem aliis si placet adoptare, ut spiritus nitrosos, ac salinos caussam esse frigoris, & originem dicant.

Cartesius Frigoris naturam per minorem motum expendi putat. Si augeatur (inquit in Tractatu, De Homine, p. 3. art. 30.), vel diminuatur hic motus à causa quadam extraordinaria in his filamentis (nervorum nostri corporis), audito caloris, diminuio frigoris sensum in anima excitabit. Nempe cum externa res motum habet majorem illo, quo filamenta nostri corporis agitantur, calida esse dicitur, quatenus augere valet motum illorum filamentorum, & sensum adeo caloris in nobis excita-

re. Secus si externa res minore sit motu concitata , frigoris ingenerat sensum , & frigida nominatur. Quo pertinet aliorum Philosophorum Recentiorum sententia , Frigus non aliud esse , quam privationem caloris ; adeo ut corpus aliquod majorem , vel minorem gradum frigoris acquirere dicatur , cum ad majorem , vel minorem caloris gradum decreverit.

Peripatetici post Aristotelem arbitrantur , Frigus esse affectionem à substantia rei distinctam : cuius affectionis proprium est congregare homogenea simul , & heterogenea.

Ut autem certa ab incertis secernamus , innumeris experimentis compertum est , Calorem vel semper , vel fere semper conjungi cum motu , & cum substantiali calidorum corpusculorum effluvio ; quamquam non omnibus Peripateticis probetur , id ipsum semper evenire : in Frigoris etiam communicatione , & propagatione corpuscula frigida diffundi , quæ , si mavis , spiritus salinos , ac nitrosos poteris appellare . Porro motum esse caussam caloris , experientia manifestat : ut homo ambulando incalescit , manus invicem perfricatae incalescent , & molæ farinariæ per motum calefiunt . Attamen motus est caussa caloris tantummodo per accidens . In viventibus enim motus dicitur causare calorem , quatenus efficit , ut spiritus animales evocentur ad cu-

tem , & ad exteriores partes accedant . Illi autem spiritus , cum sint calidissimi , calorem excitant . Ita ergo manus mutua perfrictione incalescent , quatenus per motum calidi spiritus ad cutem excitantur . In non viventibus vero motus est caussa caloris , sed in iis tantum corporibus , quæ valide inter se conteruntur , & quorum alterum saltem sit calidum , vel calidiora corpuscula in suis meatibus contineant . Nam tunc vel corpuscula illa extrahuntur per motum , & rarefiant , vel aer circumambiens purior per motum redditur , & ab eo separantur crassiores , & frigidi halitus , unde post rarefactionem ex sui natura incalescit ; atque exinde calor diffunditur . Itaque caloris caussa per se tunc est aer , vel illa corpuscula , raritas est dispositio , motus vero est caussa per accidens . Hinc si vinum , & nix misceantur , non incalescent per motum , sicuti nec aqua frigida manu agitata . Non sufficit autem quæcumque partium separatio ad calorem producendum ex motu , sed requiritur tum vehementis agitatio , tum solidorum corporum affrictus ; vel quod calidiora corpuscula in sufficienti copia emittantur . Hinc fit aerem à vento magis , quam à sagitta commotum , non calefieri , quamvis per sagittæ motum calefiat . Ipsa vero sagitta per aerem transiens non incalescit , quia continuo partes aeris successive immunitat ,

tat, & prius rarefactas deserit, in novamque aeris partem subit à vaporibus non expurgatam. Simili ratione arbor navis jactatæ fluctibus non solo aeris motu incalescit, sed quia funibus, atque aliis lignis conteritur ex impetu, quem aer in istis efficit. Ex his facile expenditur, cur piper, & vinum, & alia id genus, quæ virtualiter calida dicuntur, cum sunt in stomacho, animalis calorem procreent. Id enim fit per accidens ex spirituum animalium, calidiorumve corpusculorum agitatione.

Nunc igitur inquirimus, in quantum constituenda sit caloris, & frigoris natura, sive essentia?

Dicimus, caloris naturam non consistere in motu, aut in substantiali corpusculorum effluvio, sed calorem esse formam accidentalem absolutam, cuius vis est homogena congregare, & separare heterogenea: frigus etiam non esse solam caloris privationem, nec ipsius naturam formaliter consistere in substantiali effluvio, sed rite dici posse formam accidentalem absolutam, cuius vis est congregare simul homogena, heterogenea.

Assertio tres partes pro calore, totidemque pro frigore complectitur, arctisque tamen invicem connexas. Quod attinet itaque ad calorem.

Probatur prima pars. Et speciatim adversus Atomistarum sen-

tentiam ita ratiocinamur. Atomistæ affirmant, easdem igneas atomos, rotundas, tenuissimas, maximeque mobilessimul lucidas esse, & calidas. (In iisdem quippe atomis naturam lucis, & naturam caloris constituant, hoc solo discrimine quod calor atomos præ se fert in majori copia, quam lux.) Atqui assertio ista contraria est experientiæ. Ergo caloris natura non consistit in atomis rotundis &c. Minor probatur experimento Romerii, quod refertur à Du Hamel, parte secunda Physicæ, dissertatione secunda cap. z. Speculum metallicum, & concavum ita reflecti calorem ignis, ut in puncto concursus multo sit intensior. At si inter ignem lucidum, & ardenter, & inter speculum ipsum interponatur vitrum in speculi foco, lux quidem augetur, sed nullus omnino calor procreatur. Ergo evidens est, majorem atomorum ignearum copiam non esse calorem, sed calor à luce re ipsa distinguitur, quippe luce aucta calor tollitur, & calore prohibito, lux diffundi adhuc pergit expedita. Cum vero Atomistæ fateantur, ignem in se se ardenter esse, & calidum, nequeunt assere, non quaslibet atomos igneas habere in se ipsis calorem: atque hoc pro arbitrio tantum configneretur. Rursus lux in sui diffusione habet velocitatem longe majorem, ac calor; Sentiatur enim jam plena, ubi calor omnino tenus sensum incipit vellicare.

Er-

Ergo in iisdem atomis igneis lux simul, & calor constitui non possunt, ita ut sola majori, minorive copia differant: ut Atomistæ arbitrantur. Accedant rationes generatim adversus atomos, earumque figuram propositæ, disp. 1. quæst. 1. tum quæ contra rotundam ignis figuram diximus, disp. 2. quæst. 7. tum alia etiam argumenta postea referenda.

Ab aliis vero Philosophis Recentioribus, qui calorem in effluvio corpusculorum, vel molecularum divisibilium constituunt, perimus explicari nobis, qua ratione ejusmodi corpuscula sint calida? Estne calor effectio quædam illis ingenita, atque indistincta; vel potius adventitia, & separabilis? Si secundum quis affirmet, quid erit igitur in se se calor ipse? Quidpiamne substantiale? an aliquod accidentale? Atque ita semper inquisitio reddit. Si primum asseverare quis velit, exponat quid sit affectio illa; utrum-ne substantialis forma, an partium dispositio? Si forma est substantialis, ea est à materia sua separabilis, ut sunt omnes aliæ formæ; sed nec potius est ratio affirmandi calorem esse formam substantialem, ac suppetat nobis dicendi calorem esse formam accidentalem. Si est partium dispositio, jam partes sine ista esse poterunt; atque adeo calor non erit affectio ingenita. Tum explicandum manet, quid sit ista dispositio, quomodo calorem ef-

ficiat, aut quomodo ipsa sit calor. Sane si calor est partium dispositio, ea maxime, quæ motum præse fert perturbatum. Proinde ad eam opinionem, quæ calorem esse motum definit, hæc ipsa Recentiorum sententia reducitur.

Probatur secunda pars. Assertio ista apud Recentiores communis, quæ calorem in motu constituit, pugnat aperte cum ipsorum sententia de Lucis natura. Ergo si hæc admittantur, illam rejicere oportet; atque adeo caloris natura sita in motu non est. Probatur antecedens. Lux in Recentiorum opinione est subtilissima substantia omnino per rectam lineam diffusa, vel motus rectus ejusdem substantiae, aut globulorum secundi Elementi Cartesiani: Calor autem si motus est, profecto motus est perturbatus, celerimus, & expansivus. Atqui motus ille rectus lucis, & motus iste perturbatus caloris simul componi non possunt. Ergo &c. Minor probatur. Impossible omnino est, immo ne intelligi quidem potest, motum rectum simul cum motu perturbato per eamdem lineam diffundi, & propagari. Atqui lux, & calor per eamdem lineam diffunduntur, & propagantur. Ergo rectus ille motus lucis, & motus esse perturbatus caloris simul componi non possunt. Major est evidens, & rursus exponitur. Si tenuissima lucis substantia per rectam lineam diffunditur, cum saltem prope illam ex-

tent particulae caloris perturbato motu agitatæ , una profecto istarum , vel altera impinget in corpusculum aliquod lucis , illudque subinde coget à rectilineo deflectere . Jam si una lucis particula à rectilineo deflectit , tota corruit lineæ lucis rectitudine : quemadmodum in globulis videre fas est , si prius impellantur recte , atque eorum unus postea cogatur deflectere . Ut enim corpuscula plurima impellantur recte , & rectilineum servent , necesse est , quodlibet illorum tangere aliud in puncto suæ medietatis ; alioquin actu erit de rectitudine motus . At quomodo corpuscula lucida semper & constanter tangent , & propellent alia sibi succedentia in puncto medietatis eorum , si circum ipsa volitant corpuscula caloris perturbato , & irregulari motu concitata , & abrepta . Probatur igitur minor . Ut recenset Cabæus , lib . 1 . Metaph . quæst 1 . si speculum istorum exponatur , non solum maximæ ignis quantitatæ , verum etiam parvo igni , aut ferro carenti , ignis accenditur , atque plumbum ipsum dissolvitur ex puncto illo concursus , in quo radii caloris coadunantur . Porro linea illa , quæ ducitur ex punto concursus , calida simul est , & lucida . Ergo lux , & calor per eamdem lineam diffunduntur , & propagantur . Rursus experientia ostendit , radios caloris per rectam linéam diffundi , unde Fabri in tractatu de Calido , proposit . 61 . &

in tractatu de Luce , pluribus experimentis confirmat , lineas caloris rectas esse , ut sunt lineæ lucis . Ergo cum linea caloris sit recta , si calor consistit in motu perturbato , per eamdem lineam propagantur motus rectus , & motus perturbatus . Quod absurdum est .

Confirmatur . Sol simul illuminat , & calefacit . Sed data Cartesii sententia , Sol exhibere simul non posset affectus istos . Etenim calefactio impediret illuminationem . Quippe illuminatio haberi non potest , nisi globuli secundi Elementi Cartesiani permaneant recte dispositi : ut placet Cartesio . Porro calefactio rectam hanc globulorum dispositionem tollit . Dum enim terrestres particulæ innatant subtili materiae Cartesianæ , & ab ea rapiuntur , impossibile est globulos illos permanere recte dispositos . Igitur &c . Rursus ex Cartesii sententia , particulæ primi sui Elementi non excutiunt globulos secundi Elementi , sed eos recte propellunt . Ita enim ille naturam lucis declarat . Exponens autem naturam caloris , affirmat , primum Elementum distrahere , & commovere particulas crassiores tertii sui Elementi . At hæc pro arbitrio dicuntur . Quippe eadem actio particularum primi elementi deberet eumdem motum caussare , immo deberet potius procreare motum minorem in crassioribus tertii elementi particulis figura ramosa , & ad motum minus apta donatis , quam

quam in secundo elemento, quod propter rotundam figuram suam mobilius est tertio elemento. Ergo &c.

Respondent Cartesiani, calorem non esse motum irregularem, sed motum vehementem illo, quo à spiritibus animalibus fibrillæ nostrorum sensuum concitantur. Adducent, in speculis istoriis non refrangi, aut reflecti lineas caloris, sed lineas lucis. Ut enim Cabæus expertus est, vitra quedam aquis frigoribus repleta, adhuc vim habent calefaciendi objecta corpora. Quod sane evenire non posset, si calefactio oriri dicatur à lineis caloris, istæ siquidem trajicientes corpus aquæ frigidissimum, propriam naturam servare non possent.

Contra est. Caussa motus illius vehementioris non potest esse, nisi motus corpusculorum in objecto, & aere existentium. Sed motus iste corpusculorum perturbatus esse debet, cum ramosas partes tertii Elementi Cartesiani commovere, atque exagitare dicatur. Lucis autem motus ex Cortesianorum sententia adeo tenuis est, ut sola oculi retina eumdem percipere valeat. Porro reflexionem ab ipso principali agente oriri arbitramur, licet terminus incidentia eamdem coadiuvet: ut suo loco declarabimus. Itaque caloris reflexio etiam in allato experimento à principali agente, nimirum igne caussatur; neque tamen admittimus caloris radios trahicere, & penetrare, a-

quam illam frigidissimam. Proinde quoniam à lineis lucis, sed à lineis caloris eam calefactionem ori-ri dicimus.

Respondent, lucis motum à corpore luminoso per lineam rectam propagari oculum versus, quin perturbetur, aut commoveatur à particulis terrestribus perturbato motu concitatis, & in eadem recta linea dispersis, in qua lux diffunditur. Id vero declarare nititur Constantinus Grimaldi hoc exemplo. Sit dolium quoddam musto repletum, & in eo existat vinacea, quæ ab Agricola hinc, & inde commoveatur, & vario concitetur motu. Nihilominus mustum in dolio existens continuo premit in dolii fundum; ac si in medio fundi extet foramen aliquod, totum mustum per rectam lineam circumundique versus foramen illud concurrit, ut à dolio exeat, quin pressio ista impediatur à motu perturbato vinacea; permanet enim illa in eo statu, in quo esset, si vinacea innatans musto non commoveretur. Ideo ergo de lucis diffusione dicendum est, ut nempe rectus illius motus à motu caloris perturbato minime impediatur,

Contra primo. Etsi Cartesiani claris, distinctisque ideis suis assequantur, quod defendunt, per eamdem nimirum lineam propagari motum rectum lucis, & motum perturbatum caloris; nos tamen duo hæc simul pugnantia conciliare invicem non possumus. Sed nec id-

ipsum suadet propositum à Cartesianis exemplum , nam & contra illos aperte pugnat. Eténim cum Agricola non possit vinaceam commovere , quin mustum ipsum commoveat ; mustum utique premit deorsum , & versus fundi foramen descendit : non tamen per lineas mottis , ac pressionis rectas , sed per lineas mixtas , quæ corraspondent & externo impulsu , & naturali gravitati ; sed & vinaceæ partes musto intermixte ob-sistunt rectitudini motus musti deorsum. Evidentissime res apparet ; si experimentum idem fiat in aqua limpida , & pura , immissis in eam multis corpusculis , quæ illius perspicuitatem non tollant. Tunc enim sensibus ipsis percipimus , aquam versus fundi foramen descendere semper per circulos , colligendo versus foramen gyros suos. Jam si & lux cogitur à motu perturbato caloris , ut circularum induat motionem , jam nulla esset lux in Cartesiana hypothesi.

Contra secundo. Si mustum per rectas lineas descenderet ad foramen , utique id ipsum præstare non posset , nisi vires nativi ponderis ipsius musti multo maiores sint impetu illo , quo Agricola particulas vinaceæ exagitat. Ergo ut lux per rectam lineam diffundi , & propagari queat , deberet profecto ipsa lux majori vi premere , quam calor , adeo ut major sit motus , & agitatio in luce , quam in calore. At exponant , ambo , Cartesiani ,

unde-namqueant ipsi majorem hanc lucis vim constituere , & comprobare ? Sane lucis pressio ab ipsis Cartesianis adeo tenuis dicitur , ut vix tenuissimæ fibrillæ ocularis reticulæ eam valeant percipere ; immo reticula ipsa , ut lucem valeat percipere , coadiuvari debet , à refractionibus quas lux suscepit per oculi humores transiens. Quomodo igitur tenuis adeo pressio rectilinea non solum non destruetur , sed ne quidem perturbabitur à vehementissimo ardore dierum circularium?

Respondent alii , posse motum rectum lucis , & motum perturbatum caloris propagari per eamdem lineam rectam. Ajunt quippe particulas tenuissimæ lucide substantiæ à Sole , vel ab igne emissas , recte diffundi : quod lucis est proprium ; at simul moveri etiam circulariter , & circa suum centrum unquamque illarum convolvi : in quo caloris motum situm esse configunt.

Contra ratiocinamur. Experiencia compertum est , sphæram oblique super planum cadentem , si circa proprium centrum rotetur , non posse reflecti per angulum æqualem angulo incidentiæ. Ergo si sphærica particula lucis circa proprium centrum rotantur , ac cum recte impelluntur , simul etiam circulariter moventur , jam in objecta corpora incidentes , non poterunt reflectendo angulum efficere æqualem angulo incidentiæ. Atqui hoc ip-

ipsum experientiæ contrarium est, & Philosophi omnes consentiunt, hanc esse constantem, non solum quoad sensum nostrum, sed etiam re ipsa, legem reflexionis lucis, ut angulus incidentiæ sit æqualis angulo reflexionis. Absurdum est igitur affirmare, lucis particulas circa proprium centrum convolvi, ut caloris naturam hoc motu constituant. Rursus circularis ille motus non satis idoneus est explicandis effectibus caloris: maxime cum rotundæ dicantur illæ particulæ. De quo argumento jam supra diximus, & potissimum in 2. disp. q. 4. Potius ergo caloris motus perturbatus omnino esse debet, ut hac illac objectorum corporum partes agitare, ac dispergere valeat.

Respondet P. Fortunatus, posse distincta lucis & caloris effluvia sinuæ recte moveri, & perturbato etiam motu agi: quo modo dum globus metallicus, ebuliente aqua plenus, recte projicitur, aqua tunc movetur recte, quin in ejus particulis tumultus siccirco deficiat. Id in nostra etiam sententia ait admissi oportere, cum lucem dicamus per rectilineum produci, & calorem conjungi cum motu, utique perturbato. Si vero eadem omnino particulæ lucem, & calorem efficiant, non repugnat eas recta difundi, & motum perturbatum excitare in sensibus nostris: quemadmodum perturbate agitatur aqua ex injecto in ipsam lapide, tametsi hujus motus tam intra, quam ex-

tra aquam secundum rectam lineam perficiatur.

Contra 1. Primum à P. Fortunato exemplum ad rem non pertinet. Nam si tumultuarius particularum aquæ motus rectilineum totius aquæ in globulo metallico conclusæ non tollit, hoc ideo evenit, quia aqua à globulo continente rapitur, & detinetur. Quod si aqua extra globulum sibi esset relicta, videbis à motu tumultuario partium ipsius, minui motum quoque totius aquæ in rectam linæ, & saltem paulatim tolli. At subtilissima, & tenuissima lucis corpuscula non sunt conclusa in aliquo corpore duro, & resistente, adeoque corpuscula caloris iis proxima, & contigua, atque perturbato motu agitata, in illa incurserent, eorumque motum retunderent, & lucem à rectilineo deturbarent. Neque eadem ratio est in sententia nostra. Non enim arbitramur lucem emitte à lucido corpore per corpuscula successive in oculos insipientium, sed eamdem dicimus immediate ab illo productum in medio, tum in ipsis insipientium oculis.

Contra 2. Nos impræsentiarum, ut initio quæstionis diximus, de calore loquimur, ut in objecto est, sive quatenus est *sensibilis qualitas*, seu id, per quod res extra nos posita valeat passionem excitare in externo sensorio nostro. At P. Fortunatus nunc de ipsa loquitur passioni sensoriū nostri externi.

Duo

Duo hæc distinguenda esse vel ipse P. Fortunatus fatetur, in Physica Generali, p. 1. diss. 4. sect. 1. num. 675. At responsio allata primum cum secundo confundit. Nihil igitur concludit. Quod si caloris motus est similis motui lapidis secundum rectam lineam in aquam injecti : ergo caloris natura, non in motu perturbato, sed in motu recto erit constituenda : contra ac docet idem P. Fortunatus, loco citato, sect. 2. Cæterum perturbatus ille motus aquæ non à solo oritur recto motu lapidis, sed potissimum à natura aquæ se se ad libellam restituentis.

Secundo probatur eadem pars nostræ assertionis. Si calor est motus perturbatus, sensibilis ejusmodi motus esset calor sensibilis, major, vel minor motus esset major, vel minor calor. Hoc experientiæ adversatur. Ergo calor non est motus perturbatus. Major probatur. A definitione ad definitum legitima est illatio : ut cum dico: *Homo est animal rationale* : ergo *animal rationale est homo*; aut hoc modo: *Ubi extat homo, ubi extat animal rationale* : ergo *ubi existit animal rationale, ibi existit homo*. Ergo cum Cartesiani calorem motu perturbato definiant, seu caloris essentiam, & naturam in motu perturbato constituant, bona est consecutio, dicendo: *Calor est motus perturbatus* : ergo *motus perturbatus est calor*: Et rursus: *Ubi extat calor, ibi extat motus pertur-*

batus : ergo *ubi existit motus perturbatus, ibi calor existit*. Minor probatur. In Machina pneumatica, exhausto aere crassiore, aqua ebullire conspicitur, ac si igni esset exposita: ut in disp. 2. q. 7. diximus; nec tamen aqua tunc est calida. Nihil enim ostendit, aquam tunc calidam esse, cum frigida prius in recipiente posita fuerit, & frigida extrahatur. In liquorum etiam effervescentia licet sensibilis motus appareat, iis tamen ab igne remotis, & effervescentiæ motu intra exiguum temporis spatium sensibiliter detumescente, nulla profecto fit ad sensum imminutio caloris; quin etiam dum pix igni primum exponitur, effervescentia fit major, quæ sensim amittitur, dum calor augetur. Igitur &c. Adde experimentum spiritus vitrioli: §. Contra 1. post Probationem 1. p. de Frigore.

Quod autem reponunt Cartesiani, fluida omnia in se ipsis calida esse, etsi calida nobis non apparent; id pro arbitrio confictum est. Ita etiam dum P. Fortunatus reponit, in effervescentia, non imminuto calore, minui motum visu sensibilem, non tamen motum sensibilem tactu, atque in hoc solo calorem consistere; id divinando tradit, cum nulla ratione probet, detumescente effervescentia, motum tactu sensibilem non minui, nisi quia calor idem permanet; unde responsio per illud ipsum traditur, quod in quæstione est. Cæterum in effervescentia motus quoque tactu sen-

sibilis est major, nam propulsatio quædam major, & expulsio manus, aut corporum innatantium, vel adjacentium tunc contingit. Minuitur autem postea, calore nequaquam imminuto, aut etiam aucto, ut in pice diximus evenire. Nostra vero sententia, etsi motus comitetur calorem, tamen motus perturbatus ab aliis caussis oriri etiam potest; nec motus est *per se* caussa caloris, sed solum per accidens; ut declaravimus.

Probatur 3. pars nostræ assertio-
nis. Porro sensus est, calorem co-
adunare ea, quæ sunt homogenea,
seu ejusdem rationis, & segregare
invicem illa, quæ sunt diversæ
rationis, seu heterogenea. Un-
de ab Aristotele calor describitur,
id, quod congregat homogenea, &
segregat heterogenea. Sed ut optime
animadvertis Philoponus, lib.
2. de Generatione, ad textum 8.
per homogenea non intelliguntur
ea solum, quæ eamdem habent na-
turam substantialem, sed etiam il-
la, quæ in liquabilitate, vel gravita-
tate, vel in alia simili complexione
conveniunt, licet in earumdem af-
fectionum gradibus differant, ut
metalla: præsertim vero illa, quæ
similem habent partium contex-
turam, sive materiae consistentiam.
Ita per heterogenea intelliguntur
illa quæ in his affectionibus discre-
pant, licet aliquando sint ejusdem
naturæ.

Itaque probatur 3. illa pars &c.
Affectione rei optime describitur per

præcipuum, & notissimum illius effectum. Sed rerum ejusdem gene-
ris congressus, & dissimilium rerum separatio est præcipius effectus caloris, maxime in ordine ad mixti generationem, hæc enim haberí non potest, nisi partes assimilares congregentur, & dissimilares segregentur; quippe dum calor corpora quæque exagit, & rarefacit, tum partes corporum graviores subsi-
dunt, leviores vero sursum evolu-
ntur. Ergo ea vis est caloris, ut
homogenea congreget, ac hetero-
genea segreget. Sic aurum purga-
tur igne, quia omnes partes ejus-
dem rationis simul uniuntur, &
dissimiles separantur, ut scoria,
partesque adeo impuriores à purioribus segregantur. Simili ratione si
cera habeat in se se lapides, & paleæ simul concretas, in liquefa-
ctione ope caloris facta lapides in
fundo subsidunt, paleæ supernant,
& in medio pura remanet cera.
Cum enim calor per virtutem relaxandi, & rarefaciendi, con-
cretionem, & colligationem illo-
rum corporum tollat, iccirco quodlibet corpus ad locum propriæ gra-
vitati debitum fertur.

Quocircanihil obstat, quo minus
dicamus, *Calorum esse formam ac-*
cidentalem absolutam, qua nata
est raritatem inducere, congregare
homogenea, heterogenea segregare,
& quæ cum motu, ut plurimum jun-
gitur, atque cum substanciali cor-
puscularum effluvio propagatur, &
frigori opponitur, ac illud destruit.

Sane calor multis corporibus modo inest, modo non inest, integra remanente eorum natura. Quamobrem cum, ut diximus, non sit affectio ingenita, nec quidquam substantiale, reliquum est, ut sit accidens physicum. Sed nec verisimile est, corpora nunc calida fieri, nunc frigida, per ingressum, vel egressum corpusculorum calidorum. Nam in qua-cumque parte ebullientis aquæ calor percipitur, cum tamen incredibilis sit, calida corpuscula in omnibus aquæ particulis reperiri. Dum autem in aquam, vel aliud corpus calida corpuscula ingrediuntur, ea postmodum calorem procreant in corporibus illis; formas enim accidentales ita adstruimus, ut iisdem vim attribuamus producendi similes sibi qualitates.

Objic. 1. contra 1. partem. Referente Du Hamel, linteum album, aut sudarium, vel mantile, igni admotum, & bene calefactum, si in locum obscuriore statim inferatur, tum evolutum, & unguibus motu celeri pressum, mille scintillas det. Ita & felium pili in obscuro loco vehementius moti, scintillas emittunt. Calor ergo aliud non est præter ignem rariorem.

Respondetur, hæc, & similia experimenta probare quidem, calida, & ignita corpuscula hac illac dispergi, & ab igneis corporibus in objecta corpora emitte. Quod ultro fatemur. Sed adhuc inquirendum superest, quid sit calor in

ipsis illis corpusculis? Multo minus inde evincunt Atomistæ, calorem consistere in atomis rotandis, tenuissimis, maximeque mobilibus. Ergo etiamsi in sudario illo extent ignita quædam corpuscula, non tamen sequitur, calorem esse substantiale atomorum effluvium. Quamquam potius dicendum est, in linteo illo bene calefacto, & in pilis felium manu rudijs perficatis, ignitionem quamdam per motum excitari, quatenus exhalatio sicca, & calida, quæ in illis extat, in aere frigido, humidoque concitata intenditur, & accenditur: eo ferme modo quo fulmen intra aerem vappidum, & frigidum cuditur.

Objicies 2. contra secundam thesim. In qualibet calefactione motus semper localis contingit. Sic aqua dum incalescit, sensibiliter agitatur. Immo si phialam impleas aqua fœculenta, aut putrida, eamque igni admoveas, perspicies, incipiente calore, aqueam illam illuminem commoveri, & susque deque verti: magis, aut minus pro actionis calefactivæ mensura. Idem certe est in metallis, quorum particulae à vehementi calore ita agitantur, ut aliæ ab aliis disjungantur, atque ita metallum colliquescat. Idem appetet in combustionine, quæ est summa calefactio, per quam mixta penitus dissolvuntur, aliis alio abeuntibus corporum partibus. Ferrum lima corrosum sit calidissimum, glans pluma-

plumbea è sclopo explosa per aeris collisionem concipit calorem, curruum rotæ prope centrum, ubi major est attritio, ignem saepe cōcipiunt.

Confirmatur. Si motus augeatur, augetur etiam calor. Si vero motus minuatur, etiam calor minuitur. Atque motu deficiente, calor ipse deficit. Constat hoc in aqua igni exposita. Hinc in flamma, in carbonibus ipsis motus quidam conspicitur. Igitur &c.

Respondetur, non esse legitimam ratiocinationem, cum ex duorum similitate subinfertur potius illorum identitas, quam connexio. Ergo illa Cartesianorum argumentatio: Nullus calor est sine motu: ergo calor non est nisi motus; fallaciam involvit. Proinde permittimus antecedens, & negamus consequiam, quam facile probare non possunt Cartesiani. Quemadmodum igitur non rite ratiocinatur, qui dicit: Motus non est sine movente: ergo motus est ipsum movens: vel, sensio non est sine organo: ergo sensio est organum. Ita non valet allata Cartesianorum argumentatio. Quod enim calor cum motu jungatur, non aliud ostendit, nisi motum proprium esse calori, ipsiusque plerumque causam: quod ultro fatemur; non tamen demonstrat, caloris natram in ipso motu, seu agitatione consistere: quod Cartesianis probandum est. Accedit, flammam ignis majorem in se commotio-

nem habere, ac carbo ignitus heat, cum tamen majorem longe calorem experiamur in carbonis contactu, quam dum flammam tangimus; hanc enim paulisper sustinere valemus, neutquam illum. Quæ vero recensita fuerunt effecta, explanabuntur in responsum ad sequentem objectionem.

Objicies 3. Si calor non est motus, plurima naturalia effecta expendi non posseant. Et primo cum lima ferrum politur, ferrum, non lima calefit; è contra cum serra, aut tenebra lignum secatur, vel perforatur, non lignum, sed serra, aut tenebra calescit. Id autem non aliunde provenit, nisi quia insensibiles tum ferri, quod politur, tum serræ secantis, vel tenebræ penetrantis, non vero limæ, & ligni partes, tunc amoventur. Secundo si rotæ currus summa velocitate moveatur, in ipsius circumferentia non gignitur calor, sed solum in partibus axi propinquis. Atque id contingit, non nisi quia partes rotæ, quæ lineas maiores suo motu describunt, non commoventur secundum suas particulas; at partes axi propinquiores, continuo axem perfricantes, contexturam conterrunt partium ligni; unde fit, ut ignis particulae in ligno reclusæ exeant, ac motu suo partes rotæ axi propinquas calefiant. Tertio si clavus magnus mallei ictibus in lignum intrudatur, non calefit, dum lignum penetrat, calorem

tamen concipit, quando ultra in lignum penetrare non potest, atque vis impellentis tota in eo est, ut clavi summitatem complanet, & ligni superficie æquet. Porro id evenit, quia cessante motu totius corporis ipsius clavi, ex mallei percussione dilatantur partes clavi percussæ; atque adeo particulæ igneæ clavum ipsum componentes, & in illius poris latentes, exeunt, ac suo motu calorem excitant. Quarto quidnam in caussa est, cur ex ore aperto halitus egrediantur calidi; si vero os sit occlusum halitus exeant frigidi; nisi quia in priori casu longe majores ignis particulæ cum acre exeunt. Igitur &c.

Confirmatur. Per Cartesii hypothesim optime explicatur actiuitas ignis, qua corpora etiam durissima dissolvere, ac destruere vallet. Id enim fit, quia ignis commovet illorum corporum partes, quas quies annexas invicem detinebat. Sed Peripatetici rem satis declarare non valent. Ergo &c.

Respondetur ex dictis patere rationem optimam effectorum omnium, tam juxta sententiam Peripateticam, quam exhibuimus, ac rem declarant Recentiorum hypotheses. Itaque cum calor sit raritatis caussa, hinc fit, ut motus localis habeatur, tum in metallis, tum in liquidis, dum incalescant: maxime cum ignita quædam, vel calida corpuscula poros pervadant ilorum corporum. Cum etiam ex

motu habeatur attritio solidorum corporum, & aer rarefiat, atque ab illo vappidi, & frigi humores segregentur, & calidorum corpusculorum fiat excussio; hinc ferrum per limam fit calidum, & glans plumbea per aeris collisio-nem. Unde appetet ratio experimen-torum, quæ in præcedenti ob-jectione retulimus.

A 1. autem ex nuper relatis dicimus id evenire, quia lima tum compactior est, quam ferrum, minoresque poros habet, in quibus subinde minor aeris copia reperitur; tum quod lima non secundum eam-dem partem ferrum tangit, & suc-cessive ab aliis, & aliis crassi aeris particulis tangitur. Unde nec aer in lima contentus incalescit, nec calida corpuscula in illa pene-trant, & diutius perseverant. Idem valet de serra, & tenebra. Sed ultro fatemur calorem esse cum motu, ut haec ipsa evincent expe-riimenta.

Ad secundum. Affrictus par-tium rotæ axi propinquarum cum axe ipso caussa est majoris rarefac-tionis aeris, & ideo partes illæ ex motu per accidens incales-cunt.

Ad tertium. Dum clavus pene-trat lignum se ipso mollius, par-tes illius non dilatantur: ac subinde nec aerea, & calida corpuscula tunc ita rarefiunt, ut postea; unde partes illæ post eam rarefactio-nec incalescant.

Ad quartum. Ore aperto cras-sio-

siores, calidioresque halitus emituntur: non ita cum os semi-aperatum est, quamvis aliquando majori tunc impetu halitus expellantur.

Ad Confirmationem. Jam in 1. disp. qu. 1. expendimus Ignis actiones; nec ignita corpuscula ab igne emitte inficiamur, motum etiam procreari concedimus. Quare & nobis præsto est modus, quo naturalia effecta declarare valeamus per molem figuram, & motum.

Objicies 4. contra tertiam assertionem. Vi caloris aurum cum argento ita commiscetur, ut vix separari possit, nisi per aquas fortes. Partes ceræ, & pieis, antea separatae, inter se per calorem arctissime conjunguntur. Stannum, & plumbum, si simul liquefiunt vi caloris, ita miscentur, ut nequeant amplius separari. Ita & Pharmacopolæ, plures, ad diversos liquores ope caloris commiscent. Lac ad ignem coagulatur, & cum ipso paleæ; & alia heterogenea concrescunt; atque idem in luto cernitur, dum virtute caloris solaris durescit. Simili ratione calor nobis insitus cibos dispares in ejusdem liquoris formam confundit, ac dissimiles sanguinis partes adeo non segregat, ut exquisite potius permisceat. Ergo calor congregat heterogenea.

Respondet res consimiles à calore congregari, non tam ob naturæ similitudinem, quam propter similem partium contexturam. Ergo

ea, quæ enumerata fuerunt in argumento ob similem partium texturam coadunantur. Sed cera, & pix unitunt ab humore glutinoso, & tenaci, quem continent. Lac crescit per crassitatem, pinguedinem, & viscositatem, quam habet. Dissimiles humores in vasis occlusi confunduntur, dum novus semper ex alimentis liquor accedit. Spiritus enim sanguinis coerciti, & nondum ex aliarum rerum laqueis expediti, dum se se expandere, & dilatare nituntur, alios humores commovent, qui suo pondere deprimuntur, nec sursum evolant; Atque ex hac lucta fit motus ille intestinus, seu fermentatio, & accurata humorum permixtio.

Objicies 5. Calor intensus vas vitrea, & terrea frangit. Dum glacies dissolvitur vi caloris, aqua in varias partes difflit. Ergo calor segregat homogenea.

Respondet hosce effectus, non per se à calore proficisci, sed per accidens. Etenim calor veluti per accidens vasa disrupit, dum ea rarefaciendo, ac dilatando, illorum partes ad invicem divelluntur. Hinc autem effectus est potius continui divisio ex rarefactione nimia proveniens, quam homogeneorum disaggregatio. Unde si vas liquari posset, omnes ejus partes evadent continuæ. Nec dicere debemus, ignem homogenea dissolvere, dum ea liquefacit, & laxat; siquidem non necessario quæ liquantur, ab invicem se junguntur: ut

patet in ære, plumbo, & cæteris metallis, quæ etiam in ipsa fusione consociationem servant, & ad hæsionem suarum partium.

Instabis. Ergo dicendum erit etiam, Calorem per accidens tantum homogenea unire, ac heterogenea segregare; Quatenus calor per se tantummodo calefacit, & relaxat: ex quo per accidens sequitur, ut graviora subsidant, & minus gravia superius trudantur; atque ita heterogeneorum segregatio contingat, & homogeneorum unio.

Confirmatur. Caussa, quæ tantummodo ad effectum concurrit removendo impedimenta, est caussa per accidens. Sed calor concurrit ad unionem homogeneorum, & ad heterogeneorum separationem, tantummodo removendo impedimentum; quatenus nempe rarefaciendo, & relaxando, tollit impedimentum, quo cohiebatur descensus gravium, & ascensus levium. Ergo &c.

Respondetur ad argumentum. Nego consequentiam. Ad Confirmationem, distinguo majorem: Si ad oblationem impedimenti per se sequatur positio effectus, nego maiorem: Si solum per accidens effectus inde habeatur, concedo maiorem; atque sic distincta minori propositione, nego consequentiam. Itaque ad rarefactionem, & relaxationem ope caloris factam sequitur per se semper, & necessario (si nihil aliud violenter obsit), congregatio similium, & dissimilium

secretio. Quare cum calor concurrat ut caussa per se determinata ab obicem illum tollendum, quo prædicti effectus impediuntur; ideo calor caussa dicitur per se illorum effectuum: non quidem immedia ta, quæ eos effectus attingat acti ve, sed mediata, quæ effectum suum procreat, à quo per se, & necessario prædicti effectus profluunt, quotiescumque nihil obstet. Hinc vero patet discrimen hujusce caussæ mediatae ab eo, quod tantummodo conditionem aliquam ponit prærequisitam ad productio nem effectus; conditio enim non est caussa *per se* ejusdem effectus. Ita & Motus est caussa caloris tantummodo *per accidens*, ut initio quæstionis diximus, nam ubi nullum ex corporibus commotis sit *formaliter* calidum, ex motu non sequitur calor.

Objicies 6. Congregare homogenea, & segregare heterogenea, videtur potius tribuendum humiditati, quam calori. Etenim effectus adscribendi sunt potius caussæ proximæ, quam remotæ. Sed caussa proxima illorum effectuum est humiditas. Nam calor non congregat homogenea, nisi liquefaciendo, quod est humidum reddere; sine liquefactione enim nulla similiūm unio, aut dissimiliūm segregatio habetur. Igitur &c.

Respondetur. Etsi calor effectum obtineat segregandi heterogenea, & congregandi homogenea, per rarefactionem, ac humidita tem,

tem , sive potius liquefactionem; nihilominus effectus iste calori est adscribendus, quoniam effectus iste spectatur , ut producendus in alieno subiecto: solus autem calor in alieno subiecto valet hæ præstare.

Objicies 7. ex P. Fortunato. Si calor esset forma accidentalis, esset natura sua penetrabilis, ut cæteræ qualitates. Atqui ex hoc ipso non posset præstare eos effectus , quos à calore experimur. Hi enim sine motu fieri nequeunt: motus autem corpora impenetrabilia requirit. Quod si calor ratione subjecti impenetrabilis est, jam subjectum , & non calor effecta illa præstaret. Nullus adeo esset effectus à calore *formaliter* accepto proveniens. Igitur &c.

Respondetur. Concedo majorem , & nego minorem. Qualitates omnes ex se se penetrabiles esse dicimus , cum unum in quolibet composito extet impenetrabilitatis principium , nempe quantitas , vi cuius & substantia ipsa compositi , & quotquot eidem insunt affectiones sunt impenetrabiles. Cum itaque omnes qualitates inhærent quantitati , quæ & ipsa naturaliter inhæret corporeæ substantiæ, hinc omnis qualitatum actio , quæ naturaliter evenit , in substantia sit : non quod substantia vim activam tribuat qualitatibus , sed quia hæ affectiones , ut sunt in subiecto , sic in illo operantur. Quamvis autem corpuscula calida ad motum procreandum in caloris

propagatione deserviant , tamen calore ipso aer rarefit , & vim suam elasticam exerit , unde corporum divulsio , & perturbata exagitatio caussatur. Quamobrem corpuscula calore *formaliter* sumptu destituta, non possent exhibere effectus caloris.

Postremo ex hucusque dictis juvat expendere plures alios naturales effectus. Primo in animalibus per calorem sequitur virium defatigatio , quia aperitione pororum spiritus calidiores in majori copia exeunt. At in plantis per calorem fit virium refection , quia plantarum textura crassior est , & partes nutritioni convenientes magis rarefiunt , unde & facilius ascendunt , & per canaliculos distribuuntur.

Secundo Calor corpora aliqua distendit , & explicat ; alia vero complicat. Quæ effectuum diversitas ex varia partium textura potissimum repeti debet. Tum maxime ad expansionem corporum confert aer in illis inclusus: ob ipsius enim elasticitatem fit expansio. Alia vero corpora , è quibus aer pene omnis expellitur , complicationem à calore patiuntur ob arctiorem cohaesionem partium solidarum.

Tertio in iis mixtis , in quibus humor non habet firmam cohaesionem cum textura partium , quas afficit , vi caloris humor expellitur , & corpus induratur , ut in luto contingit. In iis vero mixtis ,

in

in quibus humor est tenacior , fit emollitio , ut in cera. Itaque calor ceram emollit , partes illius segregando , quin easdem dissipet; indurat autem lutum , separando ab illius terreis partibus particulas aqueas leviores , quæ non usque adeo cum terreis Partibus cohaerent. Eadem est ratio , cur nimio Solari calore terra , & flumina exsiccentur , & ova aliquando cocta fuerint , ut ex Historia Academiæ 1705. recensent P. Regnault tom. 2. exercit. 1.

Quarto si succo cæpe contusæ manus exquisite imbuas , plumbum liquefactum , ardentesque carbones impune attrectabis. Etenim succus ille poros implens manus , impedit vim plumbi liquefacti , & ardentium carbonum , nec sinit eam vim suam in manum exercere. Ita & illi , qui manibus ignem attracent , aut in ore suo aliquandiu detinent , mixtaram adhibent æqualium partium spiritus sulphuris , salis ammoniaci , essentiæ ros manni , & succi cæpe.

Quinto sphærica pila plumbi involvatur charta , quæ sine plicaturis sit , quantum fieri potest; tum flammæ lampadis exponatur; ea tunc funditur , atque per rimam , quam sibi aperit in charta , guttatum effluit , quin carta comburatur : aut ex Ozanam notat P. Regnault laudatus. Nempe caloris actio libere permeat ampliores charta meatus , nec partibus chartæ vim facit , quod illæ invicem

contextæ sint , sed amplioribus meatus locum præbeant. At vero cum calor plumbeas pervadit partes , quæ licet sint invicem collectæ , tamen non usque adeo sunt contextæ , iccirco in illas agit , easque liquefacit.

Sexto Ferrum calore tumescit , & longius redditur , nec ingredi potest foramen illud , in quod ante frigidum permeabat. Ita Dominus de la Hire cum per trium horarum spatium exposuisset Solaribus radiis æstivo tempore unam ferri normam , invenit eam longiorem evasisse per duas tertias partes unius lineæ. Ita etiam calor auget penduli longitudinem , & frigus illam minuit; unde alteratio efficitur in horologii motibus. Duo pariter frusta marmoris æqualis longitudinis frigido aeri expellantur hiemali tempore ; tum eorum alterum aquæ calidæ immergatur , donec tantumdem suscipiat caloris , quantum nos lingua marmor tangentes sustinere possimus. Si postea unum frustum super aliud collocetur , non amplius illa erunt æqualia , sed quod calefactum est , majoris erit etiam extensionis. Quæ omnia notat citatus P. Regnault. Nimisrum calor vi sua distendit partes corporum , in quæ operatur , cum illa nititur pervadere , & rarefacere , atque subinde ad amplius spatium ea extendit.

Septimo dum aqua in cacabo ebullit , quo crassius est cacabi fundum , eo etiam calidius fit.

Quip-

Quippe ignita corpuscula uberius in fundum crassius penetrantur, & major illorum copia ibidem hæret, & magis illorum actio omni ex parte reflectitur. Dum aquæ calorem primo suscipit, fundum calidius est, ac quando aqua fert. Ignita enim corpuscula non queunt tam facile in aquæ partes penetrare, unde & in fundum ab aqua resistente reflectuntur, atque adeo calorem ibidem augent. Ubi vero aqua ebullit, ignita corpuscula facile per eam penetrant, ac egrediuntur. Est etiam animadversio dignum: Aquana determinatum suscipere caloris gradum, qui augeri nullatenus possit, etiamsi ardentiorem ignem admoveas, ut ex historia Academiæ 1703. notat P. Regnault. Nempe ignita corpuscula jam sibi viam exeundi aperuerunt in calidis aquæ partibus; unde & dissipantur nec majore vi in aquam operantur. Eadem est caussa, cur fundum cacabi, maxime si subtilius sit, minorem habeat calorem, quando aquæ ebullit, ac postquam ebullitio aquæ cessavit. Primo enim exeunt ignita, seu calida corpuscula, quæ post ebullitionem constrictis aquæ partibus in fundum regredì coguntur.

Octavo solidiora corpora ut difficilius calorem concipiunt, sic diutius calida permanent, immo sunt aliis calidiora. Sic ferrum candens est ipso igne calidius, & aurum inflammatum calidius est fuso plumbo. Quippe ea corpora

soliditate sua majora etiam calida, seu ignita continent corpuscula, quæ & in partes corporum agentia, ab illis reflectuntur. Lima dum agit in ferrum, propter majorem istius duritiem, saepe in easdem agit partes; unde ferrum incalescit. Quod si lima in plumbum agat, plumbum non calefit, quoniam illius partes ob minorem duritiem facile ab aliis dividuntur.

Nono pisces moriuntur, quando maximi vigent calores; unde & tunc fontium aquas petunt. Cujus ratio esse poterit, quod terrestres particulæ quæ in cibum sunt piscibus, calidores tunc fiant, sed in aquis paullo ante è Terra eductis sint magis attemperatae. Nivis partes evaporantur, & dissipatione aliquando, etiamsi frigus non minuatur: ut notat Dominus Mariotte in Tractatu de calore, & frigore. Quippe externi aeris motus commovet nivis partes, & aërem illum, qui inter eas continetur, quod fit, ut nitrosæ particulæ inde evolent.

Decimo frustulum carnis, vel avicula trajiciatur parvo veru rotundo coryli. Tum ante ignem exponantur, ita ut illius veru extremitates duobus sævibus politisque fulcimentis nitantur. Eveniet tunc, ut veru quasi sua sponte in gyros agatur, donec caro, seu avicula assa fuerit. Ita P. Kirker, & P. Scotti experimentis comprobarunt, ut in Magisterio uni-

ver-

versali , p. 4. l. 4. Et Dominus Gautier simile instituit experimentum , ut in Bibliotheca Philosophiae ; Et avicula una , cuius pondus erat trium unciarum , decem gyros confecit spatio quinque horarum . Hujus porro ratio est , quod exsiccata per ignis calorem una aviculae parte , hæc levior redditur , unde & cogitur ascendere , cum altera ob majorem sui gravitatem descendit . Quare cum ignis actio etiam istam graviorem partem exsiccaverit ; levioremque altera reddiderit , necesse est hanc ipsam partem elevari , & alteram deprimi . Atque ita circulationes reiterantur .

Hæc de Calore exhibuimus . Nunc ad alias accedimus assertio- nis nostræ partes , quæ circa Frigus versatur .

Probatur prima pars , videlicet Frigus non esse solam caloris privationem . Effectus positivi causam indicant positivam : ex effectibus enim natura causæ cognoscitur . Atqui frigus plurimos exhibet effectus positivos . Ergo frigus non est mera privatio , aut immunitio caloris , sed est aliquod positivum . Minor probatur . Sane frigus immutat sensus nostros , & calorem à corporibus expellit , aquam , & liquores densat , corpora etiam durissima perfringit . Corporis pariter humani partes vi frigoris intumescunt , & glaciei frigus in speculo collectum densat liquorem thermometri . Alia

quoque experimenta postea recen- senda idem ostendunt . E quibus omnibus compertum est , effectus positivos à frigore præstari , nam & in illis positiva frigoris actio reluet . Igitur &c. Frigus vero non esse solam caloris immunitiōnē , seu minorem motū , minoremve agitationem , experimentis etiam probatur . Etenim nitrum commi- nutum , & in minutās particulas discessum , frigidius est se ipso in massa una coadunato : cum tamen ea discessio , ut Recentiores do- cent , fluidum faciat nitrum , & universim ipsi affirmant , fluidum quodlibet esse concitatius solidō . Ita agitatione manus intra aquam frigidam augetur frigefactio , & agitatione nivis circa phialam aqua plenam , aqua in ea existens concipit frigus intensius . Ergo agitationis au- gmentatio aliquando auget frigus ; adeoque &c. Denique frigus esse omnimodam quietem , seu totalem privationem caloris , nec ipsi Recentiores affirmare possunt , quippe inquietū sensus nostros non per- cipere sensibilia , nisi per motū localem , & fluida partes habere jugi motū agitatas : plura autem fluida sunt frigida , & nos tactu frigus percipimus . Igitur &c. Merito proinde Aristoteles lib. 2. de part. cap. 2. ajebat , frigiditatem esse aliquam naturam , non privationem .

Respondent Cartesiani , frigida dici debere eas res , quæ possunt imminuere ordinarium illum mo- tum ,

tum, quem filamenta nervorum nostrorum recipiunt à spiritibus vitalibus. Hinc enim solum apta redditur ratio, cur eodem tempore res eadem uni homini calida videatur, alteri frigida; quia nempe ille fibrillas habet minus agitatas, iste magis, ac agitatæ sint rei illius particulae: quo etiam modo levis fricatio sensum titillationis, voluptatisque in manu efficit, fortior vero sensum doloris.

Contra 1. Si natura frigoris ex effectis spectetur, etsi ejus agitatio minor sit agitatione caloris, non tamen minor est agitatione fibrillarum nostri corporis. Quis enim asseverare poterit, fibras nostri corporis majorem motum habere, quam spiritus illos frigidos, quos à nivibus montium excusso secum trahit frigidissimus Boreas? Quis sibi unquam suadere poterit, tenuissimum, & quasi insensibilem nervorum nostrorum motum majorem esse motu illo, quo frigora intensiora petras ipsas solidiores discedunt. Spiritus vitrioli si misceatur cum sale tartari, illico sic ebulliet, ut aqua vehementi igni admota. At si quis spiritum illum tangat, sensationem frigoris percipiet. Jam vero tunc ea agitatio spiritus vitrioli minor non est profecto motu nervorum nostrorum: quemadmodum & ipsi Recentiores fatentur, commotionem aquæ igni admotæ longe majorem esse motu fibrillarum nostri corporis. Simili ratione quando contingit hominis cor-

pus contremiscere ob conceptum timorem, tunc motus corporis longe major est motu consueto: & quidem tunc nedum motus sensibilis membrorum major est, sed etiam motus insensibilis fibrillarum; una enim est causa utriusque motus. Nihilominus homo ille tunc magnum percipit frigus. Igitur &c.

Contra 2. Dispar est ratio eorum, quæ in responsione dicta fuerit. Fortior enim fricatio contexturam partium disrumpit, partesque saltem, quæ cutem constituunt, ad invicem disjungit, cum levis fricatio manus excitet tantummodo, & ad cutem evocet spiritus animales calidos; & ideo ista voluptatis sensum, illa doloris efficit. Nulla porro partium discussio in simplici perceptione caloris, aut frigoris contingit. Et ideo longe diversa sunt dolor, & voluptas, ac calor, & frigus. Aqua tepida tangenti ipsam manu frigidore appetit calida, quemadmodum etiam, si post contractata manibus nivem injicias manum in aquam tepidam; quippe cum pori manus frigore constricti sint, iccireo crassiores aquæ partes, & frigida corpuscula nequeunt ita agere in manum, sicuti agunt corpuscula calida, quæ subtiliora sunt & non adeo amplos poros exigunt. At si manu calidiore tepidam aquam tangas, tum calor manui connaturalis, tum calida corpuscula in manu contenta, apertis per calorem poris, multum impetuunt à frigore, frigidisque particulis in

Kk aqua

aqua tepida existentibus , atque hinc sensatio frigoris habetur.

Probatur secunda pars , nempe frigoris naturam *formaliter* sitam non esse in substantiali effluvio. Et quantum attinet ad sententiam Atomistarum , atomi frigorificæ pro arbitrio configuntur ; & petimus , quid-nam sit frigiditas ipsa , qua atomi fiunt frigidæ ? Cum nec dici possit , id atomis convenire ratione figuræ , quia atomos sine partibus esse , & tamen figuram habere , prorsus imperceptibile est : ut diximus disp. i. quæst. i. Ab illis autem Recentioribus , qui corpuscula quædam divisibilia proponunt , ut in ipsis naturam frigoris constituant , inquirimus , quidnam sit eorundem corpusculorum frigiditas? Affectio ne indistincta , vel potius distincta ut de calore superius diximus. Tum experientia constat , totam pene aquam frigidam reddi. Non est autem probabile , nec verisimile , tunc aquam ex totidem frigidis corpusculis compa&etam esse. Salini autem , ac nitroxi spiritus siccitati potius inducendæ aptiores sunt ; quin immo & sales ipsi calorem sæpe concipiunt. Igitur &c.

Respondet Pater Fortunatus , corpuscula esse *formaliter* frigorifica per suam figuram , quatenus nempe ab illa habent , ut simul devinciant partes corporum , quibus infiguntur , earumque motum retardent , & sistant. Addit , sensibiles aquæ partes frigidas reddi per corpuscula , quot sufficiunt ,

ut tota aqua quoad sensum frigida à nobis sentiatur : quemadmodum dulcis redditur tota aqua , quæ in vase est , licet non nisi per admixtionem dulcium corpusculorum sachari in ea dissoluti dulcedinem contrahat.

Contra. Ut alias diximus , figura non est activa : tum ex iis , quæ de calore diximus , hæc etiam responsio refutatur. Probandum etiam manet Recentioribus , frigiditatem à sola figura oriri motum retardante , cum sæpe aucto motu frigiditas ipsa augeatur ; unde ea recurrent , quæ adversus Cartesianos exhibuimus. Cum autem omnes partes sensibiles aquæ aliquando frigidæ appareant ; aliquando calidæ si frigus , & calor *formaliter* in corpusculis aquam ingredientibus consistit , hæc ipsa corpuscula , quæ tamen aquæ ex accidenti commiscentur , naturam ipsam aquæ constituerent , adeoque nec aqua esset elementum sensibile , & qui aquam frigidam sentit , non aquam ipsam , sed frigida tantum corpuscula perciperet. Allatum porro dulcedinis exemplum id assumit ut certum , quod in quæstione est. Peripatetici enim ut qualitatem in frigoris communicatione produci asserunt , idem sane & de saporibus , sive dulcedine affirmant.

Probatur tertia pars. Frigus ex dictis quidpiam positivum præ se fert. At hoc , licet in substantia sit , non tamen est quidpiam substan-

stantiale, sed accidentale aliquod, unde modo inest, modo abest, quin substantia ipsa tollatur. Ergo nihil vetat, quo minus, ut de calore diximus, ita hic affirmemus, *Frigus esse formam accidentalem absolutam, quæ nata est densitatem inducere, homogenea, & heterogena simul congregare, & qua calori opponitur, & illum destruit.* Hinc Aristoteles describit, *Frigus, id, quod congregat homogenea, & heterogena simul.* Quod in aqua congelatione apparet; tunc enim frigus constringendo, & condensando, simul unit quæcumque in aqua reperiuntur.

Ne vero postulet quis à nobis, cur ejusmodi descriptiones preferamus, sciant Recentiores, nos iis esse contentos cum naturæ arcana mentis nostræ aciem effugiant, & ultima rerum differentia latitante, eas nonnisi ex peculiaribus effectis definire liceat. Vide, quæ diximus disputation. I. quæst. I. ad objectionem 9. Existentia autem formarum accidentium probatur à Peripateticis, tum Recentiorum opiniones refutando, tum effectus omnes, & experimenta explicando: quod sæpe præstitimus. Ea autem sententia ratione sufficienti probatur, quæ aliorum placita refellit, & phænomenis omnibus explicandis sufficit.

Objicies I. contra primam partem. Non alia ratione hiemali tempore omnia frigore rigent, nisi ob-

Solis distantiam, qui prius propinquitate sua calefaciebat omnia. Sic etiam frigus illud, quod nos in febri agreditur, aliunde non oritur, quam ex spirituum absentia, qui prius præsentia sua internas corporis partes fovebant. Tum quies est sola privatio motus ex nostra sententia. Ergo frigus erit sola privatio caloris.

Respondetur ad primum, in hieme caussam positivam frigoris esse Terram, & Aquam, quarum actio impediabatur in æstate ex nimia Solis propinquitate. Hinc mense Januario majus percipitur frigus, quam mense Decembri; etsi tunc Sol sit nobis propinquior. Hinc pleræque Terraæ partes sunt aliae aliis frigidiores, licet æquatoriter à radiis Solaribus distent: quemadmodum & alii venti frigidiores sunt aliis.

Ad secundum. Caussæ positiva frigoris in febri sunt humores frigi, qui propriam actionem exercent in partibus interioribus nostri corporis, dum ad exteriora se se recipiunt spiritus calidi, qui sua præsentia humorum illorum actionem prohibebant, vel remittebant.

Ad tertium. Dispar est ratio. Quippe exhibuimus effecta positiva à frigore præstita. At vero Cartesiani, qui corporum quietem esse quidpiam positivum contendunt, assignare non possunt effectum positivum à quiete provenientem: ut dicimus disp. 9. quæst. I.

Objicies 2. contra secundam.

Effecta illa positiva, quæ à frigore præstari diximus, demonstrant causam positivam. Sed nulla causa positiva probabilius constitui potest, quam atomi frigorificæ; vel saltem spiritus salini, ac nitrosi. Frigoris igitur origo, & natura in hisce particulis est constituenda.

Respondetur, utique affecta illa demonstrare frigoris caussam esse positivam. Sed male colligunt inde Atomistæ commentitias illas frigorificas atomos esse necessarias. Ita & corpuscula frigida in frigoris communicatione saltem sæpe diffundi non inficiamur. Sed in isto substantiali effluvio frigoris natutram esse constituendam nihil est, quod demonstret; immo vero ratio in oppositum est, ut diximus: ac præsertim salinas nitrosasque particulas saporis, & siccitat potius conferre credimus, quam frigori.

Objicies 3. contra tertiam. Frigus saxa disrumpit, membra dissolvit, lacrymas ab oculis exprimit, & pituitam à cerebro, quæ per narres effluit; & in sanguine è venis emissis separat terrestres partes ab aquosis, & biliosis, atque illas in imum dejicit, & has in summum tollit. Sic etiam sal, & lutum à frigore, & humido dissolvuntur, & in media aeris regione vi frigoris congregantur inter se vapores, & ab exhalationibus segregantur. Ergo frigus vi pollet separandi homogenea ab heterogeneis.

Confirmatur. Contrariarum causarum contrarii sunt effectus. Cum

ergo actio congregandi adscribatur calori, non potest eadem attribui frigori, quod est calori contrarium.

Respondetur. Quemadmodum calor potest per accidens etiam heterogena congregare, è contra frigus eadem segregare poterit. Per accidens itaque frigus vasa disrumpit, quatenus cum vim habeat condensandi, & constringendi nimium illorum partes, istæ ab aliis scanduntur, dum eas secum trahere aglutinatas non queunt. Ob dissolutionem humoris, quo invicem necabantur, membra dicuntur frigore solvi, quia spiritibus, & calore ad interiora refugientibus, membra rigent, & collabescunt. Lacrymæ ab oculis exprimuntur, & pituita à cerebro, quia dum partes crassiores, & solidiores per congelationem, & condensationem comprimuntur, tunc partes tenuiores coguntur exire. Qua etiam ratione soli vapores constipantur in media aeris regione, & exhalationes compressionem effugientes exeunt. Idem in sanguine contingit. Sal, & lutum revera à frigore non dissolvuntur, sed tantum ab humido; unde videmus sal dissolvi aqua, tum frigida, quam calida; dicuntur tamen à frigido dissolvi, ratione humiditatis, quæ solet illi esse connexa.

Ad confirmationem. Potest idem effectus à contrariis procedere, quando pluribus & diversis modis obtineri potest, ut res

res se habet in homogeneorum congregacione, quæ affici potest & per rarefactionem, & per condensationem. Cæterum aliud est, sola homogenea congregare, quod caloris proprium est, aliud vero, congregare homogenea, ac heterogenea simul, quod convenit frigori.

Instabis ex P. Fortunato. Paradoxum est, eumdem effectum à caussis contrariis per contrarias actiones posse produci; unde posset quis etiam dicere, calefactionem manus æque effici posse tam à glacie, quam ab igne. Deinde ex data responsione sequitur, frigus non nisi per accidens congregare homogenea, & heterogenea, id enim præstat, partes simul devinciendo: sicuti diximus, frigus per accidens disrumpere vasa, quatenus partes eorum nimium constringit. Denique effectus frigoris contrarii sunt, non tantum dissimiles, ut congregare sola homogenea, quod caloris proprium esse diximus, & congregare homogenea, & heterogenea simul, quod frigori attribuimus. Igitur &c.

Respondeo ad primum. Quotiescumque effectus, qui contrariis actionibus à contrariis caussis præstari dicitur, non novam rei productionem præ se ferat, sed ad genus tantummodo pertineat causæ efficientis, diversisque modis exhiberi possit, nemini sane id paradoxum videri poterit. Ita in nostra, ut homogenea congregen-

tur, satis est, si invicem colligantur. Id porro condensatione fieri potest, & etiam rarefactione, nam ubi rarefactio contingit, homogenea ab heterogeneis suæ natura separantur, quare illa in unum confluunt, locumque suæ gravitati correspondentem petunt, dum hæc disperguntur. Quidquid igitur in homogeneorum congregacione evenit, id pertinet ad genus caussæ efficientis; & diversis modis præstari potest. Sane pleraque à sordibus mundantur & ignis ope, & etiam aqua exhibita, cui cineres sint admixti; hic enim effectus non nisi efficientem caussam connotat, diversisque potest modis exhiberi. At vero non potest manus æque calefieri ab igne, & à glacie; nam in nostra sententia calefactio manus novam caloris productionem præ se fert, in Recentiorum autem opinione talem partiem agitationem, aut corpusculorum effluvium connotat, quæ à glacie oriri non possunt. Contra Sol calorem procreans, valer humida linteal exsiccare: quod idem præstat ventus Borealis, qui frigus causat; in ea nempe exsiccatione non aliud ipsi Recentiores admittunt, nisi motum localem. Cæterum, ut jam diximus, iterumque repetimus, contrarii sunt effectus, qui à calore, & à frigore præstantur. Calor enim ita congregat homogenea, ut simul ac semel ab illis heterogenea segreget, atque divellat; frigus è contra ho-

mogenea simul, ac heterogenea congregat, & unit. In quo manifesta apparet oppositio, nam in prima caloris actione segregatio heterogeneorum contingit, in altera vero oppositum. Neque talem oportet adstruere oppositionem, quam P. Fortunatus commentatur, quippe hæc non consonat experimentis, & quæ à nobis constituta est, abunde sufficit.

Ex iis autem, quæ de calore diximus, neque hic repetere vacat, colligitur homogeneorum, heterogeneorumque simul congregatiōnē dici debere effectum frigoris, non per accidens, sed per se. Frigus sane per se rerum condensatiōnē, & unionem efficit, quæ corporum etiam diversæ rationis congregationem, coadūnationemque per se inducit; nisi forte ex accidenti aliter eveniat. Recte subinde & caloris prius, & frigoris nunc descriptio constituta est.

Ex dictis procedimus ad rationē reddendam plurium naturallūm effectū. Quoniam frigus partes corporum densat, & constringit, cadavera in locis Borealibus etiam per plures menses servantur incorrupta. Stramen exhalationes calidas terræ impediendo, ne exeant, promovet calorem, & fermentationem in agris: ac vicissim frigidas exhalationes in nive conservando, extēnumque impediendo calorem, nivem diutius servat. Calidus potus *Thè* sistit calorem, & effervescentiam sanguinis

post copiosiorem sumptionem vi- ni, quia aperit pōros, unde spi- ritus intra massam sanguinis circu- lantes, per evaporationem abeunt. Massa fermentacea sali commixta, & pedi applicata, sistit inflam- mationem pedum, & farinea tri- tieea, aut charta cœrulea, mem- bris crysipelade inflammatis medetur, quia per salia, & per fa- rinam subtilem particulae imbibun- tur, sive humores morbidi, qui etiam desiccantur. Spiritus diffici- lius conglaçiantur; quoniam multa in se continent calida corpuscula, & partes sulphureas. Corpo- ra semel congelata, & subito per calorem resoluta, subito putres- cunt, quia per frigoris constrictio- nem semel turbatus fuit ordo par- tiū; Atque hinc calor fortius eas dissolvit, unde & facilis pu- trefactio habetur. Membra frigo- re constricta, si subito admovean- tur igni, aut calori, multum, & cum magno dolore intumescunt, eo quod turbatis frigore partibus, facilis etiam calor poros aperit, & calida subeunt corpuscula; par- tesque subtiliores in carneis mea- tibus existentes, jam antea per fri- gus discussæ, facilis à crassiorib- us separantur; unde ex illarum partium rarefactione membra intu- mescunt. Membris frigore lesis no- civus est calor vehemens, quia tur- batis jam à frigore partibus, major fit illarum agitatio, & commotio per vehementem calorem. E contra vero si membra frigore læsa

laventur aqua gelida, aut nive, remedium accipiunt, quia fitus partium semel turbatus æquali motu restituitur in locum suum, aut certe per novum motum partium elicetur calor vitalis, qui moderato motu concutiendo partes restituuntur. Membris frigore contractis, si subito admoveantur igni, imminet gangrenæ periculum, eo quod gangrena est species quædam fermentationis, & putrefactionis. Glacies frigidior appetet marmorem; nam ubi glaciem manu attrectaveris, ea colliquescit, & illius adeo particulæ per poros manus penetrant, ac calida intus repellunt corpuscula in manus superficie prius extantia. Vultus, ac manus hominis minorem à frigore impressionem suscipiunt, quam cæteræ partes humani corporis, quod illarum superficies durior sit, compactior, ac solidior. Agent animalia frigore, quia spiritus animales ad interiora compulsi densantur, nec subinde motum illum attribuunt corporeis organis, qui necessarius est. Media aeris regio longe frigidior est infima regione, in qua nos vivimus; Quippe frigidorum vaporum maxima ibi copia extat, quæ radiis Solaribus non agitur. Eadem de caussa intra Tropicos æstivo tempore montium cacumina nivibus operata sunt. Glacies faciliter liquescit intra aquam tepidam, quam si prope ignem ponatur. Etenim aqua imbibit particulas salinas, &

nitrosas, quæ siccitate sua glaciem efformant, unde aquæ partes facilius dissolvuntur; Sed & subtiles aquæ particulae in glaciem penetrantes eundem effectum procreant. Ita nix, & glacies faciliter dissolvuntur in recipiente exhausto machinæ pneumaticæ, quam in libero aere: ut notat P. Regnault t. 2. pag. 10. Violentus enim ibi subtilis materiae motus partes nivis, & glaciei fortius succutit, ac commovet. Fructus gelu coacti si intra aquam frigidam calido in foco ponantur, ad pristinum redeunt statum, quoniam tunc aquæ illorum poros pervadens, moderatam iisdem agitationem communicat. Contra vero si igni exponerentur, violenta ignis actio fibras fructuum discinderet. Cum plantarum internæ partes frigore nimis constringuntur, & illarum cortex cooperit pruina, quæ poros occludit; succi, quorum circutatio impeditur, partes rariores, & spiritosæ, quæ egredi ut prius non queunt, & internus aer, qui per poros exire non potest, omnem vim suam exerunt, ut egrediantur, & inde extendunt plantarum fibras, plantasque dilatant, atque quo facilius patet exitus, egrediuntur, & plantam ibidem dividunt, maximo etiam cum impetu, ac strepitu.

QUÆSTIO TERTIA.

De Raritate, & Densitate; & quomodo fiant?

Calorem diximus esse potissimum Raritatis caussam, ut Frigus Densitatis. Quæ duo tot tantisque experimentis luculentissime demonstrantur, ut nullus maneat dubitationis locus. Raritatis igitur, & Densitatis notionem impræsentiarum nitimus investigare. Qua in re pro more suo plurimum inter se dissident, & altercantur Philosophi.

Democritus primum, Epicurus, Gassendus, aliquie Atomistæ, cum introspersa corporibus omnibus spatiola vacua supponant, illorum constrictione, vel ampliatione corpora condensari, vel rarefieri arbitrantur. Quod exemplo spongiae nunc manibus compressæ, nunc dilatatae possumus intelligere; quamquam aer certe subeat spongiae meatus. Unde Lucretius ex inæquali corporum gravitate, quæ diversam raritatis, vel densitatis rationem sequitur, colligit rarefacta corpora non repleri materia, sed inania spatia intercipere. *Nam si*, inquit lib. i. de Rerum natura.

*Nam si tantumdem est in lana glo-
mere, quantum
Corporis in plumbo est; tantum-
dem pendere par est;*

*Corporis officium est quoniam pre-
mere omnia deorsum:
Contra autem natura manet sine
pondere inanis.*

Alii vero Philosophi, qui vacuum omne rejiciunt, in explicanda raritatis, & densitatis origine, ad solius æthereæ substantiæ motum, & ingressum configiunt, ut illa corpora rara dicantur, quorum partes ex uberiori, ac fortiori subtilis æthereæ substantiæ ingressu dilatatae fuerint; densa vero sint illa, quæ ex debiliori, vel etiam impedimento subtilis substantiæ motu partes habent magis unitas, vel constipatas. Quare ingressus ætheris in poros rei facit raritatem, egressus ætheris densitatem. Ita passim sentiunt Recentiores. Quibus plerique Peripatetici adhærent, asserentes novam substancialiam in raritate acquiri, in densitate vero deperdi; unde per ingressum, aut egressum substancialium corpusculorum raritatem, & densitatem exponunt.

Sunt alii ex Peripateticis, qui penes acquisitionem, aut deperditionem quantitatis, vel qualitatis, raritatem, ac densitatem haberi arbitrantur. Sed communis in Peripato sententia docet per raritatem, ac densitatem aliud non acquiri, nisi novam extensionem localem, majorem, vel minorem. Ut eadem numero materia nunc majorem habeat localem extensionem, & rara tunc sit; nunc sub minori locali extensione existat, & densa dicatur.

Rarum porro describitur ab Aristotele, illud, quod habet *parum* materiae sub magnis dimensionibus. Densum vero, quod habet multum materiae sub parvis dimensionibus. Quæ quidem descriptio-nes ab omnibus approbantur. Sed illas unaquæque sententia sibi adaptare contendit.

Aristoteles autem libr. 4. Physicorum, t. 84. rari, & densi natu-ram explicaturus; quatuor physica principia præmittit, & statuit. Horum primum est: *Una est materia contrariorum.* Contraria enim nata sunt fieri circa idem. Alterum est: *Omne quod est in actu, ex eo fit, quod est in potentia.* Omnis scilicet forma consurgit ex præsupposito subjecto. Tertium principium: *Materia naturaliter non est à contrariis separabilis re, sed ratione tantum.* Quartum prin-cipium: *Materia ex eo quod modo est sub uno, modo sub altero ex contrario, non est alia, & alia, sed eadem secundum substaniam invariata.* Alioquin enim non una, & eadem esset materia contrariorum.

Ex primo, & quarto principio subinfert Aristoteles, eamdem quantitatem & materiam esse posse sub magna, & parva exten-sione: quemadmodum nunc suscipit calorem, nunc frigus. Ex tertio principio colligit Philosophus, ma-teriam posse concipi secundum se se cum omnimoda indifferentia ad quamlibet extensionem: sub quo

Tom. II.

conceptu materia non sibi vindicat hanc, vel illam determinatam ex-tensionem localem.

Dicimus, in Physicis admitti posse genus Raritatis, & Densita-tis, quæ non aliud præ se ferant, nisi majorem, vel minorem loca-lem extensionem.

Probatur 1. Mobile, quod in-tra unius horæ spatium quingen-tos, verbi gratia, passus acquirit, idem si duplo velocius moveatur, acquiret passus mille. Ergo idem mobile per tarditatem quingentis, per velocitatem millenis partibus correspondeat intra eamdem horam. Igitur à simili affirmare possumus idem contingere corpori, ut per ra-ritatem majori, per densitatem mi-nori spatio respondeat, & coæque-tur: & quidem absque interjectio-ne corpusculorum, quemadmodum in tarditate nec morulæ, nec inter-jectum quidpiam habetur ut in 9. disp. q. 1. Quare sicuti sine istis in-telligitur mobilis intra idem tem-pus coæquatio successiva nunc ma-jori, nunc minori spatio; ita sine illis possumus intelligere simultaneam coæquationem corporis cum ma-jori, aut minori loco per eam-dem entitatem, sed per extensi-rem diversam.

Respondent Pater Fortunatus, rationem hanc ineptam esse, quia ex principio æque, vel etiam magis ignoto procedit; magis enim latet, in quonam velocitas, & tarditas motus formaliter posita sit, quam per quid formaliter corpus

densem, & rarescat.

Contra. Hæc responsio falsæ inititur suppositioni. Supponit enim, rationem nostram procedere ex principio ignoto, cum tamen re ipsa innitatur principio certo, non tantum nobis, verum etiam eidem P. Fortunato. Duo enim distinguit & ipse, ubi de velocitate, & tarditate motus disseritur, nempe ajet motum sententiam, quæ caussam affirmat velocitatis, & tarditatis motus, & assertionem negantem, quæ insiciatur eas motus affectiones à morulis interpositis, aliisve interjectis corpusculis oriri. Primum illud incertum, ignotumque est; alterum velut certum habemus; idemque docet etiam P. Fortunatus. Ratio porro nostra non illi primo, sed huic posteriori innititur: ut manifeste patet iis, qui nostram probationem considerare velint.

Probatur 2. Definitiones rari, & densi, proprio, ac rigoroso sensu acceptæ, non videntur subsistere, nisi raritas, & densitas solam præ se ferant majorem, aut minorem localem extensionem. Ubi enim intelligitur ingressus, & egressus subtilis ætheris, non jam rarum haberet parum materiæ sub magna dimensione, nec densem haberet multum materiæ sub parva dimensione. Sed & in raro multum extaret materiæ, & in denso parum. At vero *parum*, & *multum* in illis definitionibus non sunt adjuncta extensionis, sed entitatis, quæ par-

va, & magna dicitur in priori ad dimensiones, quatenus ad ipsas comparatur. Sic dum materia extensa palmariter evadit semipalmaris, dicitur magna respectu hujus novæ extensionis, quia capax est extensionis majoris, quam prius habuit; dum vero fit ex semipalmari palmaris, dicitur parva respectu novæ extensionis, quia capax est iterum illius minoris. Semper tandem eadem, & una est.

Quamobrem Aristoteles loco laudato dicebat: *Est autem etiam corporis materia magni, & parvi eadem. Manifestum vero est. Quando enim ex aqua aer fit, eadem materia, non aliud aliquid amplius accipiens facta est, sed id facta est ab eo quod erat potentia. Quare & magnitudo, & parvitas sensibilis molis, non assumente aliquid materia extenditur, sed quia potentia est materia utriusque.* . . . *Quare est idem densem, & rarum, & una eorum materia ... Non enim quia intermititur, ipsum minus, aut magis est, neque est accipere flamme magnitudinem aliquam, in qua & albedo, & caliditas non insit. Comparat ergo Philosophus materiam rari, & densi, materiei calidi, & frigidi, quæ eadem semper est tam sub una, quam sub altera affectione. Declarat etiam, corpus extendit raritate, & densitate constipari, non quia extranea corpuscula admittat, vel emittat, sed quia parvitatem in magnitudinem, aut hanc in illam mutat; declarat, inquam, id ipsum*

po-

postea Philosophus exemplo arcus, qui curvatur magis, aut minus; non quia partes alias accipiat, vel amittat, sed quatenus in iisdem partibus maiorem, minoremve curvitatem acquirit, priore desperita.

Hoc adeo in loco Philosophus adstruit raritatem, & densitatem, quæ in sola majori, ac minori extensione locali consistant. Quamquam in Categoriorum cap. 4. vulgariter aliam raritatis, & densitatis notionem exhibuerit dicens: *Densum quidem ex eo quippiam est, quia partes ipsius sibi ipsis propinquæ sunt. Rarum autem ex eo quia à se distant.*

Respondet P. Fortunatus, subtilem illam substantiam, cuius ingressu, & egressu raritas, & densitas habentur, omnino extraneam esse corpori, nec ad ipsum *essentialiter* pertineri; adeoque semper verum esse, in raro parum haberi materiae, multum in denso; id enim non de quacumque materia intelligendum est, sed de illa tantum, est qua corpus *essentialiter* coalescit.

Contra. Si rarum fiat corpus extranea nova corpusculorum materia accidente, non una, eademque materia rara, densaque fieret, sed longe amplior in raro corpore esset materia, quam in denso. Etsi autem materia corpori essentialis semper eadem esset, huic sane determinatae spatii partes eadem semper corresponderent, & partes spatii, seu loci, quæ in raritate ad majo-

rem dimensionem, seu localem extensionem accedunt, non illi materiae commensurarentur, sed alteri numero distinctæ, quæ aetheris, vel acris, vel aliorum substantiarum corpusculorum est. Proindeque rigoroso, ac proprio sensu rari, densique definitio nequaquam subsisteret. Inficiamur itaque, solam materiam corpori essentialem tunc esse considerandam.

Probatur 3. Extant in Physicis corpora per se, & sui natura densiora, sicut & corpora quædam rariora. Et certe rarissimum elementorum ignis est, densissimum terra. Semper enim ignis se explicat, & terra se contrahit. Quod autem semper fit natura fit. Rursus corpora rariora eadem perfectiora sunt; accedunt enim magis ad ignem simplicium corporum perfectissimum. Nunc sic ratio cinamur. Si corpora essent rara, vel propter vacuola, vel per immissionem corpusculorum; jama corpus rarum deberet intra se, tanquam naturæ suæ partem admittere vel multum ex non ente, sive vacuo vel multum de alieno ente, sive substantialibus illis corpusculis. Hoc absurdum est. Ergo admittenda est raritas in sola majori locali extensione consistens. Major probatur. Quod per se est rarum per se quoque est omne illud, à quo in ratione rari constituitur. Atqui corpus rarum consti tueretur tale per vacuola, aut corpuscula illa. Ergo corpus rarum esse per se vel vacuola, vel corpuscula

cula illa. Atque adeo inde colligitur, substantiam unam esse alterius substantiæ proprietatem, aut non ens esse proprietatem entis. Ignem etiam esse ex sui natura densissimum corpus, quia ex sui natura exposceret corpuscula illa, per quæ densissimum redditur. Quæ omnia falsa sunt, & absurdâ. Igitur &c.

Hanc ipsam sententiam defendit Scottus in 4. d. 12. q. 4. lit. F: licet prius ut probabilem exposuerit alteram opinionem, quæ per ingressum, & egressum corpusculorum raritatem, & densitatem fieri tradit; de qua postea dicturi sumus.

Respondet P. Fortunatus, raritatem, & densitatem nullatenus pertinere ad essentiam corporis; adeoque dici non posse, corpora quædam esse *per se*, & ex sui natura rariora, vel densiora: cum istæ affectiones ex accidenti convenient corporibus. Alioquin eodem argumento probare quis posset, corpus *porosum* esse impossibile, quippe deberet tunc, tanquam naturæ suæ partem admittere, vel multum de non ente, sive vacuo, vel multum de alieno ente, sive substantialibus corpusculis.

Contra. Tria invicem diversa oportet distinguere; primo prædicta essentiam, seu naturam rei constitutæ; secundo affectiones, quas ipsa rei natura expostulat, & vindicat sibi, tertio affectiones, quæ mere ex accidenti convenient rei. Dum dicimus, extare corpora *per se*, & ex sui natura rariora, sensus

est, majorem hanc raritatem à talium corporum natura expostulari; atque vis hæc exposcens, seu exigens affectiones illas est ejusdem naturæ proprietas, licet actualis raritas sit accidens: quo modo risibilitas est proprietas hominis, et si actualis risus sit accidens. Ergo si raritas fieret beneficio vacui, aut corpusculorum ingressu, sequeretur eorum corporum naturam expostulare sibi vel multum de non ente, vel multum de alieno ente, atque adeo vel non ens, vel alienum ens pertinerent ad eorundem naturam, ut quidpiam ad illam consequens, atque ex ejusdem naturæ vi corporibus ipsis conveniens: quod absurdum est. Dispar porro est ratio de *porositate*. Nam porositas est mera capacitas aliud recipiendi; quare corpus porosum, ut tale, nec vacuum, nec corpuscula extraea dicit.

Ex dictis colligitur raritatem non præ se ferre novam quantitatem. Hæc enim nova quantitas nullum haberet subjectum, quia nec potest cum alia quantitate penetrari, nec nova accedit substantia. Sed nec raritas, & densitas dicunt possunt qualitates; quippe nihil est, quod id ipsum demonstret.

Objecies contra 3. assertionem. Ex data raritatis notione sequitur, unam, & eamdem corporis partem simul esse in duobus locis: & ex proposita densitatis explicazione fit duas partes ejusdem corporis simul esse in eodem loco; & quidem na-

naturaliter. Sed primum illud præ se fert replicationem, alterum vero penetratōnem: Quæ duo naturaliter sunt impossibilia. Omnino igitur repugnat exposita notio raritatis, & densitatis. Major probatur. Si totum corpus rarefactum occupat locum duplo majorem, necesse est, ut duplo etiam majorem locum occupent singulæ partes. Locus autem duplo major est duplex locus æqualis, seu adæquatus. Ergo &c. Simili ratione si corpus condensatum occupat locum dimidio prioris loci æqualem, idem servata proportione dicendum est de singulis ejus partibus. At locus ille dimidius non est æqualis toti corpori sed tantum medietati ipsius corporis. Ergo si nihilominus totum corpus est in eo loco, duæ corporis medietates erunt simul in eodem loco, qui est æqualis cuilibet scorsim; ergo erunt simul compenetratae in eodem loco.

Confirmat. Partes corporis ante condensationem non erant penetratae, sed una extra aliam erat in loco sibi adæquato. Ergo quantumvis novum modum in condensatione acquirant, tamen nulla pars potest constitui in loco minori, quia non potest esse, nisi in loco sibi adæquato, nec possunt duæ partes collocari in eod. loc. quia penetrarentur. Ergo &c. Simili ratione partes poris ante rarefactionem erant singulæ in loco sibi adæquato, quia non erant compenetratae. Ergo quamvis no-

vum modum acquirant, nulla tamen ex illis potest constitui in loco minori, quia non potest esse, nisi in loco sibi adæquato, nec constitui potest simul in pluribus locis. Igitur &c.

Respondetur, argumentum procedere ex falsa imaginatione. Ii enim, qui contra Peripateticos ita ratiocinantur, putant, corpus per se extensum, verbi gratia, palmariter, vel transire, dum rarefit, ad bipalmarem extensionem: quod quidem sine replicatione intelligi non potest; vel transire, dum densatur, ad extensionem semipalmarem, quod sine penetratione non potest. Ex hoc ipso autem argumentatio errat in suppositione. Supponit enim, totum corpus, atque illius partes ex se se determinatam expetere extensionem, cum tamen abstrahendum sit ab extensione, & considerandum sit corpus in sua entitate ad hanc, vel illam extensionem indifferentem. Quemadmodum in motu diximus intelligi. Unde exemplo motus res tota declaratur, ut in prima probatione diximus. Corrigenda ergo est imaginatio. Ut enim frigidum sit calidum, non retinendo frigus, sed mutando frigus in calorem; Ita poterit corpus palmariter extensem evadere modo bipalmare, modo semipalmare, non retinendo palmarem extensionem, sed eam amittendo, commutando in maiorem, minoremve. Hinc sublata ea falsa suppositione, apparer mani-

nifestum discriminem raritatis à replicatione, & densitatis à penetratione. Replicatio enim est, qua corpus, verbi gratia, palmare; manens palmare, duplice locum palmarem occupat. Penetratio est, qua duo corpora, verbi gratia, palmaria, dum adhuc palmaria sunt, unum locum palmarem ingrediuntur. Longe aliter autem res se habet in re præsenti. Nam neque pars ulla corporis, neque totum corpus, priorem extensionem retinet. Sed pars, quæ erat semipalmaris, per raritatem evadit palmari, adeoque replicatione opus non habet, ut tenet palmarem locum; & pars, quæ erat palmaris, per densitatem transit in semipalmarem, adeoque penetratione non eget, ut semipalmari loco æquetur: quemadmodum id ipsum in motu veloci, & tardo intelligunt, & fatentur ipsimet Recentiores.

Dum vero dicitur, materiam palmariter extensam esse in loco sibi æquali, & adæquato, à quo etiam commensuratur; jam supponit argumentum, materiam ipsam ex se se localiter illam extensionem habere, cum tamen ex se nec palmaris sit, nec alterius mensuræ; palmaris enim redditus per extensionem ipsam, quæ sola rem denominat localiter extensam, ac metiri potest. Quare quemadmodum in motu commensuratio motus cum tempore non ex motu ipso præcise, sed ex multis aliis repeti debet, verbi gratia,

ex potentia motiva majori, vel minori, ex varia moventis applicacione, ex medii resistantia. Ita licet quantitatis sit ratio essendi in loco impenetrabiliter, tamen commensuratio loci non ex ipsa præcise, cum ex se se abstrahat à determinata extensione, sed ex multis aliis petenda est, nempe ex calore, ex frigiditate, atque ex aliis materiae dispositionibus, juxta quarum varietatem substantia etiam majorem, vel minorem respicit locum, tanquam sibi adæquatum. Ita & extensio in ordine ad locum sequitur extensionem corporis in ordine ad se, sed quatenus ista dispositionibus variis afficitur. Unde unus locus, qui est adæquatus corpori sub dispositione frigoris, non est illi adæquatus sub dispositione caloris.

Colligite ex diversa contextura partium oriri, ut unum corpus referri possit, & non aliud; vel ut unum corpus magis, seu facilius refiat, quam alterum. Démum distinguere oportet, ut alias diximus, extensionem corporis in ordine ad se, quæ in pluralitate partium consistit, rectaque illarum dispositione, ac complexione, & extensione corporis in ordine ad locum, quæ raritas, est, vel densitas, cum partium majorem, vel minorem præse fert unionem, earumque transitum ab extensione majorem ad minorem, vel vicissim. Prior extensio semper convenit corpori, etiam Corpori Christi Domini in Eucharistia existenti. Sed non secunda, quæ nec

nec spiritibus conveniri potest, nec substantiam ipsam afficit secundum se se, quemadmodum prior illa extensio, quæ proinde se habet ut intensio qualitatis ad qualitatem ipsam.

His pro nostra assertione constitutis, arbitramur, falsam esse Atomistarum opinionem, qui putant raritatem haberi beneficio vacui, & densitatem fieri per spatiolorum inanum constrictiōnem. Nullum enim experimentum, nulla fatio ostendit, hæc inania spatiola inter corporis rari partes esse admittenda: ut speciatim declarabimus d. 7. q. 4. Ergo hæc pro libito conficta sunt. Immo vero experientia docet omnes aquæ effervescentis partes esse calidas & raras. Quemadmodum etiam dum lux diffunditur, totus pene aer illuminatus appetet: cum tamen non fiat tunc densior, nec vacuum possit illuminari, ergo nec in aqua effervescere, nec in aere extant inania illa spatiola. Tum raritas, & densitas in quantitate permanente, seu in corpore, æquivalent prorsus, ac correspondent velocitati, & tarditati motus, qui ad quantitatēm successivam pertinere dicitur; adeo ut motus velox dicatur, aut tardus: quemadmodum corpus dicitur densus, aut rarum. Sed in motus velocitate non intervenit ulla morula, quæ vacuolis correspondeat: ut diximus in disp. præced. quæst. 3. Ergo in corporis raritate spatiola inania non interveniunt.

Ex hac ipsa ratione evincitur etiam, raritatem non fieri per quamdam partium extractionem, nec densitatem præseferre partium penetrationem, maxime cum quantitas, quæ est affectio corporis naturalis, nullatenus per naturæ vires pati possit penetrationem.

Quod attinet vero ad opinionem illam, quæ docet, raritatem, & densitatem fieri per ingressum, aut egressum subtilis ætheris, vel aeris, aut aliorum substantialium corpusculorum; si rarefactionem, & condensationem lata significatione, & vulgari sensu accipias, facile concedimus id ipsum contingere. Multa sane experimenta rem ostendunt. Nam in aqua calida, & ebulliente multam aeris admiscetur: ut ipso sensu percipimus. Quod & in plurimum aliarum rerum effervescentia conspicimus. Plura etiam corpora per ingressum substantialium corpusculorum aliquando dilatantur, & per illorum egressum perstringuntur: ut in spongia evenit. P. Fortunatus pluribus contendit, doctrinam istam componi non posse cum præced. nostra assertione, & nostrarum probationum vim enervare. Sed perperam. Prior enim assertio veram aperit, & philosophicam raritatis, densitatisque ideam, hæc autem doctrina latiore, & vulgarem exhibet illarum significationem: ut tradidit etiam Mastrius, d. 4. de Generatione, questio 2. n. 8. Porro duo hæc invicem cohærere, nemo non videt, nisi qui veram à vul-

vulgari, propriam à latiore significationem minime secernit.

QUÆSTIO QUINTA.

De Humiditate, & Siccitate: Seu de Fluiditate, & Soliditate.

U B I

Nonnullæ aliae corporis naturalis affectiones explicantur.

HUmidum, seu Fluidum ab Aristotele dicitur lib. 2. de gen. & corr. t. 9: id, quod alieno facile termino terminatur, difficile suo. Siccum vero, sive Solidum, id quod suo facile termino terminatur, difficile alieno. Aqua enim, & humores reliqui, & multo magis aer corporum ambientium figuris se se accommodant, quare terminum, ac figuram exteriorem certam per se se non habent, sed eam à continentibus mutuantur. E contra vero Sicca per se sumpta, quæque per continuationem in massam aliquam unita apparent, ut terra, lignum, lapis, metalla, cæteraque similia, propriam sibi figuram vindicant, neque eam facile mutant, immo & corpus continens sibi saepe accommodant. Ratio horum est, quia humiditatis corpori assert fluxibilitatem quamdam, quæ in causa est, ut corpus difficiliter proprios terminos, & figuram retineat, faciliter vero accommodet se se figuræ corporis continentis. At Siccas præ se fert soliditatem quamdam, & consistentiam, per quam corpus

resistit, ut aliena figura adaptet se se & facile retinet figuram propriam.

Recentiores autem Philosophi arbitramur per allatas definitiones male confundi humidum cum fluido, & solidum cum sicco. Nam omnia quidem humida fluida sunt, non tamen vicissim omnia fluida humida quoque esse debet: quemadmodum etiam omnia corpora solida sunt sicca, seu arida, sed non vicissimi arida, vel sicca corpora, dura, aut solida esse debent. Hinc fluida à Recentioribus ea dicuntur, quorum partes in pereundi, intrinseco, perturbatoque motu sunt posita, ut facile dividiri, & in quamcumque partem agitari possint, sicuti sunt partes aquæ, & ignis. Humida vero corpora dicuntur illa, quorum partes non solum facillime dividuntur, ac perturbato motu agitantur, sed etiam ubi alterius corporis superficiem attigerint, vel poros penetraverint, illis adhaerent, & madorem tribuunt, ut aqua. E converso firma, vel solida corpora sunt, quæ partes habent mutuo connexas, difficile separabiles, ut lapis.

Nos vero Humiditatem minime secernimus à Fluiditate, nec Siccatatem à Soliditate. Id enim consenteaneum est rationi, atque experimentis; nisi quis velit expositas à nobis humidi, & siccæ definitiones suo tantum sensu usurpare, non nostro, Rem omnem aperiet argumentorum solutio.

Objicies cum Recentioribus.
Flu-

Plurima corpora sunt fluida, in quibus tamen nulla humiditas reperitur. Plurima item corpora siccata sunt, quamvis nulla soliditate sint praedita. Ergo humiditas à fluiditate, siccitas à soliditate distinguitur. Probatur antecedens. Ignis ipse fluidissimus est: non tamen humidus; alienis licet terminis facile terminetur, difficile proprio. Sic aer vase vitro inclusus, ab eo terminatur, & flamma configurationem exteriorem recipit à fornace. Pulvis quoque, & cinis, quæ sicca corpora sunt, difficile proprio terminantur termino, facillime alieno. Ita se habent etiam metalla in pulverem comminuta, facillime enim se se accommodant continenti, quamvis omni prorsus humiditate careant. E converso ignis siccus est, nec tamen solidus. Igitur &c.

Respondetur, hanc Recentiorum doctrinam procedere ex mala intelligentia illarum definitionum. Quamvis enim multa fluida adhærent, eo quod partes habent tum minus ad motum aptas, tum ratione configurationis proportionatas adhæsionis, tum aliquantulum crassiores, sicuti se habent partes aquæ, alia vero fluida non adhærent; male subinfertur humiditatem cum fluiditate non congruere, atque Philosophis sentiendum esse cum vulgo hæc veluti duo diversa vocante. Itaque si fluiditas conjuncta sit cum praedicta dispositione partium, fluida adhærent. Quod si dispositio illa partium in fluidis non

Tom. II.

habeatur, fluida non adhærent. Quapropter adhæsio non ab ipsa fluiditate, seu humiditate, sed a liunde repetitur. Nam fluiditas, seu humiditas ex se se non aliud præ se fert, nisi rem difficile terminari termino proprio, facile alieno. Idem suo modo dicendum est de siccitate, seu soliditate.

Praedictæ igitur definitiones sic intelligendæ sunt, ut per eas innuantur, terminationem illam sponte sua, & quasi ab intrinseco rebus convenire, non vero quasi coacte, & ab extrinseco. Nimurum sensus est, humidum esse illud, quod sponte sua, & quasi ab intrinseco difficiliter proprio termino terminatur, facillime alieno. Porro metalla, sicuti in pulverem comminuta, continuitate carent, contra ac illorum postulat natura, ita quasi coacte se se continentis accommodant. Idem est affirmandum de cinere, & pulvere, quæ si secundum se spectentur, propria sensibili figura donantur, propriisque terminis continentur. Flamma etiam fornacis ægre, & per vim à fornace terminatur, unde huc atque illuc discurrevit, ut foras erumpat, ac, si concavum clivani lambit, hoc ideo facit, ut quam brevi circuitu foras evadat. At corpora humida sponte sua se se figuræ continentis accommodant, & in eo conquiscentur. Neque tandem ignis siccus est, & non solidus. Quod enim propriis terminis non cohabeatur, neutrum evincit, aut solidum non

Mm es-

esse ignem, aut siccitanem id ipsum non exposcere. Sed aliunde id repetendum est. Nempe quia calor in igne prædominatur siccitati, ex quo fit, ut moderatio siccitatis vincatur voracitate caloris omnia depascentis, & ad propinquam materiam expandentis se se, ut diutius per alimentum queat conservari.

Instabis ex P. Fortunato. Ut de flamma diximus, ita aqua non nisi ægre, & per vim à vase terminatur; continuo enim nititur moveri deorsum, & premit fundum vasis, & indesinenter urget ipsius latera, ut ex ipso exiliat. Ergo vel aqua fluida non est, vel etiam flamma dici debet fluida. Deinde ignis, ut suo loco diximus, natura sua postulat intestinum motum suarum partium, quo objeta corpora dissolvat. At si ignis siccus esset, & solidus, id præstare non posset: solidum enim partes habet, ramorum instar, invicem complexas, & motui, ac divisioni resistentes: ut postea dicturi sumus. Igitur siccum non est idem, ac solidum. Demum ex nostra sententia calor in igne non perimit siccitatem: ergo impedire non potest effectum siccitatis, adeoque ignis facile cohibetur propriis terminis. Nec calor potest vincere siccitatem, nisi eisdem contraria opposatur, ut frigus calori. Igitur &c.

Respondetur. Nego antecedens. Cessante enim motu extrinsecus aquæ impresso, dum in vas infunditur, vel ipso sensu conspicimus

aquam paulatim quiescere. Quamquam ergo vi gravitatis in vas ipsum nitatur, tamen id ab ea humiditatem non tollit. Alioquin enim natus ille gravitatis probaret etiam aquam non esse fluidam. Fluidum, quippe *corpus* à P. Fortunato n. 77. dicitur, quod sibi relictum difflit quoquaversus, & cuilibet figura sua veluti sponte se se accommodat. Gravitas porro vis una, unusque semper motus est, qui cum sensibili quiete aquei voluminis compónitur, atque totam aquam sinit se se accommodare figuræ vasis continentis: ut vel sensu percipimus. In igne autem contrarium evenire experimur.

Ad secundum. Intestinus motus partium ignis non tollit siccitatem illius. Stat enim intestino motu agitari partes, manente in illis ea consistentia, quæ ipsarum siccitatem sequitur. Etsi autem siccum corpus idem sit, ac solidum, non tamen idem est in omnibus soliditatis gradus. Maxime solidum est, cuius partes, ramorum instar, se se invicem complectuntur, unde & motui, ac divisioni resistunt. At notissimum est, ex solidis quædam artius, quædam minus arcte compacta esse; quædam crassiora, quædam esse minutiora. Est adeo ignis solidus, seu siccus; sed ut citra excellentiam à nobis dicitur siccitatem habere, ita & soliditatem non maximam, nec summi gradus eidem attribuimus.

Ad tertium. Calor in igne præ-

do.

dominatur quidem siccitati, sed eam non destruit. Est enim ignis exquisitissime calidus, siccus vero citra excellentiam. Porro si ejusmodi affectiones ita accipientur, non repugnant invicem in eodem subjecto. Vincit autem calor siccitatem, quatenus istius vis actione caloris minuitur. Neque hoc ipso oportet, calorem, & siccitatem eodem modo contrarie opponi, ac calor ipse frigori adversatur; sed satis est, si in effectis contingat unius affectionis prædominium: quemadmodum sane calor raritatem inducens, consistentiam minuit, quæ ad siccitatem sequitur.

His igitur expositis, humiditatis, seu fluiditatis, quemadmodum & siccitatis, seu soliditatis notionem, sive naturam investigare contendimus.

Epicurei, sive Atomistæ fluiditatem in atomorum, maxime sphæricarum, omnimoda dissolutione, ac jugi motu consistere censem. Quod alii Recentiores sic clarius exponunt. Ajunt enim, fluiditatem oriri ex partium exiguitate, figura, textura, vel ordine ad motum expedito: aut ex motu ipso perturbato earundem partium, qui ab ætherea subtilique substantia cietur. Ita præsertim Cartesiani.

Soliditatem porro corporum arbitratur Gassendus cum cæteris Atomistis ex suarum atomorum figura esse repetendam, quæ cum ramosæ, seu hamata sint, facile mu-

tuo implecti, ac inter se se cohædere possunt: Cartesius, p. 2. Prinpior. n. 54. soliditatem corporum aliud non esse putat, nisi partium illorum quietem, quam modum esse positivum tradit. n. 27. & in tr. de Lumine c. 7. sicuti motus ipse. Cartesiani plerique soliditatis causam ajunt esse legem Naturæ: qua unaquæque res dicitur permanere in eo statu, in quo est. Rohaultius, & Mallebranche Soliditatem oriri docent à pressione subtilis materiæ. Newtonianæ à vi attractionis, quam materiæ dicunt ingenitam, soliditatem derivant. Alii demum Recentiores soliditatem caussari arbitrantur admixtione, seu ingressu quarumdam particularum, quæ pores corporis subeant: aut exclusione aliarum particularum antea permixtarum, ut in luto contingit, dum exsiccatur. Peripatetici humiditatem, & siccitatem putant esse accidentias corporum affectiones. Ita tamen ut humiditas, seu fluiditas potissimum exigat partium parvitudinem, tenuemque earundem adhesionem, unde & facile moventur, ac se jungunt invicem, difficileque continentur in se ipsis, sed figuræ externi ambientis se se accommodant; siccitas vero, seu soliditas eam partium contexturam, & configurationem exposcat, quam rorum instar, invicem se se partes arctius complectuntur, unde & motui, ac divisioni resistunt, & proprio termino facile continentur, magna vero cum difficultate ac-

commodant se se figuræ eterni continentis.

Dicimus, humiditatem, seu fluiditatem sitam non esse in omnimoda partium dissolutione, aut jugi motu: siccitatem vero, seu soliditatem non haberi per solam partium quietem, aut per legem Naturæ, aut per gravitatem, seu pressionem aeris, vel ætheris, aut per vim attractionis, nec oriri ex atomis ramosis, & hamatis: sed utrasque hasce affectiones esse formas accidentales sensu jam explicato. Conclusio plures partes continet invicem nexus.

Probatur itaque primo assertio quoad humiditatem, seu fluiditatem. Fluida corpora ita partibus constant, ut istæ invicem adhærent, & consenserent; etsi hæc adhærentia in aliquibus fluidis major, in aliis minor, aut etiam omnino tenuis sit pro partium componentiam crassitie, aut tenuitate inæquali. Ergo fluiditas sita non est in omnimoda partium dissolutione, seu disjunctione. Antecedens probatur ex dictis disp. 2. quæst. 4. & 8. ubi experimentis probavimus aeris, & aquæ particulas minimas aliquam inter se adhærentiam habere. Igitur &c. Prima consequentia manifesta est. Nam si fluiditas aliquam patitur adhærentiam partium corporis fluidi, evidens est, fluiditatem ipsam notione sua non præ se ferre omnimodam partium dissociationem, quæ adhærentiam penitus excludit.

Altera in id hæc sic ratio. Lucida corpora ea sunt, quæ lucem emitunt; pellicida, seu diaphana, quæ lucem propagari, aut diffundi sinunt; opaca, quæ lucem regerunt, seu impediunt lucis propagationem, aut diffusionem. Pelluciditas porro, seu Diaphaneitas, quorundam Recentiorum sententia, est recta pororum corporis dispositio; aliis Recentioribus placet, diaphaneitatem ex pororum angustiis, & tenuitate derivare; nostra autem opinione diaphaneitas rectam dici partium corporis dispositionem, earumque tenuitatem. Jam vero compertum est experientia, pleraque corpora lucida, plura etiam fluida esse diaphana. Quamobrem soliditas, & fluiditas cum diaphaneitate componi possunt, cui sola partium crassities major adversari videtur, quæ rectam partium, aut pororum dispositionem, vel eorum angustias, ac tenuitates tollit. Hinc solida quedam corpora opaca, si in subtilissimas laminas distendantur, diaphana evadunt: ut in marmoribus, & in vitrea massa contingit; fluida vero diaphana, si solida evadant, nec tamen in crassiorem molem concrescant, adhuc diaphana permanent: ut aqua in lamellam tenuem glaciei disposita; at si major classities fluidis diaphanis accedat, quæ rectam partium, aut pororum dispositionem tollat, tunc fluida sunt opaca: ut evenit in glacie majoris crassitiei, in oleo congelato, in aqua,

aqua , dum in spumam , atque in consistentem massam abit. His declaratis, ita ratiocinamur.

Multa fluida corpora sunt dia-phana , ut aer , & aqua. Atqui si fluiditas sita est in omnimoda partium disjunctione , corpus fluidum non posset simul esse diaphanum. Ergo fluiditas sita non est in disjunctione omnimoda partium. Minor probatur. Omnimoda partium disjunctio componi non potest cum diaphaneitate. Ergo &c. Antecedens probatur. Si omnimoda partium disjunctio componi posset cum diaphaneite , corpus solidum diaphanum , dum in minutissimas partes omnino invicem disjunctas redigitur, non amitteret diaphaneitatem. Atqui hoc repugnat experientiæ. Igitur &c. Major probatur. Diaphaneitas tolli non potest per eam affectionem , quæ eidem non opponitur, sed cum ipsa aliquando manet in eodem corpore ; nulla enim esset unitis ad alteram contrarietas ; adeoque &c. Minor probatur. Vitrum solidum, & diaphanum , si in minutissimas partes, omnino invicem disjunctas, contundatur, hoc ipso diaphaneitatem amittit. Ergo &c. Dixi hoc ipso diaphaneitatem amitti; id enim contingit , tametsi quammaxime fieri possit, ad sensibilem æqualitatem redigas vitri contusi partes: si illas etiam ita disponas invicem, ut non in pulveris cumulum concrescant, sed subtilissimi instar veli alterum corpus diaphanum coperiant.

Reponit quidem P. Fortunatus, vitrearum partium poros tunc non amplius inter se mutuo secundum rectam directionem communicare, adeoque diaphaneitatem amitti. Sed in præsentiarum hoc ipsum est, quod inquirimus, nempe unde eveniat, rectam illorum pororum dispositionem tolli : Non alia potest reddi caussa , nisi quia partes invicem omnino dissociantur.

His difficultatibus pressi Atomistæ fatentur mutuum inter liquidæ particulas vinculum. Sed in hoc ipso asseverando, Atomistæ adhuc sunt. Non enim aliud nexum agnoscent, nisi per lanuginem quandam , vel hamulos , qui proximis atomis injecti mutuo eas adstringant , & pro sua diversa vi flexioni magis; minus-ve resistente, corporum majorem , minorem efficiant resistantiam. Quod dupli exemplio , quorum aliud à natura , alterum ab arte petitur , per calami anserini capilla menta , & per loricam hamatam, explicat Maignanus.

Verum allata responsio atomorum naturæ nullatenus congruit. Primo enim imperceptibile est, hamulos illos atomorum posse restituere se se, partesque iterum connectere , cum liquidi primum fit divisio , tum rursus partium habetur commixtio , nisi hamuli prædicti sint vi intrinseca , quæ ad elasticam reducatur. Sed nulla hujusmodi vis potest esse in atomis ipsis seorsim , ac secundum se conside-

ratis. Quippe vis elastica partium textura habetur, ut docent Atomistæ. Nullæ porro in atomis extant partes. Igitur &c. Secundo si admittendi sunt hamuli isti atomorum, necesse est eos esse atomis ipsis minores, & habere motum aliud, aliamque virtutem ab atomis diversam. At hoc ipsum repugnat summe atomorum parvitatí, & indivisibilitati, quam iidem ipsi Atomistæ adstruunt. Ergo &c. Tertio fluida corpora millies divisa, semper eamdem conjunctionem repetunt. Declarant igitur Atomistæ, quanam de caussa vis illa hamulorum continua relaxatione non debilitetur, nec demum aliquando amittatur. Sed de hoc ipso iterum postea.

Ex eadem illa ratione convincimus, fluiditatem sitam non esse in jugi partium motu. Multa enim extant corpora fluida simul, & perspicua, seu diaphana. Sed diaphaneitas cohærere in hisce fluidis non potest cum motu jugi, intestino, & turbativo partium. Nam quomodo partes minimæ illorum corporum susque, deque & quaqua versus motæ, possunt incolumen servare pororum directiōnem? Ita & motus ille intestinus, ac turbativus poros fluidi majores modo redderet, modo minores; quoniam motus ille partes hac illac agitaret. Non ergo constanter aqua maneret pellucida, sed nunc opaca esset, nunc diaphana; nunc luci transitum facere, nunc lu-

cis communicationem impediret.

Dicant sane Recentiores, motum illum esse insensibilem, aut motum esse partium insensibilium. Id nihil proficit Nam vi motus illius intestini, partes insensibles aquæ nunc magis, nunc minus propter commotionem distarent invicem. Ergo insensibles pori rectitudinem amitterent, & modo maiores essent, modo minores. Atqui pori illi, quorum ratione aqua dicitur diaphana, non sunt pori sensibiles, sed insensibles. Ergo aqua opaca esset, vel saltem nunc diaphana, nunc opaca. Id ipsum aliis rationibus probatur. Ut enim observat D. Malovin, & refertur in Diario Eruditorum Transalpinorum, tom. 151. Si partes aquæ motu illo jugi, & intestino commoventur, dum una aquæ pars versus alteram movetur, hæc ipsa contra illam aqua vi nititur. Adeo sane ut partes illæ nec regredi queant, nec ad altera flectere, quippe unaquæque pars semper incidet in alias partes æqua vi contra ipsam tendentes. Quo fit, ut singulæ partes permanere debeant immobiles, cum neutra vim habeat superandi alterius actionem, seu resistantiam. Ita dum duæ partes aquæ invicem incurvant, eas tunc quiescere oportet: maxime cum vi elastica careant, ut alias diximus. Quod si vi elastica gauderent, dum regredi niterentur, in alias incurrenter partes, à quibus æqua vi repellerentur: & quidem ex omni parte, seu recta, seu

laterali. Quamobrem necesse est partes aquæ omni parte quiescere. Igitur &c. Deinde motus ille jugis, & intestinus pro arbitrio confictus est in fluidis, ut argumentorum solutione patebit. Immo Borelli experimentum refert, quo oppositum concludere fas est; Salis particulas in fundo fistulæ strictioris constituit; & aquam superinfundit. Tum factum est, ut aqua aliquantulum salis dissolveret: non tamen exquisita contigit dissolutio, quia semper superiores aquæ particulae insipida permanerunt. Idem contigit in vino generoso, cui aqua fuit superinfusa. Ex quibus licet colligere, fluidorum partes non jugi, intestino, perturbatoque motu concitari.

Speciatim vero contra Cartesium ita ratiocinamur. Fluida corpora, si Cartesio credimus, ea sunt, quæ constant exiguis particulis invicem sejunctis, & jugi motu agitatis. At si hoc verum est, nullum haberetur discrimen inter fluidum, & calidum, nec fluiditas à calore distingueretur. Non calor à Cartesio dicitur & ipse motus perturbatus. Porro hoc experientiae repugnat. Constat enim, aquam esse fluidam, non calidam. Igitur hinc Cartesiana Philosophia alteram præse fert contradictionem, quoniam fluida in motu perturbato determinat, quo naturam caloris exponit.

Respondent Cartesiani, calidum esse duplex, aliud absolute, aliud respective. Primo modo ad-

mittunt omne fluidum esse calidum, sed non secundo sensu. Hoc enim pacto calidum dicitur per habitudinem ad nostrum tactum, à quo motus fluidorum non discernitur, cum tardior sit motu particularum corporis attractantis, ad quem proinde se habet, non ut motus, sed ut quies. Ajunt subinde, Cartesium, quando definit caloris naturam in partium terrestrium agitatione, intelligere tunc mutum maiorem motu fibrillarum nostrarum; id tamen non exposcere in fluidi natura: cum hujus agitatio aut major, aut æqualis, aut minor possit esse motu fibrillarum nostrarum. Hinc facile intelligitur, fluidum posse apparere calidum, si majorem agitationem habeat, quam fibrillæ; tepidum, si æqualem; frigidum, si minorem: Pater etiam ratio, cur aqua frigidissima evadat, quin fluiditatem amittat; non enim repugnat fluiditatem oriri à motu, qui minor sit motu fibrillarum. Addunt, Cartesium c. i. Meteoreorum, n. 3. in caloris motu non expostulare, ut partes calidi corporis sint invicem subtili nexu conjunctæ, aut potius vicissim disjunctæ: quemadmodum hæc partium separatio est necessaria fluido; ad calorem enim sufficit vehemens partium agitatio, nec naturæ corporis calidi repugnat simul ejus partes invicem nexas esse.

Contra est primo. Ex proposita Cartesianorum doctrina sequitur, nullum corpus solidum esse posse

calidius fluido. Quippe nullum corpus solidum potest habere partes suas majori motu agitatas , quam fluidum. Alioquin solidum illud fluidius esset ipso fluido; cum enim esse fluidum sit habere partes commotas , fluidius utique illud erit, quod partes habuerit magis commotas. Sed quod calidius est , partes habet magis concitatas. Ergo ut solidum sit calidius fluido, deberet esse fluidius ipso fluido. Atque adeo nullum corpus solidum in Cartesiana hypothesi poterit esse calidius fluido. At hoc ipsum experientiæ adversatur. Comperit quippe est, nitrum , si solidum sit, contraria impune posse; si vero fluidum sit , fusumque in humorem, tangi sine vehementi frigoris sensu non posse. Atque adco nitrum solidum calidius est se ipso fluido, cum frigus sit calor quidam, & minus frigus sit major calor, ex ejusdem Cartesii placitis. E contra vero in nitro solido minor semper est motus, quam in fluido, si fluiditas in motu jugi partium sita est. Igitur &c.

Contra 2. Cum sæpe fluidum corpus sit frigidissimum, calidissimum à frigidissimo non differret, nisi quia illud est calidum magis, istud vero gaudet minori calore, qui nempe à sensu percipi non potest. Id ipsum porro quisnam sibi suadere poterit, nisi partium studio occupatus? Tum si aqua fluida, & frigidissima bacillo agitur , deberet illico incalescere sensibiliter; quippe

minor longe agitatio caussa est, ut incalescant manus, ut incalescant siliques, quorum partes, ut pote quietæ, motui magis resistunt. Sed & ipsa unio particularum ex Cartesio aliud non est , nisi illarum quies; quomodo ergo idem corpus solidum simul poterit esse calidum: nempe & suas partes vehementer comotas habere, & easdem partes simul quiescentes, seu unitas? Cum vero partes liquidi ratione sui motus divisioni non resistant; quanam ratione æqualis , immo major motus in solido poterit reperiri , cum ejus partes divisioni resistant?

Contra 3. Ex Cartesio fluidum est illud corpus, quod habet partes suas divisas, hoc est , varie motas, unam prope aliam ; solidum vero est, quod suas partes habet quiescentes; unam prope aliam : hoc est enim partes continuari, cum non aliud vinculum inter partes solidi corporis agnoscat Cartesius, quam ipsarum partium quietem. Ergo solidum corpus non potest habere partes agitatas , & potiori ratione non poterit habere suas partes magis agitatas, quam fluidum. Atque fibrillæ nostrorum nervorum , ut Cartesius docet , sunt corpora solidæ ; quemadmodum declarabimus in tertia Physices parte. Quomodo ergo fibræ nostri corporis solidæ intelligi possunt majorem habere agitationem, quam partes aquæ frigidissimæ , in qua cum nulla appareat diminutio prioris fluxus, dicendum est , nullimode im-

minutam esse suarum partium agitationem?

Objic. 1. Quo corpus in minutiōes particulas comminuitur, eo magis ad fluiditatem accedit. Ergo fluiditas sita est in omnimoda partium dissolutione. Antec. probatur. Si per canalem primo frumentum, postea arena, denūm farina evoluntur; ex his quod in partes tenuiores concisum est, proprius fluidi speciem imitatur. Secundo metallorum fusio, quæ liqueſunt, & fluunt, nihil est aliud, nisi comminutio partium metallorum ope ignis facta, vel vi aquarum fortium, quæ salibus constant ad atomos tenuissimas redactis. Tertio si alabastrum in tenuissimum pulverem comminuas, & igni admoveas, illico liquoris ebullientis speciem induet; quem si baccillo agites, perinde ac si aquam moveres, exigua senties resistantiam. Quod si non nihil ejus pulveris, cum maxime ferret, accipias, & chartæ imponas, non liquorem, sed pulverem experiere. Adeo verum est sola partium comminutione, & agitatione, liquorum formam, ac speciem exhiberi. Idem contingit, dum ovarum albumina, & viscosa quedam corpora in fluidam, & aquosam abeunt substantiam, cum crebra agitatione partes, quæ erant ante aliis implicitæ, fiunt minutiores. Igitur &c.

Respondetur, ineptam esse propositam argumentationem. Licit enim dissolutio partium accedat

Tom. II.

aliquatenus ad fluiditatem, non tamen est fluiditas, nisi ostendant præterea Recentiores eam dissolutionem, non in aliquo solum, sed in omnibus cum fluiditate convenire; Non enim identitatem probat similitudo. An non cuprum, & auricalchum auri speciem aliquam præ se ferunt: & aurum non sunt? An non Chimici falsum aurum elaborant, colore, & pondere à vero non multum absimile, quod tamen aurum non esse ignis ostendit? Sed nec adjuncta experimenta sunt efficaciora. Nam primo assumitur sine probatione, fussionem metallorum sola partium comminutione perfici. Deinde utcumque hoc detur, numquid non perperam hinc ad liquores argumentum ducitur, ratiocinando à simili ad idem? Quod si partes fluidorum omnino essent dissociatae, tum invicem nullam adhæsionem haberent, quod experimentis contrarium est; tum deberent dici innatae in altero fluido: quæ assertio involvit principii petitionem.

Objicies 2. Si Sal in aquam conjiciatur, ab ea dissolvitur, & licet gravior sit aqua, toti aquæ miscetur. Rursus vinum etiam modicum in multam aquam injectum, totam ita pervadit, ut nulla sit sensibilis pars aquæ, in qua aliquod vini non sit: ut ex odore, ac sapore apparet. Jam vero id fieri non potest, nisi aqua continuo suis in partibus agitetur, ut illa agitatio eam mixtionem perficiat. Secundo sit pocu-

Nn
lum

lum spiritu vini purissimo plenum. Si illius superficies oleo terebinthinae inspergatur, compresies olei guttas hinc illinc bacchantium more discurrere. Unde autem id contingit, nisi quia ab agitatis particulis illius humoris guttae olei commoventur? Tertio dum digitum aquæ immersis, & hoc illuc dimoves, nullam, aut vix sensibilem ab aqua resistantiam pateris. Atqui nisi aquæ particulae sint in motu, resistantia sentiri maxima deberet. Nam quæ moventur, facile etiam dimoventur, cum mutare non debant, nisi motus determinacionem. At quæ quiescent, difficile dimoventur, cum longior sit à quiete ad motum transitus. Ergo fluiditas in motu consistit, qui vel ab ipsa atomorum natura, vel à subili materia, ut vult Cartesius, proveniat.

Respondetur, salis experimentum in dupliae casu solvendum esse ab iis etiam, qui fluiditatem in motu constituunt. Nam primo ubi certa, & determinata salis copia in aquam injecta fuerit, & soluta, si plus injicias, non ultra solvitur, ac miscetur. Quid ergo? Numquid aqua sale imbuta motum partium, adeoque fluiditatem amittit? Aut si retinet motum illum, cur reliquum salis non permiscet? Deinde, ut diximus, si vitream fistulam tenuem, ac longam aqua repleas, eique salis granum immittas, senties inferiores tantum aquæ partes falsas esse, reliquis superio-

ribus omnino ut ante insipidis. Id vero quomodo posset contingere, si aquæ partes jugi, intestino, ac perturbato motu agitantur? Vera igitur experimenti ratio est, quod aqua in salinas partes agens, eas attenuat, & humectat, redditque leviores, ut possint ascendere, & aquam permeare. Sed ab hac actione ulterius promovenda impeditur aqua debilitata ex salis copia sibi permixta. Nam ut aqua agit maxime oblonga sua figura, & partium tenuitate, ac illarum asperitatibus; Sic salis particulae intertextæ partibus aquæ actionem prohibent. Rursus cum salsa aqua sit gravior dulci, residet in fundo fistulae. Quod non contingit in vase latiore, in quo sal attenuatus; libertatem majorem nactus, ad summa facilius ascendit. Verum est igitur, in eo experimento haberi motum, sed motus ille non jam præexistebat in partibus aquæ, nam à salis dissolutione, mutationeque gravitatis originem suam trahit. Idem dicendum de vini cum aqua mixtione. Quis enim neget ex vini defluxu aquam agitari, & agitatione ista mixtionem perfici?

Ad secundum. Inquirimus, cur illius olei particulae communis aquæ injectæ non similiter agitantur, si agitatio illa à motu intestino partium quo communis aqua non caret, unice proficiscitur? Fatetur igitur, ex motu spiritus vini oleum commoveri, & resilire. Sed si ex motu illius spiritus colligunt Re-

centiores motum aquæ, longe aber-
rant, ignis proprietates in aquam
intrudentes. Nam spiritus vini affec-
tionibus suis igni magis, quam
aquæ assimilatur; unde & maxime
inflammabilis est.

Ad 3. Negamus per exiguum il-
lam fluidorum resistentiam à motu
partium oriri. Quin etiam inde potius
colligimus nullum extare ejus-
modi motum. Motus enim resis-
tentiam auget, dum auget impe-
tum, & conatum. Et sane si digi-
tus moventis semper sequeretur
motum partium, non modicam so-
lum, sed nullam experiretur resis-
tentiam. At partes perturbatim
hinc inde moventur, adeoque ne-
cessere est, ut digitus in partes in-
cidat contra ipsum actas, & conci-
tas, quarum proinde motum
reflectere debeat, & interrumpere.
Quis autem dicat, facilius esse mo-
vere loco corpus quietum, & in
æquilibrio positum, ut sunt om-
nes aquæ particulae, quam repelle-
re, & in adversam partem cogere
corpus adversus se commotum,
dum nativæ gravitatis impetu au-
ctæ sunt illius vires? Itaque verum
est, nullam nos experiri difficulta-
tem, dum aquæ particulas dimo-
vemus à loco, quem erant relictu-
ræ, si moveantur ad eum lo-
cum, in quem tendebant: non ve-
ro si in contrarium moveantur
à loco, ad quem nativo, vel ex-
tranœ impetu contendebant. At-
que adeo dicendum potius est, flu-
idi partes non jugi, perturbatoe
motu concitatæ.

Colligate, nullum re ipsa existere
corpus perfectissime fluidum, co-
sensu, quem Recentiores exponunt.
Nullum quippe corpus extat, cu-
jus partes aliquantulam saltem ad-
hæsionem inter se non habeant.
Porro hæc varia est pro diversita-
te fluidorum, minorque semper,
& minor; atque ubi prorsus
tenuis fuerit, corpus tunc erit ma-
xime fluidum.

Probat. 2. assertio nostra quoad
siccitatem, seu soliditatem. Et
cum primis, sola quiete particula-
rum, cæteroqui penitus comminu-
tarum, soliditatem corporum non
effici, hoc argumento conclu-
mus. Certum est, corpora solida
resistere divisioni; etenim non mo-
do ferrum, & marmor, sed cera
etiam, & alia moliora corpora
divisioni resistunt. At certum etiam
est, corpora in minutæ particu-
las divisa, utcumque quieta, di-
visioni non resistere. Id sane ap-
paret in pulvere marmoreo, aut
fetro, cæterisque similibus. Solidi-
tas igitur resistentiam facit; Quies
vero resistentiam non facit. Ergo
soliditas non est quies. Atque
adeo &c.

Neque soliditas explicari potest
per legem illam Naturæ, quæ fit,
ut quæcumque res, in quantum
simplex est, & indivisa, semper
maneat in eo statu, in quo est.

Et quidem de illa motus lege
fusius erit suo loco dicendum.
Nunc ita argumentamur. Durities
corporum non est æqualis, ut om-

nibus in comperto est. At qui lex illa in corpusculis , quæ ejusdem naturæ sunt omnino eadem est. Ergo oporteret nos eamdem difficultatem experiri in separatio-ne partium abietis , ac adamantis. Omnia enim æque respicit corpo-ra lex illa motus. Rursus per eam legem fit, ut unaquæque pars co-netur permanere in eo statu, in quo est. Ergo partes conjunctæ sic permanent vi illius legis , & par-tes jam invicem divisæ , ac dissi-tæ omnino ut sunt, nituntur man-nere ob legem illam. Ergo æqua-lis haberetur difficultas , dum par-tes conjunctas nitimus dividere, ac dum partes jam divisas magis invicem removemus , vel invicem proximiores reddimus. Quod si Cartesianus quispiam velit legem illam , non æque omnia corpora determinare ; exponat ille discri-minis rationem , à quo erit postea repetenda soliditatis natura.

Eadem ratione convincimus, so-liditatem non oriri à gravitate aeris , aut pressione materiæ subtilis. Etenim in hisce opinionibus soliditas corporum omnino deriva-tur à principio extrinseco. Ergo omnia solida corpora , quorum su-perficies ad sensum æqualis sit, ejusdem omnino , & æqualis solidita-tis essent. Consequentia probatur. Eadem omnino est subtilis mate-riæ pressio , eademque aeris cras-sioris gravitas in corpora dura vo-lumine , & superficie æqualia. Sed ex eadem vi non potest impar re-

sistentia oriri. Ergo eadem soli-ditas , & durities esse in lamina ænea , ac in lignea , aut in lapidea, volumine , & superficie æqualibus, eodemque modo divisioni resiste-rent. Quod experientia adversa-tur. Deinde semel admissa ea Re-centiorum sententia , corpora soli-da vel intra suas partes aerem in-clusum habent , & tunc divisioni non resistent : quemadmodum latera follis aerem intercipientia non resistunt divisioni ; vel non continent aerem , & tunc æquiv-a-lerent duobus marmoribus leviga-tis , & ac invicem conjunctis, quæ per circulum , & ex laterum parte non resistunt divisioni : perpendiculariter autem , & æqualiter di-vidi non possunt , nisi maxima vi adhibita. Vide quæ diximus d.2.q.6.

Vim quoque attractionis non esse caussam soliditatis ; tum ex dicen-dis in qu. seq. ubi hoc Newtonianorum principium expendemus, concludimus , tum quia si par tes lapidem unum primo constitu-en tes , invicem attrahebantur , cur postea non se se attrahebant invicem, dum lapis divisus est? Quemadmo-dum in glaciei efformatione , & in metallorum induratione Recentio-res isti affirmant evenire. Ea etiam vis attraheens non est satis idonea, ut reddatur per ipsam ratio resis-tentia , quam in corporibus soli-dis dividendis , & quidem sæpe maximam , experimur. Denique, ut tradit Hartscherus , si duos par-yos cubos aurichalci plurimum

levis, ac terti, subtilissimis filis appenos, in Machina Pneumatica constituas, adeo ut minimam inter se distantiam habeant, tum vero aerem extrahas, ut horum duorum corporum homogeneorum vis attrahens ab externo ambiente non præpediatur; deberent ea profecto se se mutuo attrahere: quod nullatenus contingit; tametsi ubi eos conjungas, vim debeas adhibere ad illos cubos sejungendos: quemadmodum alias diximus.

Atomistarum autem opinio nemente quidem concipi potest. Atomus enim partibus omnino destituta, indivisibilis, & insectilis, quomodo ramosam figuram habere potest, & hamos? Tum aqua dum fluit, divisioni minimum adversatur. Unde ergo resistantiam acquirit, dum in glaciem concrescit? Unde-nam atomi aquæ primum fluentes, habent exinde vim colligationis? Si hamuli, pili, aut an-sulæ prius erant in atomis aquæ, cur ea nihilominus fluida erat. Si de novo iisdem adduntur, quomodo id effici potest?

Postremo itaque loco probatur ultima assertionis nostræ pars. Hæc sane ex dictis descendit. Nam si nulla Recentiorum opinio idonea est, sufficiens suppetit ratio, cur eas corporis affectiones dicamus, cæterarum instar, esse formæ accidentales, sensu jam exposito. Ea enim configuratio partium, ramorum instar, plurimum confert phænomenis solidorum corporum, ex-

plicandis, quemadmodum & paritas partium, tenuisque earum adhæsio deserbit effectibus fluidorum exponendis. Et quidem nostra hæc sententia optimam reddit rationem naturalium effectuum.

Primo enim cum materia metalorum sit humidum aqueum cunctuoso, atque viscosum, virtute frigoris perfecte mixtum, & addensatum cum subili terreo; ictico dum frigus illa connectens superatur à calore ignis, statim metalla liquefunt, & humida evadunt, quoniam defectu frigoris non potest siccum terreum amplius cohibere fluxibilitatem humidi aquæ. Sive, ut rem expressius declaremus, vi caloris metalla liquefunt, quoniam in illorum partes agens motu suo illas invicem segregat, dividit, ac discindit, atque tenacem illorum contexturam dissolvit. Quod si violenta illa partium dissolutio non foveatur continua externi caloris actione, reparant sibi metalla propriam configurationem, & soliditatem.

Secundo aquæ fortes, seu stygiæ duriorum corporum partes divellunt, & exagitant; maxime ob spirituum, & subtilium particularum copiam, quæ poros corporum illorum penetrat, pervadit, ac cuneorum instar dividit, & separat. Ita & fluida consolidantur, salium, ac terrearum particularum commixtione, quæ partes fluidorum adnectunt invicem.

Tertio aqua cyatho infuso as-

sur-

surgit paulatim circa vitri parietes, cum propter figuram suam poros vitri penetrat, ac illis adhærescat. Attollitur autem aqua aliquantulum in medio cyathi, quoniam non adeo facile adnætitur lateribus vitri ob illorum siccitatem. Hinc sit, ut si quæ ligni frustula in aqua illa ponantur, pellantur ad vitri latera; tum etiam ex motu, quem ipsamet ligni frustulo, dum in aquam conjiciuntur, in ipsa procreant.

Quarto cerasa, nubes, & citrea mala diutius servantur in spiritu vini, vel in sacharo soluto, quam in aere. Etenim sales tunc, & subtiliores spiritus partes penetrantur in poros illorum fructuum, sed propter soliditatem partium ibidem constricti coguntur permanere. Quare hanc ipsam augent soliditatem, & consistentiam, nec sinunt alias liquoris subtiliores particulas in ipsum fructum agere. E contra evenit in aere, qui ut maxime concitatus est, magis etiam dimovet fructuum partes, & firmam illam fibrarum texturam disrumpit.

Dices. Solidum corpus illud est, cuius partes plurimum invicem adhærescent, ut modo constituimus. Ergo fluidum corpus erit illud, cuius partes nullo modo invicem adhærescent.

Respondeatur. Nego consequentiam. Inepta est enim consecutio, quemadmodum illegitima est argumentatio, dicendo: Durum corpus est illud, quod plurimum

resistit divisioni: ergo mole corpus erit illud, quod nullo modo resistit divisioni. Oppositio igitur inter solidum, & fluidum concludit, fluidi partes non plurimum adhærere invicem, sicuti adhærescent plurimum partes solidi: quod idem suo modo de duro, & molli dicendum est.

His igitur expositis superest, ut aliarum corporis naturalis affectionum naturam brevibus exhibeamus, quæ ex prædictis oriuntur. Durities primo occurrit, & mollitiae. Describitur autem ab Aristotele, lib. 4. Meteoreorum, cap. 4. *Durum corpus, quod ex superficie in se ipsum non cedit; molle, quod cedit.* Durities porro ex partium soliditate, & arctiori contextura proficiuntur, qua fortius invicem adhærent, & arctius se se complectuntur. Mollitiae è contra minorē partium cohesionem præse fert, unde & facile queant loco dimoveri, & externi vi cedant. Sic cera mollis manibus prementium cedit. Quoties autem figura partium tenacior est, corpus etiam est magis durum, ac magis resistit. Et quo plus humiditatis continet, magis est molle. Hinc diversi extant in corporibus gradus duritie, & mollitie. Quemadmodum vero ex varia corporum commixtione calor efficitur: ut in pluribus chymicis fermentationibus compertum est, nam semilibra, verbi gratia, florū sulphuris cum eodem ponderi limature chalybis permixta, in-

tra aquam frigidam immersa, & identidem agitata tantum intra unius horæ spatium calorem proferat, ut vas manibus contrectari vix possit: ut evenit etiam in spiritu nitri cum spiritu vini commixto, & in oleo vitrioli permixto cum aqua communi, sexcentisque aliis experimentis; ita stannum, & cuprum simul fusa corpus durissimum efficiunt, non seclus ac filum ferreum candens in aquam immersum, ut fiat acus; vel immersum in stannum liquefactum, ut fiat spinula, seu acicula. Item lamina ferrea etiam calore rubens, in stannum pariter fusum, immissa, corpus durum cum eo constituit, quod *ferrum album* nominatur. Simili ratione gypsum aqua dilutum in lapidis soliditatem induratur. Horum porro omnium ratio ex eo dicitur, quod particulae illorum corporum invicem commixtae, fortius se se complectantur, ac major fiat meatus obstructio. Hinc si gypsum uberiori aquæ affusione fuerit innundatum, in mollem solidam, & duram compingi amplius non poterit; quod nempe partes gypsi minutiores aqua interfluenta se mutuo separentur. Id ipsum in calce contingit, unde calx viva non indurescit ex aquæ affusione, sed molis efficitur.

Aduotat D. Henricus Gerritsonius Herfelt, in libro, cui titulum fecit, *PHILOSOPHICUM HOMINIS*: libr. I. cap. 2.

num. 82. *Sulphur positum supra ferrum candens*, illud dissolvere, & liquefacere. Nempe sulphuris sales, seu particulæ exquisitiæ tunc ignis actione dissolutæ, poros ferri per vadunt, partesque invicem disjiciunt, & separant. Glacies sine emollitione liquefecit, cum alia corpora, antequam liquefiant, emollescant. Quippe in aquis nullæ extant partes tenacioris naturæ, nec usque adeo invicem connectuntur particulæ aqueæ cum salibus nitri, aliisve siccis corpusculis, quorum ope glacies concresevit. Pinguis particularum admixtio molliora reddit corpora. Sic corium per unguenta redditur flexibilis: & ferrum, si post candefactionem immergatur sebo, aut aliis oleosis corporibus, redditur mollius. Hæc enim corpuscula partes distendunt, nec eas adeo constringi invicem patiuntur. Ferrum, cuprum, argentum, & aurum mallei tensio ne sunt duriora. Solidiores enim partes, mallei repetitis ictibus, sibi immediate, & quasi ad amussim junguntur, & arctius cohærent. Stannum vero, & plumbum sunt molliora per mallei tensionem. Nam ipsa percussio partes fluidas commiscet cum durioribus, unde major sit mollities.

Ex corporum mollitie, illorum Flexibilitas, Ductilitas, Sectilitas, Fissilitas, & Tractilitas derivatur. Ex duritate vero Rigiditas, Fractilitas, Friabilitas, Rubilitas. Quamquam hæc omnia non aliud for-

forte sint, quam diversæ duritiei, aut mollitici modificationes. Ea ergo corpora flexibilia sunt, quæ partibus veluti implexis, atque inter se convolutis componuntur: ut lignum, & corium; quæ proinde disrupta magnam partium inæqualitatem, & fibras alias aliis intextas exhibent. Non sic se habent lapides, & vitrum; cum enim constent ex partibus leviter invicem nectis, tangentibus nimirum se se vellut in puncto, si vel minimum divellantur partes illæ, statim continuitatem amittunt, & corpora illa rigida, & frangibilia dicuntur, unde illorum fractio sectio est æquabilis, & levis. Ex eodem ferme capite ductilitas, & fractilitas oritur. Nam quando corporum partes ita adhaerent, ut in longius extendantur, ductilia sunt corpora illa: ut metallæ, quæ partibus constant, quarum aliæ aliis in longum accedunt. Sic ferrum recens è vena fusum non ita est ductile; sed tubi contusum fuerit, ductilitatem adipiscitur majorem. Si vero partes distrahi non possint, corpora dicuntur fractilia: ut de lapidibus, & vitro diximus.

Quæ corpora in longum dividisi, ac sejungi possunt, appellantur fissilia. Quæ autem transverse tantum secari queunt, sectilia nominantur. Sic metallæ sectilia sunt, non fissilia, quod partes in longum maxime directas, & ordinatas non habeant. Ligna, lapides fissilia sunt, quod veluti fibris in longum

projectis componantur. Corpora illa fractilia dicuntur, quæ in frusta dissiliunt, ut lapides. Quæ in pulverem fatiscant, friabilia sunt. Si vero solam amittant continuitatem, appellantur ruptilia, ut vitrum.

Inter cætera corpora, quæ fragilia, aut ductilia per artem effici possunt, est Chalybs. Itaque si faber candentem chalybem ex igne immediate demergat in aquam frigidam, is acquirit fragilem affectionem. Per illam etenim maximam ignis vim partes chalybis positaæ sunt extra ordinem, & quasi invicem disjunctoræ: proinde si chalybs immergatur aquis frigidis, antequam partes restituantur ordini suo, vel se se magis complectantur, illa inordinatio partium, & tenuis connexio permanebit, atque adeo chalybs erit frangilior. Hinc cavent Artifices, ne recoctus in igne scintillet, quippe tunc nullus fere est remedio locus, & omnino fragilis evadit. Ductilis vero fit, si moderato igne recoquitur, & in aquam frigidam demergatur.

Ex dictis porro facile erit expendere eos effectus, qui in occultas qualitates olim refundebantur. Nimirum ex substanciali particularum effluvio, ex varia earumdem texture, seu figura, mole, ac motu, cæterisque affectionibus plurima mirabilia phænomena rite explificantur.

Ita sane pulvis vitrioli calcinati, qui sympatheticus appellatur, in san-

sanguinem è vulnera recens emis-
sum injectus , ipsi vulneri aliquot
passibus remoto mederi , ac san-
guinem sistere observatur. Id ipsum
vero sic videtur expendi posse. Spi-
ritus vitrioli calentibus adhuc san-
guinis particulis admixti feruntur
ad vulnus, unde expressus est san-
guis , illudque pervadunt , & cu-
neorum instar ibidem consistentes
obstruant penitus apertos illos
meatus , quibus sanguis effluit.
Siccitate maxime id præstant , ac
soliditate sua. Sed & illud confert
vulneri medendo , quod pulvis ille
salibus abundet. Neque tamen ad
maximam etiam , & abnormen
distantiam operari sympatheticum pul-
verem assentimur. Si enim aliquan-
do id videatur contingere , non sit
sine suspicione superstitionis. Idem
dicendum est de unguento armario,
quod applicatum gladio infecto
sanguine hominis vulnerati , age-
re dicitur in hominem vulneratum ,
& illum sanare , etiam in quacum-
que distantia. Sane unguentum istud
ex cerebro humano , sanguine , &
pinguedine paratur , atque ut vim
habeat , ligari debent arma certis
ritibus. Quare hæc ope Dæmonis
fieri probabilius est , cum quo pri-
mi inventores ejusmodi unguenti
ita convenerint , ut etiam execra-
tus , & anathematizatus , vulneri
assisteret , illudque curaret.

Eodem loco videntur habenda
nonnulla alia affecta. Ut cum la-
pides quidam dicuntur habere vim
conciliandi amorem , aut odium. Et

TOM. II.

Vetulæ solo intuitu fascinant infan-
tes teneros , ut misere contabescant. Quamquam nec forte impro-
babile sit , lapides illos ex se se
profundere corpuscula quædam ,
quæ motu suo cor dilatare va-
leant , vel contrahere , vel ad mo-
tum perturbatum concitare ; unde
postea ex aliis circumstantiis acce-
dat amor , vel odium objecti illius , quod sæpe præsens occurrit.
Ita sæpe evenit , vetulas , quæ sa-
gæ non sint , fascinare infantes. Sa-
ne deformis rei intuitus horrorem
quemdam in nobis ipsis procreat.
Quare cum infantes tenerimæ sint
dispositionis , multo facilius ac for-
tius ex deformis vetulæ adspectu
phantasia illorum commovetur , &
horrescit , ut subinde infans con-
tabescat. Quid quod maligni spi-
ritus , sive halitus corrupti , ac fœ-
tentes è vetulis illis continuo pro-
fluunt , ac dimanan? Nam & mu-
lieres , dum menstrua patiuntur ,
aspectu solo obnubilant speculum.
Ergo halitus illi corrupti , ac fœ-
tentes inficiunt teneram infantilis
corporis dispositionem , & in ea
rectum perturbant ordinem. Ita
sæpe malitiæ sagarum adscribitur
infantis mors , cuius caussa intra
domesticus erat parietes , nec diag-
noscebatur , nimirum yetus illa
Ayia , vel Amita , quæ etsi abs-
que culpa , indiscrete tamen , in-
fantem ulnis suis complexum te-
nens , eique oscula infigens , pesti-
feris halitibus illum contabescere ,
ac emori coegit.

Oo

Ex

Ex profluvio substantiali explicatur torpor ille, qui piscatoris brachio à Torpedine pisce injectus vulgo perhibetur. Id enim intelligimus fieri, quoniam Torpedo subtilissimos à se emittit sales, sive spiritus accidos, qui subeuntes, ac penetrantes in poros nervorum brachii, efluxum, & motum præpediunt spirituum animalium. Hinc torpedo effectum non caussat, nisi Piscatoris manus sit reti adjuncta. Eodem modo ratio redditur inconditi motus, qui ex Tarentulæ morsu in quibusdam hominibus excitatur. Tarentula enim in Calabria prope Tarentum satis obvia, suo morsu sanguinem, & spiritus animales inficit, iisque incompositum suum motum tribuit. Quare motus ille per fermentationem sanguinis idem excitat; nec alio efficacissimi remedio ab eo morbo sanatur æger, quam si ludente tibicine ad numeros saltet, ut iteratis salutationibus venenum tandem una cum sudore foras egerat.

Si verum esset quod de Basilisco ajunt, nempe illum solo aspectu homines necare; id ex venenosis halitibus esset repetendum, qui videlicet perturbent sanguinis, ac spirituum animalium decursum, & necem subinde infarrant. Ita & aspectus lupi raucedinem caussare dicitur in consciencie. Hic porro effectus, qui constans minime est, repetendus videtur ex concursu specialium dis-

positionum, terroris, suppressio-
nis spirituum, & dispositionis ac-
ris: ut proinde aspectus lupi sit
tantum caussa per accidens. Bufo
vivus hiante rictu lusciniam ex ar-
bore detrahit, ac devorat. Emit-
tit enim continuo venenatos ha-
litus, quibus in aerem ascendentibus
luscinia vertigine acta decidit.
Arefactus autem Bufo, si pendeat
ex collo unius de grege, propul-
sat ab isto luem. Quamquam vero
effectus iste non satis compertus
sit, affirmare quis posset, venenata
s aeris particulas à Bufone attrahi,
sicque præmunire à lue. Ne-
mo sane ignorat scorpionem in
vulnere, quod inflxit, elisum,
spongiae instar, sparsum à se virus
exprimere. Ita expenditur alterum
experimentum de pilis rabidi canis,
quos ipsius morsui mederi narrant.
Struthio Camelus solo aspectu sua
ova dicitur excludere: quod ta-
men potius in calorem vel in ovis
ipsis jam præexistentem, vel extra
ambientem refundi debet. Sunt &
medicamina pleraque ex sola ex-
terna applicatione, aut odore, vel
contrectatione, ventriculi, & in-
testinorum fibras contrahentia, ac
purgandi vim habentia; quod in
substantiale effluvium refunditur
particularum, quæ partium acu-
mine, vel motu, aut lubricitate
ventrem solvunt.

Uno hiante os, hiat & alter.
Quod ex consuetudine petitur
quam contraxit ille, qui ex alte-
rius adspectu movetur ad actus,

ad

ad quos natura prænior est. Non semel accidit, ut ægrotante parente, filius etiam distans ægrotet: & patre moriente filius patiatur deliquium. Immo contigit aliquando in gemellis fratribus procul à se invicem distantibus, dum alter fortuito, & per vim extrinsecam graviter ægrotaret, alium itidem morbo affici, & levavi altero convalescente. Ea porro effœta contingunt, quoniam influxus illi, qui sunt noxiæ uni, nocent etiam alteri ob similitudinem temperamenti. Casu autem accidit altera vulnerato autem dolore.

Fabulosum autem est, Remoram pisciculum naves remorari, quamquam id asseveret Plinius lib. 32. c. 1. Neque enim tanta potest vis in eo pisciculo intelligi, quæ major sit impetu ventorum, & actione remorum. Quare dum naves aliquando remorari continet, id attribuendum est profluenti aquarum à vento quodam concitatæ è maris fundo egrediente.

QUÆSTIO QUINTA.

Utrum Gravitas Corporum oriatur à caussa extrinseca, vel à principio intrinseco?

Celeberrima superest Quæstio de Gravitatis origine, quæ cum Veterum, tum Recentiorum Philosophorum ingenia plurimum tortit. Ad duo porro veluti supræma

capita revocari possunt quotquot extant variæ Philosophantium sententiæ circa naturam Gravitatis. Nam Peripatetici existimant, Gravitatem esse vim intrinsecam corporibus gravibus, seu qualitatem à Deo ipsis attributam, qua deorsum moveantur. Alii vero Philosophi gravitatem corporibus omnibus extrinsecus accedere arbitrantur.

Gassendus ecce post Epicurum docet Tellurem esse veluti ingenitem magnetem, & ab ipsa deorsum trahit, ac rapi quodammodo gravia corpora. Concipit enim, ut de magnete opinatur, ita ex Tellure uncinata, & hamatas atomos quaquaversum veluti radios diffundi, quæ corpora gravia complectentes in ipso aere, iterum illa in Tellurem trahant.

Cartesius vero gravia descendere tradit, quod ab ætherea substantia deorsum premantur. Dum enim subtilissima illa scobs per plures vortices circa Tellurem motetur ab Occidente in Orientem, hinc fit, ut conetur recedere à centro sui motus, hoc est, vim centrifugam concipiatur: tum vero vorticibus aliis obsistentibus, mutata directione motus, ad Telluris superficiem redeat, atque illuc corpora minus apta ad vim centrifugam concipiendam impellat. Hinc Antonius le Grand celeberrimus inter Cartesianos, vulgo persuadere nititur, par. 4. art. 17. *Quod nos, cum ē terra tantisper*

saltando sublevamur, semper eundem motum continuaremus, si non daretur materia subtilis, totam terram ambiens, qua nos deorsum repellit.

Alii Recentiores descensum gravium adscribunt aeris crassioris pressioni, rem sibi adeo perspectam reputantes, ut Varignonius in libello, cui titulum fecit, *Conjectura de Gravitate*, asseverare non dubitaverit, fore ut globus tormenti bellie instar Planetæ circa Tellurem sit revolvendus, si ad eam altitudinem perveniat, in qua à columnis aeris æqua vi premeretur, aut in æqua se se æquilatero duo vortices comprimitur.

Thomas Hobbes in Tractatu de Causa Gravitatis c. 1. motum aliquem inesse Telluris arbitratur, quo aerem facilius à se rejicit, quam cætera corpora. Hoc enim supposito, & præterea quod locus corpore vacuis nullus sit, necessitatem descensionis aliorum corporum facile sic demonstrari putat. Nam rejecto aere, necesse est in mundo pleno, ut in rejecti locum ea succedant, quæ difficiliter rejiciuntur. Atque ita gravia descendunt. Dum autem grave descendit, novam accipit impressio nem ab eadem causa continuata, nempe ab aere, cuius ut una pars ascendit, alia mundo pleno descendit lapidem impellens.

At vero alii Recentiores, cum sententiam Peripateticorum nullatenus velint aprobare, omnesque

Recentiorum hypotheses rei explanandæ minime sufficere perspectum habeant; abdicata à rebus creatis virtute motrice, Deum invocant, quem unicam caussam constituunt gravia deorum moventem.

Newtoniani autem corporeæ substantiæ, singulisque eam componentibus, duris, impenetrabilibusque particulis ingenitam, atque inseparabilem gravitatem attribuunt, cujus gravitatis quantitas semper sit proportionalis, & correspondens quantitati ipsius materiae. Quamobrem unaquæque corporum minima pars in aliam omnem quorumcumque corporum partem minimam gravitat: & hæc ipsa gravitatio mutua est, ut proinde inter easdem particulas semper existat mutua gravitatio, & attractio: quemadmodum alias diximus. Ejusmodi porro vis attractio nis mutuæ tum omnibus ubique materiei partibus, cum corporibus, cujuscumque sint generis, re ipsa convenit. Materia etiam subtilissima, inquit Newton. lib. 3 Princip. gravitate non destituitur. Cæteris paribus, vis illa attractrix nullo tempore minuitur, nec augetur, sed eadem consistit semper eamdemque servat proportionem, & vicissitudinem mutuam inter omnes quorumlibet corporum partes. Gravitatis illius, attractionisque quantitas, ubi distantiae corporum sint æquales, semper vicissim proportione respondet quanti-

tati materiae corpora componentis. Ita si pes cubicus auri in Telluris superficie mille librarum pondus habet, ibidem constitui duo cubici pedes auri dupla gravitate pollerent, librarum nempe bis mille. Quod si Tellus duplo esset amphor, pes ille cubicus auri præ se ferret pondus librarum bis mille, duoque illi pedes cubici pondus librarum quatuor mille obtinerent.

Si corpora in se se mutuo gravititia sint æqualia, æqua in illis est gravitas, & attractio: quæ tamen in iisdem æqualibus corporibus major sit, aut minor pro inæquali eorumdem distantia. Sic lapis, qui prope Tellurem ponderé gaudet mille librarum, in determinata distantia à Tellure quingentis libris gravitat; quod si foret Lunæ proximus, minimam gravitatem haberet, & levissimus esset. Proportio autem hujus imminutionis, accretionisve, quæ huic gravitati accedit, quoties corpora invicem recidunt, vel ad se se accedunt mutuo inde oriri dicitur, quia corporum vis reciproce se habet secundum duplam proportionem, id est, sicut distantiarum quadrata. Numeras enim quadratus est productum ex numero aliquo in se invicem multiplicato: ut 4. est quadratum 2.; 9. est quadratum 3. Ita corpus centum librarum pondere pollens in intervallo decem diametrorum Telluris; si distantia duplo sit minor, pondus illius corporis quater augebitur; si distantia triplo sit mi-

nor, pondus erit novies majus. E contra, ubi hæc distantia sit duplo major, pondus erit quater minus; ubi vero illa sit triplo major, pondus erit novies minus. Vis etiam, qua unum corpus alia ad se attrahit, si prope Telluris superficiem valet attrahere, sibique adjunctum tenere pondus librarum centum, ubi distantia à centro Telluris sit duplo major, poterit attrahere pondus librarum 900. atque è converso. *Omnia corpora* (inquit Gravesand. in Elementis Physices, §. 4047. & seq.) *se se mutuo petunt, aut se se mutuo versus tendunt vi, que singulis particulis materiae in singulas particulas competit; & vis, qua corpus in alia agit, efficitur ex omnibus viribus conjunctis particularum, ex quibus corpus constat; ideo vis hæc crescit in ratione, in qua materia quantitas augetur, & immutabilis est in singulis particulis: ad eamdem distantiam semper eadem; aucta autem distantia, decrescit vis, quadratum distantie augetur. Vim hanc GRAVITATEM nominamus, considerando corpus, quod aliud versus sponte tendit; quia eo nomine vis hæc in Telluris viciniis datur. Considerando autem corpus, ad quod aliud tendit; vim hanc nominamus ATTRACTIONEM. His nominibus eundem effectum, & nil præter, effectum designamus; nam cum omnis gravitas sit reciproca, corpora se se mutuo versus gravitare, idem significat, quam corpora*

se se mutuo attrahere , aut ad se mutuo sponte tendere. Effectum hunc pro lege Natura habemus , quia nunquam fallit , & hujus caussa nobis est ignota , & ex legibus notis minime deduci potest.

Ex dictis consequens est, horum Philosophorum judicio , gravitatem corporum nec repetendam esse ab aliqua lege motus , nec oriiri à materia subtili , ut putat Cartesius, sed esse primitivam, ingenitamque materiae affectionem , & legem generalem corporibus omnibus, si-
ve terrestribus , sive cœlestibus , à Deo impressam. Nec investigare oportet, quomodo corpora gravitent, quemadmodum non quærimus, quomodo corpora in Mundi origine moveri cœperint , & quomodo semel mota , quantum est in se se, in motu perseverent semper. Sequitur etiam admitti oportere vacuum, aliud quidem longe amplium, & immensum , in quo Sidera , & Planetæ motus suos libere exerceant ; aliud vero disseminatum inter partes cuiuscumque corporis. Cum enim gravitas sit proprietas universalis , & indistincta à materia , & quantitatæ ejusdem proportionalis: si omnia essent plena, omnia corpora æqualiter essent gravia. Quam obrem corpora interjectos habent meatus innumerabiles, omnia prorsus materia vacuos , numero quidem in aliquibus majores , in aliis minores indeque sit , ut inter æqualia volumina hydrargyri , & aquæ , vel auri , & lapidis , ma-

majorem illa gravitatem obtineant, quam ista , quia videlicet hæc pluribus numero meatibus vacuis constant.

Ab eadem vi atrahente repetunt Newtoniani corporum soliditatem, seu duritiam , & cohærentiam : ut alias diximus. Elaterium quoque ab ea vi derivari putant, quam proinde in repulsam , elasticamque mutari docent. Tum Cœlestium etiam corporum motum vi attractionis expendunt. Quæ omnia suis in locis distinctius declaravimus , quemadmodum etiam illa, quæ de lucis , & colorum affectionibus ex eadem vi attrahente juxta Newtoni placitum exhibentur , in 3. Physics parte referemus.

Omnia, quæ ad istud Newtonianum Systema pertinent , distincte collegit D. Thom. Campailla in libro Italice conscripto, cui titulum fecit: *Animadversiones in Physicam Domini Isaaci Newtoni*. Eademque videri poterunt in operibus Gravessandi, Keil, Clarke, & Muschenbroekii.

Dicimus primo gravitatem corporum non oriri ab atomis uncinatis & hamatis à Tellure emissis,

Probatur Atomi illæ uncinatæ & hamatæ à Tellure emissæ ad gravia corpora rapienda , & deorsum trahenda (quas proinde Telluris Satellites rite dixeris), vel impingunt in plenum corporis gravis; vel in vacuum? Si primum dicatur: ergo non jam grave corpus deorsum

sum traherent, sed sursum impelerent; neque enim in plenum possunt penetrare. Si secundum, jam nullo modo adneterent sibi corpus grave; quippe per inane spatiū liberū obtinerent ingressum, & egressum: adeoque nullum metum imprimere possent corpori gravi. Quod autem asserunt Atomistæ, atomus illas sic esse uncinatas, ut per vacuos corporis gravis poros ingressæ, reflexæque hinc inde intra proportionatas civitates, vim habeant trahendi corpora ad terram; hoc commentitium prorsus est; nam & atomis indivisibilibus uncinus, atque hamulos attribuit, quod ipsam statutam atomorum indivisibilitatem, ac summam parvitatem evertit, ut in præcedent. quæstione diximus; tum inde fit, atomos illas non amplius dividi posse à partibus corporum gravium, quas immediate tangerent; quippe tunc inter atomos ipsas, & partes gravium corporum nullum omnino extaret vacuum: Onanis autem divisio, & separatio fit in vacuo, & sine vacuo est impossibilis, ut Atomistæ sentiunt. De quo erit fusius dicendum in disp. 7. q. 4. ubi contra Vacuum disseminatum disseremus. Petimus etiam, quanam ratione atomi sursum evolantes, invento gravi corpore, eique uncini suis adhærentes, valeant illud in Tellurem trahere? Non enim per se ipsas id præstaré queunt, cum iliarum motus sit sursum. Non præstar id Tellus. Nam quo pacto no-

vit Tellus, atomos suas longe à se excurrentes jam grave corpus invenisse, jam satellitum more alligasse, ut novam tum demum iisdem vim imprimat, qua possint fugitivum retrahere? Rursus, qui busnam brachiis, aut manibus, aut quo alio instrumento Terra & atomos suas, & gravia corpora ad se trahit? Quod si insita vi id efficit, cur Atomistæ eamdem insitam vim denegant corporibus, qua ad Terram descendant, nisi contradicendi studio? Deinde Gravia deciden-
do suum motum æqualiter acce-
llant, sive procul, sive prope ad ter-
ram moveri incipient. Ergo non
trahuntur à terra. Consequentia
probatur. Nam agens naturale ma-
jori vi agit in passum sibi proxim-
um, quam in remotum; quod
nempe tunc illius actio minus dis-
pergatur. Atque adeo terra fortius
ageret in grave propinquum. Ve-
locius ergo istud descenderet; quod
est contra experientiam. Tum in ea
Atomistarum sententia corpora le-
viora essent graviora, & è conve-
so: quod absurdum est. Sane ea
corpora sunt graviora, quæ cæ-
teris paribus citius descendunt; levio-
ra, quæ tardius: Leviora autem
facilius, & citius trahuntur, gra-
viora difficilius, & tardius. Ergo
si descendere est trahi, leviora, quæ
citius trahuntur, citius descende-
rent, atque adeo essent graviora:
& graviora ipsa, quæ difficilius
trahuntur, difficilius descenderent,
ac subinde essent leviora.

Com-

Compertum igitur ex dictis fit, falsam omnino esse, & impossibilem Gassendi sententiam. Ipse autem Gassendus oleum, & operam perdit, dum nobis inculcat Magnetis exemplum. Praeallatae enim rationes manifeste nobis ostendunt, ferrum ad magnetem per uncinatas, & recurvas atomos attrahi non posse. Quidquid igitur sit de vi magneticā, de qua dicendum erit in secunda Physics parte, expositis rationibus permoti teneamus nec attractionem magneticam, nec gravium descensum ab uncinatis, hamatisque atomis ori-ri posse.

Objicies. Experientia constat, corpora velocius moveri in fine, quam in principio motus deorsum. Sed nulla hic patet ratio, nisi quia per vim magneticam terræ, sive per atomos uncinatas, & hamatas à Tellure emissas, corpora in fine motus magis attrahantur. Igitur &c. Secundo aves majoris molis, ut sunt Aquilæ, ac similiiter nubes, licet sint crassiores aere, non gravitant in aere, sed pensiles manent. Ita & corpus Lunare solidum est, nec tamen tendit ad terræ centrum. Non alia profecto ex caussa, nisi quia terrestria effluvia non perveniant ad illa corpora. Igitur &c. Tertio nisi admittantur terrestria illa effluvia, explicari non potest, quomodo gravia determinentur ad motum. Finge enim tibi totum aarem, immo totum hunc glo-

bum terraqueum ita annihilari, ut lapis unus tantummodo in sublimi constitutus remaneat. Tunc lapis ille sibi relictus, vel staret, vel moveretur? Si primum, hinc apparet deficientibus effluviis determinantibus nullum motum haberi. Secundum autem dici non potest; nam in ea hypothesi nec haberetur locus sursum, nec locus deorsum; deorsum enim est à circumferentia ad centrum, sursum è contra: Porro si Tellus non extaret, nec daretur centrum, neque circumferentia. Simili ratione si Tellus à Deo constitueretur in concavo Orbis Lunaris, & lapis aliquis in nostro aere remaneret; vel hic ascenderet ad terræ centrum: & hoc gravium naturæ repugnat; vel descenderet: hujus autem descensus non haberetur ullus terminus: ergo &c. Quarto si gravia non trahuntur ab effluviis terrestribus, oportet illa mente, & ratione constare, ut sciant quandonam debeat descendere. Quod absurdum est. Igitur &c.

Respondetur ad primum, in fine motus majorem utique velocitatem acquiri: unde illud celebre: *Motus in fine velocior*. Sed haec velocitas non est repetenda à vi magneticā Telluris. Alioquin enim eo velocior esset motus corporum quod ex loco terræ propinquiore deciderent. Quod experientia contrarium est. Ea igitur velocitas major ex iisdem caassis repetitur à quibus profluit

fluit acceleratio motus, ut erit postea dicendum: tum maxime ex minori aeris subjecti resistantia.

Ad 2. Rationem exhibuimus in disp. 2. quæst. 3. ubi Hydrostaticæ principia exposuimus. Esto igitur aves, & nubes sint aere specificè graviores, tamen respective leviores sunt æquali volumine aeris subjecti; unde & supra illud consistunt, nisi quando constringuntur, & gravius volumen præ se ferentes decidunt. Lunam quoque Deus proprio in loco constituit, quemadmodum rebus omnibus specialia loca præfixit, omniaque in pondere, & mensura creavit. Nec tamen abnuimus partes Lunare Corpus componentes in ipsum Lunæ centrum gravitare.

Ad tertium. Gravia sunt à se ipsis determinata ad motum deorsum. Locus porro deorsum dicitur respectu gravioris, aut majoris massæ, quæ ejusdem sit ponderis. In ea igitur hypothesi, qua lapis in loco terræ consisterent, sublata penitus, & destructa Tellure, aereque ipsam ambiente, probabilius dicendum arbitramur tunc fore, ut lapis staret, atque in se ipso centrum suæ gravitatis haberet, cum circa se vel nullum reperiret corpus, vel ætheream substantiam se ipso leviorum. Quare tunc Deus alium rerum ordinem constitueret: quod fieret etiam in hypothesi, qua lapis hic consisteret, Tellure à Deo posita in Concavo Orbis Lunæ.

Ad quartum. Quæ natura fiunt,
Tom. II.

absque ulla cognitione perficiuntur. Quod enim præstat cognitio in cognoscentibus, id facit natura in non cognoscentibus, dirigente Deo motus omnes illorum.

Dicimus secundo Gravitatis rationem non esse repetendam à motu & pressione subtilis materiæ ut placet Cartesio; neque ab aeris crasioris pressione, ut alii Recentiores exposunt.

Probatur 1. Cartesius in primis supponit motum Telluris, quem nos gratis confictum esse probabimus in 2. Physices parte, ubi etiam vorticosum illum subtilis materiæ motum rejiciemus. Rursum admissio etiam Telluris motu non potest à circulari subtilis æteris motu repeti gravium descensus. Cum enim gravia tempore unius scrupuli secundi, decidendo conficiant quindecim pedes, ut demonstrat Hugenius in Dissert. De Caussa Gravitatis; si motus ejusmodi corporum à circulari æthereæ substantiæ motu oriretur, deberet motus circularis subtilis materiæ circa Telluris superficiem septendecim vicibus excedere velocitate sua motum Telluris, quam ambit, & quæ juxta hypothesim Cartesianam à subtili ipsa materia in gyrum abripietur. Porro impossibile est, Tellurem communicare ætheri sibi proximo motum suo motu majorem, & aliunde cum ille ætheris motus non sit ipsi Telluri communis deberet ille à nobis percipi. Quod est contra experientiam.

Pp Ter-

Tertio concesso subtilis materiae motu non infertur ipsius vis centrifuga. Hæc enim à gravitate corporis pendet, unde & pro ratione gravitatis major est. Cum igitur in æthere nulla à Cartesianis adstrui possit gravitas, (alioquin enim unde-nam hanc ipsam repetarent?) nulla erit in illo vis centrifuga. Hinc Perraultius expertus est, globulum cereum ejusdem fere cum aqua specificæ gravitatis, injectum in aquam circulariter agitatam, sic obsequutum fuisse motui aquæ, ut eumdem semper circulum describeret, neque à centro sui motus recederet. Quarto remanet Cartesianis explicandum; cur vis centrifuga corporibus omnibus non æqualiter conveniat, si nulla vere inest illis corporibus gravitas. Quod enim ait Cartesius id ex eo oriri, quod quorumdam corporum figura sit minus apta ad motum, subinfert contra ipsius Cartesii opinionem, particulas secundi elementi sphericam, perfecteque levigatam figuram habentes, maximam vim centrifugam concipere, & fortius, ac validius alia corpora impellere: adeoque à secundo elemento, non à primo repetendam esse gravitatis originem. Quinto Cartesius concedit, Cometas ex uno vortice in alium traxi. Idem igitur contingere posset subtili materiae. Proinde non haberet ista unde mutaret sui motus determinationem, & ad Telluris superficiem rediret, & corpora in

ipsam Tellurem ageret. Aliunde vero cum unus vortex sit alio major, jam vinceret alterius vorticis resistentiam, illumque perturbaret. Sexto cum vis centrifuga major esse debeat sub Äquatore, quam versus Polos, vis gravitatis sub Äquatore maxima, in Polis minima, & in locis intermediis ab Äquatore ad Polos esset continuo minor. Quod experientia repugnat. Et cum vis centrifuga exerceatur per circulos Äquatori parallelos, gravia non ad centrum vorticis, sed ad varia axis puncta detruderentur. Quæ omnia clarius apparebunt ex dicendis in secunda Physics parte, de Cælorum Systemate.

Altera hæc sit ratio. Si ab ætheris, vel aeris pressione oritur gravitas corporum explicari non potest major, vel minor gravitas. Velut cum experimentum, mercurium esse quatuordecim vicibus graviorum aqua, aut frustum aurum plus ponderis habere, quam cupream laminam. Ab eodem quippe æthereo pulvrisculo, & ab eodem aere incumbente, idem procedit impulsus, eademque gravitas. Quare ea corpora essent gravior, quibus incumbit major aeris, vel ætheris portio. Quod allatæ ex experientia contrarium est. Nam plus aeris, seu ætheris in illam cupream expansiorem laminam incumbit. Rursus in ea hypothesi, vel aer inferior æqualem habet vim, ac superior; vel non
Si

Si æquam vim haberet , corpora gravia neutrum moverentur, quemadmodum in marmoribus levigatis , & in hemisphæriis Magdeburgensis contingit. Si aer inferior non haberet æqualem vim, corpora nullatenus possent sursum projici. Quid enim vinceret superioris aeris , sive ætheris resistentiam, quam pene invictam in marmoribus illis , ac hemisphæriis experimur ? Tertio vel aer natura sua gravis est , vel non ? Si primum ; cur aliis corporibus gravitatem denegant Recentiores ? Si alterum ; ergo aer ipse ab alio impellitur deorsum ; & inquisitio recurrat , progrediendo in infinitum. Demum contra Cartesianos speciatim urget , quod ea saxa , & gravia corpora , quæ non sunt colligata æctiori vinculo cum Tellure, si una cum Tellure ipsa in gyros aguntur , conari deberent , ut recedant à centro sui motus, ac subinde viderentur saltitare. Quod falsum est , & ridiculum.

Quamobrem ex dictis nemo non videt ridiculum esse commentum illud Antonii le Grand , & Varnionum adstruere paradoxum, suis nempe illis assertionibus , quas ab initio proposuimus.

Objicies. Verisimile satis est, non modo crassum aerem sed subtilissimum etiam ætherem continuo agitari motū , atque circa Tellurem in gyros agi. Etenim in Zona Torrida perennis ille aeris motus ab ortu in Occasum vel sensu ip-

so percipitur. Jugis quoque , & reciprocus maritimæ aquæ motus vix locum dubitandi relinquit , quod circumfusus aer in perpetuo versetur motu. Igitur ab illo aeris, ætheris ve motu gravium descensus repeti potest. Illud etiam pro certo habendum est ; corpus nempe durum in circumacto fluido positum , ad medium , seu ad centrum rapi : ut in iis vorticibus, qui in aqua torquentur , cernimus, ubi fuerit vehemens sublatus aquæ motus , placidiorque solum permanserit. Secundo , vel ipso Aristotele teste , Omne , quod movet, ab alio moretur. Igitur gravia non moventur à principio intrinseco; Alioquin à se ipsis , non ab alio moverentur. Tertio quotidie experimur globulum plumbeum è longo etiam tubo accurate polito, levi oris attractu sursum ascendere. Porro id fieri non posset , si in globulo illo naturalis , & intrinsecus inexisteret nisus deorsum. Igitur &c.

Respondetur ad primum , nos inficiari æthereæ substantiæ motum , qualis à Cartesio adstruitur. Sed motus ille ætheris , sive aeris ab Oriente in Occidentem deservire non potest corporum gravitationi. Nam motus ille determinatus est , & æqualiter corpora omnia propelleret , quæ simili constent figura. At gravia ex quilibet mundi parte descendunt æqua ratione : & alia citius , alia tardius pro varia ipsorum respecti-

va gravitate. Caussam porro perennis illius motus aeris arbitramur esse Solis actionem : ut erit declarandum in secunda Physics parte. Inficiamus etiam corpora in gyros acta centrifugam vim concipere , & exercere per lineas secantes. De quo alias.

Ad secundum. Ea propositio universim accepta falsa est. Nisi quis velit , omne , quod movet , accepisse ab alio vim motricem , nec sine primi Motoris cooperatione posse vim suam exercere. Quod ultra fatemur. De ea propositione agit Scotus in 2. d. 2. q. 10.

Ad tertium. Cum oris attractu extrahitur è tubo aer , qui & in globum , & in aliud ubi contentum aerem gravitabat , resilit aer iste per vim suam elasticam cessante pressione externa ; unde fit , ut globulus ille sursum trudatur.

Dicimus tertio Gravitatem corporum non oriri à Telluris motu.

Probatur. Motus ille Telluris pro libito confictus est. Quod si extaret in Tellure motus ille , cum Tellus ipsa ex Hobbesio in gyros agatur , cur non continuo à se repellit gravia illa corpora , quæ in Telluris superficie posita sunt , nec tamen illi tenacius cohærent ? Neque tamen id experimur , immo contrarium. Sed & tellus quiescit , nec in gyros agitur : ut erit suo loco constituendum. Tum ipsa aeris continua in Tellurem pressio , & gravitas ostendit , non jam aerem à Tellure repellit , sed in ip-

sam potius Tellurem nitit. Quod vero ad aeris etiana prementis impulsu[m] recurrit Hobbesius , jam ex dictis rejectum est.

Objicies. In Tellure eam vim esse projiciendi à se aerem , & quamcumque rem aliam , suadent experimenta. Si enim ultraquæ manus pelvim tenens , inqua sit parvum aquæ , illam circumagias , sed intra spatium ; quantum potes , minimum ; videbis aquam per latera pelvis assurgere , & exilire. Ex quo manifestum est , motum esse quendam , per quem id , quod sic movetur , corpora sibi contigua , & fluida à se rejicit. Talis etiam est motus ille , quo agricultura cribrum circumagit , ut frumentum cribrando purget. Nam quæ granis frumenti corpora heterogena sunt ad medium cribri coguntur , grana autem frumenti ad latera rejiciuntur. Ita Hobbes. Ergo &c.

Respondetur , id quidem evenire in allatis exemplis , dum vas , in quo sunt minuta illa corpora , vel aqua , modo in unam libratur partem , modo in alteram. Sed tale quidpiam in Tellure contingere nemo usquam demonstravit. Tum rota valide in gyros acta secum trahit paleas , & alia corpuscula. Ergo id Telluris motu potius eveniret : maxime cum aer ipse gravitatione sua , & pressione in Tellurem nitatur.

Dicimus quarto , caussam motus deorsum in corporibus natura-

libus non esse solum Deum.

Probatur. Sine sufficienti ratione Recentiores isti Philosophi internam tollunt à corporibus gravitatis affectionem, & vim omnem caussalitatis denegant creaturis. In quo dispendium faciunt totius Philosophiæ: ut probabimus in seq. disp. quæst. 1. Non ergo Philosophi est ad Deum, veluti caussam totalem, recurrere, quoties evidenter non constant caussas secundas inceptas esse, nee satidoneas. At in præsentiarum hypotheses omnes abjiciunt Recentiores isti, quæ gravitatis originem ab extrinseco derivant. Sed Peripateticorum opinionem impossibilem esse, immo nec improbabilem minime demonstrant. Quare non alia ex caussa hanc ipsam renuunt approbare sententiam, aquam tamen refellere non possunt, nisi quia Peripateticis nolunt assentiri, & partium studio sunt præoccupati. Lege proinde à Deo constituta docent gravia ab ipso Deo deorsum moveri. Sed undenam novarunt illi rem ita se habere? Non nisi ex proprio marte, & arbitrio. Cum igitur ejusmodi leges propounderent, quas re ipsa admittendas esse non probant; quid aliud præstant, nisi verborum sono Philosophiæ studium complecti, Philosophosque illudere?

Dices. Incongruum non est, ad motus caussam assignandam recurrere ad Deum, ut primum motorem. Id enim omnes Philosophi

probant. Igitur non est inconveniens ad Deum recurrere pro causa gravitatis assignanda in corporibus.

Respondetur primam utique motus caussam esse Deum, primamque itidem gravitatis originem à Deo esse repetendam. Sed quemadmodum etiam caussæ creatæ vi motrice pollent à Deo accepta; ut in prima quæstione sequentis disputationis tuebimur, ita & in præsentiarum vim intrinsecam gravitatis in corporibus constituimus, quam Deus iisdem indidit, & communicavit. Quamobrem sicuti incongruum arbitramur caussalitatem omnem motuum soli Deo attribuere, ita quoque in re præsenti disserimus.

Dicimus quinto, Newtonianum attractionis, seu gravitatis principium nullatenus esse admittendum.

Probatur primo. Philosophus ea non debet admittere quæ non probantur sufficienti ratione. Atqui universale illud gravitatis, attractio- nisque mutuæ principium, quam Newtoniani non sensibilibus tantummodo corporibus, verum etiam primitivis eorumdem particulis adscribunt, nulla sufficienti ratione probatur: quemadmodum ex dictis apparebit. Non igitur admittendum est. Et licet ejusmodi vis attractiva, vel insita sit natura- liter pluribus corporibus, vel iisdem communicata, non tamen fas est inde colligere, eamdem omnibus inesse, nemo enim nescit, af-

fectiones aliquas posse pluribus corporibus convenire, quin eadem omnibus aptari queant. Deinde gravitatis istius, & attractionis mutuae caussa nullatenus à Newtonianis explicatur; & quod ait Newton, q. 31. Optices, fieri posse, ut ea attractio impulsu peragatur, tum extrinsecam statuit gravitatis caussam, de quo jam supra diximus, tum locum habere non potest inter primitivas particulas, ex quibus omnia primo componuntur. Quamobrem vis illa merito accensetur qualitatibus occultis, atque eamdem vim velut caussam assumere gravitationis corporum, aliud non est, nisi notissimum effectum ex incognita caussa repetere. Vidi mus sane Gravesandum fateri, non solum ignotam sibi esse caussam, cur corpora se se mutuo attrahant; sed etiam asserere, eamdem ex legibus Naturæ notis minime deduci posse. Quin & ipse Newtonus in Principiis Mathematicis Philosophiaæ Naturalis, ad definition. 8. ingenue scribit: *Voces attractionis, impulsus, vel propensionis cuiuscumque in centrum, indifferenter, & pro se mutuo promiscue usurpo, has vires NON PHYSICE, sed MATHEMATICE considerando.* Unde caveat Lector, ne per huiusmodi vires cogitet me speciem, vel modum actionis, caussamne, aut rationem physicam alicubi definire. Igitur ea vis erit occulta qualitas, cuius nempe physica essentia nō latet.

Respondent Newtoniani, vim

attractionis non esse qualitatem occultam. Cum enim ea sit communis affectio materiae, opus non est illam distincte explicare, aut physicam ipsius caussam nobis distincte innotescere. Hinc Newtonus q. 31. Opticæ ajebat: *Hæc principia (nempe attractionem, & vim inertiae) considero non ut occultas qualitates, qua ex specificis rerum formis oriri singantur, sed ut universales naturæ leges, quibus res ipsæ sunt formatae.* Quippe principia talia vera existere, ostendunt phenomena natura, licet ipsorum caussa quæ sint, nondum fuerit explicatum. Qualitatum occultarum nomen indiderunt Aristotelici non qualitatibus manifestis, sed istiusmodi tantum qualitatibus, quas in corporibus latere, quasque esse ipsas manifestorum effectuum caussas incognitas existimabant.

Verum hæc responsio falsam qualitatis occultæ ideam exhibet. Occulta enim ab omnibus Scholasticis ea affectio dicta fuit, & dicitur, cuius existentiam quidem attingimus, sed essentiam ignoramus. Hoc præ cæteris eluet in vi magnetica, de qua suo loco dicturi sumus, eam nos latere. Extare in magnete vim attrahendi ferrum, nemo ambigit, sed quid ea vis præ se ferat, seu quæ sit virtutis illius essentia, hoc in abdito est. Ergosicut occultam dicimus qualitatem magnetis, ita occulta qualitas erit hæc universalis vis attractiva, quam Newtoniani tradunt. Quamobrem

obrem cum Newton, q. 31. Optimes, doceat: *Affirmare, singulas rerum species specificis præditas esse qualitatibus occultis, per quas ea vim certam in agendo habeant, certosque effectus manifestos producant, hoc utique esse nihil dicere,* idem sane ferendum erit judicium de ipsis Newtoni sententia, qua ibidem scribit, *exiguae corporum particulas habere virtutes, potentias, sive vires, quibus per interjectum aliquod intervallum agant non modo in radios luminis ad eos resistentes, refringentes, & inflectentes, verum etiam mutuo in se ipsas ad producendas pleraque phænomena naturæ.* Mirum autem jure videbitur, Ne wtonianos huic vi gravitatis, seu attractionis determinatas, peculiare sque leges attribuere, quasi vero aut ejusdem physicam naturam perspectam haberent clare, ac distincte, aut saltem omnibus corporibus eamdem inesse evidenter probarent. At nemo non videt, universales quasdam ingenitas materiae affectiones adiuti à Philosopho non posse, nisi manifesta ratio easdem demonstret. Atque hinc.

Probatur secundo assertio nostra. Vis illa gravitatis, attractionisque mutua nequaquam convenit omnibus corporibus, nec adeo est ingenita materiae affectio. Alioquin enim si mutua haec gravitatio locum haberet, omnia corpora in hac nostra atmosphæra existentia non permaneret invicem divisa, & sejun-

cta, sed mutua vi se se attraherent: quod experientiæ adversatur.

Respondent eam vim gravitatis mutuæ omnibus corporibus inditam præpediri, ne in actum secundum exeat, à longe majori vi attrahente, quam Tellus in ea corpora exercet. Si quis objiciat (inquit Newtonus lib. 3. Principiorum: prop. 7. coroll. 1.), quod corpora omnia, que apud nos sunt, hac lege gravitare deberent in se mutuo, cum tamen ejusmodi gravitas nequit quam sentiatur; respondeo, quod gravitas in hac corpora, cum sit ad gravitatem in terram totam, ut sunt hac corpora ad terram totam, longe minor est, quam ut sentiri possit.

Contra est. Experientia comper-tum fit, liquida corpora homogenea se se invicem attrahere. Ita sane guttulae aquæ, si alias similes tangant, in unam majorem guttam concrescent: ut alias diximus. Quod ipsum & in aliis licet intuere. At hoc nequaquam deberet evenire, data majori illa vi attrahente Telluris; hæc enim præpediret vim liquidorum mutuam, ne in actum secundum exeat. Cum igitur id non contingat, palam fit, aut virtutem illam Telluri minime convenire aut eamdem virtutem impedire non posse mutuam corporum omnium attractionem. Deinde si corporum attractio à mutua gravitate materiae ingenita oriretur, eadem semper attractio contingenteret, tametsi partes corporum texturam; mo-

tumque mutent; semper enim eadem deberet subsistere. At aquæ particulæ gelu correptæ vim illam amittunt, caloris autem actione rarefactæ in vapores abeunt, atque tunc non se se mutuo attrahunt, quin potius nova vi elastica expansiva se se alternatim repellunt. Quid igitur in causa est, cur affectionibus diversis eadem materia proprietatem illam attractionis deperdat? Cur ea vis in contrariam repellentem mutatur? Cur aeris particulæ, licet homogeneæ, vim repellentem habent, non attrahentem, cum tamen ejusmodi vis attrahens omnibus corporibus inesse dicatur à Newtonianis, eademque materiæ ingenita?

Probatur tertio. Newtoniani affirmant, omnia corpora plus, minusve gravitationis habere pro minori, majorive distantia à Tellure; & quo propriora sunt Telluri, eo majori gravitate pollere, quia vis attrahens Telluris augetur decrescente distantia; indeque Newtoniani explicant accelerationem motus gravium decidentium, quæ velocior sit semper, quo corpora magis fiunt viciniora Telluri. At si res ita se habet, atque ejusmodi acceleratio ab ea oritur gravitatis lege, corpora gravia descendentia deberent semper motum suum accelerare, donec ad terram ipsam perveniant. Experientia autem ostendit, accelerationem gravium decidentium, acquisito jam determinato gradu, ad æqualitatem

reduci, & ea corpora æquabili motu ad terram pervenire. Ergo doctrina illa Newtonianorum vera non est.

Respond. Corpora tunc æquabiliter descendere propter aeris resistentiam, quippe quo velocior est motus corporis decidentis, eo citius aer dividitur, adeo que magis aucto motu, deberet hæc divisio fieri momento temporis. Quod si corpora in exhausto Machinæ Pneumaticæ deciderent, sublata ibidem aeris resistentia, tunc sane motum suum semper accelerarent.

Contra. Aer magis, minusve resistit pro majori, minorive quantitate gravitatis cadenti corpore existentis; atque aer in circulo magis resistit in primo temporis momento, quo corpus illud pedem unum, v. g. percurrit, quam in secundo, quo percurrit tres pedes, quia in primo spatio, utpote à centro remotius, minorem gravitatem habet, in secundo autem spatio cum sit centro propinquius, majori gravitate pollet; unde aer cedit, minoremque velocitatem corpus in illo spatio obtinet, quam in isto. Rursus si ferrea pila à summitate turris altissimæ demittatur, ad turris medietatem momento temporis perveniens, viginti pedes, puta, percurret. At si eadem pila non à summitate, sed à turris medio dilabatur, non percurrit eodem tempore viginti illos spaci pedes: quod tamen, data Newtoniana gravitatis lege, præstare deberet, quip-

quippe juxta Newtonianam doctrinam catenus pila velocior est in medio turris, quando ab illius summitate descendit, quia in medio gravior est, quam in cacumine turris, nam in istius medio propior est centro Telluris, Denique experientia ostendit, ut postea declarabimus, in exhausto Machinæ Pneumaticæ corpora inæqualis gravitatis æquabiliter quoad sensum nostrum descendere. Quod si ab impetu impresso velis caussam repetere, hæc quoque erit petitio principii, quia posita Newtoni doctrina, ideo impetus pilæ decidentis augetur, quoniam major fit pilæ gravitas ex ipsius ad terram approximatione.

Probatur quarto. Si mutua vis attrahens omnibus insita est corporibus, lucis corpuscula, & Cometarum effluvia (saltem ubi remotiora sint à Sole, & Cometi, nec propinqua sint alteri corpori attractiva sua majori virtute ipsorum vim impedienti) deberent mutuam exercere propriam vim attrahentem, atque in novam aliquam massam concrescere, subindeque nova continuo Sidera procreare. Et quamquam per exigua sint, minimaque subinde vi attrahente pollere dicantur, hæc ipsa tamen, utcumque minima vis proportione respondet eorumdem parvitati, atque adeo illa se se mutuo attraherent, ubi sibi invicem satis propinqua forent. Deinde Solares radii, qui in Planetas, puta

Tom. II.

Jovem, & Lunam impingunt, non attrahuntur ab illis, sed repelluntur, & quidem summa velocitate. Summa autem deberet tunc potius contingere attractio, nam summa, si Newtonianis credimus vis attrahens inest Planetis, qua & Jupiter Satellites suos ad se trahit, & Luna corpuscula aeris subjecta, & aquam etiam maris elevat, unde æstum maris exponunt. Porro lucis radii materia subtilissima constant: Newto autem docente, materia etiam subtilissima gravitate non destituitur.

Objicit Newton, q. 31. Optics, lib. 3. plurima experimenta, quibus attrahentem virtutem corporibus omnibus inditam putat suaderi, ut per eam vim ratio eorumdem experimentorum apta reddatur. Primo enim inquit: *Quum Sal Tartari fluit per deliquium, non hoc efficitur attractione aliqua, qua est mutua inter particulas Salis Tartari, & particulas aquæ, qua vaporum speciem habentes circum in aere volitant?* Et cur non *Sal vulgaris, vel Sal nigrum, vel vitriolum, fluit itidem per deliquium, nisi quod istiusmodi attractionis expers sit?* Secundo *cur Sal ipse Tartari, postquam aquam, pro quantitate sui, certa portione ex aere exhauserit, deinceps non amplius imbibit, nisi quod, postquam aqua saturatus sit, vi illa attrahente deinceps careat?* Et unde est, nisi ab hac vi attrahente, quod aqua, qua per se ip-

Qq sa

sa vel leni admodum tempore distillat, è Sale Tartari tamen distillando elici non potest nisi magno calore? Et annon ejusmodi quoque vi attrahenti, qua inter particulas olei vitrioli, & particulas aquæ mutua sit, attribuendum est, quod oleum vitrioli aquam satis magna portione ad se ex aere elicit: cum autem semel saturatum sit, deinceps non amplius imbibat; & in distillando, aquam ægre admodum dimittat? Tertio quum aqua, & oleum vitrioli in unum vas infusa, concalescant intermiscendo, annon ex calore illo apparat, magnum excitatum esse motum in particulis liquorum? & annon ex motu illo apparat, binorum istorum liquorum particulas inter miscendum magna cum vi coalescere, & consequenter ad se invicem motu cum accelerato irruere? Quod ipsum colligit ex aliorum effervescentia, & motu per commixtionem effectis; tum etiam quod spiritus acidus, qui facile à nitro emittitur, si vitriolo nitrum immisceatur, elevetur statim; & hoc quidem Newton attribuit majori vi attrahenti, quæ inter alkalum nitri existat, & acidum vitrioli. Quarto quum aqua forris dissolvit argentum, non autem aurum, & aqua regia dissolvit aurum, non autem argennum, annon recte dici potest, aquam fortem satis quidem subtilem esse ad penetrandum aurum aquæ ac argentum, carere autem vi illa attrahente: & aquam regiam satis

quidem subtilem esse ad penetrandum argentum aque ac aurum, carere autem vi illa attrahente?.... Cum igitur spiritus Salis precipitat argentum de aqua forti, annon hoc inde sit, quod is attrahat aquam fortem, non autem attrahat argentum, fortasse etiam id à se repellat? Addit Newton plura alia experimenta expositis similia, è quibus idem subinfert.

Respondetur, ejusmodi experimenta potius probare, vim illam attrahentem non esse ingenitam materiae. Nám si hæc vis indita esset materiae, etiam sal nitri, & sal communis eadem vi pollerent. Dicendum est igitur potiori jure, vim attractivam in sale Tartari non à materia, sed ab illius forma oriri, quæ ab aliorum salium forma diversa est. Hinc quando sal alkalicum tartari violentissimo, diurnoque igne in formam vitri reducitur, eam vim attrahentem deperdit, eadem materia permanente. Ignis porro mutare quidem valet rerum formas, non tamen materiam ipsam, aut essentiales ejusdem proprietates. Hæc ad primum.

Ad secundum. Si ratio, cur oleum tartari, & oleum vitrioli non amplius imbibunt vapores, esset quia deinceps creant vi illa attrahente: quando evenire posset, utraque simul commixta se invitam attrahere tanta vi, ut summam excident effervescentiam? Oporteret affirmare, duas diversas vir-

virtutes attractivas illis messe, alteram respecto aquæ alterum respectu acidi in oleo tartari, & respectu alkali in oleo vitrioli. Quamobrem ea virtus attrahens non erit universalis lex naturæ, sed peculiaris affectio hujus, & illius mixti ab ejusdem specifica forma proveniens.

Idem in tertio constat. Etenim nec omnia liquida corpora commixtione concalescunt, aut magnum motum præ se ferunt, quare non materiae, sed formæ effectus ille adscribendus est. Ita quoque si major illa vis attrahens spiritus acidi in nitro convenit sali alkalico nitroso, patet eam esse peculiarem istius salis affectionem, non autem ingenitam materiae proprietatem: quemadmodum vis attrahens magnetis, quæ aliis mineralibus nequaquam convenit, non est proprietas materiae, sed particularis affectio magnetis.

Ad quartum. Inde sequitur, attractionem corporum non à materia proficisci, sed ab eorumdem specifica forma. Hinc ea vis attrahens quandoque ab artificiali corporum mixtione oritur. Ita quando metalla ignis magni vi in vitri formam rediguntur, aut salibus, aut aliis rebus permixtis, vim acquirunt electricam attrahentem, quamquam nec metalla, nec sales, nec res permixtæ polleant virtute attrahendi paleas, aut alia minuta corpuscula etiam metallica.

Quamobrem dicimus internum

extare principium gravitationis in corporibus. Sive jam istud principium ingenita dicatur materiae affectio, sive distincta qualitas. Id enim in medio relinquimus.

Sane sententia ista, quæ gravitatem ab intrinseco repetit, simplicior est, & verisimilior aliis omnibus Recentiorum hypothesesibus. Potuit equidem Deus, Cartesio asseverante, tantum imprimere motum materiae, qui in eadem semper quantitate perserveret. Potest materia subtilis, ut affirmant Cartesiani, motum imprimere aliis corporibus. Potuit Deus vim attribuere uncinatis atomis, ut arrepto per aerem gravi corpore, in Tellurem redeant. Cur igitur non potuit Deus talem vim imprimere corporibus, ut velut sponte sua in Telluris centrum nitantur? Facilius sane intelligitur ista vis corporibus omnibus communis, quæ deorsum ferantur. Quod ipsum ostendit vel tanta inter se se Recentiorum dissensio, & altercatio.

Verum inquietunt Recentiores nullam se hujus interni principii ideam habere posse. Ejusmodi autem querimonias jam sæpe rejecimus. Nulla sane est idea clara, & distincta, fatemur. Nullam esse ideam subobscuram, negamus. At qui ideas claras, & distinctas hisce in rebus exquirit, frustraneo labore contendit, cum ad ultimas rerum differentias infirmam mentis nostræ aciem intendimus. Id ipsum profecto pene omnibus in-

rebus nos ipsi experimur. Id evidentissime demonstrat tanta Philosophantium discordia.

Ex dictis colligitur, virtutem determinativam motus deorsum non esse repetendam ab externo contactu corporum cognatorum: ut exponit Maignanus. Valent enim hic pene omnia argumenta, quæ contra Gassendum proposuimus. Tum partes corporum ex quo se se tangant, non queunt mutare determinationem sui motus, nisi & ipsæ moveantur. Tum determinatio motus non est aliquid ab ipso motu distinctum. Ergo ex eodem principio & motum repetere possumus, & determinationem ipsam motus; Evincitur etiam gravia, & levia non habere vim se movendi à generante, quoniam permanent illa etiam post generationis destructionem; nisi velint Thomistæ ab ipso generante communicari vim internam gravitatis, quemadmodum & alia affectiones communicantur: quod verissimum est. Empedoclis demum opinio corruit, motum gravium, & levium à Cælo repetentis, quatenus illud rapidissima sua revolutione corpora quædam ad se trahat; alia vero propulset. Etenim res tota prohibito conficta est, & iisdem impetratur rationibus, quibus contra Recentiorum hypotheses disputavimus.

Utrum vero corporibus quibusdam naturalibus concedenda sit absoluta levitas, quemadmodum

aliis absoluta gravitas attribuitur; Inquisitio parvi momenti est. Levia sane corpora dicuntur illa, quæ sursum feruntur, sive id ex extrinseca virtute obtineant, sive ab extrinseco sursum trudantur, quod minus isto sint gravia. Maxima aeris rarefactio in pulveris pyrii accensione caussa est, ut in cuniculis turrium partes concutiantur, & sursum pellantur. Bombarda directa orizontaliter explodit pilam ad 800. passus; directa vero per lineam medium inter perpendicularum, & orizontem, projicit pilam ad 2500. passus. Etenim tunc in crassiorem aerem fertur, & qui magis divisioni resistit, nec circumundique ab aere æquabiliter sursum evehit: quemadmodum in posteriori directione contingit. Ita si in phiala vitrea argentum vivum addensatum sit, tertiamque occupet phialæ partem: deinde infundatur aqua stygia, seu fortis, & immediate postea occludatur phialæ orificium, statim phiala crasso fumo impletur, & vehementem adeo motum concipit, ut nisi maximo detineatur conatus, ad cubiculi fornicem advolvet, ubique allidatur, & frangatur. Sursum porro tunc phiala truditur, quod æqualiter circumundique aer in massam illam agat.

QUÆ-

QUÆRES PRIMO.

*Quenam sit causa accelerationis
motus corporum gravium?*

ET si non defuerint Philosophi, qui gravia suum descendendo accelerare motuum negaverint, ut Simplicius, & Arriaga; tamen pro certo habendum est, velocius ea in fine moveri, quam in principio, ut tradit Aristoteles, libr. I. de Cælo, cap. 8. Multis quippe idipsum experimentis compertum est. Constat enim, corpora gravia, quo majori ex altitudine decidunt, eo majorem iactum in subjecta corpora infligere. Gravius etiam ferit lapis ex majori, quam ex minori altitudine decidens. Id autem aliunde oriri non potest, quam ex velociori motu, quem lapis ipse semper decidendo acquirit. Si etenim motus, & velocitas semper æqualis foret, eadem quoque vi, eodemque impetu semper impelleret lapidem, unde percussio major, vel gravior esse non posset. Ut vero rem ipsam exquisite, ac dilucide valeas perspicere, sume lapidem, ac sine illum ex ulnarum vigenti altitudine cadere: tum numera vel penduli, vel tui pulsus vibrationes, eo temporis intervallo, quo lapis decidit. Et, si verb. gr. quatuor fuerint vibrationes, fac deinde, ut lapis cadat ex altitudine quadraginta ulnarum. Videbis autem non duplicari numerum

vibrationum, quibus hic alter motus mensuratur sicuti duplicatur altitudo; sed cadere lapidem sex circiter vibrationum spatium. Evidens ergo est, minus temporis impendi in secunda parte, quam in prima. Adeoque evidens est, motum acelerari. Id ipsum apparet in pendulis, quæ circulariter moventur. Nam si globus (fig. 10. tab. 5.) funi A B appensus decidat ex puncto C, non quiescit in puncto infimo B, ad quod vi gravitatis fertur, sed ultra progreditur in D ad eamdem fere altitudinem, ex qua de-lapsus fuerat, quia nimirum descendendo majorem impetum acquisivit. Igitur &c.

Hæc eadem motus acceleratio, quæ in corporibus perpendiculariter descendantibus observantur, in funependulis etiam deprehenditur, quæ circulariter moventur, sive per varios circuli arcus excurrunt, & ad infimum punctum descendunt. Si enim corpus aliquod X (fig. 5. tab. 10.) funi A B appensum ex puncto C decidat, ubi in infimo puncto B pervenerit ad perpendicularem, non quiescit, sed ulterioris ascendit ad punctum D, ad eamdem fere altitudinem, ex qua descenderat; non alia profecto de causa, nisi quod præter gravitatis impetum, quo solo ad infimum punctum B descenderebat, novum quoque majorem impetum inter descendendum acquirit, quo ulterioris progrederiatur in D.

Objicit tamen Arriaga. Cadant pila

pila coriacea, & lapis ex turri quamvis eadem velocitate moveantur, tamen pila illa nullum infert damnum, lapis vero confringet caput. Ergo ea diversitas repetenda non erit à majori velocitate motus, sed à vehementiori impulsu. Immo quamvis lapis velocius moveretur, hæc tamen major velocitas nullam proportionem haberet cum excessu damni à lapide caussati ; pila enim nec minimum dolorem causavit, ubi lapis comminuit caput. Demum velocius movetur avis rapidissime volans, quam lapis decidens : & tamen lapis caput infrigit, avis vero non nocebit ; etsi aliquem tetigerit.

Verum allata paritas nullam vim habet. Neque enim nos dicimus, ex sola velocitate motus causari majorem impulsu, nam fatemur, in mobili requiri etiam proportionatam gravitatem; ita ut una sine altera minime sufficiat. Hinc major est impetus projecti lapidis, quam plumæ. Immo resistentia moderata in mobili juvat ad motum, unde magis patitur ille, qui plummam projicit, quam qui lapidem; nam impetus brachio impressus à virtute motrice, excutit violenter brachium, quasi ipsum è corpore evellens. Tum major corporum durities deservit, ut major habeatur impulsus mobilis cadentis in subjectum corpus. Deinde explicandum manet Arriagæ, unde-nam habeatur vehementior ille impulsus lapidis.

Alterum autem exemplum primo quidem nos minime impedit, sed & ab Arriaga solutionem expectat, manet enim & illi expoundeda variii illius effectus caussa. Itaque Avis impetum adeo vehementam non imprimit, quemadmodum lapis. Lapis enim durior est, ac gravior, atque toto conatu agit in subjectum corpus. Avis vero tum propter plumas, & mollitem carnis, tum præsertim quia, cum sit vivens, se ipsum sustentat in aere, non imprimit impulsu juxta vires omnes suæ gravitatis in subjectum corpus. Qua ratione gladiator solis manibus non confringeret caput adversarii sui, quamvis maximo certaret impetu ; at si ferrum aliquod, vel lapidem haberet in manibus, minori etiam adhibito conatu, propter lapidis duritatem caput collideret.

Quoniam vero gravium vires finitæ sunt, resistentia autem aeris eo major est, quo celerior est motus, siquidem cum aer cuicunque motui ipsum scindenti resistat, consequens est, ut magis etiam resistat velociori scissioni : ita si quis equo celerrime feratur, sentiet aeris à fronte quasi vento in se agitati resistantiam, quam sane non percipit, dum tardius movetur: ita quoque si baculum in aqua lenite moveas, modicam resistantiam deprehendes, magnam vero, si citius ; hinc fit vires gravium finitas debilitari : & maxime in projectis imminui, ut etiam in istis cesset

set motus ; quo agebantur.

Itaque his constitutis , caussam modo inquirimus illius accelerationis. Circa quam variae extant Philosophorum sententiae.

Et primo quidem plerique ex Recentioribus ab eodem fonte gravitatem, ac illius accelerationem derivari putant. Eadem quippe universim caussa , qua effectum simpliciter ponit , aucta ponit majorem. Unde Telluris magneticam vim, vel aeris pressionem, vel ætherrei pulvisculi impulsu pro caussa habent accelerationis. Quatenus quo grave est terræ propinquius, eo majori vi ab illa trahitur , vel à majori incumbente aeris , sive ætheris molle fortius, deorsum pellitur. Addunt autem plerique, multum ad ejusmodi accelerationem, conferre aerem ipsum inferiorem, per quem fit motus , quia cum aer ille antea immotus magis in principio resisteret , concitatus postea à motu gravis , facilius cedit.

Verum has opiniones facile est ex dictis convellere. Valent enim omnia, quæ in præcedenti quæstione contra gravitatis caussam eamdem protulimus. Quibus accedit, aerem resistentia sua retardare potius, non premoveare motum. Tum aut aer ab initio motus corporis gravis , minus illi resistit, quam in fine; aut magis si minus, cur grave tardius ab initio movetur? si magis; hoc falsum est , siquidem medium suæ qualisq[ue] mque continuatatis tenax , & divisioni resistens , magis

resistit scindenti ipsum velocius, quam scindenti serius : ut diximus: Grave autem, dum primo moveatur, tardius aerem scindit. Crassities quoque aeris longe major in inferiori parte majorem etiam illius resistantiam facit. Postremo aeris resistantia vincitur quidem per motum gravis , non tamen minuitur: quemadmodum qui arcum incurvat, vincit quidem aliquatenus ejus resistantiam, quæ contra incurvationem est, sed eam non minuit, immo paulatim experitur majorem ; ita & motus gravis resistantiam aeris non tollit. Quamobrem aeris resistantia impedit potius accelerationem.

Maignanus propos. 30. ãn. 8. accelerationis caussam ita explicat. Grave acquirit velocitatem , dum aeris resistantiam vincit. Hoc evidens est, quia motus ipse est Victoria supra aeris resistantiam. Rursus omnis motus velocitatem aliquam habet , si comparetur cum motu possibili tardiore ; velox enim , & tardum dicuntur respective , sicuti magnum , & parvum. Addit vero, ex sola majori motus velocitate in moveente vividiorem , ac fortius esse ab eodem actiohem movendi; per velocitatem enim vis motiva est in actu , & viget : ergo per eamdem majorem est magis in actu fortiusque viget. At vis motiva fortius vicens est nata celerius moveare. Ergo celerior motus à sola est velocitate. Idipsum confirmat, quia velocitas , quæ primo tempore fuit

acquisita conservatur eadem, salva, & in columnis tempore sequenti, & insuper eodem sequenti tempore nova velocitas acquiritur, eo quod ut geat continuo gravis pellentis natus idem, immo major, & fortior, ex coniunctione scilicet sui cum velocitate prius acquisita. Hæc Maignanus.

Sed ista nullius pene sunt roboris. Nam velocitas est motus ipse minori tempore idem spatium acquirens. Ergo quemadmodum quando mobilem secundam partem spatii acquirit, prior motus non est, ita nec prior velocitas. Vel igitur Maignanus perperam effingit, motum esse quidpiam permanens, nec successivum; vel cogitur fluentem quoque velocitatem asserere, adeoque nullam unquam ipsius partem in mobili permanentem. Quo admisso, tota corruit Maignani doctrina. Quod vero ait, per velocitatem vim motivam vigere, & esse in actu, lusus est in equivoco. Etenim id verum est de actu non primo, sed secundo, qui vigorem, seu vires non facit sed supponit. Vis autem, quæ major est in actu primo, est nata fortius movere: non quæ major est in actu secundo; nisi actus secundus sit ipse quoque operativus.

Ulterius si illa Maignani dicta intimius inspiciantur, nudum esse verborum apparatum deprehendes, apertamque principii petitionem involvere. Accelerationis enim gravium, quæ effectus est per experientiam notissimum, caussam ignotam

quærimus. Maignanus vero non aliam caussam affert, quam velocitatem ipsam, seu celeritatem. Quid autem ineptius, quam celeritatis caussam inquirenti celeritatem reponere?

Propterea num. 12. ad gravitatem ipsam Maignanus recurrit, quantum hæc est, quæ vi sua totam velocitatem acquirit, & conservat. Quamquam quia gradus velocitatis acquiri non possunt, nisi per partes, & nullo modo per saltus: consequens est, ut sensim ad majorem se velocitatem descendendo promoveat.

Verum ignoramus sane, quid sit velocitatis gradus acquiri per partes. Dicendum potius est, velocitatem minorem mutari in maiorem, sicuti mutatur motus antecedens tardior in sequentem velocirem. Hujus ergo mutationis quæritur in præsenti caussa, quæ non est in ipsa velocitate, quasi antecedens efficiat sequentem, aut ipsa se se; non in gravitate: cur enim gravitas eadem per idem medium descendens, modo illud tardius, modo citius impellit? In primo siquidem minuto supponitur unam ulnam percurrere, in secundo tres. Si ergo viribus gravitas non est aucta, quomodo poterit cum medio ejusdem, aut forte majoris resistentiae composita illud efficacius detrudere: quod antea adversus medium ejusdem, aut minoris resistentiae non poterat?

Communis demum Peripateti-

cōrum opinio , quam nos amplectimur , accelerationis illius causam in impetu acquisitio constituit. Quia per motum efficitur in gravi major semper , ac major impetus usque ad terminum accelerationis ; qui impetus & gravitatem auget , ac motum proinde magis accelerat. Sane motu impetum effici , & majori motu majorem impetum , constat in projectis , quæ à projiciente impulsu non accipiunt , nisi cum eo moveantur : & quo diutius cum eo moventur , eo fortius projiciuntur. Ideo lapidem funda longius , quam manu jacimus ; motus enim lapidis in funda major est. Ideo ut saltum altiore edamus , sive ut obstaculum perrumpamus , retrocedimus quærentes motui majus spatium. Ideo arcus adductus , dum se restituit , sagittam impellit : & quo tenditur magis , eo magis ut se restituat , movetur , majoremque propterea impetum facit in sagittam. Certum igitur est ab experientia , motum impetus & majorum motum majoris impetus esse caussam.

De hoc impulsu dicturi sumus agentes de caussa continuati motus Projectorum.

Objic. In Machina Pneumatica corpora vel levissima celerrime moventur , & æquabiliter. Immox plumbum celerius decidit , quam pluma ; & aurum quam suberum ; sed eadem omnium velocitate descendere videntur. Ita notat

Tom. II.

Gravesande in Physic. Elem. Mathem. lib. 1. c. 9. p. 19. n. 77. & plures experientia comprobavit in Regiis Academiis Parisiensi , & Londinensi. Ergo omnis inæqualitas , & acceleratio descensus ex medii resistantia oritur.

Confirmatur. Per istam quippe sententiam optime explicatur , cur motus longe facilius communicetur mobili jam moto , quam eidem prius immoto. Elaterium enim aeris conservat motum in ipso prius existentem.

Hoc eodem argumento arbitrantur plerique probari etiam posse , Gravitatem non esse corporibus intrinsecam , sed eam illis ab extrinseco convenire. Si enim gravia ex intrinseca virtute deorsum descenderent , hæc utique virtus major esset in auro , quam in subero , in plumbo , quam in pluma. Adeoque in medio non resistente (cujusmodi est æther in machina pneumatica contentus) deberent aurum , & plumbum celerius descendere pro sua majori gravitate , quam suberum , & pluma. Quod cum minime eveniat , conficitur hinc , non vi intrinseca corpora descendere , sed propter externi aeris , vel ætheris pressionem , quæ cum sit æqualis super illa corpora in machina pneumatica , æqualiter etiam descendunt : quemadmodum inæqualis gravium descensus ab inæqualitate pressionis derivatur.

Respondetur. Concedo primam

Rr

par-

partem antecedentis. Et distinguo secundam partem : illa corpora decidunt æquabiliter , hoc est , nulla sensibili inæqualitate , concedo : Omnino æquabiliter etiam re ipsa , nego secundam partem antecedentis , & consequentias inde subillatas. Itaque in machina pneumatica , exhausto crassiori , aere , celerrime quælibet corpora descendunt , quia subtilis aer vel nullam resistentiam exerit , vel fere nullam. Porro retardatio motus potissimum à medii resistentia deprimitur ; Unde lapis tardius descendit in aqua ; quam in aere , quia medium illud crassius est , ac magis resistit divisioni. Decidunt etiam æqualiter sensibiliter , hoc est , si ne ulla sensibili inæqualitate , in illo subtili æthere ea corpora , quæ in libero aere maximam , & sensibilem exhibent descendendo inæqualitatem ; Quatenus nimirum , nullam sensibilem inæqualitatem in illorum corporum descensu tunc deprehendimus. Sed quid inde? Nulla ex iis sequitur consecutibus , quas Recentiores colligunt. Nam vero in libero etiam crassiori aere duo corpora , quæ longe inæqualia sint in pondere , & mole , æqualiter prorsus , eodemque tempore ad terram descendunt , si ex mediocri altitudine demittantur. Quia nempe , etsi dubium non sit , aerem crassiorem uni corpori magis alteri minus resistere , tamen differentia hujus resistentiæ in mediocri illa distantia sensibilis

non evadit. Quocirca & idem dicendum est contingere intra machinam pneumaticam , ubi medium , videlicet subtilis æther æque proportionatus est auro , ac subero ; plumbo , ac plumæ. Non ita cummunis aer ; tenuitas enim plumæ , & ramosa illius configuratio in caussa est , ut non adeo facile crassus aer dividi possit : quare hinc magis plumæ resistit , etiam in mediocri distantia. At si corpora gravia pondere quidem , aut mole sint inæqualia , non tamen maxima adeo sit diversitas configurationis ipsorum , tunc certe in mediocri distantia experti sumus eadem æqualiter descendere. Ubi vero distantia major est , tunc sensibilis evadit resistentia medii crassioris , unde & ad sensum inæqualiter descendunt. Ita expertus est P. Riccioli , & recensent in suo Almagesto. Cum enim anno 1645. die quarta Augusti , ex altitudine 280. pedum romanorum antiquorum (nempe ex Vurri Asellorum , quæ Bononiae est editissima) demisisset eodem tempore duos globos cretaceos diversæ magnitudinis , quorum unus erat unciarum octo , alter unciarum quatuor ; tunc observatum est , iterato quindecies experimento , graviorem globum percussisse pavimentum , cum adhuc levior globus ab eo distaret uno pede , aut paullo amplius. Rursus idem Riccioli ex eadem altitudine , eodem temporis momento demisit duos alios globos , unum

unum pondere unciarum viginti, alterum pondere unciarum decem, sed ejusdem molis; Iterato autem duodecies experimento comperit, graviorem globum attigisse pavimentum, eum levior ab eo distaret pedes quindecim. Ita & cum ab eadem turri demisisset duos globos pondere, & magnitudine inæquales; unius enim pondus erat unciarum 21, & drachmarum quatuor, alterius vero unciarum 11, & drachmarum quatuor; graviorum expertus est attigisse pavimentum, cum alter adhuc distaret è pavimento pedes duodecim. Ex quibus colligitur falsum esse quod ait Aristoteles libro quarto Physicorum, capite octavo, textu 74. gravia corpora in medio descendere velocitate proportionali gravitatibus ipsorum, ita ut pila ferrea millies gravior altera, millies etiam velocius descendant, quam ista. Nam si id verum esset, cum altitudo Turris, è qua captum fuit experimentum Riccioli esset pedum 280. & inter pondus duorum globorum, quorum postremo meminimus, haberetur proportio quasi dupla; debuissest gravior globus pavimentum attingere, dum alter adhuc remotior est per pedes circiter centum quadraginta: ut ratiocinanti perspicuum fit.

Ut vero redeamus ad id, quod proposuimus; hæc poterit haberi ratio, cur corpora inæqualis gravitatis æqualiter ad sensum des-

cendat in exhausto machinæ pneumaticæ. In medio enim non resistente, vel saltem nullam sensibilem resistentiam exhibente, duo corpora inæqualis gravitatis æqualiter sensibiliter descendunt, quia quanto unum excedit alterum gravitate, tanto excedit etiam materia. Quare gravitas major majori materiae communicata, majorē effectum præstat, quatenus majorem materiae quantitatem deorsum trudit; in leviore autem, ubi minor est gravitas, minor quoque extat materia, unde velut compensatio quædam fit materiae, & gravitatis. Quamobrem, si cætera sint paria, æqualiter sensibiliter corpora illa descendit. At vero ubi medium crassius est, & majori vi resistens, tum vel sola figuræ corporum diversitas, vel partium tenuitas exhibere poterunt sensibus nostris ipsius medii resistentiam, quæ tunc major erit.

Porro re ipsa inæqualiter descendere corpora diversæ gravitatis etiam in exhausto machinæ pneumaticæ, possumus confirmare experimento, quo probatur etiam ab aere subtiliori corpora tunc resistentiam pati. Ut enim in physicis experimentis recenset D. Poliner, sint duo corpora pondere æqualia, volumine autem longe inæqualia, alterum puta suberi, plumbi alterum, perfectumque invicem æquilibrium servent. Porro si in recipiente machinæ pneumaticæ constituantur, exsucto ac-

re æquilibrium amittunt, suberumque deprimunt, & plumbum elevat. Quia nempe suberum in aere densiore majorem patiebatur resistentiam aeris, quam plumbum, quoniam illius amplior est superficies, resistentia autem proportionalis est superficie. At postea ubi suberum, & plumbum innatant aeri magis rarefacto, proindeque minus resistenti, plumbum attollitur, quia cum minorem habeat superficiem, respectu ipsius resistentia aeris minus decrescit, ac decrescat in subero ampliorem superficiem habente, adeoque fit, ut tunc relativa suberi gravitas major sit, & vi hujus æquilibrium auferatur, suberumque descendat. Idem experimentum in ampliori cartacea pila, & in pila plumbacea evenire docet D. Nollet tom. 2. lectione 8. prop. 2. exper. 3.

Ut autem facile intelligas rationem eorum experimentorum, quæ ex Patre Riccioli retulimus, atque perspicias, cur gravia inæqualis ponderis, in medio resistente non æqualiter decidant; Oportet animadvertere, gravitatem in corporibus, ut diximus, esse vim impulsivam, qua corpora deorsum feruntur, quæ vis proportionata est quantitati materiæ, quæ in gravibus reperitur. Aer autem vim resistendi habet; sed illius resistentia, cæteris paribus, commensuratur superficiebus corporum immersorum, atque illis est proportionalis. Animadvertisimus e-

tiam, corpora ejusdem gravitatis specificæ non habere eamdem rationem superficerum, & voluminum, aut superficerum, & gravitatum. Quod quidem exemplo sic declaratur. Sit cubus plumbeus, cuius radix sit duorum digitorum, erit ejus volumen octo digitorum, superficies vero cubum ambiens, & terminans 24. digitorum superficialium. Dividatur ille cubus in octo cubos homologos, inter se omnino tum pondere, tum volumine æquales, quorum singuli erunt octava pars & ponderis, & voluminis cubi totalis. Quilibet ex his octo cubis habebit radicem unius digiti: ejus volumen erit unius digiti solidi: superficies ambiens, & terminans erit sex digitorum quadratorum, vel superficialium. Hinc liquet superficiem cubi partialis se habere ad superficiem cubi totalis, ut 6. ad 24. sive ut 2. ad 8. volumen vero ut 1. ad 8. Porro ratio 2. ad 8. major est, quam ratio 1. ad 8. Ergo superficies cubi partialis ad superficiem totalis majorem habet rationem, quam volumen partialis ad volumen totalis. Ergo corpora ejusdem specificæ gravitatis non habent eamdem rationem superficerum, & voluminum; sed nec superficerum, & gravitatum, quia gravitas non est superficie proportionalis, sed massæ, sive materiæ, & in homologis massa proportionatur volumini.

Itaque in primo, & tertio Riccio-

cioli experimento, superficies globi habentis pondus quatuor unciarum habet majorem rationem ad superficiem globi octo unciarum; quam habet pondus quatuor unciarum ad pondus octo unciarum: Siquidem cum in corporibus homologis, sive ejusdem specificæ gravitatis, sed volumine inæqualibus superficies minoris majorem habeat rationem ad superficiem majoris, quam volumen minoris ad volumen majoris, ut diximus; & cum gravia homogenea habeant gravitates, seu pondera quantitati materiae, & volumini proportionalia; sequitur evidenter superficiem minoris illius globi majorem habere rationem ad superficiem globi majoris, quam pondus globi minoris ad pondus globi majoris.

Ex his conficitur, debere eretaceum globum minorem in aere crassiore, ceteris paribus tardius descendere. Cum enim vis impulsiva prædictorum globorum sit eorum gravitati, seu volumini proportionalis; & cum vis resistitiva, seu repulsiva aeris, sit proportionalis superficie globorum; habebit vis repulsiva minoris majorem rationem ad vim impulsivam majoris, quam illius vis impulsiva ad hujus vim impulsivam. Ergo vis repulsiva minoris habebit majorem rationem ad ejus vim impulsivam, quam habet vis repulsiva majoris ad hujus vim impulsivam. Atque adeo, ceteris paribus, & proportione servata, magis resistit aer

gravitati minoris globi. Hic ergo tardius descendet.

Habetis ex his rationem primi, & tertii experimenti. Pro secundo, cum globi sint volumine æquales, sed unus altero duplo gravior, erit materiae quantitas, quæ est in graviore, dupla quantitate materiae, quæ in leviori reperitur; siquidem gravitas est proportionalis quantitati materiae. Ponamus quantitatem materiae, quæ est in graviore, esse exempli gratia ut 1000. erit quantitas materiae in leviori 500. Itaque globus gravior habebit gradus 1000. vis impulsivæ: levior autem solum 500. Ponamus autem, vires impulsivas æquales producere, resistentiae gradus, ut 10. Igitur hi resistentiae gradus communicari debent tam globo habenti gradus 1000, quam habenti gradus 500. vis impulsivæ. Quare dividendo 10. tam per 1000, quam per 500. inveniemus quilibet gradum vi impulsivæ in globo graviori debere sustinere $\frac{1}{100}$ partem gradus vis resistitivæ; quilibet vero gradus vis impulsivæ in globo leviori debere sustinere $\frac{2}{100}$ partes gradum vis resistitivæ. Ergo duplo majorem, ceteris paribus, patietur ab aere resistentiam globus levior, quam gravior. Adeoque globus levior tardius moveatur necesse est, quam gravior.

Hinc igitur patet abunde responsio ad argumentum.

QUÆ-

QUÆRES SECUNDΟ.

Quanam proportione fiat acceleratio gravium?

DIcimus, accelerationem gravium fieri per numeros impares; quatenus si grave descendens primo minuto ulnam, ex. gr. unam spatii conficit, altero minuto tres ulnas conficiet, tertio quinque, & sic deinceps præcedendo per hos numeros 1. 3. 5. 7. &c. Rem ita se Galilæus omnium primus feliciter detexit, & demonstravit.

Ut vero idipsum assequamur, operæ pretium est cum eodem Galilæo animadvertere, quid sint motus aquabilis, & motus aquabiliter acceleratus.

Motus aquabilis, seu uniformis est ille, quo spatii partes quibuscumque temporibus aequalibus a mobile peracta, inter se sunt aequales. Hinc si mobile eadem velocitate plura pertranseat spatia, inter spatia ipsa, & tempora lationum aequalitas erit. Quod si velocitas unius mobilis duplascit velocitate alterius, illud eodem tempore percurret spatium duplex; atque ex duplice spatio duplam fas est in mobile velocitatem colligere.

Motus aquabiliter acceleratus est, qui a quiete recedens temporibus aequalibus aequalia celeritatis momenta sibi superaddit.

Gravitas enim, quæ velocitatem in mobili producit, eadem semper est, eodemque modo (cæteris paribus) semper operantur; adeoque gradus velocitatis per gravitatem acquisiti in singulis temporis partibus aequalibus, puta in singulis horæ minutis, erunt aequales. At cum corpus mobile in semel concepto velociori motu perseveret, quotiescumque gradus velocitatis acquisitæ extingui non possint ab externo objeto: aer autem vim non habeat penitus destruendi motum illum; accirco gradus ille velocitatis jam acquisitus distingui debet ab altero gradu velocitatis, qui deinde per gravitatem acquiritur, primoque gradui superadditur secundus. Corpus adeo grave, quod in primo horæ minuto gradum unum velocitatis per gravitatem acquisivit, in secundo horæ minuto descendit tum vi gravitatis, qua & alterum aequalem velocitatis gradum acquirit, tum vi gradus velocitatis jam in primo minuto acquisiti, atque hoc novo sibi addito velocitatis gradu duplex spatium in secundo minuto decurrit. Quamobrem si grave descendens in primo minuto horæ vi sua gravitatis ulnam spatii conficit; in secundo tres decurret, unam nempe vi gravitatis, duas vero vi gradus velocitatis jam acquisiti, & in ipso gravi permanentis. Jam grave in isto secundo minuto vi gravitatis sua novum rur-

rursus acquirit gradum velocitatis proindeque in tertio minuto duos habet velocitatis gradus acquisitos, quibus primi spatii, seu ulnae quadruplum percurrere vallet: vi autem gravitatis ulnam unam perficit, atque adeo in tertio horæ minuto quinque ulnas excurrit. Et ita deinceps progrediendo.

Res declaratur in figur. 15. tabul. 5. linea A B tempus indicat in plures partes æquales punctis D E F divisum, quo tempore grave descendens decurrit spatium aliquod. In prima temporis parte A D grave acquirit gradum unum velocitatis linea D G repræsentatum. Ea porro proportione, qua augentur tempora, etiam velocitates augmentur; proindeque lineæ DG, EH, FI, BO, quæ inter se parallelæ ducuntur ex punctis temporis DEFB, repræsentabunt velocitates in illis punctis acquisitas, atque omnes istæ velocitates collectum experimentur ab omnibus simul lineis illis, sive à triangulo BAO, & maxima velocitas repræsentabitur à linea BO, vel KA.

Jam si idem grave eo tempore A B, integra illa velocitate BO moveri intelligatur motu uniformi, cum hæc ipsa velocitas in singulis temporis partibus perseveret semper eadem, ut diximus, lineæ DL, EM, FN, BO repræsentabunt velocitates singulas primæ velocitati omnino æquales. Proinde collectio linearum omnium ex

punctis lineæ A B ducibilium, seu rectangulum ipsum BK exprimet aggregatum velocitatum omnium, quæ in prædictis partibus temporis in gravi descendente existunt, & exercentur. Quamobrem cum rectangulum BK sit duplum trianguli BAO, aggregatum omnium velocitatum semper æqualium duplum erit collectionis velocitatum omnium, quæ successive augentur. Atqui dupla velocitate, ut jam diximus, duplex spatium eodem tempore percurritur. Ergo spatium à gravi peractum motu uniformi, & gradu velocitatis jam acquisito duplum est spatii æquabiliter accelerati, dum interim gradus ille velocitatis acquiritur.

Ex his manifestum fit, spatia temporibus equalibus à gravi descendente motu æquabiliter accelerato successive peracta crescere in ratione numerorum imparium ab unitate, 1, 3, 5, 7, &c. Ita corpus grave X (figur. 3. tab. 6.) prius quiesdens, tum descendens, à punto A motu æquabiliter accelerato in primo exempl. grat. minuto temporis peragit spatium A B, puta ulnam; in secundo ulnas tres, in tertio quinque, in quarto septem; atque ita deinceps. Id porro jam ex superiorius dictis declaratum manet.

Ipsa autem spatia à gravi peracta sunt inter se se ut quadrata temporum. Etenim numerus in se seductus, seu multiplicatus alium

nu-

numerum reddit, quem appellant quadratum prioris numeri. Ita 2. reddunt 4; & 3 reddunt 9; & 4 efficiunt 16, si illa multiplicentur. Porro 4 est quadratum 2., 9. est quadratum 3. 16 est quadratum 4. At 2 est latus, seu radix 4; 3 est radix 9; 4 est radix 16: & sic deinceps. Quamobrem cum grave descendens in primo temporis minuto ulnam unam spatii peragat, in secundo tres, in tertio quinque, in quarto septem; duabus minutis ulnas quatuor perficiet, in tribus novem: Numerus autem 4 est quadratum 2 tempus repræsentantis; & 9 est quadratum 3. Idemque progrediendo semper veritatem obtinebit.

Eadem accelerationis ratio contingit etiam in pendulis. Etenim globus è filo trium pedum, & paulo amplius pendens, vibrationem simplicem, descensum nempe, & ascensum, intra minutum secundum perficit. At si filum sit quadruplo longius, intra duo tantum minuta secunda vibratio simplex peragit. Si vero filum sit novies longius, pedum nempe 27, intra tria minuta vibratio perficitur.

Declaratur etiam ex prædicta accelerationis ratione, corpora projecta describere lineam parabolam curvam, seu parabolam, sive horizontaliter, sive oblique emitantur. Globus enim plumbeus (figur. 13. tabul. 5.) vi pulveris pyrii ex tormento bellico erum-

pens, solo impetu sibi impresso æquales spatii partes AB, BC, CD, DE, æqualibus temporis partibus deberet percurrere. At quia vi suæ gravitatis deorsum tendit, & motu æquabiliter accelerato spatia peragere debet AM, MN, NO, OP; hinc motu composito fertur ex horizontali impresso, qui sit æquabilis, & perpendiculari, qui à propria gravitate oritur, & æquabiliter acceleratur, unde fit, ut curvam lineam A R S T V, describat. Si vero oblique emittatur, integrum parabolam ascendendo simul, & descendendo perficiet. Eadem enim ratione, qua velocitas in gravi descendente sensim augetur, velocitas ipsa, seu impetus ille decrescit, qui gravi sursum projecto imprimitur. Vide figur. 14. tab. 5.

Hæc omnia fusius demonstrantur à Galilæo, aliisque Recentioribus. Non defuere tamen, qui expositam Galilæi opinionem experimentis minime convenire dixerint. Ita P. de Chales libr. 2. Statice, proposit. 11. plura in contrarium affert, atque se expertum scribit, uno minuto semisecundo grave descensu suo confecisse pedes $4\frac{1}{4}$; duobus $16\frac{1}{2}$, tribus 36; quatuor 60; quinque 90; sex 123. At cum accuratissimis observationibus Theoria Galilæi confirmata sit, sat est dicere, irregularitatem in experimentis P. de Chales ab aeris resistentia de-

deducendam esse. Sed nec contendimus, accurate, & in quacumque distantia eam progressionem per numeros impares haberi; sed quam proxime solum, & in minoribus saltem distantiis.

DISPUTATIO QUINTA.

De Composito Substantiali.

QUÆSTIO UNICA.

*Utrum Compositum Substantialie
distinguatur realiter à suis
partibus?*

Sæpe diximus, materiam, & formam substantialiem esse duo entia essentialiter incompleta, quorum unum habet rationem *potentie*, seu perfectibilis in genere physico, alterum autem rationem *actus*, seu perfectivi, unde & constituunt compositum substantialie, unum *per se*. Materia porro, & forma constituunt compositum, sicut ipsas eidem communicando. Scotistarum autem opinio docet, compositum substantialie esse entitatem physicam substantialiem, à suis partibus componentibus, materia nimis, & forma, simul, & collectim acceptis realiter distinctam: ut homo: exempl. gratia, quidpiam sit realiter distinctum ab anima rationali, & corpore, simul, & conjunctim sumptis. Alii autem Philosophi oppositam sententiam tuentur, homi-

Tom. II.

nem videlicet aliud non esse nisi animam, & corpus collectum accepta idemque de aliis compositis arbitrantur.

Dicimus cum Scotistis, compositum substantialie realiter distinguiri à suis partibus simul, & collectim acceptis. Ita docet Scotus in 3. d. 2. q. 2.

Probatur 1. Omnis caussa realis realiter caussans debet distingui realiter ab effectu, quem caussat. Alioquin idem esset dependens, & independens; prius, & posterius se ipso; nam caussa est prior suo effectu, & ab illo independens, effectus autem est posterior, & dependet à sua caussa. Atqui materia, & forma sunt caussæ reales, reipsa caussantes substantialie compositum: ut sæpe tradit Aristoteles. Igitur compositum substantialie realiter distinguitur à suis partibus simul & conjunctim acceptis.

Respondent, majorem propositionem veram esse in caassis extrinsecis, non autem in caassis intrinsecis; istæ enim non sunt veræ caussæ compositi substantialis, sed tantummodo illud constituunt, eidem scipias communicando. Materia autem, & forma sunt caussæ intrinsecæ.

Contra. Caussa universim accepta ea est, quæ influit esse in aliud, in quantum aliud. Ergo si caussa materialis, & formalis continetur sub caussa universim accepta, jam caussant aliquid à se realiter distinctum; omnis enim caussa præ-

Ss sup-

supponitur præexistens ad id, quod ab illa caussatur, unde non causat se ipsam, quia nihil est prius, & posterius se ipso. Contendunt autem Scotistæ, materiam, & formam esse veras caussas, quibus rite conveniat notio caussæ universim acceptæ.

Respondent alii, partes unitas vere esse caussas compositi substancialis, etiam ut unitas, non ut secundum se se consideratas. Sed addunt, partes unitas bifariam accipi posse, nempe vel utrasque collectum unitas, quo sensu dicunt ipsam partium collectionem; vel ambas unitas distributive, quo sensu una singillatim accipitur ut alteri unita. Proinde docent, partes distributive unitas caussare semetipsas collective unitas, non vero tertium aliquod realiter ab ipsis distinctum.

Contra, Materia, & forma non sunt caussa adæquata compositi substancialis, nisi ut unitæ, & collectum sumptæ. Ergo ab illis non caussatur collectio, sed partes ipsæ sub collectione acceptæ caussant quidpiam aliud realiter distinctum. Probatur antecedens. Parte unitæ, sed singillatim sumptæ, non sunt caussæ compositi, nisi partiales, atque tantummodo collectum acceptæ integrant unam caussam totaliem; siquidem caussa totalis compositi coalescit ex per se actu, & ex per se potentia, simul unitis & collectum acceptis. Igitur.

Probatur secundo. Compositum

substancialie, ut colligitur ex lib. i. Physicorum, t. 64. est id, quod primo ac per se terminat generationem, & corruptionem; atque ut dicitur l. 7. Metaphysicæ t. 27. proprietas, & operationes propriæ speciei conveniunt primo, per se, & adæquate eidem composito substanciali: ut risibilitas & risus actualis conveniunt homini. Atqui omnia hæc non possunt convenire materiæ, & formæ, etiam collectum acceptis. Ergo quidpiam aliud est admittendum realiter ab illis distinctum. Minor probatur. Nec materia, nec forma est per se terminus generationis, nec id convenire potest unioni illarum, quæ est accidens. Similiter illud est subjectum risibilitatis, quod potest ridere. Anima autem, & corpus hominis, etiam collectum accepta, cum sint duo, non possunt risum actualem in se se recipere, nam risus est accidens, adeoque simul & semel inesse nequit duobus realiter distinctis, & cum aliunde sit accidens immanens, petit recipi in caussa ipsum producente. Igitur &c.

Confirmatur. Partes etiam unitæ sunt plura, & non unum aliquid. Ergo denominatio unitatis per se petit necessario compositum aliquod realiter à partibus distinctum.

Respondent, ea omnia convenire partibus, ut unitis, unde compositum substancialie dicitur generari, & corrupti secundum conjunctionem, & dissolutionem sua-

rum

rum partium. Hinc Aristot. lib. 7. Metaphysicæ, t. 2. explicavit compositi effectiōnem per hoc quod forma fiat in materia; & Patres affirmant, mortem hominis non esse consumptionem substantiæ, sed unitorum separationem. Sic etiam compositum, sive partes collectim acceptæ denominantur operantes, licet operatio in unica tantum parte resideat: quo modo homo dicitur videns à visione in solo oculo residente. Demum partes unitæ sunt unum unitate compositionis quæ sola convenit composito.

Contra. Admissa prædictæ responsionis doctrina, nihil substancialē generaretur, seu nihil substancialē esset terminus generationis, tanquam id, quod producatur per se, & primo; quod falsum est. Hinc docent Aristotelem loco citato dum ait fieri copulationem, loqui de composito, & Patres unice velle, animam hominis non destrui in morte ipsius hominis contra errorem Epicureorum. Sic etiam licet operationes aliquæ recipi possint in partibus, & tamen denominare compositum, id locum habere non potest in operationibus immanentibus, cuiusmodi est risus. Denique Aristoteles numquam dixit materiam, & formam esse unum per se; sed ex illis ait fieri unum per se; proindeque in composito admittenda est unitas major unitate compositionis partium.

Hinc animadvertendum ex doctrina Scotti in I. d. 2. qu. 7. di-

stinguendos esse quinque gradus unitatis: Primo est unitas aggregationis, quam habet etiam cumulus lapidum. Secundo unitas ordinis, & hæc quidpiam addit supra unitatem aggregationis, nempe ordinem quemdam inter partes, qualis convenit, v. g. exercitu. Tertio unitas per accidens, quæ ultra ordinem præ se fert accidentalem informationem: sic se habet homo albus. Quarto unitas per se compositi ex principiis essentialibus, quorum unum sit per se actus, alterum per se potentia; & hæc unitas convenit substanciali composito. Quinto unitas simplicitatis, quæ est vera identitas.

Ex dictis infertur, partes integrales non caussare compositum aliquod integrale, realiter distinctum ab ipsis collectim acceptis, quia nimis partes illæ in se se sunt specificē completæ, nec se habent ut per se actus, & per se potentia. Id colligitur ex Scotto in 4. d. 12. q. 4. ubi docet in Continui divisione desperdi solam partium habitudinem, licet illud compositum distinguatur à qualibet suarum partium, ut idem Scottus asserit in 2. d. 16. Idem dicendum est de composito per accidens, cum subjectum non sit per se potentia, sed ens simpliciter completum, unde licet habeat unitatem intrinsecam, quæ major est unitate extrinseca aggregationis, tamen quia est compositum per accidens; distinguitur à com-

posito substantiali, & est idem cum suis partibus collectum acceptis: ut tradi Scotus in 3. d. 2. q. 2.

Objicies primo. S. August. lib. 3. de Trinit. c. 4. ait, hominem non esse aliud, quam animam, & corpus. In Symbolo S. Athanasii dicitur: *Anima rationalis, & caro unus est homo.* Fertur etiam S. Joannem Damascenum de Verbo Divino dicere: *quod semel assumpsit, numquam dimisit.* Atqui si compositum substantiale realiter distinguitur à suis partibus, assumptum fuisset à Verbo Divino, & in Christi morte dimissum, homo mo etiam esset aliud quidpiam præter animam, & corpus. Igitur &c. Hinc Aristoteles lib. 4. Physicorum, t. 23. ait totum nihil esse præter partes, & lib. 2. de Anima, t. 10. scribit, animam, & corpus esse animal, sicuti oculus est pupilla & visus.

Respondeatur cum Scotistis, ex allatis auctoritatibus unice colligi, hominem includere animam, & corpus: quod verum est, quatenus homo habet suum esse ab anima & corpore; atque ita explicantur duæ priores sententiae. Tertia vero intelligitur de partibus essentialibus. Aristoteles autem intendit, compositum non esse reipsa separatum à partibus, seu non esse sine illis; quod certum est. Utitur porro exemplo oculi, quatenus sicut oculus caussatur à pupilla, & visu, ita & compositum à suis partibus. Ceterum

lib. 11. Metaphysicæ, e. 3. dividit substantiam in materiam, formam, & compositum, & hæc dixit esse substantias tres; adeoque &c.

Objicies secundo. Compositum non potest essentialiter intelligi sine partibus unitis, nec partes unitæ possunt intelligi sine composito. Ergo nullatenus distinguuntur. Omne enim absolutum, quod intelligi sine alio non potest, idem est cum illo. Igitur &c.

Respondeatur. Nego consequentiam. Nam etiam relatio intelligi non potest sine extremis, nec unum correlativum sine alio; & tamen hæc omnia inter se realiter distinguuntur. Omne autem absolutum idem est cum eo, sine quo intelligi non potest, quotiescumque non dicit essentialē dependentiam ab illo, vel non habet cum illo essentialē connexionem; non tamen si secus res sit. Porro compositum dependet essentialiter à partibus, quas essentialiter includit; partes etiam unitæ essentialē habent connexionem cum ipso composito, quia statim ac invicem unitæ sunt, jam sunt causæ actualiter cauantes totum, & illud constituentes; ideoque sicuti caussa actualiter cauans non potest intelligi sine affectu, ita partes unitæ non possunt intelligi sine composito. Nihilominus compositum realiter distinguitur à partibus unitis, quemadmodum relationes realiter distinguuntur ab extremis,

&c.

& termini connotati distinguiuntur realiter à suis connotatis, licet sine illis nequeantur intelligi.

Objicies 3. Vel compositum ab anima, & corpore in homine resultans, & ab illis realiter distinctum, est tota hominis essentia, vel est tantummodo pars essentiae hominis? Si primum, ergo anima, & corpus non sunt de essentia hominis: quod falsum est. Si secundum, ergo illud compositum erit tantummodo pars essentialis; adeoque non erit totum, seu compositum. Deinde essentia realem habet identitatem cum eo, cuius est essentia: ut patet de animalitate, & rationalitate in homine. Ergo si anima, & corpus sunt de essentia hominis non distinguuntur realiter ab ipso homine, sive è composito.

Respondeatur. Compositum illud esse totam essentiam, quæ de homine prædicatur *in recto*, unde consequens est, animam, & corpus non esse de hominis essentia *in recto*, licet pertineant ad illius essentiam in obliquo. Essentia in *recto* ea est, quæ substantive dicitur de composito; essentia autem *in obliquo* est illa, quæ de composito dicitur tantummodo adjective. Prima habet cum composito realem identitatem, non sic secunda. Neque enim valet: Homo est anima, & corpus; sed tantummodo dicere licet: Homo est aliquod constans ex anima, & corpore: in

qua prædicatione partes *in obliquo* affirmantur de homine, tertia autem entitas, sive compositum dicitur de homine *in recto*, & est illud *aliquid* de homine enunciatum. Quod in argumento additur verum est de essentia metaphysica, quæ non caussat realiter & physice compositum, proindeque cum non dicat nisi formalités, ideo non distinguitur realiter. At essentia physica physice caussat, & ideo realiter distinguitur à suo effectu, nempe à composito.

Instabis. Compositum metaphysicum, sive tertia entitas metaphysica non est distincta formaliter à partibus metaphysicis. Ergo compositum physicum, sive tertia entitas physica non est distincta realiter à partibus physicis. Antecedens patet, nam homo non est quidam distinctum ab animali rationali.

Respondeatur. Transeat antecedens. Non enim desunt Scotistæ dicentes, tertiam entitatem metaphysicam distingui formaliter à suis partibus. Nego tamen consequiam & paritatem. Quippe partes physicae, etiamsi accipiuntur simul & conjunctim, semper retinent rationem partis; unde non valet ista prædicatio: homo est anima, & corpus. At partes metaphysicæ *in concreto* acceptæ, prout constituant totum, induunt rationem totius; hinc tenet: homo est animal rationale.

Objicies 4. Si compositum distin-

stinguitur realiter à suis partibus, vel distinguitur ab illis secundum se totum, vel secundum aliquam partem sui? Non primum, quia totum dicit partes. Non secundum, quia tunc non distingueretur à suis partibus. Ergo &c. Deinde totum includit partes. Ergo realiter non distinguitur ab illis.

Respondeatur. Compositum bifariam considerari posse, vel præcise secundum se, quatenus est quidpiam à partibus unitis caussatum, vel secundum ea omnia, quæ per continentiam realem includit. Priore sensu distinguitur realiter à suis partibus, non tamen posteriore sensu, nam licet partes non habeat per identitatem, eas tamen necessario includit per continentiam realem, veluti intrinsecas suas caussas. Duplicem illam compositi acceptiōnēm alii sic expōnunt, ut prior sensus dicatur significare totum categoreticamente & passive acceptum, posterior vero præse ferat totum sincategoreticamente & active sumptum.

Objicies 5. Si compositum esset quidpiam realiter à partibus distinctum, cum sit ens absolutum, posset per divinam potentiam separari à partibus, & sine illis conservari. Quod falsum est; non enim homo potest esse sine anima, & corpore. Igitur &c.

Respondeatur. Nego majorem. Quippe etsi compositum sit quidpiam absolutum, tamen essentialiter dependet à partibus, adeoque

non potest sine illis conservari, quemadmodum creatura, quia pendet essentialiter à Deo, non potest existere sine Deo.

Instabis. Ergo saltem partes unitæ possunt per Dei potentiam existere, & conservari sine composito. Quod falsum est. Consequentia allata probatur. Scotus in 2. dist. 1. quæst. 4. ait: *Impossibilitas quod A sit sine A, aut est propter identitatem B ad A, aut est propter prioritatem, aut simultatem in natura.* Atqui partes unitæ præcedunt natura ipsum compositum, nec ab illo dependent. Ergo possent ab illo separari. Cum vero hoc sit impossibile, dicendum est inseparabilitatem oriri ex reali identitate partium cum ipso composito.

Respondeatur, Scotum loqui de inseparabilitate, quæ oritur ab intrinseco: & hæc profecto non convenit partibus unitis respectu compositi, nam illæ tantummodo ab extrinseco sunt inseparabiles à composito, videlicet ratione unionis, quippe licet unio ista non pertineat ad essentiam partium, tamen partes ipsas constituit in actu primo proximo caussandi compositum. Quamobrem cum Deus nequeat impedire caussalitatem causarum intrinsecarum; quando illa actualiter est, iccirco partes unitæ non possunt esse sine composito. Positis autem partibus unitis, ponitur & ipsum compositum, non quidem *formaliter*, sed de consequenti.

Objicies 6. Admissa hac tertia entitate in homine , vel esset spiritualis , vel materialis? Non primum , quia illa dependet à corpore materiali : res autem spiritualis non dependet à materia. Non secundum , quia ad illam concurrit anima spiritualis : specificatio autem desumitur à forma. Ergo &c.

Respondetur , tertiam illam entitatem esse materialem , quia nimirum partes includit , unde etiam generatur. Specificatio autem desumitur à forma secundum gradum specificum formæ , ut est rationalitas. Forma vero non tribuit semper denominationem à suis genericis prædicatis depromptam , ut alias diximus , hinc homo non dicitur immortalis ab anima rationali immortali.

Instabis. Ergo in homine duo essent corpora , nempe tertia entitas materialis , & corpus ipsum oculis adspectabile.

Respondetur. Distinguo consequens : duo corpora quantitativa , nego: duo corpora physica , scilicet duæ substantiæ materiales , & corporeæ , concedo consequentiam. Compositum enim non est quantum quantitate distincta à quantitate corporis adspectabilis ; & ideo hæc duo corpora simul sunt compenetrata.

Objicies 7. Effectus formalis , verbi gratia , esse album , non distinguitur realiter à sua caussa formalis , videlicet albedine. Ergo nec compositum distingui de-

bet realiter à materia , & forma simul & collectim acceptis.

Respondetur , caussalitatem causæ formalis in ordine ad suum subjectum non esse veram & propriam caussalitatem , quia tunc non habet effectum aliquem physice & realiter productum. Ut igitur caussa formalis sit vera caussa respectu alicujus , dicendum est , eam efficere compositum vero & physico influxo , seu vera & physica actione , alioquin nunquam esset vera caussa. Próinde compositum distingui debet à materia , & forma.

Objicies 8. Si in homine admittatur tertia entitas realiter distincta à corpore , & anima rationali , duæ essent in homine rationalitates. Hoc absurdum est , & ridiculum. Enim vero tunc homo esset bis rationalis , & duæ rationalitates idem omnino præstarent. Igitur &c. Major probatur. Homo est rationalis in suo conceptu formalis , cum definiatur animal rationale , & definitio explicit intrinsecam rei essentiam. Atqui non esset rationalis per rationalitatem animæ. Ergo per aliam rationalitatem. Minor probatur. Rationalitas animæ est realiter indistincta ab ipsa : ergo non potest esse idem realiter cum tertia hominis entitate , quæ realiter distinguitur ab ipsa anima ; & hæc ratio evidenter probat , rationalitatem animæ non posse pertinere ad conceptum formalem hominis. Igitur &c.

Res-

Respondetur aliqui Scotistæ tertiam entitatem hominis dici posse rationalem *denominative* per rationalitatem animæ; sicuti homo dicitur videns per visionem in solo oculo residentem.

Verum isti vim argumenti non percipiunt, quo dicitur, tertiam illam entitatem non esse solum denominative rationalem, sed talem esse in suo conceptu formaliter, siquidem definitur animal rationale, & definitio explicat prædicta essentialia formaliter definito convenientia.

Respondetur. Essentiam hominis metaphysice considerati sitam non esse in rationalitate formaliter, quæ propria est animæ, & realem habet cum illa identitatem, sed in rationalitate radicali, per quam homo dicitur formaliter rationalis in suo conceptu essentiali. Hinc absurdum non est duas admittere rationalitates in homine unam radicalem, quæ ipsam essentiam hominis constitutam, & sit in illo principium essendi; alteram formalem, quæ sit principium ratiocinandi, & pertineat ad ordinem operandi. Hinc patet, hominem non esse bis rationalem, quia rationalitas illa radicalis non est principium ratiocinandi, sed prædicatum quoddam essentiae constitutivum, cuius idea clara & distincta nobis minime suppetit, unde quia est radix principii ratiocinativi, iescirco à nobis dicitur rationalitas radicalis, sicuti admit-

timus impenetrabilitatem radicalem quantitatis. Patet etiam; has duas rationalitates prestare diversos effectus, quia una pertinet ad ordinem essendi, altera ad ordinem operandi. Et ideo &c.

Colligit 1. Duo distingui genera accidentium, nam alia dicuntur perfecta, ut quantitas, qualitas; alia vero imperfecta, quatenus ad compositi substantialis efformationem deserviunt, ut generatio substantialis, mutatio, unio materiae cum forma. Accidentia hæc immediate recipi in partibus compositi evidens est ob allatam rationem. Sed alia accidentia dicuntur recipi immediate in ipso composito substantiali. Hinc nonnulla sunt violenta, non quod materia repugnantiam habeat, nam ipsa est indifferens, sed quia compositum contrariam habeat inclinationem. Id tamen non est dicendum de intellectione, & volitione quæ resident in sola anima spirituali.

Colligit 2. Unionem inter materiam, & formam præ se ferre relationem iisdem superadditam, & ab ipsis realiter distinctam. Id vero sequitur ex dictis in Logica de Relationibus, atque ex iis etiam rationibus probatur, quibus Relationes reales adstruimus.

Aliorum autem Phylosophorum sententia, quæ tradit, totum esse entiale non distingui realiter à suis partibus simul sumptis, plurimum probabilis est. Ita sane ho-

mo (ut à notissimo capiamus argumentum) non est entitas physica realiter distincta ab anima rationali , & corpore , collectim acceptis. Neque enim anima rationalis , & humanum corpus , simul & collectim accepta , sunt re ipsa caussa ipsius hominis , sed potius sunt ipse homo. Si enim caussæ rationem obtinent , vel sunt causa æquivoca , vel caussa univoca: Non primum , quia caussa æquivoca , quoad entitatem suam est perfectior suo effectu : anima autem , & corpus non sunt natura aliqua specifica , completa , & subsistens , cuiusmodi est ipse homo. Porro compertum est , naturam specificam , completam , & subsistentem , semper esse perfectiorem iis , quæ non sunt natura specifica , completa , & subsistens. Tum nequit explicari modus ille caussandi æquivocus , & cum effectus æquivoce productus sit specificè diversus à sua caussa æquivoca , homo esset specie diversus ab anima , & corpore : hoc vero ridiculum est. Non secundum , quia caussa univoce quoad entitatem suam est omnino ejusdem essentiae cum suo effectu : & quidem specificè. Quare anima , & corpus collectim accepta , & ipse homo essent profecto in eadem specie. Atqui de iis , quæ in eadem sunt specie , ipsa natura specifica potest eodem modo , & , ut ajunt , in recto prædicari. Ego ut vera est ista propositio :

Tom. II.

mo est animal rationale , eodem prorsus modo vera esset hæc altera propositio : Animal rationale , & Corpus humanum , collective accepta , sunt animal rationale. Si hoc fateris , jam concedis unum & idem esse ipsum hominem , & animam , ac corpus collectim accepta ; nec unum & idem esse ipsum hominem , & animam , ac corpus collectim accepta ; nec opus est ulla reali distinctione , cum non possint appellari duo individua ejusdem speciei. Quemadmodum ergo caussa formalis , ut albedo , communica subiecto non distinguitur realiter à suo effectu formali : ut dicturi sumus disputatione sequente quæst. 6. ante Object. primam , ita dicendum est , & animam , & corpus , sive caussam formalem , & materialem nominis (idemque valet de aliis compositis , earumque materia , & forma) non esse veras caussas realiter à suo effectu distinctas. Immo vero cum caussa generatim accepta distribuatur in efficientem , formalem , materialem , & finalem : ut diximus in prima Logices parte , sectione tertia , capite septimo ; idem non poterit respectu ejusdem effectus simul habere rationem caussæ formalis , & caussæ efficientis , aut caussæ materialis , & efficientis: quemadmodum non potest simul esse unius ejusdemque effectus sub eadem ratione caussa efficiens , & caussa finalis. Ergo si anima

Tt

ra-

rationalis est caussa formalis hominis, non erit caussa efficiens illius; & corpus humanum, quod est caussa materialis hominis, non poterit simul esse caussa efficiens hominis. Atque adeo anima, & corpus, simul, & collectim accepta, non distinguuntur realiter ab ipso homine.

Quod autem ajunt, risum, aliasque operationes sensitivas non posse recipi in anima, & corpore, quia hæc duo sunt, risus autem unus; hoc captiosum est. Ea enim operatio, quæ risus dicitur, ex duobus conflatur; videlicet ex motu corporis, quem in ridente experimur, & ex interna animæ perceptione, quæ cum illo motu conjuncta internam indicat lætitiam. Priore sensu etiam in brutis, ut in Simia, reperiri potest nec proprie risus est; ac subjectum proinde illius in homine corpus est. Posteriore sensu est animæ affectio; ex qua simul cum eo corporis motu risus intelligitur. Nec adeo opus est, Tertiam ullam Entitatem comminisci, ut sit principium, aut subjectum operationum hominis.

Anima porro, & corpus hominis, cum sint duæ substantiæ essentialiter incompletæ, & ad invicem ex sui natura ordinatæ, ut in tertia Physics parte dicturi sumus, siccirco faciunt unum per se, videlicet hominem. Ideo in hominis generatione, forma corporis utique de novo gignitur,

anima autem rationalis creaturæ fit eorum invicem unio. Nihil porro aliud generatur. Ita in cæteris compositis non viventibus forma generatur, & materiæ conjugitur. Hic autem notare lubet longe falli Patrem Casimirum, qui in prima parte Physicæ, disputat. 5. quæstion. 5. cum sibi objecisset: *Si corpus secundum se est completum in ratione substantiæ, ex illo, & anima rationali non potest fieri unum per se;* respondent negative dicens: *Nam ex Verbo Divino omnino completo, & humanitate fit unum per se.* Is sane non intelligit, quid sit *unum per se;* est enim una natura, quemadmodum unam esse in homine naturam dicimus; sed duplex est in Christo natura, altera humanitatis, altera divinitatis.

Mitto jam dicere ad rem nostram, hominis illam tertiam entitatem, ut vocant, non posse esse spiritualem, quia homo est essentialiter materialis, nec posse esse materialem, quippe vel quantitatem ex se se haberet, seu impenetrabilis esset; vel non: Si primum, penetrari ergo non posset cum corpore: quod falsum est. Si secundum, homo non esset, nec dici posset quantus seu impenetrabilis, quia quantitas cum sit affectio immanens, non potest in hominis corpore existens, tribuere effectum suum formalem impenetrabilitatis illi tertiae entitati, quæ

quæ realiter distincta dicitur à corpore hominis , adeoque & ab ipsa humani corporis quantitate . Tantummodo animadverto ex Patre Casati , in dissert . 4. de Igne , Aristotelem libr . 8. Metaphysicæ , textu 15. dicere : *Omnium enim , quæcumque plures partes habent , & non sunt Omne (hoc est aggregatum) sicut acervus , sed est aliquod INTEGRUM PROPTER PARTES , aliqua est caussa .* Ubi Latinus Interpres aut parum attenus , aut à corrupto codice deceptus , fucum fecit non paucis dicens : *Sed est aliquid aliud præter partes .*

Quomodo igitur describendus est homo , si physice considerare eum velis ? Respondeo cum S. Augustino , lib . 7. de Trinitate , cap . 4. *Corpus , & anima est totus homo .* Unde idem S. Doctor , lib . 19. de Civitate Dei , cap . 3. Varronem laudat , quia hominem nec animam solam , nec solum corpus , sed animam simul , & corpus esse arbitratur . Ita & Athanasius in Symbolo , vel si quis alius est illius Auctor , optime inquit : *Anima rationalis , & caro unus est homo .* Quamobrem rite describitur : *Homo est anima rationalis , & humanum corpus , invicem , conjuncta , & collectim accepta .*

DISPUTATIO SEXTA.

De Virtute activa , & de potentia passiva rerum naturalium .

QUÆSTIO PRIMA.

Sit-ne in rebus naturalibus vera virtus effectrix ?

IN priore Logices parte , sectione tertia , capite septimo , diximus , Caussam universim acceptam *id esse , quod re ipsa , & physice quidpiam facit , ita ut effectus ab eo principio pendeat .* Tum quatuor esse caussarum genera declaravimus , nempe caussam Materialem , Formalem , Efficientem , & Finalem . Ex ea caussæ descriptione fas est colligere , in Divinis Patrem non dici caussam Filii ; nulla enim dependentia in ente summe perfecto locum habere potest : appetit etiam discrimen causæ à conditionibus , quæ mere præquiruntur , ac physice non efficiunt .

Caussa porro Materialis rite dicitur principium , ex quo aliquid sit , velut ex subjecto : quemadmodum caussa Formalis principium est , ex quo aliquid sit velut ex actu , seu perficiente . Quæ manifesta fiunt de materia prima , & forma substantiali ex iis , quæ diximus disputatione prima , quæ-

stione prima. Caussa materialis, & formalis constituunt compositum, semet ipsa eidem communicando. Hinc colligimus, e-jusmodi caussalitatem materiae, & formæ non posse à Deo solo præstari; esset enim contradicatio, nam materia, & forma dicerentur communicatae composito, & re ipsa non essent eidem communicatae. Colligimus etiam, caussam formalē nullatenus distingui ab effectu suo; hinc enim aliud non est, nisi ipsa caussa formalis subjecto comunicata, adeo ut nec Deus possit hujuscce caussæ effectum exhibere sine illa alioquin aperta habetur contradicatio, ut appareat. Hinc sequitur, nec divina virtute posse corpus vivere sine anima, aut sine ipsa sentire. Vivere enim aliud non est, nisi habere vitam, seu animam intime unitam, & communicatam: Sensatio etiam necessario præsupponit principium intrinsece vitale, adeoque intimam animæ communicationem.

Caussa Efficiens ea est, quæ active operatur, & alicui dat esse. Ita Deus est prima rerum omnium adspectabilium efficiens caussa. Quia vero caussa efficiens nequam temere operatur, sed propter finem, quo ipsa ad agendum movetur, iccirco Caussa extat Finalis, & ea est, cuius gratia aliquid fit. Hæc porro caussa finalis est quidem realis, non quod physice operetur in effectum, sed quatenus re ipsa movet caussam effi-

cientem ad agendum, & illam moraliter allicit, præostensa bonitati reali, vel apparenti, qua bonitas cognoscitur ut possibilis, vel ut conditionate futura, si nempe media selligantur apta ad illam consequendam.

Agentia omnia intellectualia propter finem operari, inconfesso est apud omnes. Dicere etiam possumus, bruta quoquomodo agere propter finem, quatenus etsi formalem finis rationem non percipient, quæ materialis non est, nec sensibilis, agnoscent tamen fines sibi proximos, eosque ut sibi ipsis convenientes apprehendunt, & appetunt. Remotis autem fines bruta non cognoscunt, sed in illos solo appetitu naturali feruntur: ea tame dirigit Deus prima rerum omnium caussa, qui omnia etiam alia naturalia agentia ad finem ipsis convenientem, velut Naturæ Auctor, ordinavit; unde illis indidit intrinsecum principium, quo insuum finem feruntur.

Caussa Efficiens bifariam distribuitur in primam, & secundam. Prima illa est, quæ se operatur: ut Deus. Secunda est illa, quæ per virtutem à Deo acceptam agit: quo modo se habent creaturæ.

Caussa efficiens alia est omnino universalis: ut Deus, qui ad omnes effectus active concurrit: Alia dicitur quidem universalis, sed finito modo, & cum aliqua determinacione: ut Sol, qui per universum Orbem calorem, & lucem diffundit.

dit. Altera vero *particularis* appellatur, quæ effectus specie determinatos respicit: ut ignis ad ignem procreandum vim habet.

Rursus caussa efficiens alia est libera, altera naturalis: de quibus sæpe locuti sumus. Dividitur etiam caussa efficiens in *proximam*, & *remotam*. Illa per se se, & *immediate*, ad effectum concurrit; hæc *media-
te*, per aliud nempe, in effectum influit.

Efficiens caussa appellatur *physi-
ca*, cum re ipsa effectum attingit actione sua. *Moralis* nominatur, quando caussam physicam ita movet, ut ex prudenti opinione effectus moventi adscribatur. Hanc caussam constituunt *Jussio*, *Consi-
lium*, *Consensus*, *Palpo*, *Recursus*. Qui recipit, Mutus, Non obstans, Non manifestans. Præcipua tamen moralis caussa dicitur illa, quæ vi alicujus pacti ratio est, cur re ipsa caussa physica operetur, & movet efficientem ad operandum. Ita Jūdēx præcepto suo dicitur *absolu-
te* reum occidere. Atque hinc relucet discrimen caussæ moralis à mero signo, ut ex. gr. est Chyrographum; hoc enim tantummodo debitorem significat, & demonstrat, neque tamē debitorem facit. Contra vero moralis caussa facit effi-
cientem operari. Ita Christus Do-
minus nos rediuit, & caussa mor-
alis est *meritoria nostræ salutis æ-
ternæ*. Unde merita Christi caussa appellantur *meritoria gratiæ*, & *gloriæ*, quas Deus hominibus e-

largitur. Hæc autem *caussa meri-
toria* movet, non ut possibilis, aut conditionate futura: quod proprium esse diximus *Caussæ fi-
nalis*; sed ut existens, vel ut absolute futura, saltem in mente Dei omnia prævidentis. Quamobrem Christi Passio, velut absolute futura, atque ut talis Deo præcognita, promeruit gratiam hominibus in Veteri Lege; quatenus autem re ipsa exitit, promeruit hominibus gratiam in Lege Nova.

Caussa itidem efficiens physica (atque idipsum de caussa morali suo modo dicendum est) alia est *principali*s, alia *instrumentalis*. *Principali*s ea est, quæ vi sua attingit effectum ipsum. *Instrumentalis* est illa, quæ cum in se se virtutem agendi non habeat principali efficienti deser-
vit ad eum effectum producendum, quem agens principale per se inten-
dit. Hæc triplex est, *supernatura-
lis*, quando inservit ad effectum, cui ex propria natura minime ordina-
tur: ita dicimus, Sacra-
menta esse instrumenta, quibus Deus gratiam efficit; *naturalis*, quando famula-
tur agendi naturali relate ad effec-
tum, cui suapte natura conveniens
est: ut calor dicitur instrumentum
ignis; *artificialis*, inservit principali agenti ad opus artificiale effor-
mandum, atque id præstat vi sibi
extrinsecus impressa: sic calamus
scriptioni desservit, sic serra fabro-
rum lignariorum est instrumentum.
Animadvertis autem Doct. in 4. d.
1. p. 5. ultimum hoc instrumenti

ge-

genus non esse activum, adeo ut tota efficientia sit ab Artifice. Ita ligni divisio effective procedit ab Artifice: serra autem materialiter tantum se habet. Hac ratione dicimus, figuram non esse activam.

Altera est etiam divisio caussæ efficientis in *totalem*, & *partialem*. *Totalis* est illa, quæ se sola potest effectum producere. *Partialis*, quæ licet per se solam non possit, tamen cum altera valet id præstare. Etiam in causis secundis locum habet hæc distributio, servata semper dependentia creaturæ à Deo, & concursu effectivo Dei ad omnes effectus procreandos. Hinc caussa secunda aliquando dicitur causa *totalis*, non absolute, sed relate ad alteram caussam creatam. Dicitur autem *totalis bifariam*, & in ratione caussæ & relate etiam ad effectum: quæ nimirum se sola effectum ex toto producit (hanc appellant *totalem totalitatem effectus & caussæ*;) aliquando autem *totalis* appellatur relate tantummodo ad effectum, quando nempe licet effectum non præstet, nisi simul cum altera caussa, quidquid tamen in effectu est, ab ipsa etiam dependet. (istam nominant *totalem totalitatem effectus sed non caussæ*) De caussa *partiali* eodem modo disserimus. Nam alia *partialis* est in ratione caussæ, quæ cum altera effectum producit; alia *partialis* dicitur relate ad effectum, quando duabus caassis agentibus due

etiam distinctæ partes in effectu apparent singulis respondentes.

Inter efficientes caussas alia dicuntur *caussa per se*, alia appellatur *caussa per accidens*. Prima est illa, quæ effectum producit suapte natura, seu ex intentione naturæ. Altera, à qua effectus ex accidenti tantum, non ex intentione naturæ, procedit. Priorem illam ita declarat Doctor in dist. 2. quæst. 2. Unde illud Aristotelis prodiit: *Quod semper, aut fere semper fit, natura fit*. Atque, ut ait Scotus in r. cit. dist. 3. quæst. 4. *Quidquid evenit, ut in pluribus ab aliqua caussa non libera, est effectus naturalis illius caussæ*.

Caussam vero efficientem aliam esse univocam, alteram equivocam in Logica declaravimus.

Cum autem omnis Artifex non operetur nisi ex præconcepcta idea, hinc caussam exemplarem, seu idealē admittere oportet, quæ est ratio in mente Artificis, secundum quam potest aliquid extra se efformare ad ipsius idea similitudinem. Hinc ab ea caussa exemplari Artifex dirigitur in operis efformatione; quippe ut ait Seneca, epist. 65. *Exemplar est, ad quod respiens Artifex, id, quod destinabat, efficit*. Intendit autem Artifex efformare opus externum ad similitudinem *conceptus objectivi*, non vero *conceptus formalis*: quos declarabimus in secunda Lôgices parte, disput. 2. paullo post initium quæstionis.

Caus-

Caussæ demum per accidens tres vulgo recensentur, *Casus*, *Fortuna*, & *Fatum*. *Casus* est caussa per accidens; ad quam per raro sequitur effectus, & dicitur de agentibus, ex determinatione naturæ: *Fortuna* autem in iis dicitur, quæ ex electione sunt propter finem, & raro contingunt. Prioris exemplum, si equus ad flumen properans, ut sitim extinguat, præceps ruat. Posterior, si quis terram fodiens, thesaurum inveniat. Omnia hæc respectu nostrum tantummodo dicuntur, Deus enim omnia certo prævidit. *Fatum* vero, ut optime ait Boetius lib 4. de Consolatione Philosophiae, prosa 6. nihil aliud est, nisi *rebus mobilibus immobilis inherens dispositio*, juxta quam *Divina Providentia suis quæque nedit ordinibus*. At Ethnici cum Divinam Providentiam minime tenebrent, fortunam invexere, nescio quam, Deam, à qua regi putarunt ea, quæ hominibus ex accidenti contingunt, omniaque citra ullum justitiae ordinem disponi. Quod quid ineptius, & absurdius!

His igitur expositis, præsens quæstio circa caussam secundam physicam, & efficientem versatur. Cartesius secunda parte Principiorum numer. 56. Deum solum esse caussam physicæ efficientem docuit, atque fecunditatem omnem, agendi vim, & energiam creaturis ademit. Quamobrem Cartesianorum sententia est, Deum esse unicam efficientem caus-

sam rerum omnium, adeo ut creaturæ nullatenus efficienter influant in ea affecta, quæ oculis nostris obversantur sed solummodo sint caussæ occasio[n]ales, quatenus nempe Deus ipse ad præsentiam creatarum substantiarum hos, vel illos effectus præstat.

Hanc ipsam igitur opinionem Recentiorum ad examen revocare intendimus. Et cum virtus activa, & effectrix bifariam intelligi queat, nempe vel quæ sit effectrix operando, vel quæ sit effectrix producendo; generatim rem ipsam evolvimus: Utrum nempe naturales res suos physice, & efficienter attingant effectus. Hoc enim concesso, ubi effectus novam præse ferat rei productionem, fit vim illam naturalium rerum non solum esse operaticem, verum etiam productricem. Sed an effectus novam, distinctamque obtineant entitatem, ex aliis quæstionibus, & assertionibus pendet. Potissimum ergo de vi effectrice universim spectata procedit quæstio.

Dicimus, naturales res non esse caussas mere occasio[n]ales; sed vera, efficienti, & activa polere virtute.

Probatur primo. Si creaturæ non sunt caussæ vere effectrices motuum, jam omnis penitus Philosophica Facultas sublata nobis est. Hoc porro absurdum est. Ergo creatura, sive naturales res polent vera, efficienti, & activa vir-

tute. Probatur illatio majoris propositionis. Corruit penitus Philosophica Facultas omnis , quoties nos non amplius valeamus composita invicem diversa naturali lumine cognoscere , ac distinguere. At qui si naturales res non sunt caussæ vere effectrices , motuum nos minime possumus naturali lumine composita invicem diversa discernere. Ergo sublata nobis esset penitus Philosophica Facultas omnis. Major evidens est. Quid enim est Philosophya Facultas , nisi rerum naturalium cognitio , & discretio? Minor prob. Iccirco nos, ignem, v. gr. ab aqua distinguimus, & affirmamus, puta hic ignem extare, illic vero aquam , quia ad illorum objectorum præsentiam varios experimur motus. Atqui si motus illi non vere efficiuntur ab igne , & aqua rite non possumus ex motuum diversitate ignem ab aqua discernere, atque hic unius existentiam illic alterius asseverare. Ergo si naturales res non sunt causæ vere effectrices motuum , nos minime possumus naturali lumine composita invicem diversa discernere. Major est certissima , & à Cartesianis ipsis pleno ore traditur , qui cum solum motum localem admittant ; ex sola motus varietate , diversas substantias extare colligunt. Minor probatur. Si solus Deus varios illos efficit motus : utique pro sua libertate; profecto de potentia absoluta efficere posset eosdem motus ad præsentiam

unius substancialiæ , qui sit omnino ejusdem rationis. Porro si Deus ad præsentiam unius substancialiæ posset motus illos præstare jam ex illa motuum varietate non licet colligere substancialium diversitatem. Ergo si motus illi non vere efficiuntur ab igne , & aqua, rite non possumus ex motuum diversitate ignem ab aqua discernere &c. Major propositio à nemine negari potest , qui caussæ mere occasionalis notionem , & potentiam Dei absolutam , & libertatem intelligat. Cum enim caussa occasionalis nihil influat in effectum , cum ipsa non virtute sua Deum determinet ad hunc potius motum efficiendum, quam alterum ; sed id oriatur à sola Dei lege , ac decreto , quo constituit , se velle potius ad præsentiam duarum substancialium, quam ad præsentiam unius , varios motus efficere ; profecto absolutæ divinæ virtuti concedendum est , eamdem posse varios motus exhibere etiam ad unius substancialiæ præsentiam. Probatur igitur minor. Non possumus ex motuum diversitate varias rerum naturas colligere , si certi non simus, Deum præstare velle motus illos ad præsentiam duarum substancialium. Ita res se habet. Ergo &c. Minor probatur. Ea, quæ unice pendent à divina libera voluntate , dijudicari à nobis lumine naturali non possunt; hoc est, naturali lumine illorum potius existen-

stentiam, quam non existentiam, minime colligimus. Cum igitur quod Deus velit varios illos motus potius efficere ad præsentiam diversorum compositorum, quam ad præsentiam substantiæ omnino ejusdem rationis à sola Dei pendeat libertate; Nos certe naturali lumine cognoscere non possumus, Deum potius unam partem præ altera elegisse. Quod idem apparet in existentia Mysteriorum fidei. Ergo &c.

Dices, legem esse Dei, qua vult potius ad præsentiam diversarum substantiarum motus varios efficere.

Sed unde nam probas (maxime per lumen naturale, cui Philosophia innititur), hanc esse Dei legem, cum aliam potuerit Deus oppositam constituere?

Ex generali, inquis, experientia, & ne Deus nos decipiatur; extantiam colligo leges illius.

Verum nunquam Deus decipere homines potest: & tamen potuit varios motus ad præsentiam uniusmodi substantiæ præstare. Experientia vero generalis notos quidem facit varios effectus, sed intrinsecam caussarum occasionalium diversitatem minime demonstrat, cum haec nihil influant. Quapropter si vim effectricem creaturis adimis, ex Dei bonitate, & generali experientia, compositorum essentiale diversitatem non colligis. Tota enim deceptio, & error à nobis ortum duceret, quoniam si-

nè ullo fundamento judicaremus, motus illos produci à Deo ad præsentiam duorum compositorum, qui subsistente divina bonitate ad unius substantiæ præsentiam effici possent; quoniam nempe nos naturali lumine dijudicaremus ea, quæ à sola liberrima Dei voluntate pendent.

Confirmatur hoc argumentum. Etsi ex Dei bonitate, & generali experientia possimus ita ratiocinari: Sensus nostri motus afficiuntur; Ergo existunt corpora, ne Deus nos decipiatur; Attamen juxta placita Recentiorum, & maxime Cartesianorum, qui sensibiles affectiones in objectis contendunt non esse quidpiam simile ideis nostris, ut erit dicendum in tertia Physics parte, disp. 2. qu. 4. non valet hæc argumentatio: Sensus nostri tali motu afficiuntur, & talis in nobis excitatur idea; Ergo tale corpus, puta lucidum, siue lux, existit, ne Deus nos decipiatur. Igitur nec legitima erit ratiocinatio ista: Sensus nostri motibus afficiuntur variis; Ergo existunt varia, & diversa composita, ne Deus nos decipiatur. Ut enim Recentiores contendunt, in allato lucis exemplo deceptionem totam se tenere ex parte Peripateticorum, quos dicunt non rite argumentari; sic ad rem nostram deceptio ab homine oritur inépte ratiocinante, dum sine ullo rationis fundamento concludit, Deum potius ad præsentiam duarum substantia-

rum efficere varios motus , qui à Deo ipso effici potuerunt ad unius substantiæ præsentiam. Sane hypothesis gratia supponamus , Deum re ipsa varios illos motus efficere ad præsentiam unius substantiæ ; Non-ne tunc deciperemur ex variis motibus , diversorum compositorum extantiam colligentes? Ita sane. Unde ergo suppetit fundamen tum asseverandi , Deum ita non operari? Ex naturali lumine nullum est. Quamobrem mirabilis illa Recentiorum opinio , quæ vim omnem , & energiam naturalibus adimit rebus , utcumque à claris , distinctisque ipsorum ideis vendetur profecta , dispendium certissime facit universæ Philosophiæ.

Dices non esse tantam vim in argumento. Posset enim respondere Cartesianus , Deum efficere calor em ad præsentiam ignis , & frig us ad præsentiam aquæ , quia ignis habet in se se principium passivum calor is, aqua vero frigoris. Deus autem naturis rerum accomodat se se.

Verum instantia hæc nullatenus vim nostræ probationis infringit. Primo enim principium passivum dicitur respectu affectionis immanentis , quæ nempe in eadem est re , cui principium illud convenit; non tamen principium passivum dicitur de re per ordinem ad operationem aliquam in alieno sub jecto exercendam , quæ effectus transiens nominatur. Ergo principium passivum calor is in igne &

frigoris in aqua , concludit quidem , Deum rebus omnibus congrua tribuentem , calorem igni dare , & frigus aquæ. Sed cum ignis , & aqua nulla vi polleant agendi , & mere occasionales caussæ dicantur ; principium passivum non determinat Deum ad efficiendum potius calorem in nobis ad præsentiam ignis , & frigus ad præsentiam aquæ , quam ad uniusmodi substantiæ præsentiam. Hinc Deus quaslibet res potest assumere , velut caussas occasionales , etiam respectu illorum effectuum , quibus earum rerum passiva potentia vel non congruit , vel etiam repugnat. Sed & ejusmodi passiva potentia à Recentioribus , maxime Cartesianis , deridetur ; cum corporis cuiuslibet natura per se se sit omnino indifferens ad motum , & quietem. Igitur &c.

Probatur 2. Sribit Antonius le Grand par. 4. Philosophiæ, art. 17. *Quando dicitur durum corpus mouere aliud , non est sensus , quod illi qualitatem reali imperiat , sed tantum quod determinet universalē caussam ad applicandam potentiam ad alterum corpus , in quod virtutem suam motricem non exercisset , nisi ab esset determinata : adeo ut motus omnibus momentis à Deo quasi procreetur. Igitur ex Cartesianorum sententia pilæ à bellicis tormentis explosæ , dum in obsessam irruunt civitatem , nihil aliud præstent , nisi Deum determinare , ut mænia in-*

infringat, & prosternat. Atqui hoc asserere tum à vero alienum est, tum satis ridiculum. Ad quid enim in pilis tantus impetus, ut determinent Deum? Numquid Deus, dormiens est, tanquam potens capulatus à vino, ut tanto bombardarum fragore sit excitandus? Illud etiam petimus: Quorsum fit determinatio? Numquid corpora moventur, seu mænia prosternuntur, obidente Deo voci bombardarum? Si hoc verum est, causa prima determinatur à caussis secundis: quod falsum est. Notum est etiam experientia, corporea agentia, puta homines, magno sæpe, ac ingenti conatu corpora movere, ita ut multoties prä labore lassentur vires, & deficiant. Quis autem credit hoc totum contingere, ut homines determinent Deum ad motum aliquem efficiendum? Rursus nulla demonstratio probare possunt Recentiores, Deum esse unicam caussam omnium motum; & pro libito omnino denegant naturalibus virtutem immediate motricem, & vere effectricem; quemadmodum objectio num solutio declarabit. Igitur &c.

- Probatur tertio. Genesis cap. i. ver. 11. ait Deus: *Producat Terra herbam virentem, & facientem semen, & lignum pomiferum, faciens fructum.* Et Lucæ 21. v. 29. Christus inquit: *Videte siculneam, & omnes arbores, cum producunt jam ex se fructus, &c.* Experimenta itidem constat, plantas producere

fructus suos, ignem calefacere, & comburere. Constat etiam virtutes naturales, formasque creaturis esse collatas. Hæ autem superflua essent omnino, si naturales res nullatenus agerent, & nihil vere producerent. Hinc frustra essent tot organa in animalibus, cum Deus posset tot diversos effectus producere sine illis organis. Communis demum, ac velut à natura insita, hominum opinio est, calor, quem ab igne experimur, vere ab igne caussari. Porro Divinarum Litterarum sententiae proprio semper, ac litterali sensu accipiendo sunt, quoties nihil obsit: quemadmodum in re nostra contingit; nulla enim evidens ratio activæ naturalium rerum virtutis adversatur, nec divinæ bonitati repugnat, creature ut in existentia, sic in operatione similes esse Deo, à quo & existentiam, & operandi virtutem accipiant. Rursus in natura nihil est superfluum, ut optime scribit Aristoteles, & evidens ratio ostendit. Ergo tot affectiones, & formæ, tot organa eatenus concessa fuere creatis rebus, ut istæ operarentur. Communis demum hominum opinio non est facile incusanda erroris. Quemadmodum ergo ex communī hominum sensu rite colligimus existentiam Dei; Ita ex quo homo quilibet, saltem ante susceptam Cartesianæ Philosophiæ doctrinam, judicat caussas secundas vere operari, id verum esse dicendum est.

Objicies 1. Isaiae c. 44. v. 34. ait Deus : Ego sum Dominus faciens omnia , extendens cælos solus , stabilens terram , & nullus tecum. Jobi cap. 10. v. 8. Manus tua fecerunt me , & plasmaverunt me totum in circuitu. Nonne sicut lac mulsisti me , & sicut caseum me coagulasti? Libro 2. Machabæorum, c. 7. v. 22. Mater Martyrum machabæorum sic filios suos alloquitur : Nescio qualiter in utero meo apparuistis..... singulorum membra non ego ipsa compagi : sed enim mundi Creator. Actorum cap. 17. v. 25. Ipse (Deus) dat omnibus ritam , & inspirationem , & omnia. Isaiae c. 26. v. 12. Omnia opera nostra operatus es in nobis Domine. Et in Epistola prima ad Corinthios cap. 12. v. 6. ait Apostolus : Deus omnia operatur in omnibus. Igitur solus Deus caussa est effectrix omnium rerum.

Respondetur, hisce omnibus, ac sexcentis similibus Divinarum Literarum testimoniis nihil aliud collegi , nisi Deum concurrere immediate ad quascumque res creandas : ut diximus in secunda Metaphysics parte , disput. prima, quæst. tertia , de Divina agentes Providentia. Hic tamen immediatus Dei concursus non excludit consortium creaturæ operantis, quam Deus , non quidem ex necessitate , aut indigentia , sed ex sola sua libertate , ac bonitate simul cooperari permitit. Infertur etiam omnem creaturarum vim esse

à Deo illis communicatam: quod ultro fatemur. Sed cum Isaías Deum facit solum , hoc est , sine ulla creaturarum cooperatione exten- disse cælos , stabilivisse terram, id verissimum est , nam se solo Deus rerum condidit Universitatem. Machabæorum Mater sic loquitur, quoniam non arte propria , aut cognitione filiorum suorum membra ipsa disposuit , aut direxit: Deus enim est , qui caussas naturales ordinat , ac dirigit in hominis formatione , alisque naturalibus effectis. Sed hinc minime sequitur , Matres inata sua , & naturali virtute non concurrere ad filiorum generationem , & corpora efformanda.

Objicies secundo. Qui asserunt naturales res vi effectrice pollere, affirmant etiam à rerum natura effectus oriri. Sed hoc ipsum est, Deum, Divinamque providentiam evertere. Nam , ut ait Lactantius in libr. De falsa sapientia , c. 28. Religionis eversio natura nomen inventit ; & ut idem scribit lib. 7. c. 9. natura mundus , non providentia esset constitutus. Igitur &c.

Confirmatur 1. ex Mallebranche lib. 7. De inquirenda Veritate , c. 3. Dum asserunt Peripateti ci formas extare , facultates , qualitates , virtutes , & entia realia idonea ad producendos effectus vi suæ naturæ , divinum aliquod attribuunt corporibus omnibus. Proprium quippe Dei est agere , remunerari , punire. Proinde Sol di-

cendus esset Nūmen. Quæ omnia absurdā sunt. Ergo &c.

Confirmatur 2. Quidquid in nos, ut caussa vera, & realis agere potest, necessario supra nos est. Unde Augustinus ex hac ipsa ratione probavit, non posse corpus agere in animam rationalēm, & lib. 6. De Musica, c. 5. inquit: *Ego enim ab anima hoc corpus animali non puto, nisi intentione facientis; nec ab isto quidquam illum pati arbitror, sed facere de illo, & in illo, tanquam subiecto divinitus dominationi sua.* Igitur &c.

Respondetur duo hæc distingui orportere; nempe naturam ex se se omnia facere, vel aliquando saltem sine Deo operari, & naturam aliquam efficere simul cum ipso Deo. Primum illud damnamus & nos cum Lactantio laudato. Alterum vero asserimus, quod ipsum Sancti Patres approbarunt, dum duas in Christo voluntates, humanam nempe, & divinam tutabantur, & veram efficiētis rationem respectu propriarum operationum in ipsis creaturis agnoverunt. Unde Petavius libro octavo, De Incarnatione, c. 1. Patrum in id testimonia confert, & inter cetera refert Anastasium Sinaitam, in libro, cui titulus, *Dux viæ*, cap. 2. dixisse: *Est energia, auctor S. Gregorio Nysseno, naturalis cuiuscumque substantia virtus, & motio, qua id solum caret, quod non est.* Ita & Basilius epistola

olim 80. nunc 189. inquit: *Propter naturarum differentiam diverse sunt inter se creature, & quæ ab illis sunt operationes.* Et Augustinus libro 6. De Genesi ad litteram, cap. 25. definit caussales rerum rationes, primas caussas finendorum, quas mundo primitus Creator inseruit. Itaque rite dicimus, effectus creatos fieri natura rerum exigente, & coagente cum Deo; sed non sine Deo.

Ad 1. Confirmationem. Dei proprium est operari à se, & omnino independenter. Dei proprium est operari per operationem à se realiter indistinctam, ut in secunda Metaphysics parte, disputat. 3. quæst. 5. diximus, etsi Recentiores creatæ etiam voluntati id commune faciant. Creaturas porro dicimus operari non à se, sed virtute à Deo accepta, operari non independenter, sed cum dependentia à Deo, sine quo creatura non valet operari. Quamobrem nihil divinum admittimus in corporibus. Remunerari, punire procedunt ex cognitione; Quare non conveniunt Soli, nec aliis rebus cognitione parentibus. Sed quemadmodum creaturæ omnes sunt Deo similes in existentia quam obtinent ab ipso Deo, ita nihil vetat, creaturas Deo similes facere in virtute operandi, quam habeant à Deo, nec exercere valeant sine Deo.

Ad secundam Confirmationem. Assumptum illud verum est de se

sola causa universalissima, & omnium prima, nempe Deo, qui utique supra nos est. Sed non in eo distinguitur Deus à creatura, quod ipse operatur, non vero hæc. Discriminis ergo ratio nuper exposita fuit, quia Deus agit virtute propria, & omnino independenter: non sic creatura.

Augustinus autem optime ibidem concludit, non posse corpus agere in animam rationalem, cum materiale non possit agere in spirituale: ut dicemus in 4. quest. quoniam corpus est imperfectius anima, nec ullam habet cum ea specificam proportionem. Admitit tamen S. Doctor ibidem vim activam in anima respectu corporis, & in lib. 83. questionum, questione 8. inquit: *Anima voluntate, id est; illo motu, qui localis non est, corpus suum tamen localiter movere;* & in lib. 7. de Genesi ad litteram, c. 8. scribit: *Anima in istis, tamquam in organis agit; nihil horum est ipsa; sed vivificat, & regit omnia, & per hoc corporis consulit, & huic vite.* In aliis etiam corporeis rebus vim vere effectricem, ac productricem sepe adstruit. Ita lib. 5. de Genesi ad litteram, c. 23. creaturas vere producere asseverat dicens: *Etiam illa, qua aqua, & terra produxit potentialiter, atque causaliter.* Et lib. 9. c. 15. enumeratis quibusdam naturalibus effectis ait: *Natura id agit interiore motu, nobisque occultissimo, qui tam*

men si Deus subtrahat operationem, intimam, qua eam substituit, & facit; in continuo tamquam extinta, nulla remanebit. Et c. 17. inquit: *Alius ergo est rerum modus, quod illa herba sic germinat; illa sic: illa ètas parit, illa non parit: homo loqui potest, pecus non potest.* Horum, & talium modorum rationes non tantum in Deo sunt, sed ab illo etiam rebus creatis inditæ, atque concreatae. Innumera sunt pene alia loca, quibus S. Doctor & divinam operationem, & creaturæ virtutem commendat, quam tamen subditam Deo affirmat; adeo ut sine Deo operari non valeat: Unde lib. 5. citato, c. 20. scribit. *Sic ergo credamus, usque nunc operari Deum, ut, si conditis ab eo rebus operatio ejus subtrahatur intercidant.*

Objicies 3. Illud minime admittendum est, cuius nulla effigi potest idea. Sed activæ creaturarum virtutis nullam ideam habere possumus. Quid est enim virtus illa, seu principium? Profecto non aliam ideam præ se fert, nisi entitatis eiusdem universim acceptæ. Id quippe indicant tot diversæ Scholastico-rum opiniones, quorum alii docent, caussas secundas immediate operari per proprias substantiales formas, alii per materiam, alii per formam, alii per utramque, alii per accidentia, alii demum eas agere autem per quasdam virtutes, seu facultates ab his omnibus diversas, ac distinctas. Igitur &c.

Con-

Confirmatur. Intelligere non possumus ab uno corpore calido calorem produci in alio corpore; nisi illud transmitat in istud partem substantiæ suæ, vel accidentis. Igitur &c.

Respondetur, multarum rerum, ut sæpe diximus, certo à nobis cognosci existentiam, quarum essentiam minime perspectam habemus, & quas subinde non nisi confusa, indistinctaque idea assequi possimus. Id in vi magnetica perspicuum est, in fluxu, & refluxu maris, innumerisque aliis rebus, circa quas quot sunt capita, tot extant sententiæ. Id manifeste elucet in Cartesiana indefinita divisione materiae, quam Cartesius ipse clare, distincteque assequi non potuit, ut ipse fatetur. Aliud est enim quærere, an res sit; aliud quid res sit: Itaque consentiunt Peripatetici, quemlibet hominem pauca intelligere, multa ignorare, nec assertiones suas probare contendunt exclaris, & distinctis ideis. Namque id Cartesianis est proprium, à quibus proinde expectamus tandem aliquando expromi claram illam, distinctamque ideam, quæ ostendat, creaturas esse solum caussas occasio[n]ales, omnique penitus via effectrice destitui. Ex nostra autem sententia operandi virtus facultas est realiter indistincta ab ipsa forma substantiali ejuscumque rei. Quemadmodum vere sæpe diximus in caloris propagatione ignita, aut calida diffundi corpuscula,

ita concedimus aliquando substancialias ipsas operari mediis accidentibus, cum similem affectionem aliis rebus ingenerant.

Objicies 4. Creatura non est sibi sufficiens ad existendum, indiget enim conservari à Deo. Ergo non potest tribuere alteri existentiam. Tum creatura non habet existentiam, nisi à Deo. Ergo non habet operationem, nisi à Deo; Atque ipsa non efficit sibi suas operationes. Quemadmodum enim pendet essentialiter à Deo quod ad existentiam, ita & quantum ad operationem. Tertio ipsa actio creature est à Deo. Ergo creatura nullatenus agit, sed solum Deus: quemadmodum quando baculus ab homine motus movet aliud corpus, motus istius corporis non baculo, sed homini adscribitur. Quarto actio Dei in effectum presupponitur ad actionem creature, quam etiam præcedere intelligitur. Ergo actio creature nihil efficit; Alioquin actum ageret, cum actio divina præcedens jam determinaverit existentiam effectus. Quinto effectus creati pendent essentialiter à solo Deo. Quippe non pendent essentialiter à creatura, sine qua possent à solo Deo produci. Ergo &c.

Resp. ad primum, probari inde simultaneum Dei concursum ad rerum omnium productionem. Quatenus sicuti creatura non est sibi adæquate sufficiens ad existendum, ita ex se sola non est adæquate sufficiens ad operandum, sed

simultaneum requirit concursum Dei.

Ad 2. Omnino dispar est ratio de existentia, & operatione. Creatura, ut intelligitur in priori ad existentiam, nihil est. Quod nihil est, operari non valet. Ergo creatura non potest sibimet comparare existentiam, sed eamdem obtinet à solo Deo. At vero operatio non pertinet ad ordinem essendi, & ante operationem ipsam creatura intelligitur existens, atque adeo capax comparandi sibi operationem ipsam. Quare dependentia creaturæ à Deo quo ad operationem, in eo tantum sita est, ut creatura accipiat à Deo vim operandi, nec operari re ipsa possit nisi concurrente Deo.

Ad tertium. Actio creaturæ simul est à Deo, & ab ipsa creatura. Dispar autem est ratio de baculo, quem homo movet ad aliud corpus movendum. Etenim motus ille non ab ipso baculo est, nec à vi illius intrinseca proficiscitur, sed eidem ab extrinseco communicatur. Verum actio ipsa creaturæ ab ejusdem interna vi provenit, ut probationes nostræ evincunt.

Ad quartum. Creatura non agit actum. Quippe actio Dei compattitur secum creaturæ concursum, & cooperationem; nec Dei actio determinat existentiam effectus, velut causa totalis. Proinde actio Dei præcedit solum perfectione ipsam actionem creaturæ.

Ad 5. Effectus creati dependent

utique à solo Deo dependentia essentiali *simpliciter*, sine qua nullatenus haberi possent. At vero dependent etiam à creaturis dependentia essentiali *secundum quid*; hoc est, ex hypothesi quod à creaturis accipient suum esse, quoniam Deus bonitate sua, & libertate sinit creature secum cooperari ad effectuum productionem.

Objicies quinto. Creatura non valet superare distantiam infinitam. Atqui si vere produceret, toleraret infinitam distantiam. Etenim ens, & non ens infinite distant. Creatura porro producendo, transferret non ens ad esse entis. Igitur &c. Secundo etsi creaturæ non polleant activa virtute, non tamen essent supervacaneæ, nec frustranea in illis essent tot organa. Deservient enim véluti conditiones prærequisitæ ad productionem effectuum: quemadmodum parentuna concursus non est superfluus, licet sit sola conditio ad creationem animæ rationalis requisita. Tertio si creaturæ gaudent vi activa, semper re ipsa agerent; quippe causa naturalis necessario operatur. Quartu Peripatetici pro libito configunt activam virtutem in una re creata, quam alteri pro arbitrio denegant. Quinto Deus solus pro suæ voluntatis beneplacito corpora movet, hoc est, ea in diversis locis continuata creatione conservat. Nec ultra vi, aut potentia sine ipso corpora transferri possunt, cum nulla vis, aut potentia cogere valeat

Deum,

Deum, ut corpora in diversis locis continuo procreet, atque conservet. Sexto S. Augustinus libr. 5. de Cœitate Dei, capit. 9. scribit: *Corporales caussæ non sunt inter caussas efficientes anumerande. Igitur &c.*

Respondetur ad primum, ex ratione illa colligi quidem, nullam rem creatam posse quidpiam creare, hoc est producere ex nihilo subjecti, id est, sine dependentia à subjecto. Etenim ut diximus in prima disputat. quæst. prima, quodlibet agens creatum omnino finitum est, & limitatum, ex suis intrinsecis, tum ex dependentia à subjecto, si ne quo nihil potest efficere. Quavis autem creatura tollere non possit infinitam illam distantiam, quæ inter duos terminos positivos versari intelligitur; tamen distantiam illam auferre valet, quæ intercedit inter esse, & non esse: dummodo semper operetur cum dependentia à subjecto. Nam ex ipsa independentia relucet proprius Divinæ Omnipotentiae character, qui creaturis convenire non potest.

Ad secundum. Concedimus, creature esse posse, & re ipsa esse causas mere occasio[n]ales respectu quorundam effectuum, cum quibus non habent specificam proportionem: ut contingit respectu creationis animæ rationalis. At negamus id universim dicendum esse; nam contrarium ex dictis descendit.

Ab tertium. Caussa naturalis necessario operatur, quando est caus-

Tom. II.

sa totalis, quæ nec præbias exposcat dispositiones, nec præsentiam termini proportionatam. Non sic se habent creaturæ. Et quando res creata est caussa totalis, atque omnibus ad agendum requisitis instruta est; tunc certe necessario operatur.

Ad quartum. Non pro libito effectricem virtutem respectu quorundam effectuum uni potius creaturæ attribuimus, quam alteri. Sed generalis experientia assertiones nostras dirigit, & veritatem ostendit. Quod si rationem exquiras etiam à priori: non alia suppetit, ut recte admonet Scotus in 1. dist. 17. nisi determinata cuiuslibet rei essentia, sive natura.

Ad quintum. Nihil ex proposita ratione evincitur adversus activam creaturarum virtutem. Sed inde solum colligitur, creaturam operari non posse contra voluntatem Dei, nec sine simultaneo Dei concursu.

Ad sextum. Augustinus laudato in loco disserit de caussis efficientibus liberis, & pro nutu suo effecta determinantibus, è quarum numero certe excludi debent corporales caussæ, quæ naturales sunt. Ibi enim totus in eo est, ut contra Ciceronem tueatur, præscientiam Dei non tollere humanam libertatem.

Objicies 6. Nulla res habet à se ipsa id, quod amittere potest, integra permanente sui natura. At qui corpus amittere potest motum, integra permanente sui natura. Er-

go corpus non habet motum à se. Sed nec ab ullo spiritu corpus moveri potest, quippe nulla deprehenditur necessaria connexio inter corpus, & spiritum, ex qua possimus intelligere, quo pacto motus corporis à spiritu pendeat, tanquam à vera efficiente caussa. Ergo corpus movetur à solo Deo.

Respondetur. Nego majorem propositionem, quam Cartesiani probare nullatenus possunt. Deinde falsum est, spiritum non posse movere corpus. Id enim animæ rationali concedendum esse probabimus in tertia Physics parte.

Instabis. Idea corporis perfecte intelligitur, quin motus, aut vis motrix in corpore percipiatur. Ergo corpus non habet ex se vim effectricem motus. Antecedens patet, quia corpus potest esse sine motu, & vis ipsa motrix dicitur ex accidenti convenire naturæ corporis.

Respondetur. Antecedens verum esse, si sola spectetur idea essentia corporis. Sed negamus postea consequentiam. Etenim si dicendum est, corpus non gaudere virtute motrice, quoniam hæc virtus non relucet in idea essentiæ corporis; oportet etiam affirmare, hominem non esse risibilem, quoniam idea essentiæ hominis non præ se fert risibilitatem. Proinde negare deberemus omnes rerum proprietates. Quod absurdum est. Corpus ergo secundum essentiam suam nec vim motricem præ se fert, nec vim motricem excludit. Quare hæc vis

inesse potest corpori, velut illius proprietas.

Objicies 7. Corpus ex se se indifferens est ad motum, & quietem. Ergo non habet vim effectricem motus. Antecedens probatur. In idea corporis non nisi extensio reluet. Sed extensio passiva est, non activa. Ergo &c. Tum si corpus non esset indifferens ad motum, & quietem, tunc vel semper moveri deberet, vel semper quiescere. Quorum utrumque absurdum est.

Respondetur. Distinguo antecedens. Corpus ex se se indifferens est ad motum, & quietem, si spectetur unice ipsa corporis essentia, concedo. Si corpus ipsum consideremus, ut re ipsa est cum suis differentiis, & proprietatibus, nego antecedens, & consequentiam. Sane substantia creata universim accepta, prout communis esse intelligitur menti, & corpori, definitur à Cartesio, parte prima Principiorum, num. 52. *Est una res indigens solo divino concursu, ut sit.* Proinde ex se se intelligitur indifferens ad extensionem, & cogitationem, neutra enim reluet in illius idea, sive definitione, clara utique, & distincta, quam exhibet Cartesius. Ergo ne licet inde colligere, substantiam ipsam, prout de facto est cum suis differentiis, indifferentem esse ad mentein, & corpus, nec præ se ferre cogitationem, vel extensionem? Id profecto negabit etiam Cartesius. At nos eodem modo ratiocinamur de corpore,

ut

ut quamvis ex sua essentia abstrahe-re dicatur à motu , & quiete ; non tamen si spectetur , ut est re ipsa . Extant enim corpora , quæ vim ha-bent motricem , qua in quietem ob-tinendam nituntur . Fatemur tamen , corpus non sibi vindicare insepara-biliter motum , vel quietem actua-lem , quæ profecto ex accidenti il-li convenientiunt ; etsi vis motrix sit à corpore realiter indistincta .

Instabis . Repugnat in corpore principium motus simul , & quietis , cum ex Peripateticorum sententia quies non sit nisi privatio motus . Ergo &c.

Respondetur . Nego antecedens . Etenim motus , & quies ordinantur tanquam medium , & finis ; & i-deo corpus recte intelligit , habere principium motus , quo ad quietem , tanquam ad finem , contendat . Sed & in homine idem est principium assentiendi , & dissentiendo , volen-di , & nolendi . Quocirca non repugnat idem esse principium oppo-sitorum . Corpora autem , ut dixi-mus , moventur ad quietem obti-nendam . Quod sic optime declarat Augustinus enarratione secunda in Psalmum 29. n. 10. dicens ; *Pondus est impetus quidam cuiusque rei ve-lut conantis ad suum locum . Hoc est pondus . Fers lapidem manu ? pateris pondus ; premis manum tuam , quo locum suum queris . Et vis videre quid querat ? Subtrahē manum . Venit ad terram , quiescit in terra , per ve-nit quo tendebat , invenit locum suum . Pondus ergo illud motus erat qua-*

si spontaneus , sine anima , sine consensu .

QUÆSTIO SECUNDA.

Quoniam requirantur in causa effi-ciente ad operandum ?

PLura scitu digna in præsenti quæstione tradituri sumus . Horum autem primum , & præci-puum est , utrum existentia ita sit necessaria causæ efficienti ad ope-randum , ut neque divina voluntate possit creatura operari , nisi re ipsa existat ? Est enim Thomistarum opinio , causam secundam elevari posse virtute supernaturali ad effec-tum aliquem producendum , tamet-si causa ipsa *actualiter* non habeat existentiam , dummodo immediate prius exiterit .

Dicimus existentiam esse *absolu-te* necessariam causæ efficienti , ut effectuum suum præstare queat . Ita docet Scotus in 2. dist. 2. quest. 10. atque huc pertinet illud Philosophi lib. 2. Metaphysicæ , tom. 16. *Quæ non sunt , quo loquentur , aut am-bulabunt .*

Probatur illud est *absolute* ne-cessarium , sine quo effectus nulla-tenus haberi potest . Atqui ita se ha-bet existentia in causa , ut hæc re ipsa operetur . Ergo &c. Minor probatur . Operari præ se fert no-tione sua , & essentialiter , exerci-tum virtutis operativæ . Porro ac-tuale exercitum virtutis intelligi non potest sine existentia ipsiusmet virtutis . Igitur &c. Minor evi-

dens est terminis; alioquin idem simul esset, & non esset: nempe virtus esset, quia exerceatur, non esset autem, quia non haberet existentiam, quæ Thomistis etiam consentientibus, est *ratio formalis essendi*. Cum igitur ea, quæ contradictionem præ se ferrent, ne divina quidem virtute sint possibilia, dicendum superest, existentiam ita esse *absolute necessariam caussæ efficienti*, ut nec supernaturaliter operari queat, & effectum producere, nisi caussa ipsa sit existens. Deinde si caussa secunda elevari debet à Deo ad efficiendum, jam presupponitur existens; nam quod non existit, re ipsa nihil est: quod autem re ipsa nihil est, nec potest esse capax elevationis. Igitur. &c.

Respondent, satis esse, si caussa existat *virtualiter*, & in ratione caussæ: non oportere autem eamdem existere *formaliter*, & in ratione entis.

Contra. Dum caussa dicitur existere *virtualiter*, & in ratione caussæ, aut id præ se fert caussam entitate sua esse extra nihil, vel non? Si Primum, jam caussa revera existentiam habet. Alterum autem affirmari non potest; reddit enim argumentum propositum: ut patet.

Respondent. Non requiri necessario existentiam caussæ, quando re ipsa caussat; sed satis esse, si caussa immediate prius extiterit, adeo ut inter caussam, & effectum

quædam habeatur unio per immediatam durationis successionem: quemadmodum inter caussam, & effectum non est necessaria penetratio, sed sufficit si contigua sint quoad locum.

Contra. Caussam, & effectum, dum is re ipsa producitur, deberet simul existere, probationis nostræ ratio evincit, quia quod re ipsa non existit, nihil est, ac subinde nec operari potest. Tametsi igitur caussa dicatur immediate prius extitisse, hoc non sufficit, ut habere queat exercitium suæ virtutis. Dispar porro est ratio de caussa, & effectu relate ad locum; hoc enim ipso quod contigua sunt, jam re ipsa caussa existit, & intelligitur virtutem habere effectivam. Quemadmodum igitur caussa, quæ re ipsa non existit, sed immediate postea intelligitur futura, non potest physice caussare effectum; ita nec caussa, quæ immediate prius fuit. Et quamquam hæc dicatur existere in suo termino, id nihil proficit, quia semper verum est, caussam fuisse, atque re ipsa non existere.

Objicies. Existentialia est conditio caussæ efficientis. Atqui Deus se solo; & virtute sua supplere potest defectum cuiuslibet conditionis. Ergo per divinam virtutem caussa etiam non existens potest effectum producere. Major evidens est, quia existentialia non est *formalis ratio* efficiendi. Minor probatur. Deus se solo, & virtute sua supplere potest defectum cuiuslibet

bet caussæ secundæ efficientis : ergo ducto argumento à majori ad minus , potest etiam supplere defectum cuiuslibet conditionis. Deinde anima volitione sua movet corpus , adeoque volitio est caussa illius motus , nec tamen ipsa permanet , quandiu perseverat motus. Formæ elementorum cauissent formam corporis mixti , neque tamen simul cum ista existunt. Motus est caussa , cur res dicatur mutata , & tamen motus jam præteriisse intelligitur. Ita intelligimus instans temporis effici à parte temporis , quæ immediate præcedit ; & Sphæra , si perfecta sit , intelligitur tangere planum , in quo ponitur , & nihilominus tantummodo in puncto illud tangit. Idem igitur dicendum de caussa &c.

Respondetur ex dictis in prima Metaphysicæ parte disputatione , quæst. 3. in solution. ad secundam instantiam object. 3. distinguo majorem : Existentia est mera conditio caussæ efficientis , nego majorem : est conditio , quæ tamen pertinet ad ipsammet virtutem efficiendi , concedo majorem. Falsa etiam est minor absolute proposita ; atque hinc negatur consequentia. Existentia non est mera conditio operantis , sed pertinet ad ipsam rationem operandi , quia ponit virtutem activam in esse actuali , & extra nihilum ; adeoque eamdem constituit in actu primo proximo ad operandum. Quamvis igitur Deus sola virtute sua om-

nem possit efficientiam creaturarum supplere , non tamen dicendum est , ipsum etiam supplere posse conditionem omnem operantis , & efficere , ut quod re ipsa non extat , operetur. Conditiones autem ad agendum requisitæ sunt duplices generis. Nam aliae sunt absolute necessariæ , à quibus nempe vis activa , ut talis , essentialiter pendet : quo modo cognitio objecti , & finis necessario requiritur , ut voluntas ad agendum moveatur ; unde & objectum ipsum amoris , & finis etiam debent existere *intentionaliter* in mente agentis. Aliæ vero conditiones sunt necessariæ solum ex accidenti , vel propter agentis limitationem , vel propter naturalem rerum ordinem. Has potest Deus virtute sua supplere , sed non illas.

Volitio autem animæ dicitur caussa motus corporis , quatenus imperat , & applicat potentiam locomotivam , unde motus tamdiu perseverat , quandiu virtus hæc exercetur. Formæ porro elementarunt dicuntur caussæ materiales mixtionis , sensu illo , quem declaravimus disputatione secunda quæstione secunda , corpus autem mixtum ab ipso agente efficitur. Idem de re mutatione , idem de instanti temporis dicendum , si hoc reale quidpiam dicatur. Sphæra denique ideo intelligitur tangere planum in puncto , quia ipsa concepitur existens , & puncto conjuncta ; unde si solum punctum intelligatur , sphæ-

ra non diceretur tangere planum. Idem igitur de caussa efficiente dicendum.

Secundo animadvertisimus, necessariam non esse realem distinctionem agentis à recipiente, ut actio habeatur æquivoca, qua videlicet res una quidpiam efficit à se diversum specificē: ut docet Scotus in 1. dist. 3. quæst. 7. Ita anima suas sibi efficit intellectiones, & gravia à se ipsis deorsum moventur: ut alias diximus. Actus autem intellectionis realiter distinguitur ab anima, ut suo loco docuimus: quod satis est, ut caussa effectum habere dicatur à se realiter distinctum. Idem in aliis fatemur. Univoca vero actione, quæ effectum connotat ejusdem naturæ cum caussa, nihil potest in se ipsum agere. Hinc idem non potest efficere se ipsum. Id optimè Sanctus Augustinus expressit, probavitque in lib. 2. de Libero arbitrio, cap. 17. ubi ait: Nulla res formare se ipsam potest: quia nulla res potest dare sibi quod non habet: & utique ut habeat formam, formatur aliquid. Quapropter qualibet res si quam habet formam; non ei opus est accipere quod habet: si qua vero non habet formam, non potest à se accipere quod non habet. Nulla ergo res formare se potest. Quod attinet vero ad accidentarias affectiones, agentia univoca, ut similem affectionem producant, necessario postulant dissimilitudinem aliquam in ipsa intentione qualitatis; alioquin actio, & reactio

omnino essent æquales, nec potior præsto esset ratio, cur unum in alterum agat. Si quæ porro experientia huic doctrinæ nostræ adversari videntur, ea suis locis apte explicantur, nec vacat eadem hic repetere.

Tertio cum caussa det esse effectui, ea utique secundum se se est ab illo independens, adeoque est prior effectus suo. Sufficit autem prioritas naturæ: de qua diximus in prima Logices parte, disp. 4. in fine quæst. 2. Ita quoque caussa æquivoca debet esse perfectior effectu suo, cum virtutem habeat plures, & varios effectus præstandi, proindeque perfectione pollere debet singulis majore. At similitudo specifica, quæ inter caussam univocam, & effectum suum reperitur, utriusque perfectionem specificam æqualem esse declarat.

Quarto an virtus effectrix, quæ rebus creatis convenit, exerceri possit immediate in distans, dubium est, quod in varias opiniones distracti potest pro diverso sensu disserentium. Certum porro est, uniuscujusque creati agentis virtutem finitam esse, & limitatam, etiam quoad spatiū, & distantiam, ad quam diffundi possit. Unde effectus quidam supersticiosi vel ex hoc ipso deprehenduntur. Certum pariter est, caussam naturalem diffundere actionem suam etiam in medium sibi proximum, quoties hoc capax est ejusdem actionis. Quan- doque autem contingit, ut agens in

in partes spatii sibi propinquai majori vi operetur, quam in remotores; sed aliquando ob varias medii dispositiones actio vegetior esse potest in subjecto distanti, quam in medio proximiore. Si vero medium non sit idoneum actioni subjectum, eamque nihilominus non impedit, actio immediate in distans exercetur. Dum autem & medium capax, & terminus idoneus est, vis ipsa agentis in partes omnes fertur spatii sibi convenientis: & quidem in omnes eas partes immediate. Ita Sol lucem efficit per totum Orbem, & licet agat in aere, tamen lucem in ipsa etiam Tellure immediate producit. Recolite experimenta, quæ exhibuimus in finc quæstion. 4. disputat. 4.

Postremo dubium alterum facile resolvimus: Num caussæ possint esse sibi invicem caussæ? Si enim eadem ratio in utraque causa spegetur, si in eodem ordine considerentur; planum est, id nullatenus contingere posse. Alioquin idem simul esset prius, & postius se ipso; cum omnis caussa sit prior effectu suo. Quamvis in diverso ordine, ac pro diverso temporis instanti locum id habere possit; unde finis in ordine intentivo movet ad media paranda: & media ipsa in ordine executivo finem assequuntur. Per accidens igitur igniti carbones plures simul collecti se se conservant, nempe externo ambienti aeri humido re-

sistendo, & illius actionem repellendo. Duæ manus invicem confricatae incalescent, quoniam motu ad cutem evocantur calidiores spiritus animales. Et in aliis omnibus, vel diversa affectio producta habetur, vel varia caussalitas. Alioquin nulla unquam erit actio. Unde illi, qui sibi mutuo contestantur, nunquam se ingressuros locum aliquem, nisi alterum viderint præsumptum, nunquam profecto ingredierentur, si promisso stare vellent. Quamobrem unus, vel alter profundiori capitis inclinatione veniam petit, quod desit promisso; & prior ingreditur.

QUÆSTIO TERTIA.

Vtrum accidens possit producere substantiam?

THomistarum opinio est, substantiam unam creatam non producere alteram immediate, sed id præstare medio aliquo accidente seu forma accidentaliter absoluta, quo velut instrumento, & virtute substantia ipsa utatur ad alterius substantiæ productionem. Aliis placet, accidens esse caussam partialel substantiæ, adeo ut simul cum substantia, cui convenit, alteram procreet. At Scotistæ cum Doctore in 4. distinction. 12. quæstion. 3. arbitrantur, substantiam immediate, & sua substantiali virtute productivam esse alterius substantiæ, non autem medio accidente; im-

mo affirmant, accidens inservire substantiæ velut dispositionem ad agendum præviā, nullatenus vero active operari in substantiam illam, quæ de novo producitur; addunt etiam, accidens ita ineptum esse ad productionem substantiæ, ut nec divina virtute elevari queat ad substantiam producendam. Has igitur sententias præsentis quæstione discutimus.

Dicimus, accidens non posse naturaliter producere substantiam, ne quidem per modum caussæ partialis, sed nec supernaturaliter elevari posse ad substantiam producendam.

Probatur prima pars. Omnis causa æquali saltem gaudere debet perfectione cum suo effectu. Atqui accidens longe imperfectius est substantia. Ergo accidens non potest naturaliter producere substantiam. Major est evidens. Caussa enim præcontinere debet virtute effectum suum; alioquin pro arbitrio posset quis comminisci, entia perfectiora à quibuscumque imperfectis produci. Minor probatur. Substantia est per se, accidens inhæret alteri. Sed esse per se perfectionem dicit longe majorem inhærentia. Igitur &c.

Confirmatur. Principium proximum, & immediatum productionis illud est, quo caussa, & effectus proximam, & immediatam similitudinem habet. Atqui substantia producens, & substantia producta similes sunt proxime, & immediate

per formam ipsam substantialem; qualibet enim accidentaria affectio ne seclusa, similes nihilominus essentialiter intelliguntur. Ita ignis producens, & ignis productus, secluso etiam calore, sunt ejusdem speciei. Igitur &c.

Hinc sequitur, substantiam ipsam per se operatricem esse, & productricem alterius, non vero per accidentales qualitates; unaquæque enim essentia propriam sibi vindicat operationem, & operatio ipsa essentiam sequitur. Accidens autem deservit substantiæ per modum dispositionis, qua subjectum disponatur ad novam substantialem formam, quæ immediate ab ipsa substantia agente producitur. Sic calor est dispositio ignis. Unde Aristoteles lib. 2. de Generat. tom. 54. eos reprehendit, qui immediatam substancialium formarum virtutem negabant, & ait: *Amplius autem & potentias attribuunt corporibus, propter quas & generant valde instrumentaliter, auferentes eam, quæ secundum formam caussam.*

Probatur 2. pars. Non alia ratione cognoscere possumus quidpiam ab altero, velut à caussa etiam partiali, produci, nisi ex determinata, & specifica proportione inter caussam, & effectum. Atqui inter accidens, & substantiam nulla reluet determinata, & specifica proportio. Ergo accidens ne quidem per modum caussæ partialis potest producere substantiam. Major patet ex dictis in prima probatione. Si enim suffice-

re sola proportio generica inter caussam, & effectum, unumquodque ens posset à quolibet alio produci, quia in generali notione entis omnia convenient. Minor etiam manifesta est ex ipsa notione substantiæ, & accidentis.

Probatur tertia pars. Ex dicendis in qu. seq. creatura elevari non potest virtute divina ad quoslibet effectus producendos, sed ad illos tantummodo, cum quibus habet determinatam proportionem. Cum igitur accidens nullam habeat ejusmodi proportionem cum substantia, nec supernaturaliter elevari potest ad producendam substantiam.

Respondent Thomistæ, accidens esse quidem imperfectius substantia in ratione entis, esse tamen perfectius ipsa in ratione productivi.

Contra. Ex majori perfectione entitativa effectus, fas est argumentari, & probare majorem perfectionem entitativam caussæ. Ita ex creaturarum perfectionibus infinitam colligimus perfectionem Dei creaturas producentis. At hæc ratiocinatio inepta esset, si quidam posset esse imperfectius altero in ratione entis, & tamen eo perfectius in ratione productivi. Unde posset quis commentari, Deum creaturas omnes producentem esse quidem perfectissimum in operando, sed non *in essendo*. Igitur falsa est allata responsio. Et sene uti res se habet ad esse, ita ad

Tom. II.

operari; operari enim sequitur esse. Virtus etiam activa, quæ accidenti tribuitur, non potest esse realiter distincta ab ipso accidente; ergo ea virtus non excedit perfectione ipsam accidentis entitatem. Adeoque &c.

Reponit Amort, disparem esse rationem de Deo, ac de accidente. Quippe Deus Mundum producit per creationem, proindeque debuit præcontinere perfectionem Mundi. At vero accidens substantiam producit per eductionem: qui producendi modus non præ se fert caussam communicare perfectionem effectui, ut creatio præstat; sed mere significat, posito actu primo proximo accidens per se ipsum exigere substantiam, & cum illa connecti, ob proportionem totius Universi: Hoc porro activitatem creaturæ significat.

Contra est. Nam hæc doctrina creaturas facit esse caussas mere occasio[n]ales, aut morales tantum: quod falsum est, ut jam docuimus. At creaturæ sunt re ipsa caussæ physicæ, quæ non meram dicunt exigentiam effectus, sed illi tribuunt esse, perfectionemque communicant. Modus autem eductionis non præ se fert caussam nihil communicare effectui, sed tantummodo ostendit virtutem agentis esse finitam. Par igitur ratio quoad perfectionem habenda est, sive de Deo, sive de creaturis loquamur; licet quia Deus per creationem operatur, non sola perfectio, sed

Yy

ia.

infinita perfectio Deo inesse demonstretur.

Respondent alii, caussam, quæ agit, debere utique esse perfectiōrem effectu, aut æque perfectam, non tamen id verum esse de virtute agendi, nam hæc est prædicatum metaphysicum etiam in nostra sententia, adeoque est imperfectior effectu, qui est res. Porro accidens est virtus agendi; adeoque potest esse ratio caussandi substantiam, licet sit imperfectius ipsa. Aliis terminis aūt primam nostram probationem esse veram, si loquamur de caussa *ut quod*, non de caussa *ut quo*, sicuti est accidens.

Contra. Ideo creatura re ipsa caussat, & producit, quia virtutem habet producendi idoneam. Sed virtus imperfectior effectu non est idonea ad illum producendum. Ergo virtus ipsa agendi, debet esse saltem æque perfecta, ac sit effectus. Minor probatur. Effectus producendus dicitur contineri in virtute suæ caussæ. Atqui imperfectius non potest continere perfectius. Ergo &c. Prædicatum autem metaphysicum, quod est caussæ virtus agendi, re ipsa totam caussæ perfectionem habet, quia nimur realiter idem est cum caussa; atque hinc caussa dicitur per illud vere agere, quia non operatur per virtutem à se realiter distinctam. At vero accidens realiter distinguitur à substantia, proindeque nullo modo habet perfectionem substantiæ,

nec potest esse substantiæ virtus agendi.

Respondent alii, caussam principalem utique non posse esse imperfectiōrem suo effectu, caussam vero instrumentalem esse posse effectu suo imperfectiōrem in entitate, licet sit eo perfectior in virtute agendi. Ita autem se habet accidens, quod operatur in virtute substantiæ, cuius est instrumentum.

Contra. Dum accidens dicitur operari in virtute substantiæ, & esse instrumentum substantiæ, vel sensus est accidens operari per actionem, & per motum à substantia receptum, vel sensus est accidens operari per virtutem in ipso à substantia derivatam, & distinctam à propria ipsius accidentis virtute. Si primum, ergo non jam accidens, sed substantia ipsa operaretur actione propria, adeoque non accidens, sed substantia substantiam produceret. Si alterum dicas, ecquidam est ea virtus? Nam si quidpiam est substantiale, tum in accidente recipi non potest, tum non ipsum accidens, sed ea substantia ageret; Quod si virtus ista sit accidens, reddit argumentum.

Reponunt, accidens operari in virtute substantiæ non aliud præ se ferre, nisi accidens esse ipsammet substantiæ virtutem ad agendum, quatenus accidens à substantia dimanat; unde licet ea virtus sit formaliter ipsum accidens, tamen est virtualiter substantia. Aliis

Aliis terminis dicunt, accidentis non esse proprio sensu instrumentum agens in virtute substantiæ *transitivæ*, quasi hæc virtus sit aliquid citra ipsum, sed esse dumtaxat instrumentum lata significatione, & agere in virtute substantiæ *intransitivæ*, quatenus est ipsam virtutem substantiæ. Quamobrem non indiget moveri, aut elevari per aliam virtutem.

Contra. Etsi accidentis dimanet à substantia, dicatur virtus substantiæ, aut agere in virtute substantiæ, aut esse *virtualiter* substantiam, tamen nullam entitativam perfectionem acquirit, quæ in se se vere, & re ipsa excedat perfectionem accidentis. Ergo quemadmodum per se se est imperfectius substantia, & non idoneum ad illam producendam, ita manet semper tale, quia etsi plura vocibus illis accidenti attribuas, nihil tamen re ipsa eidem conferatur, nec substantia dat illi, unde agat supra vires entitati suæ connaturales. Recurrunt ergo rationes superioris allatæ.

Respondent alii, non convenire substantiæ virtutem operandi immediate, quia substantia datur, ut existat, non ut operetur: accidentis autem non datur, ut existat, sed potius ut operetur, & substantiæ deserviat.

Contra. Operari sequitur esse. Quemadmodum ergo accidentis existit, & operatur producendo aliud sibi simile; ita de substantia di-

cendum est, quia *unumquodque est propter suam operationem*, & essentia rei, ac ejusdem virtus activa non distinguuntur realiter. Inficiamus itaque, substantiam dari ut tantummodo existat, & non operetur.

Objicies. 1. Ex lib. 9. Metaphysicæ t. 13. actus & potentia sunt ejusdem generis. Atqui actus, seu operatio est accidentis. Ergo potentia, seu virtus operandi est accidentis. Libro etiam de sensu, & sensibili Aristoteles docet, ignem non agere, ut ignem, sed ut calidum. Et lib. 1. de Generatione t. 51. actio dicitur esse tantummodo inter contraria. Porro substantia non habet contrarium: ut in Logica diximus. Igitur &c.

Respondetur, materiam primam, quæ est *per se* potentia, & formam substantialem, quæ est *per se* actus, utique esse ejusdem generis substantialis, ut priore loco docet Aristoteles. Ita etiam actus *entitativus*, & potentia *objectiva*, de quibus in Metaphysica locuti sumus, sunt ejusdem generis. At id ipsum verum non est universum de virtute operativa, & ejus operatione, nam intellectus angelicus est substantia, ejus autem intellectio est accidentis nihil autem ostendit virtutes operatrices realiter distinguiri à rebus ipsis, quibus convenienter. Porro si ignem spectare velis, ut agit in sensu nostros, utique id præstat, quatenus est calidus, nam substantia, ut sæpe

diximus, non est per se sensibilis. Duplicem porro actionem distinguere oportet; alteratio enim generationem præcedit. Illa per accidentia fit, atque inter formaliter contraria versatur. Hæc à forma substantiali procedit. Diximus autem in Logica, duas substancialias esse posse contrarias virtualiter.

Objic. 2. Accidens attingit ultimam dispositionem formæ generandæ. Ergo caussa est produciva ipsius formæ. Consequentia probatur. Ideo vivens dicitur causa alterius viventis, quia attingit ultimam dispositionem formæ viventis, ut docet Scotus in 2. d. 18. Ergo etiam &c.

Respondetur, disparem esse rationem, quia vivens attingit ultimam dispositionem, nempe formam substancialē corporeitatis, quæ attingitur, & partialiter producitur per aliquid ipsius viventis, & permanet in vivente producto. At vero accidens tantummodo attingit dispositionem accidentalem, quæ etiam destruitur, veteri forma pereunte, & ideo &c.

Objicies 3. Plurima experimenta ostendunt substancialē gigni mediis solis accidentibus: ut cum ex intenso calore efficitur ignis. Ergo &c.

Respondetur, hæc experimenta suis in locis à nobis recenseri, & explicari. Ut plurimum enim dum ignis à calore gigni videtur, hæc ignis generatio à substancialibus ignitorum corpusculorum ef-

fluviis procedit. Quod si aliquando nulla creata substantia par esse possit, aut præsto sit, dicendum est, effectus illos à Deo, velut Naturæ Auctore, immediate præstari, eum Deus suppleat impotentiam caussarum secundarum: quemadmodum in creatione animæ rationalis contingere, in confesso.

Objicies 4. Accidens potest vi sua destruere substancialē. Ergo potest etiam vi sua eamdem producere. Antecedens probatur. Calor vi sua potest destruere omnem frigiditatem aquæ: hoc ipso autem destrueret aquam ipsam, quæ sine frigoris gradu aliquo nequit conservari. Igitur &c.

Respondetur, patere omnibus nullam esse illationem argumenti, etiamsi permitteremus antecedens. Nemo enim ignorat, plura requiri ad rerum compositionem, ac sint necessaria ad earumdem destructionem: ut notat Doctor in 4. d. 43. q. 3. Cæterum, ut Scotus tradit d. 12. falsum est antecedens. Calor enim est tantummodo dispositio ad destructionem aquæ, quantum destruendo frigus aquæ con naturale, Deus ab istius conservatione cessat.

Objicies 5. Quando duæ causæ partiales concurrunt ad eundem effectum producendum, potest in istius productione defectus aliquis oriri ab una caussa, & non ab altera: ut docet Scotus in 1. d. 37. Ergo quando duæ causæ partiales concurrunt ad eundem effe-

effectum producendum, potest perfectio effectus ab una caussa derivari, & non ab altera. Igitur necesse non est, ut in accidente perfectio habeatur correspondens perfectioni substantiæ producendæ, sed satis est, si accidens simul cum substantia operetur. Ergo accidens, saltem ut caussa partialis, potest producere substantiam.

Respondet. Nego consequentiam, & paritatem. Defectus enim cum sit rectæ dispositionis carentia non habet positivam sui causam, nec veritatem positivam in caussa supponit. At perfectio, quæ quidpiam absolutum, & positivum est, principium itidem positivum præsupponit, à quo oriatur. Cæterum nos diximus, accidens nec ut caussam partiale posse producere substantiam, non quia deficiat à perfectione substantiæ producendæ, sed quia nullam habet cum ipsa determinatam, & specificam convenientiam.

Colligite infusam calici conservato aquam converti in vinum, non ab accidentibus vini permanentibus, sed à Deo supplente defectum substantiæ vini.

QUÆSTIO QUARTA.

Utrum activa creaturarum facultas per Virtutem Divinam attingere valeat effectus omnes? ob hoc

S I V E

An detur potentia obedientialis activa in quolibet ad quodlibet?

Activam creaturarum facultatem impræsentiarum ita consideramus, ut eadem per speciale Dei auxilium corroborata, & confirmata, sive elevata intelligitur ad effectus quosdam exhibendos, quos utique per se se, propriisque naturalibus viribus assequi non valeret. Quo sensu illam consueverunt appellare Scholastici Potentiam Obedientialem Activam; quatenus divinæ subditur voluntati imperanti, eidemque obsequitur. Ergo quæstio est, utrum vis illa creaturarum activa sic queat elevari à Deo, ut attingat effectus quosdam supernaturales; & an ad omnes pene effectus eadem extendi possit per speciale auxilium Dei, quo roborari intelligitur; sive, ut inquit, an potentia obedientialis activa creaturarum ad omnes prorsus effectus producendos idonea esse possit?

Porro effectus illi, qui supernaturales appellantur, quatenus longe superexcedunt vires naturæ, duplicitis habentur ordinis. Etenim alii

alii super naturales sunt *quo ad rem ipsam*, qui nempe ex vi suæ essentiæ petunt produci à caussa supernaturali, & secundum suam entitatem excedunt vires naturæ: quo modo visio intuitiva Dei, & beatifica est supernaturalis. Alii dicuntur supernaturales *quo ad modum sua productionis*, quatenus entitate, & essentia sua correspondent viribus naturæ, sed talem ex Dei beneplacito productionis obtinent modum, qui supra vires naturæ est: qua ratione productio Corporis Christi Domini, ut pote quæ sine virili concursu, & instanti temporis facta fuit, hoc ipso viris naturæ excedit; etsi ipsummet Christi Corpus entitate sua, & essentia corresponeat naturæ viribus, à quibus juxta communem rerum ordinem potuit generari.

Jam vero objectum activæ facultatis aliud est *naturali attingentia*, aliud vero *naturalis inclinationis*: ut diximus in 2. parte Metaphysicæ disp. 3. qu. 6. atque postremum hoc dicitur etiam *supernaturalis attingentia*, quia solo speciali Dei auxilio naturæ indebito facultas activa objectum istud assequi potest. Ita mens nostra in Deum clare, distincteque, ac intuitive videndum ordinatur; sed non nisi speciali suffulta præsidio consequi illum potest. Eadem igitur activa facultas dicitur naturalis, quatenus Deum respicit, ut naturæ auctorem, generali concursu sibi cooperantem, appellatur

autem obedientialis, quando ad Deum refertur, ut auctorem gratiæ, specialibus auxiliis sibi cooperantem. His ergo expositis.

Dicimus, activam facultatem creaturarum posse per divinam virtutem attingere quosdam effectus supernaturales; non tamen omnes, sed eos solummodo, qui specificam præ se ferunt proportionem cum effectibus ab illa creatura per naturæ vires producibilibus. Conclusio duas habet partes. Et priorem tradit Doctor in 3. d. 4. & in 4. d. 49. q. 11. posteriorem vero in 4. d. 1. q. 1. n. 26. ff. Ad questionem ergo, ubi sic scribit: *Etsi Deus posset absolute creare frigus, non tamen per calorem, ita quod calor sit in aliquo ordine causa activa respectu frigoris.*

Probatur prima pars. Voluntas hominis active concurrit ad actus meritorios supernaturales. Ergo activa creaturarum facultas potest per divinam virtutem attingere quosdam effectus supernaturales. Probatur antecedens. Concilium Tridentinum sessione sexta, canone quarta definit: *Si quis dixerit, liberum hominis arbitrium à Deo motum, & excitatum... velut inanime quoddam nihil omnino agere.... mereque passive se habere; anathema sit.* Cui consonat illud Apostoli in priore Epistola ad Corinthios, c. 15. v. 10. *Abundantius illis omnibus lavoravi, non ego autem, sed gratia Dei mecum.* Quæ verba sic excipit Augustinus: *Ac per*

per hoc nec gratia Dei sola, nec ipse solus, sed gratia Dei cum illo.

Atqui si voluntas hominis non concurreret active ad actus meritorios supernaturales, mere passive se haberet, recipiendo auxilium supernaturale Dei, nec dici posset operari cum gratia, sed solum per gratiam. Ipsa quippe voluntas nihil omnino ageret, sed gratia sola operaretur omnia in ipsa voluntate. Igitur &c. Idem illud antecedens suadetur etiam ex theologia ratione. Etenim actus meritorius est vitalis, & liber. Sed ejusmodi non est à gratia, quæ non est vitalis nec libera. Ergo actus ille, ut vitalis esse intelligitur, ac liber, profuit à voluntate, velut à causa partiali efficienti.

Respondent Thomistæ, qui arbitrantur, ipsam gratiam esse adæquatam virtutem operandi, voluntatem nihilominus cooperari gratiæ, quoniam ipsa gratia non est causa adæquata; Hæc enim indivisibiliter conflatur à voluntate, & gratia. Quare voluntas ipsa remote agit in actus meritorios.

Verum responsio ista ad rem non pertinet. Cum enim dicunt Thomistæ, voluntatem ipsam agere remote, vel fatentur voluntatem effective attingere ipsos actus meritorios, vel significant, voluntatem solum denominari operantem, quoniam in se habet gratiam operantem? Ut asseverent illud primum, oportet eos fateri, gratiam non esse totam agendi vim,

sed voluntatem ipsam etiam per se se attingere actus meritorios. Alioquin enim, ut rem declaremus probato apud ipsos exemplo, gratia esset jam caussa totalis: quemadmodum calor in aqua existens dicitur totalis caussa calefactionis, quoniam est tota vis calefaciendi, nec aqua ipsa active operatur in calefactionem, licet denominetur calefaciens ex calore calefaciente, quem habet in se. Ex quo etiam sit alterum illud ab initio propositum minime sufficere, ut subsistant sacræ auctoritates relatæ.

Probatur secundo. Intellectus creatus active concurrit ad visionem Dei intuitivam, beatificam, & supernaturalem. Ergo &c. Probatur antecedens. Visio illa est vitalis, & expressiva; sed quatenus ejusmodi est, non potest originem suam habere, nisi ab intellectu creato. Ergo &c. Probatur minor. Lumen gloriæ, quo intellectus creatus elevatur ad visionem illam, non est vitale. Etenim principium vitale debet esse connaturale rei viventi, ut nimis ab ista exigatur; immo Thomistæ docent principium vitale proficiisci debere ab ipso vivente: Cujusmodi sane non est lumen gloriæ. Ergo vitalitas beatificæ visionis repeti non potest à lumine gloriæ. Atque adeo visio, ut vitalis, originem suam habet à solo intellectu creato. Igitur &c.

Cum vero ex dictis voluntas hominis non agat tantummodo per gratiam, veluti per virtutem totalem,

lem operandi, nec intellectus creatus operetur solummodo per lumen gloriae; sed simul cum istis supernaturalibus auxiliis cooperetur intrinseca virtute sua vitali; siccirco causæ habentur effectivæ partiales, nec potentia obedientialis activa quidpiam est illis à Deo superfusum, sed est ipsa intrinseca illarum potentiarum virtus, quæ per speciale Dei auxilium completer ad eos actus supernaturales effective attinendos.

Probatur secunda pars, speciatim thesim ipsam in plura capita distribuendo. Nam primo materialis visiva potentia attingere non valet objectum spirituale. Ergo activa creaturarum facultas non potest attingere effectus omnes, ne quidem per divinam virtutem. Antecedens probatur. Nulla potentia operari potest extra suum objectum formale. Alioquin enim cum potentia quælibet intelligatur referri ad suum objectum formale, atque ex hoc ipso ordine attendatur specifica potentia determinatio, jam non una sed multiplex specie esset potentia, si extra proprium formale objectum extenderetur. Porro objectum formale visivæ facultatis est lucidum, & coloratum. Jam vero spiritualis res nec lucida est, nec colorata. Igitur &c.

Secundo, materiale non potest producere rem spiritualem. Neque enim id præstare valet per propriam intrinsecam virtutem. Nam nulla relucet specifica, ac determi-

nata proportio inter materiale, & spirituale, ex qua colligamus partiale inesse vim materiali ad rem spiritualem producendam. Nec materiale idipsum potest efficere per affectionem quamdam ei superfusam. Quippe nulla spiritualis affectio communicari potest materiali, ut erit dicendum in 6. quæstione. Quæ autem affectio materialis est, & ipsa impar omnino est spirituali rei producendæ. Atquæ adeo reddit argumentum. Igitur &c.

Tertio, unum contrarium gigni ab altero nequit. Si enim calor, v. g. virtutem haberet producendi frigus, ejusmodi sane virtus ab ipsa caloris natura profluere intelligetur: Quod repugnat; cum è converso potius quælibet res suapte natura petat conservari, & vim habeat destruendi quocumque sibi contrarium est. Igitur &c.

Quarto, Bruta elevari non possunt ad Deum videndum, nec oculus audire potest, vel auris videre. Quippe hæc, & similia fidem omnem superant, & absurdâ per se se apparent. Igitur &c.

Quinto tandem universim assertio nostra probatur ex ratione, quam nobis tradit Scotus in 2. d. 3. q. 10. Cujuslibet creaturæ virtus finita omnino est, ac limitata. Atqui si activa creaturarum facultas posset per divinam virtutem attingere effectus omnes, facultas illa esset infinita. Igitur dicendum est, activam creaturarum facultatem non ad omnes effectus extendi posse. Minor pro-

probatur. Ubi pluralitas requirit perfectionem, infinita pluralitas requirit infinitam perfectionem. Sed potentia illa, quæ attingere valet, etiam per modum causæ partialis, quinque effectus specie diversos, præ se fert majorem perfectionem, quam potentia illa, quæ unicum effectus producere possit. Ergo facultas, quæ attingere valeat omnes effectus, pene infinitos, omnino infinita esse debet. Igitur &c.

Dicendum igitur est, activam creaturarum facultatem sic posse per speciale auxilium Dei corroborari, & adjuvari, ut attingat eos supernaturales effectus, cum quibus determinatam habet proportionem.

Objicies 1. contra primam thesim. Si activa creaturarum facultas posset per divinam virtutem attingere effectus aliquos supernaturales, eos etiam posset propriis naturalibus viribus assequi. Sic homo posset naturaliter Deum videre intuitive. Hoc absurdum est. Igitur &c. Major probatur. Innata illa facultas esset virtus incompleta. Ergo naturaliter exposceret suum complementum, nempe concursus Dei, quo in effectus illos valeat contendere: quemadmodum Materia prima, quoniam incompleta est, dicitur naturaliter exposcere suum complementum, nempe formam substantialem. Ergo &c.

Respondetur. Nego majorem. Ad probationem, nego antecedens universim acceptum. Concursus enim Dei non est debitus, nisi causæ

totali in actu primo proximo dispositæ. Ejusmodi porro non est intellectus, qui non est causa totalis visionis, cum & objectum ipsum sit causa partialis necessaria ad cognitionem efficiendam: ut diximus in secunda Methaphysices parte, disputat. 3. quæst. 5. Porro Deus, qui est objectum beatificæ visionis, est objectum omnino liberum, & supernaturale. Quamobrem ratione suæ libertatis, si vult videri, videtur: si non vult videri, non videtur; & quoniam supernaturale est, superexcedit cuiuslibet creaturæ naturalem vim, & exigentiam.

Dispar subinde est ratio de materia prima. Hæc enim per se se omnino, & simpliciter est incompleta in ordine physico. Quamobrem ex Universi ordine, & perfectione substantialis forma materiæ est debita, cum Universi perfectio ex specierum diversitate coalescat, quæ à substantialibus formis repetitur. At vero intellectus hominis respectu actuum naturalium vere completus est in ordine potentiarum; unde dicitur solummodo incompletus secundum quid respectu actuum supernaturalium.

Instabis primo. Concursus ille Dei ad beatificam visionem necessarius, esset semper liber, etiamsi creato intellectui debitus dicatur. Ergo &c. Probatur minor subsumpta. Concursus Dei cum igne ad comburendum est simul liber Deo, qui non necessario determinatur à creatura, & est etiam naturalis,

sive debitus igni, nam si concursus ille denegaretur, ignis pateretur violentiam. Ergo &c.

Respondeatur, disparem esse rationem. Etenim concursus Dei cum igne ad comburendum est quidem absolute liber, quoniam ex sui libertate potuit Deus nolle concurrere. Attamen est ex hypothesi necessarius ratione decreti generalis à Deo constitui, quo voluit Deus causas secundas agre suos motus. Unde cum ignis sit causa in sui ordine adæquata, & constituta in actu primo proximo operandi, nec desit illi quidpiam, nisi generalis concursus Dei, hic utique igni est debitus ex vi prædicti generalis decreti. At vero intellectus hominis, ut diximus, non est caussa adæquata, nec constituta in actu primo proximo; sed deest illi objectiva Dei præsentia, quam nullo suo decreto voluit Deus debitam facere ulli creaturæ in hoc mundo.

Instabis secundo. Objectum infinitum attingi potest per visionem finitam. Ergo objectum supernaturale attingi potest per visionem naturalem. Adeoque &c.

Respondeatur, discriminis apriendo rationem. Quando objectum infinitum attingitur visione finita, imperfectio omnis in sola est potentia attingente, quæ cognoscendo non assequitur omnem perfectiōnem ipsius objecti. At vero si objectum supernaturale attingeretur visione naturali, imperfectio in ipsis esset objecto, quoniam istud non

esset supernaturale, sed omnino debitum naturali facultati. Etenim cum absolute haberi nequeat visio sine objecto, non potest visio ipsa esse naturalis, nisi objectum sit naturaliter debitum. Nam quemadmodum caussa non potest producere effectum, nisi habeat omnia requisita ad effectum producendum: Ita productio effectus non potest contineri in potestate naturali ipsius caussæ, nisi in ejus etiam sit potestate omnia requisita ad effectum producendum. Quamobrem cum objectum sit omnino necessarium ad producendam visionem; ut ista sit naturalis, deberet objectum ipsum contineri in potestate naturali creaturæ. Esset adeo debitum naturæ, & non supernaturale.

Objicies 2. Si intellectus hominis active concurreret ad beatificam visionem, visio hæc esset naturalis. Nam conclusio sequitur debiliorem partem: ut diximus in prima Logices parte, sectione tertia. Atqui beatifica visio est supernaturalis quod rem ipsam, nec potest esse naturalis. Igitur &c.

Respondeatur, ex citato Logices loco patere argumenti solutionem. Neque enim semper effectus sequitur debiliorem caussam, sed tunc solum quando caussa debilior, ut talis concurrit, & minuit activam virtutem caussæ perfectioris. Porro intellectus hominis non concurrit ad visionem beatificam, ut naturalis est, sed quatenus vitalis, & expressivus, unde non infringit, non

minuit activam virtutem supernaturalem auxilii, sed illam potius coadiuvat. Atque adeo visio ipsa erit semper supernaturalis.

Instabis. Quia ad beatificam visionem concurrit intellectus finitus, visio ipsa est finita. Ergo quia ad eamdem visionem concurrit intellectus naturalis, visio erit naturalis.

Respondetur. Nego paritatem. Ut enim effectus censemur supernaturalis; sat est si debitus non sit naturæ. Porro quidquid exposcit principium unum supernaturale, nequam debitum est naturæ; quoniam eo principio non concurrente, etsi cætera parata sint, effectus haberi non potest. At vero solus ille effectus censemur infinitus, qui perfectionem omnem includit, atque ex nulla parte limitatus est. Hoc ipso autem quod ad visionem efficiendam concurrit principium finitum, jam visio ex parte ipsius determinatur, & finita redditur, ac limitata. Quod ipsum in beatifica visione contingit.

Objicies 3. Visio beata est adæquate supernaturalis, non vero partim naturalis, & partim supernaturalis. Ergo causa effectrix ipsius visionis debet esse adæquate supernaturalis, non autem conflata ex auxilio supernaturali, & intellectu naturali. Ergo &c.

Confirmatur. Intellectus concurreret ad totam visionem. Ergo contineret visionem supernaturalem. Atqui supernaturale non potest

contineri in potentia naturali. Ergo &c.

Respondetur. Visionem esse quidem supernaturalem, sed esse etiam vitalem. Hæc ipsa autem vitalitas beatificæ visionis, etsi realiter sit supernaturalis, non tamen in sua formali notione supernaturalitatem præse fert, sed ab ista intelligitur abstrahere. Quamobrem visio beata præcontineri dicitur in virtute intellectus secundum vitalitatem, & in virtute auxilii secundum supernaturitatem. Ex quo sequitur, totalem caussam visionis beatificæ esse vitalem & supernaturalem; coalescit enim caussa illa ex intellectu vitali, & ex auxilio supernaturali. Proinde intellectus non debet adæquate præcontinere visionem, cum non sit totalis caussa. Ita visio ipsa secundum representationem respicit objectum, veluti sui caussam. sed ut vitalis præcontinetur in virtute intellectus, & ut supernaturalis auxilium supernaturale, ut sui caussam respicit, nempe lumen gloriae. Quamvis autem intellectus concurrat ad totam visionem, non tamen debet eam totam præcontinere. Quippe dum operatur, non agit se solo, sed simul cum auxilio supernaturali: dum autem intelligitur præcontinere, spectatur se solo. Quare intellectus, & auxilium attingunt quidem totum effectum, sed singillatim acceptæ sunt causæ partiales.

Instabis. Ratio formalis, per quam intellectus ageret in visionem,

vel esset vitalitas naturalis, vel vitalitas abstrahens à naturali, & supernaturali. Non prima; non enim efficere posset actum vitalem supernaturalem. Non secunda; quippe ratio formalis agendi debet esse similis effectui producendo: Vitalitas autem ipsius beatificæ visionis est determinata, & supernaturalis. Igitur &c.

Respondetur. Intellectum agere in beatificam visionem vitalitate sua, non tamen quatenus hæc est naturalis. Neque enim id ipsum præ se fert vitalitas in suo conceptu formali, sed de reali tantum involvit naturalitatem. Ita & vitalitas visionis de reali tantum includit supernaturalitatem. Quare utraque vitalitas visionis, & intellectus, quatenus ex se se abstrahit à naturali, & supernaturali, proportionem, & similitudinem ad invicem præ se ferunt.

Objicies 4. Habitū supernaturales necessarii sunt ad operandum, sive ad ipsam substantiam operis efficiendam. Ergo sunt tota virtus agendi. Atque adeo facultas creata per se se non operatur immediate in actus meritorios. Quod significat Apostolus in epistola ad Romanos, cap. 9. vers. 16 dum ait: *Non est volentis, neque currentis hominis, sed miserentis est Dei.* Tum si voluntas hominis active cooperaretur in actus supernaturales, & meritorios, posset de illis gloriari, quatenus partialis esset illorum caussa: quod repugnat eidem Apostolo dicens in priore epistola ad Corin-

thios, c. 4. v. 7. *Quis enim te discernerit? Si autem acceperisti, quid gloriaris, quasi non acceperis?* Igitur &c.

Respondetur. Habitus supernaturales esse necessarios ad substantiam operis, non quia sint tota virtus agendi, sed quia actus supernaturalis nullo modo effici potest sine habitu supernaturali; cum è contra actus naturalis effici possit etiam sine habitu, etsi non a deo faciliter, nec cum perfectione. Apostolus autem loquitur de vocatione efficaci, sine congrua, quæ profecto unice est donum Dei. Et licet voluntas cooperetur in actus meritorios, gloriari tamen in se ipsa non potest, quoniam nihil boni fieri potest sine gratia, quæ est donum Dei. Nec in opere bono fas est duas partes distingue re, quarum altera sit à voluntate, altera à gratia. Quippe ut ait Sanctus Bernardus in libro de Gratia, & libero arbitrio, capit. 14. *Non partim gratia, partim liberum arbitrium, sed totum singula opere individuo peragunt.* Nihil ergo habet homo, quo in se ipso gloriari possit, cum nihil boni sine Deo valeat efficere. Hic autem animadvertisimus, supernaturalitatem visionis beatificæ repetendam esse ex habitu supernaturali, qui insideat potentiae operanti, nec repeti posse ab ipso objecto supernaturali. Nam objectum concurrit tantummodo, ut caussa particularis, & secundum determinatam, ac sibi propriam repræsentationem.

Proin-

Proinde Theologi affirmant, hæreticum credere mysterium aliquod, puta Incarnationis, fide sola naturali, quia non habet ille habitum fidei supernaturalem.

Objicies 5. contra secundam thesim. Extat in intellectu creato potentia activa in visionem beatificam. Ergo admittenda est etiam in igne potentia ad producendam aquam. Consequentia probatur. Minor est proportio inter intellectum naturalem, & visionem supernaturalem, quam inter ignem, & aquam, quæ sunt ambo naturalia. Ergo &c.

Respondetur. Nego consequentiam. Ad probationem, dicimus minorem utique esse similitudinem inter intellectum, & visionem, ac inter ignem, & aquam; si spectemus ipsam entitatem rerum. At ubi habeatur ratio activi, & passivi, major relucet proportio inter intellectum, & visionem. Extat enim in visione prædicatum specificum, nempe vitalitas, quæ correspondet activæ virtuti intellectus. E contra vero inter ignem, & aquam nulla est ejusmodi determinata, ac specifica similitudo. Porro vis activa non ex rerum entitate commensuratur; sed ex illa proportione, seu similitudine determinata, quæ non jam rem totam sequitur, sed tantummodo determinatum aliquid attributum rei.

Instabis. Sufficit proportio in utilitate, ut intellectus sit partialis caussa beatificæ visionis. Ergo sufficit proportio in ratione cor-

poris naturalis, ut ignis dici possit partialis caussa aquæ. Consequentia probatur. Quemadmodum ratio corporis naturalis est prædicatum genericum, ita vitalis est prædicatum genericum. Nam quod commune est naturali, & supernaturali: quod convenit Deo, Angelis, & Hominibus: substantiæ etiam, & accidenti; quidpiam genericum est. Hujusmodi porro est vitalitas ipsa. Ergo &c.

Respondetur. Nego consequentiam. Ad probationem, nego antecedens. Ad cuius probationem dicimus, vitalitatem illam esse vitalitatem determinatam, nempe finitam; unde à Dei vitalitate distinguitur. Ita & intellectus noster, dum operatur in visionem beatam, distinguitur ab Angelo, quoniam ipse intellectus noster tunc per objectivam Dei præsentiam corroboratur, & adjuvatur. Est etiam illa vitalitas expressiva, & spiritualis, ad quam ex accidenti sequitur, ut ipsa sit in re naturali, vel in re supernaturali; in substantia, vel in accidentalí qualitate: Hæc enim omnia cum pertineant ad ordinem essendi, non sunt proprio sensu differentiæ vitalitatis, quæ ad ordinem spectat operandi. At nulla relucet specifica, & determinata similitudo inter ignem & aquam.

Objicies 6. Facultas intellectiva finita attingere potest Deum infinitum. Ergo potentia materialis attingere poterit objectum spi-

rituale. Consequentia probatur. Minor est proportio inter finitum, & infinitum, quam inter materiale, & spirituale, quorum utrumque finitum sit. Igitur &c.

Respondetur ex dictis in præcedentis objectionis solutione. Itaque inter materiale, & spirituale extat utique major proportio, quam inter finitum, & infinitum, si entitas rerum spectetur: non tamen si habeatur ratio activi, ac passivi, nam eiusmodi nulla est inter materiale, & spirituale, cum spirituale non sit sensibile, & materiale respiciat objectum suum sub ratione sensibilis. At proportio illa reperitur inter potentiam intellectivam finitam, & Deum infinitum, cum Deus sit intelligibilis, atque in ipso Deo ratio cognoscibilitatis ex sua ratione formalis non sit infinita.

Instabis. Activa vis intellectus, etiamsi spiritualis sit assequi potest objectum materiale. Ergo activa virtus sensitivæ potentia, licet materialis sit, poterit assequi objectum spirituale. Igitur &c.

Respondetur. Nego paritatem. Cum enim objectum intellectus est quocumque intelligibile, sub hac ipsa ratione, quæ abstrahit à materiali, & spirituali; siccirco materiale pertinet ad objectum formale intellectus. At vero objectum potentia sensitivæ est solum ens sensibile, & materiale, sub hac ipsa ratione sensibilis, & materialis. Cum igitur eiusmodi non

sit objectum spirituale, attingi non poterit à potentia materiali.

Objicies 7. Objectum naturalis inclinationis potentia cujuslibet latius patet, quam objectum naturalis attingentia. Ergo cum potentia visiva respiciat pro objecto suæ naturalis attingentia lucidum, & coloratum, poterit secundum naturalem inclinationem attingere etiam rem spiritualem. Alioquin idem semper esset objectum visivæ facultatis, tum pro naturali attingentia, tum pro naturali inclinatione.

Respondetur. Objectum naturalis inclinationis, & objectum naturalis attingentia non differre essentialiter, sed tantummodo quo ad modum; adeo ut utrumque contineatur intra eundem determinatum ordinem, ut diximus. Itaque objectum naturalis inclinationis potentia visivæ erit lux maxime intensa, vel longe remotior; non tamen esse poterit res ulla spiritualis, quæ nullam habet determinatam proportionem, seu similitudinem cum formalis objecto ipsius visivæ facultatis.

Instabis. Intellectus hominis sufficientem habet proportionem cum beatifica visione supernaturali per vitalitatem abstrahentem à materiali, & supernaturali. Ergo visiva facultas sufficientem habebit proportionem cum objecto spirituali per vitalitatem abstrahentem à materiali, & spirituali. Consequenter probatur. Etsi intellectus sit

facultas naturalis, tamen vitalitas in ipso abstrahit à naturali. Ergo etsi visiva potentia sit materialis, tamen vitalitas in ipsa abstrahere poterit à materiali.

Confirmatur. Objectum materiale concurrebit ad productionem cognitionis spiritualis per vim representationis abstrahentem à materiali. Ergo etiam in potentia visiva vitalitas abstrahere poterit à materiali.

Respondetur, latum esse discrimen. Etenim vitalitas intellectus, etiam ut abstrahens à naturali, specificam habet, ac determinat proportionem cum visione beatifica; cum illa vitalitas sit semper determinata, spiritualis nimurum, expressiva, & finita. At si abstrabas à vitalitate facultatis visivæ ipsam rationem materialis, nihil haberet vitalitas unde esset propria facultatis visivæ, nec jam visiva facultas ipsa tunc operaretur.

Ad confirmationem. Ex dictis patet disparitas. Subsistit enim specifica proportio inter objectum materiale, & cognitionem spiritualem, in ratione representationis. Nam vis representabilis in objectum materiali est quidem ex se se materialis in representando non tamen in essendo est materialis ex sua formalis notione, sed omnino abstrahit. At vero facultas visiva, ut talis, est materialis, nec intelligi potest vitalitas propria illius facultatis,

nisi eadem concipiatur materialis.

Objicies 8. Saltem Deus videri poterit ab oculo corporeo. Et ego &c. Probatur antecedens. Deus est *eminenter* lucidus. Atqui *eminenter* lucidum videri potest ab oculo: quemadmodum illud, quod in se ipso lucem habet, & *formaliter* lucidum appellatur. Quidquid enim hoc potest, etiam illud; alioquin non præcontineret *formaliter* lucidum, nec esset illo perfectius. Ergo &c.

Confirmatur. *Formaliter* lucidum concurrebit per modum caussæ efficientis ad visionem sui efficientiæ simul cum facultate visivæ. Sed *eminenter* lucidum ex hoc ipso potest per se solum omnia exhibere, quæ præstantur in genere caussæ efficientis à *formaliter* lucido. Igitur &c.

Respondetur. Nego antecedens. Ad probationem nego minorem. Produçtio visionis equidem fit in genere caussæ efficientis à corpore *formaliter* lucido. Atque ita fatemur, Deum se solo posse visionem ipsam producere. At vero videri, sive per visionem ipsam representari potius præ se fert ex parte objecti modum caussæ formalis, quæ per suæ exhibitionem caussare dicitur. Nimurum objectum ipsum debet *intentionaliter* uniri facultati visivæ, & se habet ad instar formæ determinantis facultatem ipsam. Et ideo cum genus caussæ formalis requirat causam

sam *formaliter* italem, non potest solus Deus videri ab oculo corporeo: quemadmodum licet sit *eminenter* sapor & auditus, non potest tamen gustari, vel audiri; sed haec omnia supponunt objectum *formaliter* tales: quod nempe exhibitione presentiae suæ potentiam materialem sic moveat, & determinet.

Instabis. Quemadmodum in objecto, ut videatur, est necessaria unio intentionalis, ita eadem unio requiritur in objecto, ut cognoscatur. Atqui divina Essentia, ex quo *eminenter* continet intelligibilitatem creaturarum, per se ipsam potest præstare quidquid creaturæ omnes præstarent in ratione intelligibilis. Unde creaturæ repræsentantur in ipsa divina Essentia, velut in objecto motivo. Igitur Deus, ex quo est *eminenter* lucidus, videri poterit ab oculo corporeo.

Respondet. Divinam Essentiam non solum esse *eminenter* intelligibilem quatenus continet creatarum omnium intelligibilitatem, sed etiam esse *formaliter* intelligibilem propria veritate, & intelligibilitate. Proinde divina Essentia ex hoc ipso unionem habet intentionalem cum divino intellectu. At vero Deus nullo modo est *formaliter* lucidus; atque adeo nullatenus videri potest à facultate visiva oculi.

Objicies 9. Objectum infinitum repræsentari potest à facultate

finita, & modo finito attingi. Ergo objectum spirituale representari poterit à facultate materiali, & modo materiali attingi.

Respondet. Nego paritatem. Etenim dum objectum infinitum representatur modo finito à facultate finita, semper habetur specifica, & determinata proportio inter facultatem ipsam, & objectum. Nam finitas, & infinitas sunt rerum modi, & ideo non immutant ipsam rerum essentiam. At nulla, ut sepe diximus, extat proportio determinata, & specifica inter potentiam materialem, & objectum spirituale.

Instabis. Etsi visio beatifica intuitiva etiam specifico discrimine distinguatur à cognitione abstractiva, quam de Deo in hac vita acquirimus: ut diximus in secunda parte Metaphysics, disput. 3. prope finem quæstionis 5. Tamen utraque cognitio ab eadem intellectiva facultate procedit. Ergo etsi materiale, & spirituale distinguantur invicem specifico discrimine; attingi poterunt ab eadem visiva facultate.

Respondet. Utramque cognitionem, intuitivam, & abstractivam, præ se ferre semper specificam proportionem cum intellectu, & contineri sub objecto formaliter ipsius intellectus, quod est intelligibile universim acceptum. At spirituale non pertinet ad objectum formale visivæ facultatis, nee proportionem habet cum ipsa

de-

determinatam, & specificam.

Colligite elevationem activæ virtutis creaturarum fieri posse, vel per habitum supernaturalem effective coadjuvantem, vel etiam per specialem Dei concursum, qui vices suppleat ipsiusmet habitus. Ex nostra itidem sententia Lumen gloriae, quo Beati in patria illustrantur, & adjuvantur, ut Deum videant intuitive, dicitur participatio physica divini intellectus, sed inadæquata, & imperfecta, quatenus uti divinus intellectus cognitionem valet efficere, sic lumen gloriae deservit intellectui hominis ad cognitionem efficiendam: Non est tamen participatio physica adæquata, & perfecta, & sub ipsa ratione vitalitatis. Id ipsum dicendum est suo modo de Charitate, sive Gratia, respectu divinae voluntatis. Ex communi etiam Theologorum Scotistarum sententia; Ignis Inferni non torquet animas spirituales physice, & realiter, sed solum intentionaliter, quatenus est objectum animæ disconveniens, & in eo per vim detenta anima miserime contabescit, & se ipsam torquet: Sacraenta etiam non causant gratiam spiritualem physice, sed solum moraliter. Quæ omnia à Theologis Scotistis declarantur.

Tom. II.

QUÆSTIO QUINTA.

An idem effectus produci possit à pluribus caassis totalibus?

Quærimus nunc, utrum idem numero effectus produci possit à duobus, vel pluribus caassis efficientibus totalibus ejusdem ordinis, quarum utraque totaliter effectum ipsum attingat, & procreet, atque id spectata saltem divina virtute. Porro duæ illæ totales caussæ bifariam spectari possunt, vel divisim, ac distributive, adeo ut una agente, altera tunc non efficiat; vel conjunctim, & collective, ita ut utraque simul & semel ex toto effectum eundem producat. De illis caassis utroque modo consideratis quæstio procedit.

Dicimus, eundem numero effectum virtute divina produci posse à duabus caassis totalibus efficientibus ejusdem ordinis, divisim, & distributive acceptis, non tamen ab iisdem collectim, & totaliter agentibus. Primam partem tradit Scotus in 2. d. 2. q. 2. & in 4. d. 43. q. 2. Secundam partem docent in 1. d. 2. qu. 3. in 2. d. 20. q. 2. & in 4. d. 6. q. 2.

Probatur 1. pars. Illud omne possibile est divina virtute, quod nullam præ se fert contradictionem. Atqui eundem numero effectum produci à duabus caassis totalibus efficientibus ejusdem ordinis, nul-

Aaa lam

Iam dicit contradictionem : ut argumentorum solutione patebit. Igitur id fieri potest. Deinde si caussæ efficiētes ejusdem speciei inter se conferantur, æqualem habent specificam perfectionem. Id ipsum verum est etiam de effectibus ejusdem speciei. Igitur quod una earum caussarum valet, altera etiam præstare poterit; & unus, idemque effectus tum ab una caussa, tum ab altera poterit produci: quemadmodum una, eademque virtus caussæ potest numero effectus procreare.

Respondent Thomistæ, rationem repugnantiæ à natura caussarum oriri; quælibet enim caussa est determinata ad certam seriem effectuum. Sicuti autem virtutes caussarum, licet sint specificè similes, sunt numero distinctæ; ita earum quælibet, licet possit producere plures effectus specificè similes, non tamen eundem numero effectum.

Verum responsio hæc ad quæstionis caput reddit. Hoc ipsum enim est, quod inquirimus, utrum quælibet caussa determinet sibi talem effectum seriem. Nisi enim id probent Thomistæ, contrarium nos tuebimur possibilem esse Deo volente, quippe nihil obstat. Virtus autem specifica ex se se intelligitur omnia respicere, & singula effecta ejusdem speciei.

Probatur 2. pars. Ea, quæ contradictionem præ se ferunt, nec divina virtute sunt possibilia. At-

qui si idem numero effectus produceretur à duabus caussis. totalibus collectim, & ex toto agentibus, haberetur contradictione. Ergo id evenire nullatenus potest. Probatur minor. Dependere essentia-liter ab aliquo, & non dependere essentialiter ab illo contradictionem dicunt, si de eodem enuntientur. Atqui data hypothesi idem numero effectus dependeret essentia-liter ab utraque caussa, & non dependeret essentialiter. Ergo &c. Minor probatur. Effectus dependet essentialiter à sua caussa, à qua recipit esse; id ipsum enim notio effectus, qua effectus est, aperte præ se fert. Ergo tunc idem numero effectus, quia totum suum esse ab utraque caussa recipere, ab utraque etiam dependeret essentia-liter. Porro à neutra carum essentialiter dependeret; nihil enim pendet essentialiter ab illo, quo sublato, adhuc haberet suum esse: circumscripta autem qualibet ex illis caassis, effectus adhunc ab altera suum esse recipere. Igitur &c.

Confirmatur. Repugnat dependentiam effectus adæquate respice-re unam caussam totalem, & simul aliam caussam totalem respicere; hoc ipso quippe prior caussa non esset totalis, & adæquata. Ita nec potest in eodem instanti eadem res bis produci, quia tunc existe-ret per unam productionem, atque simul non existeret, ut alia actione produci posset; productio enim dat rei existentiam, quam supponit

nit re ipsa non haberè. Igitur hæc omnia manifestam sapiunt contradictionem, nec adeo possibilia sunt.

Respondent, effectum utique ex se se indigere unica tantum caussa, à qua pendeat: Deum tamen posse tribuere effectui id, quo non eget, nempe dependentiam ab altera causa, sine qua effectus poterat existere.

Contra. Cum dependentia effectus à caussa sit essentialis, ut diximus, non potest Deus tribuere effectui ab una caussa pendentia dependentiam itidem essentialiem ab altera caussa. Alioquin prior illa dependentia non esset essentialis, ut manifestum est. Cum autem dependentia effectus oriatur ab indigenia ipsius effectus, qui extare non potest, nisi recipiat esse à sua caussa, iccirco ne intelligi quidem potest duplex simul dependentia, quia quod existit simul & semel conciperetur ut non existens.

Respondent proinde, effectum creatum dependere essentialiter à solo Deo: à caussa autem secunda dependere tantummodo accidentaliter. Quod ipsum ex prima assertionis nostræ parte descendit. Cum enim idem effectus produci possit à duabus caassis divisim, & distributive acceptis, manifeste sequitur, à neutra illarum effectum ipsum dependere essentialiter, quia per alterutram effici potest.

Contra. Effectus creatus dependet essentialiter & à Deo, velut prima caussa, & à creatura, velut caussa secunda, à qua accipit suum

esse. At à Deo dependet essentialiter absolute, quia sine illo nullatenus existere potest: à creatura autem dependet essentialiter conditionate, quatenus nimirum accipit ab illa suum esse. Porro si effectus ab una aliqua caussa secunda recipiat suum esse, hoc ipso non potest non dependere ab ipsa essentialiter, quia tunc habere intelligitur essentialiem, & necessariam connexionem cum illa. Dum vero effectus totum suum esse ab una caussa recipit, non potest idem simul ab altera recipere; alioquin haberet totum suum esse ab una, & non haberet: atque ita simul & semel dependeret ab una caussa essentialiter, & non dependeret essentialiter ab illa, ut diximus. Secus res contingit, si caussæ divisi spectentur. Tunc enim semper ita ab una produceretur, ut non reciperet simul esse ab altera, nec ab ista essentialiter pendere intelligeretur. Semper autem ab ea caussa essentialiter pendet, à qua suum esse recipit, cum hoc ipsum sit fundamentum dependentiæ.

Infertur ex dictis, non posse eumdem effectum simul produci ab una caussa totali, & ab altera caussa partiali: ut allatæ rationes ostendunt.

Objicies i. contra primam partem. Effectus determinatus in numero exposcit caussam numero determinatam: ut sæpe docet etiam Aristoteles. Ergo nec divisim potest idem effectus produci à duabus caassis &c.

Respondetur : disting. anteced. id exigente intrinseca natura effectus , nego antecedens : Deo id determinante pro arbitrio suo, concedo antecedens , & nego consequentiam. Utique effectus numero determinatus produci debet à caussa numero determinata, quia actiones sunt singularium, & causa non agit , nisi existens , sit , & singularis. At effectus ex intrinseca sua natura non postulat potius unam numero caussam præ alia , nec sibi caussam determinat numero taliem ; nihil enim relucet in effectu ad ejusmodi determinationem. Quamobrem determinatio effectus quoad numerum est à solo Deo; quælibet enim caussa creata , positis etiam omnibus circumstantiis, non intelligitur potius determinata ad hunc numero effectum, quam ad aliud. Hinc Divina Bonitas in nos maxime commendatur , quod in sinu Catholicæ Ecclesiæ suæ nasci nos voluerit præ aliis, quos in errorum tenebris oriri permisit.

Instabis 1. Effectus determinatus in specie ex intrinseca natura sua exposcit caussam determinatam in specie. Ergo effectus determinatus in numero ex intrinseca natura sua exposcit caussam determinatam in numero. Consequentia probatur. Sicuti se habet species ad speciem , ita individuum ad individuum : Atqui diversæ differentiæ specificæ , licet afficiant idem genus , impedit effectus unius speciei produci posse à caussa alterius

speciei. Ergo suo modo idem dicendum est de differentiis individualibus.

Respondetur : permissò antecedenti , nego consequentiam & paritatem. Quippe differentia specifica caussæ , ut optime docet Scotus in 1. d. 7. est virtus agendi, unde & sibi determinat effectus quoad speciem, & effectus , ea specifica virtute sublata , non reperiет in caussa virtutem sui productivam. At differentia individualis non est ratio agendi , sed solum conditio operantis : ut alias diximus. Hinc eadem numero causa potest successive producere plures numero effectus ; neque tamen caussa specifica eadem valet successive producere effectus specie plures. Permisimus autem antecedens, quia effectus univoce produktus ab una aliqua caussa specifica , potest per actionem æquivocam produci ab altera caussa excellentiori : ut corpus humanum in resurrectione universali à solo Deo recipiet suum esse.

Instabis 2. Differentia individualis determinat naturam specificam ad producenda hæc numero individua , & non alia. Ergo &c. Probat. antecedens. Paternitas in Divinis determinat Naturam Divinam ad generandum Filium, quem gignere non potest Divina Natura determinata per Filietatem. Igitur etiam &c.

Respondeatur. Nego antecedens. Ad probat. nego paritatem. Natu-

ra Divinam terminata per Filietatem non potest alterum Filium gignere, quia jam habet terminum adæquatum suæ virtutis generativæ; Filius enim in Divinis, ut pote infinitus, totam exhaustit virtutem generativam Patris. At virtus productiva creaturæ non habet terminum sibi adæquatum in unico effectu.

Objicies 2. Si effectus, qui ab una causa producitur; posset dividimur ab altera produci, jam non dependeret essentialiter à causa ipsum producente. Atqui effectus ut absolute recipit esse ab illa causa, ita ab ea dependet essentialiter. Igitur &c. Deinde, data nostra sententia, ille, qui nunc Pater est Antonii, potuissest, aut posset ab Antonio generari; proindeque idem posset esse Pater, & Filius respectu ejusdem: cum tamen duæ istæ relationes nullatenus simul componi queant. Tertio eadem actio non potest duplice causæ convenire; ergo nec idem terminus actionis, seu idem effectus produci potest, à duplice causa. Quarto species, seu imago unius rei effici non potest ab altera specifica simili. Ergo &c.

Respondetur ad primum ex dictis. Essentialis enim dependentia effectus à causa, à qua reapse producitur, habetur tantummodo ex suppositione, quod revera effectus à tali causa recipiat suum esse unde licet sit actualis, & realis, non tamen dici potest absoluta eo

sensu, quo creatura dependet à Deo, sine quo nullatenus produci potest. Quamobrem in alia hypothesi effectus posset ab altera causa pendere, si non ab illa, sed ab ista reciperet suum esse.

Ad secundum. Relationes Parentitatis, & Filietatis nequeunt simul componi; & ideo nunquam potest idem pro eodem tempore esse Pater, & Filius respectu ejusdem. Tunc enim manifesta habetur contradic̄tio. At si is, qui modo Antonii Pater est, Deo sic disponente, fuissest Antonii Filius, nulla repugnantia relucet.

Ad tertium. Relatio actionis terminum simul respicit, & fundamentum: ut universim de relationibus in Logica diximus; & ideo distinctæ causæ, ut sunt distincta relationum fundamenta, ita eamdem nequeunt actionem habere. Attamen idem effectus per distinctas numero actiones produci potest: ut docet Scotus in 4.d. 13.q. r.

Ad quartum. Dispar est ratio. Imago enim est naturalis similitudo sui objecti, & conditiones causæ suæ peculiares sequitur, atque jam hoc ipso specificam quamdam determinationem includit, nec proinde ab alia causa præstari potest.

Objicies 3. Contra secundam partem. Sit corpus capax luminis, aut caloris in gradu determinato. Tunc si duæ adsint causæ naturales, quarum unaquæque virtutem habeat efficiendi eos determinatos lucis, aut caloris gradus, isti

isti ab utraque caussa necessario, & naturaliter agente in totum producentur. Idem igitur effectus à duplice caussa totali produceretur.

Respondeatur, in data hypothesi, duas illas caussas attemperare debere suum concursum, & operari per modum caussæ partialis. Caussa enim naturalis necessario agit ex tota virtute sua, sed quando præpedita non est. Tunc autem caussarum virtus, & actio totalis impediretur ex ipsa subjecti potentia, quod non nisi unius actionis adæquatæ capax esse supponitur.

Instabis. Duæ caussæ formales adæquatæ, ex. gr. duæ albedines ut octo, non possunt ita attemperari, seu determinari, ut se habeant per modum caussæ partialis. Ergo nec duæ caussæ efficientes &c.

Respondeatur. Nego paritatem. Caussa enim formalis suum præstat effectum per exhibitionem, seu communicationem sui, unde effectus caussæ formalis est ipsamet caussa formalis communicata subjecto; quapropter si in totum communicata est, in totum denominat. At caussa efficiens agit virtute sua, & effectum habet à se ipsa realiter distinctum.

Objicies 4. Una, eademque caussa potest plures effectus producere. Una, eademque facultas intellectiva extendere potest se se ad plura objecta intelligibilia. Eadem materia plures simul formas substantiales recipere potest, divina

virtute. Idem corpus potest esse in duplice loco simul, & semel, quemadmodum & duo corpora in eodem loco. Plura accidentia eidem subjecto simul communicari possunt. Potest homo eamdem operationem efficere propter duos fines adæquatos, puta deambulare, sanitatis, & oblationis gratia. Ergo etiam idem effectus produci simul poterit à duabus caassis &c.

Respondeatur, disparem esse rationem. Etenim vis activa caussæ, & intellectus non respiciunt pro suo termino adæquato unum effectum, aut unum objectum intelligibile. Duæ formæ substantiales duplex esse specificum materiæ tribuerent, ut suo loco diximus. Corpus respicit locum, ut quidpiam sibi extrinsecum, & accidentale: tum plures relationes intelligerentur inter corpus, & locum, alterutro eorum multiplicatio. Plura etiam accidentia multiplicem dant subjecto denominacionem, subjectum quoque ex se se omnium accidentium est capax, saltem divina virtute. Finis caussa est, quæ non operatur physice in effectum, sed tantummodo agentem movet, ac moraliter allicit, unde ex duplice fine homo vel promptius, vel alacrius, vel perfectius operatur. At in re nostra, effectus unicum esse sibi essentiale, & adæquatum reciperet totaliter à duplice caussa efficiente, atque à singulis caassis dependenter &c.

Ob-

Objicies 5. Si duo Sacerdotes simul proferant, & simul compleant verba Consecrationis super eumdem panem, eadem consecratio efficeretur à duabus caassis totalibus ex toto agentibus, eademque præsentia Corporis Christi ab illis procederet. Si plures eundem hominem aqua baptismatis lustrent, formamque simul baptismi proferant, & compleant, effectus idem gratiæ, & forma eadem baptismi, ut Sacramentum est, à duabus caassis totalibus ex toto agentibus haberetur. Plures gratiæ justificantis gradus peccatum delent, quæ peccati deletio ab unoquoque gratiæ gradu efficeretur. Duo peccata lethalia adæquate inferunt privationem gratiæ, si perpetrentur simul, & tamen eorum quodlibet ex se se caussa esset illius privationis. Idem ergo dicendum &c.

Respondet, latum esse discri-
men. In hisce enim caassis moralibus effectus non dependet ab illis essentialiter, quemadmodum dependet à caassis physicis. Itaque duo illi Sacerdotes sunt caussæ tantummodo morales, nam caussa physica transubstantiationis, & præsen-
tiæ Corporis Christi, est solus Deus: ut docet Scotus in 4. d. 6.
q. 2. Gratia quoque in baptismate à solo Deo physice efficitur. Ex illis porro moralibus caassis altera superflueret, & Deus pro sua libertate unam præ alia acceptam haberet. Verba itaque ab uno prola-
ta omnino superflua essent. Quam-

quam dici possit, Deum exhibere effectus illos ad verborum prolationem, servata debita materia, & forma, sive ab uno, sive à pluribus ea verba dicantur. Eadem ratione Deus peccata delet ad gratiæ infusionem, sive hæc major, seu minor sit. Nam gratia dicitur delere peccatum vi divini decreti: peccatum autem cum non sit aliquod reale, & physicum, non est capax physicæ destructionis. Ipse etiam Deus gratiam aufert à peccatore, statim ac à suis præceptis ille recedit, sive majori, sive minori culpa lethali homo mandata Dei trasgrediatur.

Colligite, caussas artificiales di-
versas esse ex diversitate artefacti,
quia Artifices diversis ideis ope-
rantur: ut de caassis universim
diferentes diximus initio disputa-
tionis. Plures etiam numero effec-
tus non indicant infinitam virtu-
tem in caussa, aut virtutem per-
fectiorem, quæ necessaria est ad
producendos plures effectus specie
diversos; quippe ad plures nume-
ro effectus sufficit multiplex appli-
catio ejusdem virtutis activæ.

Infertur ex dictis, posse per di-
vinam virtutem eundem numero
effectum reproduci, ut notat Doct.
in 4. d. 43. q. 1. Quippen nullahinc
apparet repugnantia, cum eadem
res possit pluribus extrinsecis du-
rationibus successive commensura-
ri, & præsens rursus fieri; etsi non
quatenus jam fuit. At vero natu-
raliter non potest idem numero

redire effectus, non quidem ex intrinseca creaturæ natura, sed ex ordine, quem Deus Universitati rerum præfixit. Quamobrem ridicula est, & falsa Platonis illa commentatio statuens omnia prorsus hujuscemodi Universi individua, peractis certis annorum periodis, post completam octavæ sphæræ circulationem, per motum naturalem redire: maxime cum actiones liberae non queant à Cælorum motibus determinari, nec ipsa cælestia corpora constitui possint totales causæ naturalium effectuum.

QUÆSTIO SEXTA.

Quanam ratione per divinam virtutem passiva creaturarum potentia ampliari possit?

S I V E

An detur potentia obedientialis passiva in quolibet ad quodlibet?

QUæstio hæc ex iis, quæ de activa creaturarum facultate docuimus, naturali quadam consecutione profluit. Sibi enim invicem respondent in creaturis activa facultas, & passiva potentia. Quamobrem nunc investigare nitetur; utrum passiva creaturarum potentia per divinam virtutem supernaturales quasdam formas possit in se se accipere; & an omnes etiam formas, etsi non conjunctim, valeat suscipere. Quod quidem natu-

ræ viribus fieri non posse certum est. Nam nec spiritualis affectio recipi potest in materiali substantia; alioquin enim cum illa ex sui natura debeat esse tota in toto subjecto, & tota in singulis subjecti partibus, simul in fieri, & conservari penderet à pluribus causis totalibus: quod omnino repugnat, ut paulo ante diximus. Ita nec materialis affectio per vires naturæ potest recipi in substantia spirituali, quæ partibus omnibus caret, atque omnino est divisibilis.

Dicimus passivam creaturarum potentiam posse per divinam virtutem ampliari, & extendi ad plures formas supernaturales recipiendas; non tamen ad omnes. Quatenus nimis, ut inquiunt, potentia obedientialis passiva non est in qualibet re ad quamlibet formam suscipiendam. Priorem partem tradit sèpe Doctor in iis locis, quos in 4. quæstione laudavimus. Alteram expressit in 4. d. 12. q. 2. n. 12. sub litera C. dicens: *Sicut lapis non potest esse sapiens, quia nullo modo habet rationem receptivi respectu sapientie; sic Angelus non potest esse albus, quia nullo modo susceptivas est forme hujus: sive ista forma ponetur divisibilis, sive non. Nunc quidem est duplex ratio, quare non potest esse albus. Una est extensio in ipsa forma, & inextensio Angelii. Alia ratio, quia hæc forma est hec forma, & Angelus est Angelus. Et*

secunda ratio est essentialis ratio impossibilitatis ; prima non. Ergo prima ablata est possiblitas ? Nulla est consequentia.

Probatur prima pars. Ex dictis in quarta quæstione intellectus Beatorum corroboratur , & adjuvatur per lumen gloriæ supernaturale, ut Deum videre possint intuitivè: & voluntas nostra gratiam habitualem suscipit , quam esse formam inhærentem probavimus in secunda Metaphysices parte , disputatio ne tertia , quæstione nona. Ergo passiva creaturarum potentia per divinam virtutem recipit formas aliquas supernaturales. Et quidem immediate in se ipsa recipit has formas creatura. Nam quod ajunt Thomistæ necessarium esse modum aliquem , quo disponatur passiva creaturarum potentia ad eas formas recipiendas; pro libito omnino confitum est. Etenim novus hic modus vel esset naturalis , vel supernaturalis ? Si modus ille dicatur naturalis , jam & ipse modus , ad instar ipsiusmet potentiae passivæ creaturarum , nullam habet proportionem cum forma supernaturali ; atque adeo non potior est ratio , cur potentia illa queat suscipere supernaturales formas per modum istum , ac sine illo , & per se se. Si vero modus ille dicatur supernaturalis ; jam potentia passiva creaturarum , utpote naturalis , non poterit per se ipsam immediate recipere modum hunc supernaturalem ; ac proinde redit argumen-

Tom. II.

tum ; vel potentia passiva creaturarum idonea est per se ipsam immediate formas ipsas supernaturales accipere. Igitur &c.

Probatur secunda pars. Quan do subjectum non est idoneum suscipiendi effectum formalem primarium alicujus formæ , non potest recipere ipsam formam. Atqui subjectum spirituale incapax est effectus formalis primarii qualitatis corporeæ; & subjectum corporeum incapax est effectus formalis primarii qualitatis spiritualis. Ergo subjectum spirituale non potest recipere ullum accidens corporeum; nec subjectum corporeum potest recipere affectionem aliquam spiritualis ; atque adeo passiva creaturarum potentia per divinam virtutem non potest ampliari , & extendi ad omnes formas recipiendas. Major propositio evidens est. Cum enim effectus formalis primarius formæ non sit nisi ipsam formam communicata subjecto , repugnat formam inesse illi subjecto , cui convenire non possit effectus ipse formalis. Hinc Philosophi omnes consentiunt , Deum non posse impedire effectum formalem primarium alicujus formæ , nisi impediendo ejusdem formæ communicationem. Probatur itaque minor. Effectus formalis primarius albedinis , v. gr. est reddere album , sicuti effectus formalis primarius quantitatis est reddere impenetrabile. Atqui Angelus non potest fieri albus , nec impenetrabilis , quia

Bbb

ex

ex sui naturā est intrinsece invisibilis, & penetrabilis. Ergo Angelus nullo modo capax est suscipiendi effectum formalem primarium albedinis, vel quantitatis. Similiter ratione effectus formalis primarius cognitionis est reddere subjectum capax complete, & proxime representandi objectum ; & effectus formalis primarius sapientiae est reddere subjectum sapiens. Porro utraque hæc denominatio repugnat lapidi. Ergo utraque etiam forma lapidi repugnat. Atque adeo &c,

Respondent, albedinem non reddere album, nisi quando recipitur modo extenso. Quod idem affirmant de quantitate. Addunt vero, has formas recipi in Angelo indivisibiliter ; atque adeo non tribuere illi eas denominationes. Ita dicunt sapientiam, & cognitionem non tribuere suum effectum formalem, nisi quando subjectum polleat virtute tendendi in objectum : cùjusmodi non est lapis. Adeoque &c.

Contra est. Albedo non potest recipi in Angelo, nisi recipiatur eo modo, quo facit ipsum album ; sic & quantitas, nisi reddat Angelum impenetrabilem. Ita & sapientia, & cognitio nequeunt recipi in lapide, nisi reddant lapidem sapientem, proximeque, ac complete potentem exprimere, & representare objectum. Hæc enim omnia sunt effectus formales primarii illarum formarum ; sive non aliud sunt, nisi ipsam formam subjecti suis com-

municatæ. Ergo si formæ illæ non possunt recipi in prædictis subjectis, eo modo quo præstant hujusmodi effectus, nullatenus poterunt illis recipi.

Respondent. Duplicem esse effectum formalem formæ ; alium scilicet, qui consistit in communicatione ipsius formæ : & hic effectus à Deo impediri non potest, quoties forma sit in subjecto ; alterum vero effectum præ se ferre eas denominationes, quas forma solet tribuere : istæ autem denominationes non præstantur, nisi forma comunicetur eo modo, quem pertinet ipsæ denominationes. Quamobrem cum albedo non communicetur Angelo, modo extenso, ut petit denominatio albi ; ictcirco non potest denominare Angelum album, licet Angelus dici possit habens albedinem. Ita & lapis appellari potest habens cognitionem, non tamen posset dici cognoscens, quia cognoscere non est habere cognitionem, sed per cognitionem operari, & repræsentare objectum.

Contra ratiocinamur. Effectus formalis primarius formæ attendi debet à prædicato specifico ipsius formæ. Ergo effectus ille non est sola formæ communicatio universim accepta ; sed debet esse talis communicatio, per quam subjectum reddatur tale, qualis est essentialiter ipsa forma. Ergo si albedo non potest ita communicari Angelo, ut reddat ipsum album, absolute illi communicari non poterit,

Pro-

Probatur antecedens. Effectus formalis primarius unius formæ debet esse diversus essentialiter ab effectu formalis primario alterius formæ secundum speciem diversæ ; si quidem à caassis formalibus essentialiter diversis necessario proveniunt effectus formales essentialiter diversi. Atqui communications formarum sunt omnes ejusdem generis, & æque communicatur albedo , ac nigredo , si communicationem ipsam universim consideremus. Ergo effectus formalis primarius formæ attendi debet à prædicto specifico ipsius formæ. Rursus formalis , & primarius effectus distinguit , & ostendit, hanc potius formam, quam aliam inesse subjecto. Porro idipsum minime intelligitur per communicationem universim acceptam. Ergo effectus formalis primarius non consistit in hac formæ communicatione. Tum quid est esse album, nisi habere albedinem? Quemadmodum ut tradit Scotus in 1. dist. 3. quæst. 7. esse quale est habere qualitatem. Ergo ubi habetur communicatio formæ albedinis secundum esse specificum , jam habetur esse album. Si ergo Angelo repugnat istud , etiam albedo ipsa repugnat. Tandem licet effectus formalis primarius cognitionis non sit denominare subjectum tum ipsa cognoscens , est tamen reddere subjectum complete , & proxime potens operari intentionaliter, exprimendo , & repræsentando objectum. Porro hæc denominatio re-

pugnat lapidi. Ergo nec ipsa cognitione poterit esse in lapide.

Objicies 1. contra primam thesim. Ad dispositionem non est necessaria dispositio , hæc tamen necessaria est ad formam ; quemadmodum contingit in substantialibus ; calor enim præcedit ignem, ut dispositio ; sed calorem ipsum nulla alia dispositio præcedit : ergo necessaria erit dispositio , sive modus aliquis ad formam supernaturalem recipiendam , non tamen alia dispositio requiritur ad accipendum ipsum modum. Ergo corruit proposita à nobis ratio. Atque adeo potentia passiva creaturarum non suscipit per se ipsam , & immediate formas aliquas supernaturales.

Respondetur. Nego paritatem. Eatenuis enim prærequiritur calor, ut determinetur indifferentia materiae , ut tollantur à subjecto affectiones illæ , quæ contrarie sunt formæ ignis introducendæ. Idipsum porro non valet , ubi de calore loquamur. At Thomistæ in passiva creaturarum potentia modum aliquem præexigunt , quoniam forma recipienda est supernaturalis. Atqui etiam modus ille deberet esse supernaturalis , ut diximus. Igitur omnino eadem valet ratio de modo illo , ac de ipsa forma.

Instabis. Ad producendum effectum supernaturale prærequiritur in intellectu quidpiam supernaturale , quoniam intellectus per se se aptus non est. Ergo ad recipiendam formam supernaturalem ne-

cessarius erit modus supernaturalis. Consequentia probatur. Nam etiam inter recipiens, & receptum debet dari proportio. Hinc anima rationalis supponit materiam dispositam per organizationem. Igitur &c.

Respondetur. Nego paritatem. Etenim dum caussa producit, debet in se habere virtutem, per quam attingat effectum. Proinde naturalis facultas creaturæ elevari debet; ut in effectum supernaturalem operetur: maxime cum effectus iste sit supernaturalis; quoniam superexcedit quamlibet creaturæ naturalem virtutem. At quando creatura recipit, nihil operatur, sed mere passive se habet; unde sufficit sola receptiva potentia. Ad probationem consequentie dicimus, non esse necessariam proportionem in essentia, seu in entitate sed sufficere capacitatem subjecti: quemadmodum vel ipsi Thomistæ coguntur fateri in receptione modi supernaturalis. Anima autem prærequisit organizationem, quia proprium illius subjectum est corpus, ut nempe cum illo constituat compositum *unum per se*, nimirum animal, quod essentialiter constat ex anima, & corpore.

Objicies 2. contra secundam thesim. Deus in Christo per unionem hypostaticam dicitur mortuus & passus; licet sit intrinsece immortalis, & impassibilis. Ergo etsi Angelus sit intrinsece penetrabilis, poterit tamen denominari impenetrabilis per quantitatem in se ipso receptam. Atque adeo &c.

Respondetur. Nego paritatem

Cum enim natura humana non sit unita divinæ Naturæ tanquam forma subjecto, sed solum in unitate suppositi; siccirco non debet Deum intrinsece denominari mortuum, & passum: sed omnis ista denominatio extrinseca est. At vero cum quantitas communicaretur Angelo tanquam forma subjecto, intrinsecam illi præberet denominationem impenetrabilis. Porro hæc denominatio repugnat Angelo. Ergo & quantitas &c.

Objicies 3. Non repugnat, formam inesse subjecto, quia illi tribuat suum effectum formalem primarium, & specificum. Ergo corruit allata probatio. Probatur antecedens. Licet effectus formalis primarius specificus Personalitatis sit reddere incommunicabile, tamen in triduo mortis Christi Personalitas Divina fuit Corpori unita, quin ipsum redderet incommunicabile, cum re ipsa fuerit Animæ communicatum. Ergo &c. Ita etiam illa Personalitas tunc non denominavit ipsum Corpus personam, quoniam Corpus non est capax hujuscemodi denominationis. Idem ergo dicendum est de albedine: & quantitate respectu Angeli.

Respondetur. Nego antecedens. Ad probationem dicimus, effectum formalem primarium Personalitatis non esse reddere incommunicabile complete, sed quomodo cumque

alterius dependentiam terminare. Quod utique Personalitas Divina præstitit Corpori Christi in triduo mortis. Nec debuit corpus denominari persona , nam ut diximus in prima Metaphysics parte, disput.

3. quæst. 5. ipsa Substantiæ notio solam præ se fert negationem communicationis; appellatur autem Personalitas , vel Suppositum pro varia connotatione naturæ intellectuæ , vel Substantialis.

Objicies 4. Anima rationalis, spiritualis , & immortalis communicatur corpori per modum formæ, nec tamen reddit ipsum corpus immortale , vel spirituale , quoniam corpus incapax est harum denominationum. Ergo idem dicendum de albedine , & quantitate respectu Angeli.

Respondetur. Nego paritatem. Immortalitas enim , & spiritualitas non sunt prædicatum specificum animæ rationalis , sed genericum. At vero esse album est prædicatum specificum albedinis , esse impenetrabile est prædicatum specificum quantitatis. Porro forma debet necessario tribuere suam specificam denominationem subjecto, cui inest ; sed non denominationes alias à predicatis genericis desumptas nisi quando subjectum sic capax etiam istarum denominationum ; quia nempe denominationes iste non significant hanc specie formam inesse subjecto. Sic albedo denominat corpus album , non tamen illi tribuit denominationem

accidentis. Cum igitur esse album, & impenetrabile sint effectus specifici albedinis , & quantitatis; ut formæ istæ sint in Angelo, deberet Angelus eas suscipere denominationes. Quod est impossibile.

Instabis. Reddere rationale est effectus formalis primarius à prædicato specifico animæ rationalis depromptus , & tamen anima non reddit corpus rationale. Ergo &c.

Respondetur , animam rationalem tribuere corpori denominationem proxime potentis inservire ipsi animæ ad exercendas suas operationes rationales , hoc est animam tali modo vivificare corpus , ut valeat esse instrumentum proxime aptum ad inserviendum ipsi animæ. Quamobrem talem corpori communicat anima vitalitatem , qua redditur proxime potens eas efficerre sensationes , quæ sunt propriæ hominis , & immediate ordinantur ad ipsas rationales animæ operationes exercendas. Ipsa porro anima rationalis ex sua specifica ratione includit etiam virtutem proxime potentis efficere humanas sensationes , unde & corpus ita disponit , & illi communicat istam specificam denominationem.

DISPUTATIO SEPTIMA.

De Infinito.

QUÆSTIO UNICA.

Utrum infinitum possit à Deo creari?

INfinitum illud esse intelligitur, quod fine, termino caret. Id porro bifariam intelligimus, nempe vel extrinsece tantum, quatenus assequi non possumus, quanta sit alicujus rei perfectio vel extensio, etsi eadem major esse queat; vel intrinsece, quatenus res ipsa attingit intrinsece sumimum, & infinitatem. Idecirco duplex distingui solent infinitum, videlicet *Categorematicum*, & *Sincategorematicum*. Jam vero infiniti illius, quod *Categorematicum* ab omnibus Philosophis appellatur, possibilitatem quibusdam adstruentibus, aliis negantibus, mirum est, ad sermonis iurgium hujusmodi controversiam adigi: à quo disceptationis genere plurimum nos alienos esse profitemur. Nemo sane Philosophorum est, qui putet extare posse numerum adeo summum, ut illi nulla fieri queat additio. Porro numerum nunc posterior Philosophorum sententia infinitum *Categorematicum* appellat, quod proinde impossibile esse contendit. Altera autem opinio hujuscce infiniti possibilitatem adstruens, tradit illud esse,

quod re ipsa partes habet innumerabiles: quemadmodum etiam infinitum *Sincategorematicum* illud appellat, quod partes infinitas solum potestate continet, seu illas semper habere posse intelligitur. Ignitus prius de utriusque infiniti notione dicendum est.

Aristoteles in libro 3. *Physicorum*. tom. 24. infinitum sic describit: *Est id, cuius semper est aliquid extra accipere.* Quæ quidem descrip-
tio, ut notat Scotus quæstion. 5. *Quolibet alium, s. De primo*, con-
venit soli infinito *Sincategorematico*. Eam enim definitionem docet Philosophus aptari infinito, quod cum habeat esse in fieri, & in potentia rationem obtinet partis, & non totius; incompletum est, non vero completum. Porro infinitum *Categorematicum*, ut mox declarabimus, completum est. Et cum Aristoteles ipse contra Antiquos Philosophos probet, non extare infinitum in actu, sed solum in potentia, atque hoc constituto, descriptionem illam tradat, profecto eamdem adaptat soli infinito in potentia: cuiusmodi est solum infinitum *Sincategorematicum*.

Aliam tradiderunt Veteres infiniti descriptionem, dicendo: *Est id cuius nihil est extra.* Porro definitio ista soli congruit infinito *Categorematico*, si ita accipiatur, ut infinitum illud sit, cui non solum nihil deest eorum, quæ ad illius essentiam, & integratatem pertinent, sed extra quod nihil penitus

remant in eo genere. Unde , ut ait Doctor , tale infinitum in actu vere esset totum , & vere perfectum : totum , quia nihil sui esset extra illud ; perfectum , quia nihil illi deesset in eo genere. Cujusmodi est infinitum Categorematicum , ut mox probabimus. Allatæ descriptioni consonat altera Aristotelis , lib. 1. de Cælo dicentis : *Infinitum est id , quo non est majus , nec esse potest.*

Arbitramur autem , infinitum Categorematicum distingui ab infinito Sincategorematico , non quatenus illud partes infinitas obtineat re ipsa , istud vero eas solum possit habere ; sed quia illud est totum , & completum , non ita Sincategorematicum , quod imperfectum est , nec intrinsece assequitur summum , & infinitatem. Quare duo hæc infinita discriminantur invicem in ipsa extensione , non in solo modo essendi actuali , vel potentiali.

Ita docet Scotus , libr. 2. Metaphysicæ , quæst. 6. §. *Ad rationes.* Ibi enim occurrens argumento , quo possibilitas adstruebatur infiniti in actu per creationem animarum rationalium , præsupposita hominum generatione ab æterno usque ad tempus ; sic ait Doctor : *Forte posset concedi , quod actu essent infinite in potentia , quia in potentia accipiendo unam animam post aliam , quia aliter non competebat eis inginitas ; sed non essent infinite actu , quia non sunt tot , quin plures possint*

esse : Infinita in actu tot sunt , quod non possunt plura compossibilia esse. Est postea addit : *Si essent tot homines simul , quot fuerunt successive (in ea hypothesi generationis hominum ab æterno) , non essent infiniti actu : quia infiniti fuerunt in potentia.* Ideo nunquam sequitur ex illis , si essent simul , infinitas actualis , quia alterius rationis sunt infinitas actualis , & potentialis , ideo ex infinitate potentiali nunquam potest concludi infinitas actualis . Hinc ibidem Doctor ad prævendam fallaciam illam , quæ dicitur Compositionis , & Divisionis optime admonet aliud esse habere re ipsa actualiter infinitatem aliud vero habere infinitatem actualem. Quod quidem maxime notandum est.

Porro hæc ratio est. Ut enim docet Scotus laudatus , infinitas Sincategorematica præ se fert partes non esse tot , quin plures esse possint ; infinitas vero Categorematica præ se fert partes esse tot , quod nequeant esse plures. Quæ duo invicem contradictoræ opponuntur. Atqui rationes istæ abstrahunt à modo essendi actuali , vel potentiali. Ergo his modis etiam præcisis , infinitum Categorematicum , & Sincategorematicum invicem distinguuntur ; atque adeo in ipsa differunt extensione. Minor probatur. Concipiamus infinitum Sincategorematicum constitui in actu secundum omnes suas partes , non circa illud esse infinitum Categorema-

maticum. Quippe cum existentia supponat rem , cui advenire intellegitur , determinatam in specie , & in numero; jam eadem est essentia- liter multitudo in statu possibilitatis ; ac in statu realis existentiæ. Igitur &c.

Deinde infinitum Categorematicum tale appellatur per ordinem ad terminum Categorematicum , sicuti infinitum Sincategorematicum tale dicitur per ordinem ad terminum Sincategorematicum. Quemadmodum ergo duo isti termini non eantibus discriminantur , quod ille si gnificet rem acto existentem , iste vero rem solummodo possibilem; sed quatenus ille per se se vere si gnificat , hic vero per se ipsum non significat ; ita infinitum Categorematicum non discriminatur ab infinito Sincategorematico penes actualem existentiam , sed quatenus illud per se se vere attingit sumnum , & infinitatem ; istud autem per se se non attingit infinitatem ipsam , sed partibus suis successive acceptis semper est in potentia ad infinitatem , id est , semper partes , & partes habere potest. Unde non proprio , ac rigoroso sensu infinitum est , sed finitum dicitur in infinitum. Atque hinc solemnem terminorum abusionem in iis animad- vertimus , qui aliter sentiunt.

Dices. Aristoteles laudatus suam infiniti descriptionem tradit , ut illam excludat , quam Veteres ex ponebant. Ergo cum isti definierint infinitum Categorematicum , de eo

etiam Philosophus loquutus est. Atque adeo &c. Ita & Scotus in 1. distinctione 2. quæstione 2. numer. 39. scribit : *Quæcumque sunt infinita in potentia , ita quod accipiendo alterum post alterum , nullum poterunt habere finem ; illa omnia , si simul actu sunt , sunt infinita actu.* Idipsum docet quæst. 5. Quolibetalium. Ergo duo illa infi- tita penes actualem existentiam , vel possibilitatem discriminantur.

Respondetur. Veteres dixisse , in finitum in actu re ipsa existere: quod Aristoteles inficiatur. Unde in hoc ipso totalis erat inter Veteres , & Aristotelem. Fatetur tamen Aristoteles extare infinitum in poten- tia , quod iccirco describit.

Scotus vero , etsi hac in re nun quam expresse mentem suam deter minavit , tamen loco laudato pro bare intendit infinitatem divini intellectus , & scribit ea , quæ infini ta sunt in potentia actualem ha bère infinitatem , si actu simul ex istant ; sed hanc ipsam infinitatem non Categorematicam esse indicat loco à nobis laudato.

Hæc dicta sint de essentia infini ti. Nunc illius proprietates recen seamus. Prima infiniti proprietas est immensurabilitas. Et hæc utrique infinito convenit , licet infinitum Categorematicum sit ab intrinseco immensurabile , Sincategoremati- cum vero ab extrinseco tantum. Utrumque tamen infinitum distin- te cognosci non potest secundum omnes suas partes. Hinc nec pertransiri

pos-

possunt omnes illius partes , nec numerari , nec successive singillatim cognosci : ut diximus in Metaphysica, part. 2. disputat. 1. quæst. 3. de Divina Omni scientia agentes.

Secunda proprietas est non posse infinito fieri additionem. Porro hæc affectio congruit soli infinito Categorematico ; quippe quod cum ejusmodi infinitum omnino ex se se attingat summum , habet omnes suas partes , nec quidquam illi deest in suo genere , nec pars in eo designari potest , cui fiat additio. At vero infinitum Sincategorematicum finitum est , vel secundum se totum , vel secundum alias partes , quas habet re ipsa , licet sit infinitum in potentia; proinde illi fieri potest additio secundum rationem illam , qua dicitur finitum : & per partium additionem non tollitur , sed compleatur potius illius infinitas.

Superest modo , ut de infiniti possibilitate dicamus. Et infinitum quidem Sincategorematicum esse possibile consentiunt omnes , quo cumque in genere illud accipiatur. Nam quocumque numero intellecto , potest illi fieri additio ; & cum qualibet creatura infinite disset à Deo , inter ipsam , & Deum alia perfectior , & perfectior semper erit possibilis , quatenus una magis , quam altera , divinam perfectionem potest participare. An madvertimus tamen , non posse à Deo simul collective creari om-

nia possibilia. Quamvis enim hæc omnia disjunctim , & distributive accepta extar e queant , non tamen simul , & conjunctim. Alioquin ut diximus in secunda Metaphysics parte , disp. 1. q. 1. in solutione ad tertiam confirmationem 2. object. tota collectio possibilium fieret per creationem determinata , cum tamen ex sui notione , ac natura necessario sit quidpiam omnino indeterminatum. Quæ duo invicem repugnant. De infinito igitur Categorematico dubium occurrit ; possitne illud creari , vel secundum essentiam , vel secundum quantitatem , vel secundum qualitatem , vel secundum multitudinem.

Dicimus. Nullum infinitum Categorematicum posse à Deo creari. Conclusio evidenter sequitur ex dictis.

Probatur. Repugnat infinitum Categorematicum in multitudine. Ergo etiam in essentia , in quantitate , & in qualitate. Consequentia manifesta est. Essentia enim infinita intelligeretur habere infinitos numero gradus perfectionis , essentialis quantitas infinita haberet infinitas numero partes , & qualitas infinita omnes includeret suæ perfectionis gradus infinitos numero. Probatur igitur antecedens. Infinitum Categorematicum est illud , quod attingit intrinsece summum , & infinitatem , & cui subinde repugnat additio. Sed cui libet numero dato , vel intellecto fieri potest additio , si non ex

parte rerum numeratarum, saltem ex parte numeri; semper enim addere possumus unitatem, vel numerum impossibilium, vel numerum ternarum Divinarum Personarum. Igitur &c.

Hinc si quis dicat, omnia possibilia simul à Deo esse creata, illa non essent infinitum Categorematicum in multitudinem, quia semper illis fieri posset additio ex parte numeri. Si infinitum aliquod Sincategorematicum supponatur extare secundum omnes suas partes posset nihilominus illi fieri additio ex parte numeri; proinde non esset infinitum Categorematicum, quia res est omnino eadem essentialiter, sive re ipsa existat, sive intelligatur in statu possibilitatis. Ex quo fit omnia possibilia simul à Deo cognita, semper esse infinitum Sincategorematicum, quia cognitio non immutat naturam objecti.

Objicies 1. Infinitæ potentiae activæ debet correspondere infinitus terminus possibilis. Sed in Deo extat infinita virtus activa. Ergo possibile est infinitum Categorematicum; nam & ipsa Omnipotèntia Dei est infinita Categorematica. Et sane major est potestas Dei, quam virtus infinitorum hominum, si isti existerent. Sed infiniti homines possent producere effectus infinitos Sincategorematice. Ergo dicendum est, Deum posse producere effectus infinitos Categorematice. Hinc Christus Dominus in-

finitam habuit gratiam: *Non enim Deus dedit ad mensuram spiritum Filio;* ait Sacra Scriptura, capite tertio Joannis, vers. 34. Igitur &c.

Respondetur. Potentia Divinæ infinitæ correspondere infinitum Sincategorematicum creaturarum possibilium, quas omnes successive producere potest Deus; & quantum est ex se se, posset etiam simul producere, si simultanea illarum omnium productio non repugnaret. Etsi autem Deus non possit producere nisi infinitum Sincategorematicum, nihilominus Dei virtus ex modo operandi distinguitur etiam à virtute infinitorum hominum; quæ intrinsecus limitata semper est, ac dependentiam à subiecto præ se fert. Illa pariter Dei virtus est Categorematica infinita, quia continet virtualiter, & eminenter omnes omnino perfectiones effectuum possibilium, & quantum est ex se se, posset etiam producere creaturam Categorematicam infinitam, si hæc non repugnaret. Gratia vero Christi Domini fuit summa negative, quo ad suam entitatem; quatenus nec æqualis, nec major creaturis aliis concessa fuit: ut Scotus defendit in 3. dist. 13. quæst. 1.

Objicies 2. Potest à Deo effici creatura perfectior omnibus aliis, immo & perfectissima. Porro hæc esset infinitum Categorematicum. Ergo &c. Et sane unio hypostatica humanitatis Christi cum Verbo,

bo, Maternitas Dei, visio beata, & gratia, sunt dona adeo perfecta, ut in suo ordine nequeant fieri perfectiora. Sic & homo est substantia perfectissima sub genere animalis. Ergo &c.

Respondetur. Nego majorem, ut jam pridem diximus. Etsi enim possibilis sit creatura, quæ sit longe perfectior cæteris aliis re ipsa creatis; non tamen dari potest creatura perfectissima, quæ includat omnes perfectiones infinitas. Nam quælibet creatura, quantumvis perfectissima, infinite semper distaret à Deo; atque adeo inter ipsam, & Deum alia semper creatura perfectior, & perfectior est possibilis. Quæ autem addita fuerunt exempla, evincerent, in quibusdam generibus deveniendum esse ad speciem supremam: quod satis probabile est. Nihilominus hoc etiam concesso semper possibilis erit creatura perfectior, & perfectior extra illud genus, vel infra illam speciem. Rursus illa dona censemur in ordine supernaturali supra, quo ad terminum, & moraliter, non autem physice. Dicimus tandem non repugnare animal, quod sit homine perfectius; etsi re ipsa illud non existat.

Colligit 1. Finitatem, vel infinitatem esse proprietates quantitatis. Hæc tamen infinitas est sola infinitas Sincategorematica. Plures etiam partes quantitatis, & plures gradus qualitatis non augent intrinsecam, & essentialiem il-

larum perfectionem.

Colligit 2. Ex possibilitate generis rite inferri possibilitatem specierum, quando species ex sui peculiari notione non præ se ferunt repugnantiam. Porro infinitum Categorematicum, ut tale, involvit repugnantiam. Videtur etiam impossibilis visio creata, quæ non sit comprehensiva, & sit perfectior cognitione intuitiva; quippe supra cognitionem intuitivam immediate habetur cognitio comprehensiva. At supra Angelum, v. gr. non datur immediate ipse Deus, sed cum Angelus infinite distet à Dei perfectione, alia semper possibilis perfectior, & perfectior creatura inter Angelum, & Deum mediare intelligitur. Demum licet non posset dari descensus à Deo infinitus Sincategorematicus, non sequitur negandum esse ascensum; quia possibilis est totalis recessus à Deo per annihilationem, non tamen accessus adæquatus ad Deum.

DISPUTATIO OCTAVA.

De Loco, & Tempore.

QUÆSTIO PRIMA.

Quid sit Locus?

Loci nomen ambiguum est, ab modo significat superficiem corporis, qua alterum corpus continetur; modo pro eo spatio usur-

patur, quod proprie à corpore pletur, & quod intra illam superficiem remanet, sublatō inde omni corpore. Priore sensu locus dicitur externus, posteriori autem significacione appellatur internus. In præsentiarum autem quid apud Physicos loci nomen obtineat, inquirimus.

Jam vero, ut animadvertisit Philosophus, lib. 4. Physicor. cap. 6. *Magnum quiddam, ac difficile videtur sumere, quid sit locus.* Unde Philosophi pro more suo in varias abiere sententias. Et primo Stoici spatiū à corpore occupatum, locum esse dixerunt, apud Empyriū, lib. 2. aduersus Physicos. Quam opinionem plerique Recentiores adoptant, loci naturam in eo spatio imaginario constituentes, quod à corpore occupatur.

Gassendus, sectione 1. Physics, lib. 2. cap. 1. locum internum proprie locum nominandum esse cum Epicuro scribit, quoniam singula corpora spatio intrinseco proprie contineantur, & ab illo penetrantur. Sed in hoc ipso constituendo, ridendum portentum adstruit Gassendus, dum tradit, locum esse spatiū æternū, immobile, incorporeum, improductum, quod nec substantia sit, nec accidens; sit tamen aliquid réale. Quam obrem Gassendi Scētatores duplex distinguunt spatiū; corporeum unum, ut est, verbi gratia, longitudo, latitudo, & profunditas aquæ intra vas aliquod contentæ;

spatiale alterum, quod dimensio- nem spatiale appellant, & est longitudo, latitudo, & profunditas, quas inter latera ejusdem vasis concipiunt, si ab eo aqua fuerit, omneque aliud corpus exclusum. Has spatiales dimensiones in Universo, & extra docet Gassendus fuisse ante mundi creationem; ea que spatia adhuc permansura, mundo annihilato; illa etiam appellat immobilia, & incorporea, non quod sint substantiæ quædam spirituales, sed quatenus dicunt negationem eujuscumque corporis, aut dimensionis corporeæ. Eodemque modo de isto spatio philosophatur, ac de spatiis vulgo imaginariis; etsi doceat illud esse quidpiam reale.

Aristoteles laudato in libro, t. 3. sic locum describit: *Locus est ultimum corporis continentis, immobile primum.* Sive ut declarant Peripatetici, *locus est superficies prima, & immobilis corporis continentis:* juxta quod ait Philosophus, capite quarto: *Locus superficies quadam, & quasi vas, continensque esse videtur.* Hæc docent Peripatetici propria esse loci extrinseci, cui soli nomen loci physico, ac proprio sensu aptari posse arbitrantur. Tradunt igitur locum latitudine sua correspondere corpori contento, & separari posse à quolibet corpore contento saltē disjunctive. Docent distribui posse in definitivum, & circumscriptivum, pro varia

extensione rei locatæ, ut alias diximus; in naturalem, & violentum pro natura corporis in loco positi; & variis illum distinguunt positionibus: ut notum est. Sed præcipue immobilitatem Loco tribuendam sentiunt; quatenus Locus ipse non possit moveri motu locali.

Cum autem experientia compertum sit, Superficiem corporis continentis, puta aeris, re ipsa localiter moveri; siccirco Peripatetici non uno modo immobilitatem Loci declarare nituntur. Thomistæ, ac plerique etiam ex Scotistis Locis immobilitatem repetunt ex determinato ordine, ac distantia à Telluris centro, vel Polis Mundi, vel iis partibus, quæ re ipsa in Universo sunt immobiles. Adeo ut etiamsi superficies, circumambiens aliquid corpus, moveatur, & mutetur; tamen alia succedat, quæ eundem cum prima intelligitur habere determinatum ordinem, ac distantiam à Telluris centro, aliisque partibus mundi re ipsa immobilibus. Unde per æquivalentiam Locus habeat immobilitatem.

Alii vero Scotistæ; cum Divina Substantia ubique diffusa sit, & in ea partes virtute plures distingue-re possimus, Loci immobilitatem repetunt per ordinem ad ejusmodi determinatas Divine Substan-tiæ virtuales partes. Neoterici defendunt, Loci immobilitatem at-tendit debet à spatio imaginario,

quod fixum, & immobile esse intellegimus. Unde & intrinsecum locum admittunt, quem spatio definiunt. Ab eadem opinione non dessident Recentiores plerique, qui dicunt, Locum non esse immobilem, si physice spectetur; quamvis si mathematice accipiatur pro sola extensione abstracta, concipi possit ut immobilis.

Cartesius autem, ut diximus in tertia Disputatione, quæstione prima, tradit spatia omnia esse realia, & vera corpora, quoniam extensa sunt.

Dicimus, Locum non esse spatium, sed superficiem primam, & immobilem corporis continentis: ejus vero immobilitatem non aliunde petendam esse, nisi ex ordine ad Telluris centrum, partesque Universi fixas, & re ipsa immobiles.

Probatur 1. Prima pars contra Gassendum. Nihil absurdius confungi potest, atque tum à fide, tum à recta ratione alienum magis, quam spatium illud æternum, immobile, incorporeum, improductum, quod nec substantia sit, nec accidentis; sit tamen aliquid reale: ut Gassendus commentatur. Nam quidquid reale est extra Deum, illud certe productum est. Etenim Sapientiae capite undecimo v. 26. Sapientis sic Deum alloquitur: *Quomodo autem posset aliquid permanere, nisi tu volnisses? Aut quod a te vocatum non esset, conservare-*tur? Et in Evangelio Joannis, c. 1.

v. 3. dicitur : *Omnia per ipsum facta sunt.* Unde in Theologica Facultate nulla firmior est veritas, quam præter Deum nihil extare, aut reale esse, quod improductum sit. Id ipsum naturalis ipsa ratio demonstrat: ut in Metaphysicis diximus. Reclamat etiam adversus Gassendi sententiam illam Universa Philosophia, quæ medium omne reale inter substantiam, & accidens omnino amovet, & excludit. Tum ea spatialis extensio sensibus percipi non potest, nec vera idea, vel probabili etiam ratione probari existens. Mirum insuper est, Gassendum, qui alioquin nihil extensem non solidum, non impermeabile, agnoscit, nihilominus tradidisse, extensionem hanc esse penetrabilem, eamdemque simul appellasse incorpoream, & ex partibus fixis, & immobilibus compactam. Ergo spatium illud, ut à Gassendo exponitur, prorsus est impossibile. Nec adeo Locus in eo consistit.

Probatur 2. eadem pars contra Stoicos, & alios Recentiores. Spatium illud, ut à Stoicis, & Recentioribus exponitur, non est igitur ens reale, & positivum, sed præcise est quid imaginarium. Porro id non inservit ad esse physicum Loci; nihil ponit in rebus, nec eas complecti, vel continere potest. Ergo spatium illud non habet rationem Loci. Et sane spatium illud est nihil. *Nihil* vero idem significat, ac *Non*. Atque

adeo spatum illud esse non significat, nisi corpora non esse. Quemadmodum autem *Non* minime capax est quidpiam recipiendi, non est penetrabile, aut immobile, nec partes habet; Ita etiam *Nihil*. Proinde spatium illud cum sit nihil, non potest exercere munera Loci. Quod si spatium illud esse aliquid reale, trianam haberet dimensionem. Dum ergo corpus aliquod est in eo spatio, duo corpora essent in eodem loco. Deinde si illud spatium est corpus, superest semper inquirendum, quisnam sit illius corporis locus? cum cuicunque corpori proprius locus correspondeat. Igitur &c.

Respondent, Spatium illud non esse omnino nihil, sed tale ut præse ferat non repugnantiam ad corpora capienda. Quamobrem est capacitas quædam recipiendi corpora, quæ rite dici possunt esse in illa inanitate, quatenus coexistant tali spatio de se inani.

Contra. Inanitas illa, & vacuitas aliud non est, quam negatio corporis cum non repugnantia ejusdem corporis ad ibidem existendum. Porro hæc omnia unice præse ferunt negationem, quæ non est vere aliud reale. Posse enim ibi corpora collocari non oritur ex capacitate quadam positiva, quæ ibidem existat, sed præcise ex eo quod ibi non extat aliud corpus; hoc ipso enim dicimus, inane esse capax accipiendo corpora. Igitur &c. Hinc sicuti universim loquendo

do posse esse, & non esse, quod negationibus attribuitur, non aliud est, quam posse esse, & non esse formarum oppositarum; Ita spatium illud posse habere corpora non est aliud quam corpora posse ibidem existere, illamque inanitatem replere; ut notat Scotus Quolibet alium quæstione 11. art. 2. F. Quamobrem cum illud spatium sit negatio, & negatio non possit coexistere cum suo opposito; ubi extant corpora, non est illa negatio, sed unice quid fictum. Ita & spatia extra mundum sunt omnino nihil, in quo & à vacuo differre intelliguntur, nam vacuum quidpiam habet reale, nempe latera distantia.

Objicies. Inter parietes aulæ vacuae habetur extensio quædam penetrabilis, & immobilis; atque illam sic esse concipimus. Extensio illa dimetiri potest, capax est recipiendi corpora, & loci immobilitas illi soli extensioni convenit. Corpora quoque ipsa dicuntur esse in spacio. Ergo spatium illud est locus.

Respondetur, extensionem illam concipi, & fingi à nobis velut quidpiam positivum, sicuti tenebras ad instar formæ nigræ per aërem extensæ imaginamur. Quemadmodum autem hinc inepte quis colligeret, tenebras esse quidpiam positivum, & reale, ita de spatio illo dicendum est. Quare non nisi pura negatione explicatur, sicut tenebræ non aliud sunt nisi lucis privatio.

Parietes autem aulæ vacuae invicem distant, quoniam inter illos colloeari potest illud corpus. Hinc fit, ut spatium illud dimetiri possit, quatenus parietum distantiam metimur. Ut vero spatium illud ab intellectu effingitur, ita immobilitatem habet ab intellectu confictam, sed non realem, quæ loco convenit.

Probatur 2. pars, quam expresse docet Scotus in 2. d. 2. q. 6. Nomen loci significatur id, quod continet aliquid corpus. Id porro præstatur à superficie prima corporis continentis: ut per se patet. Ergo hæc superficies proprio, ac vero sensu est locus. Debet autem locus esse immobilis; nam si locus ipse moveretur localiter, res immota permanens posset mature locum, & è converso res localiter mota in eodem loco posset persistere. Ita arbor in medio fluminis defixa manens mutaret locum, loco ipso circa illam pertransente; Aut si quando corpus, quod in loco est, secum devehat locum ipsum, tunc illud eodem semper in loco diceretur, & tamen esse localiter motum. Quæ duo absurdâ sunt. Tum si locus ipse localiter moveretur, esset & ipse in loco, & admittere oporteret locum loci; atque ita progredi deberemus in infinitum. Ergo dicendum est, locum esse immobilem. Sed cum superficies continens mutetur, & localiter moveatur; iecirco difficile est expendere loci immobilitatem. Proinde.

Di-

Dicimus secundo, loci immobilitatem non esse repetendam ex ordine ad spatium imaginarium, nec ex ordine ad Divinam Substantiam ubique diffusam, sed ex ordine ad Telluris centrum, partesque Universi fixas, & re ipsa immobiles.

Probatur. Et I. quidem Spatium imaginarium, ut diximus, est omnino nihil. Ergo realis immobilitas loci non est ab illo petenda. Nam quod reale est, non pendet à mentis nostræ figmento.

II. Cum Deus in se se, sit omnino indivisibilis, virtualis illa divisibilitas, quæ in Deo concipitur, non aliud est nisi quatenus Divina Essentia ubique diffusa terminare intelligitur omnium creaturarum in Universo extantium præsentiam. Atque adeo virtualis divisibilitas Dei ex creatoris attenditur, penes ordinem creaturarum ad Deum, nec sine creaturis divisibilitas illa Dei intelligi potest. Ergo immobilitatem loci repetere ex partibus virtualibus Divinæ Substantiæ ubique diffusæ, est ipsam repetere ex ordine creaturarum in Universo extantium, quo intelliguntur ad Deum referri, & illi esse præsentes. Ergo satius est ab ipsismet creaturis in Universo existentibus attendere loci immobilitatem, nec virtuales illas Divinæ Substantiæ partes in id ipsum assumere, quæ nullatenus intelligi possunt sine ipsis creaturis in Universo existentibus.

Confirmatur. Non possunt in Divina Substantia intelligi partes ille virtuales, nisi intelligentur multiplices relationes præsentiaæ creaturarum ad Deum. Atqui necessario prius concipi mus, creaturas esse in loco, quam concipi amus illas fundare relationem præsentiaæ ad Deum. Ergo prius intelligitur rem esse in loco, quam intelligatur virtualis illa Dei divisibilitas. Igitur loci immobilitas in ipso conceptu nostro præcedit hanc virtualem Dei divisibilitatem. Atque adeo loci immobilitas repetenda non est ex ordine ad Divinam Substantiam ubique diffusam. Sed & facilius intelligimus: rem esse in loco, quam partes illas virtuales Divinæ Substantiæ concipere valeamus. Ergo loci immobilitatem repetere ex ordine ad illas partes, est rem ipsam obvolvere, & quod notum est, per ignotum explicare. Igitur &c.

Quamobrem dicendum est loci immobilitatem à Telluris centro, partibusque Universi fixis esse petendam. Etenim immobilitas loci non jam absoluta est, sed tantummodo ex suppositione constitutionis Universi. Neque enim ratio ulla demonstrat absolutam loci immobilitatem. Porro immobilitas loci attendi debet ab aliquo immobili. Sed hoc ipsum non videtur convenientius statui posse, quam centrum Telluris, & partes, quæ re ipsa in Universo sunt immobiles. Ergo loci immobilitas repetenda est ex

ex ordine ad Telluris centrum , & partes Universi fixas.

Erit ergo locus immobilis , quia etsi superficies continens continuo mutetur , tamen alia succedit , quæ intelligitur æqualem præ se ferre ordinem præsentia , vel distantia ad centrum Telluris , & partes immobiles Universi . Hanc ipsam sententiam docuit Aristoteles , libro quarto Physicorum , tom. 42. & Scotus in libro laudato , qui locorum diversitatem repetit ex diverso ordine ad totum Universum . Ubi non de sola loquitur loci incorruptibilitate , ut ait Pater Mastrius ; sed de ipsa disserit loci immobilitate , quemadmodum postea apertum fiet ex illius verbis .

Objicies i. contra secundam assertionem . Res immota permanens non potest mutare locum . Porro si locus est superficies , res immota permanens mutaret locum . Etenim flante vero mutantur continuo superficies aeris ambientis turrim , atque adeo mutaretur locus : & tamen turris omnino immota permanet . Ergo locus non est superficies .

Confirmatur . Etsi superficiei recedenti succedat alias superficies , non tandem inde affirmare licet , eumdem numero locum manere , nam nec idem numero ordo ad Universum persisteret ; sed solum tunc haberetur locus similis . Quod absurdum est . Ergo &c.

Respondetur , ex dictis locum non esse immobilem pro materiali ,

Tem. II.

quod est ipsa superficies , sed dici immobilem secundum æquivalentiam ; quatenus semper idem intelligitur ordo ad centrum Telluris , & partes Universi fixas . Igitur , ut ait Scotus citat . numer . 8. & 9. Relatio loci succedens , est eadem precedenti per æquivalentiam , quantum ad motum localem , nam in cassu ita incompossibile est , localem motum esse ab hoc loco in hunc locum , sicuti si esset omnino idem locus numero . Cujus dicti rationem adstruit dicens : *Quia nullus motus localis potest esse ab uno ubi ad aliud ubi , quando duo ubi non correspondeant duabus locis differentibus specie propter spatium interceptrum , hoc est , habentibus alium respectum , non tantum numero , sed etiam specie , ad totum Universum . Motus itaque localis appellatur motus lationis , quatenus ad motum localem requiritur spatum . Proinde loca omnia dicuntur specifico discrimine distingui , quia diversum ordinem præ se ferunt ad partes Universi immobiles ; atque hinc quando unum corpus succedit spatio , in quo extabat alterum corpus , illud tamen dicitur esse in eodem loco , quia etsi non sit idem corpus , nec eadem extet superficies , tamen omnino idem concipitur ordo ad partes mundi fixas , & immobiles . Ex hoc ipso igitur Turris , de qua in argumento diximus , non mutat locum , nec localiter movetur . Non enim transit per spatium ali-*

Ddd quod

quod, nec diversum ordinem præ se ferre intelligitur.

Objicies 2. Si superficies esset locus, posset corpus localiter moveri, eumdem semper retinendo locum. Si enim navis per Tyberim decurrens Romam versus iisdem numero aquæ partibus semper ambiatur, navis illa cum Romam pervenerit, in eodem erit loco, quia eamdem retinet aquæ superficiem: & tamen localiter mota fuisset. Ergo cum id absurdum sit, dicendum est, superficiem non esse locum.

Respondetur. In ea hypothesi superficiem aquæ esse ad instar vasis, quod continet rem aliquam, sed ab altera itidem continetur, Tunc ergo intelligimus moveri totum conflatum ex navi, & partibus aquæ navim continuo ambientibus: sicuti contingit, dum homo vestitus móvetur. Quamquam nec navis, nec aqua illa, cum Romam pervenerint in eodem sunt loco, ut prius. Quippe & per spatium transire, & diversum ordinem præ se ferre intelliguntur ad partes Universi fixas, & immobiles.

Objicies 3. contra tertiam themam. Si loci immobilitas attenditur penes ordines ad centrum terræ, & partes mundi fixas; res localiter mota semper in eodem loco perseveraret. Quod absurdum est. Igittur &c. Assumptum probatur. Sit Triremis longitudinem habens passum 50, quæ scopulum puppi attingat. Sit vero Petrus in priora.

Recedat puppis, seu Triremis à scopulo per rectilineum, & dum recedit Triremis Petrus contendat à priora ad puppim, eadem celeritate, qua Triremis recedit à scopulo. In hac hypothesi Petrus motus est localiter per quinquaginta passus, quibus totam Triremim pertransiit, perseveravit tamen semper in eodem loco per eumdem ordinem ad Telluris centrum & partes mundi.

Respondetur. In prædicta hypothesi pedes Petri alternatim locum mutasse, & localiter motos fuisse; trunco corporis immoto. Unde Petrus secundum se totum in eodem semper loco permanet, ne in illo fuit aliis localis motus, nisi crurum, & pedum. Id ipsum contingere, si quis nataret contra iustum fluvii tanta vi, quanta fluvius ipse decurrit.

Objicies 4. Quiescente aliqua columnâ, quam semper ambiat idem numero aer, vel divinam virtutem potest Tellus id unam, vel alteram inclinari, seu moveri partem. Hac in hypothesi columnâ maneret localiter immota: & tamen mutaretur ordo illius ad centrum terræ. Ergo loci immutabilitas repetenda non est ex ordine ad terræ centrum, & partes mundi fixas; sed ex ordine ad Divinam Substantiam ubique diffusam. Sic etiam è contra si totum Universum à Deo moveretur per spatium imaginarium, servata eadem, quæ nunc est, partium dispositione; tunc

cor-

corpora inter cælum, & terram existentiam locum mutarent, manente semper eodem ordine ad centrum terræ. Multa pariter corpora æque distant à centro terræ, nec tamen sunt in eodem loco. Ita Sol die 21. Martii, & 24. Septembris in æquinoctio positus æqualiter distar à centro terræ; nec tamen est in eodem loco. Igitur &c.

Respondetur. Argumentum præcedere ex falsa suppositione. Supponit enim, locum esse absolute immobilem, cum tamen non sit immobilis, nisi ex hypothesi constitutionis hujus Universi. Ita enim rem omnem adspectamus, nec philosophamur de loco, nisi quatenus re ipsa est. Cum ergo centrum terræ sit re ipsa immobile, iccirco immobilitas loci rite poterit ab illo repeti. Sed cum ex dictis ad motum locallem requiratur transitus per spatium, columna illa non moveretur localiter, quia non transiret per spatium. Quæ vero corpora moverentur ad motum totius Universi ratione sui in eodem dicerentur loco. At quando duo corpora æque distant à centro, non sunt in eadem parte, nec eundem habent adspectum, nec ab aliis fixis mundi partibus æque distant. Atque adeo non sunt in eodem loco.

Colligite, omnia corpora esse in loco, præter ultimum cælum, quod communis est omnium locus, omnia nempe continens. Sunt autem ipsa corpora naturaliter in loco circumscriptive, ut alias dixi-

mus; id exigente ipsorum quantitate. Substantiae autem spirituales sunt in loco definitive: ut in Metaphysica diximus.

Postremo iisdem rationibus, quibus in 2. Logices parte, disp. 4.q. 5. juxta Scotistarum sententiam probavimus, relationes in creatis esse reales, & formam præ se ferre extremis realis superadditam, concludere etiam oportet, admittendam esse relationem realem loci inter superficiem continentem, & corpus contentum: quam relationem appellant *Ubicationem formalem*. Nova enim habetur denominatio relativa, dum corpus est in hoc, vel illo loco. Sed cum ultra capacitatem superficie ad continentem, & corporis ad contineri, requiratur approximatio utriusque, iccirco ea relatio erit extrinsecus adveniens.

De tempore pauca addere præstat. Tempus est species quædam durationis. Duratio autem est existentia non destruta; unde per illam res intelligitur existere, & in hoc Universo permanere. Porro Deus *eternitate* commensuratur. Eternitas enim est *interminabilis vita tota simul, & perfecta possessio*. quatenus quod æternum est, est à se: ut declarat Scotus, quæst. 6. Quolib. Angeli vero, cum sint indivisibles, & semper sint permansuri, etsi possint à Deo destrui, dicuntur commensurari *Evo*, quod est *duratio entis permanentis indivisibiliter, intrinsece defensibilis*, licet non

deficientis. Tempus autem respondeat durationi illarum rerum , quæ possunt habere successionem.

Quid est ergo tempus? respondebat Sanctus Augustinus , libr. 11. Confessionum , cap. 14. *Si nemo ex me querat , scio , si queren ti explicare vellim , nescio.* Ita sane ingenuæ fatemur , Tempus ipsum ænigma esse abditum , & retrusum , ut cum illius naturam exquirimus , non nisi leves , ac probabiles occurramus nobis rationes , quibus rem ipsam utcumque adumbrare valeamus.

Tempus itaque aliud intrinsecum dicitur , & est ipsam eu-juscumque rei existentia ; aliud extrinsecum appellatur , de quo nunc disputamus , & mensura est existentia temporalium rerum. Cartesius scribit , Tempus esse durationem rei creatæ. Et Cartesium imitatus Purcotius , parte prima Physicæ , sect. 4. cap. 4. censem : *Tempus esse successivum rei ejuscumque durationem* , quia initium habuit , finemque habere potest. Atomistæ tempus distinguunt in commune , & proprium. Primum constituunt in durationem motus Firmamenti , vel Solis. Alterum docent esse ipsam uniuscujusque rei durationem , quatenus cum motu Firmamenti , vel Solis coexistit. Aristoteles libro 4. Physicorum , tom. 101. sic describit tempus : *Est numerus motus secundum prius , & posterius.* Quod sic interpretantur Peripatetici : *Tempus est mensura motus , & quietis*

secundum prius , & posterius : Quatenus nimirum Tempus ejusmodi est , ut illius extensione duratio , vel extensio aliarum rerum cognosci possit , ac primo velocitas ipsa , vel tarditas motus , tum ex accidenti etiam permanentia quietis , quæ motui adversa esse concipiuntur.

Jam vero motus quilibet deseruire poterit nobis ad rerum durationem cognoscendam. Sed Tempus proprio sensu illud esse intelligitur , cui potiori jure attribuenda sit notio mensuræ respectu durationis rerum. Proinde Tempus ipsum probabili satis ratione in motu cœlestium corporum videtur consistere. Iste enim motus major est aliis omnibus , notissimus est , certissimus , velocissimus , ac sibimet omnino constans , & uniformis. Quanobrem potiori ratione assumi poterit à nobis velut mensura aliorum motuum ejuscumque rei sublunaris. Nempe quatenus mens nostra , dum hos motus confert cum illo , inde istorum durationem , & permanentiam assequitur.

Horologia autem , quæ appellari etiam possunt mensuræ particulares , deserviunt nobis potius per modum signi , quo motus ipse cœlestium corporum manifestatur. Sed & ipse motus cœlestium corporum multiplici sua circulatione indicat nobis suam durationem ; nec illius ope commensurare possumus nisi tempus imaginarium , hoc est , à nostro intellectu confictum. Ipsa ve-

ro entia permanentia, cum virtualiter sint divisibilia secundum suam durationem, per motum cœlestium corporum commensurantur.

Tempus in tres veluti partes distributum intelligitur, quarum una præsens est, altera præterita, alia futura; nec mente ipsa configere possumus duas Temporis partes simul esse. Quare Tempus semper fluens esse dicitur, & successive transire. Sed in re adeo obscura, vix quidpiam licet definire. Quamobrem pauca illa sufficient, quæ utcumque exhibuimus.

QUÆSTIO SECUNDA.

Vtrum duo corpora quantitate effeta possint esse in eodem loco?

Consentient Philosophi omnes, corpora quantitate affecta naturaliter penetrari non posse. Epicurei autem id ipsum ne divina quidem virtute possibile esse contendunt. Quibus assentitur ex Scholasticis Durandus. Utramque igitur partem ad disputandum assumimus.

Dicimus primo, duo corpora quantitate affecta penetrari non posse naturaliter in eodem loco. Ita docet Aristoteles lib. 4. Physicorum, & Scotus in 4. d. 49. qu. 16. & Quolibetalium qu. 11. art. 3.

Probatur. Quantitas, ut diximus in part. 2. Logicæ, disput. 4.

quæst. 4. ex sui natura impenetrabilitatem præ se fert; unde per eam fit, ut unum corpus expellat alterum ab eodem loco. Quod ipsum experientia demonstrat. Igitur dicendum est, duo corpora quantitate affecta penetrari non posse naturaliter in eodem loco. Hinc anima spiritualis penetratur cum corpore, quia ipsa non habet quantitatem; & accidentia dicuntur penetrari cum substantia, quia per se se non gaudent quantitate.

Objicies. Vas aqua plenum admittit in se se aliquos nummos, quin aqua effundatur. Vas cinere plenum magnam imbibit aquæ copiam. Panis recens vivo immersus imbibit vinum. Ignis compenetratum cum ferro candenti. Spiritus vitales per partes animalis discurrunt, & per easdem partes penetratur alimentum. Ventus per aerem magno impetu discurrens cum partibus aeris penetratur. Fulmen per transit vagina, & ferrum in ea contentum destruit, illæsa vagina. Liquores menstrui corrosivi tingunt vitrum, & marmor per totum, tam intus, quam extra, ut testantur Pictores Angeli; unde liquorum habetur penetratio; Sagæ penetrant cubicula, januis clausis. Ergo corpora naturaliter penetrantur.

Respondetur, patere optimam horum experimentorum rationem, quin dicamus corpora penetrari. Quamobrem singula sic explicamus.

Immissis nummis non statim aqua è vase diffunditur , nam propter labiorem siccitatem , illis adhærescit ex propria configuratione , ut alias diximus : unde madefactis postea labiis statim egredietur . At in medio vasis intumescit aqua ad modum fornicis , atque hoc ipso tantumdem in aere occupat loci , quantum relinquit nummis .

Cinis intra suas partes multum aeris continet , qui ex mutu , & pondere aquæ ingredientis foras expellitur . Excluduntur etiam ex motu subtiliores cineris particulae . Unde aqua in harum particularum , & aeris locum subit .

Vinum recipitur in poris panis , depulso aere : unde etiam panis intumescit .

Ignita corpuscula poros replent ferri carentis , ut experientia ostendit .

Spiritus vitales , & alimentum per canaliculos fibrillarum , & poros corporis diffunduntur .

Ventus non differt ab aere . Quod si diversus esset ab illo , aerem suo impetu scinderet , & viam sibi faceret .

Ubi materia fulminis est subtilior , ampliores poros corporum pervadit facilime , & poros constrictiores discindit . Unde fit , ut vagina illæsa , ferrum absumatur .

Liquores corrosivi transeunt per poros vitri , aut marmoris . Nam certum est , poros in quibuscumque corporibus reperiri .

Quod demum de sagis dicitur ,

non veram præ se fert penetracionem , sed Dæmonis arte januæ aperiuntur , & statim occluduntur . Quamquam plurima , quæ de Sagis vulgo recensentur , non aliud sint , quam nudæ apparentiæ , & sensuum illusiones .

Dicimus secundo , duo corpora quantitate effecta per divinam virtutem penetrari posse in eodem loco .

Probatur . Deo illa omnia possibilia sunt , quæ nullam sapiunt contradictionem , sive quæ suæ natura non repugnant . Sed duo corpora quantitate affecta in eodem loco penetrari , non sapit contradictionem , seu repugnantiam . Quod enim quantitas impenetrationem præ se ferat , is est effectus secundarius ipsius , quem proinde virtute sua Deus potest impedire . Ergo duo corpora quantitate effecta per divinam virtutem penetrari possunt in eodem loco . Idipsum maxime consentaneum est Sacræ Scripturæ dicenti , Christum Dominum illæso Virginis utero fuisse natum , clauso sepulchro resurrexisse , & clavis januis ingressum fuisse in cænaculum ad discipulos . Quæ omnia sine ullo rationis fundamento detorquet Durandus ; & proprio , ac litterali sensu accepta , ut par est , veritatem assertio- nis nostræ confirmant .

Colligite ad argumentorum solutionem solam impenetrationem in actu primo esse proprietatem quantitatis , actualem vero impe- ne-

netrationem esse effectum secundarium quantitatis, qui proinde potest à Deo impediri. Aequalitas autem rerum, & inæqualitas; adæquatio loci, & repletio attenduntur ex naturali cuiuscumque corporis extensione. Duo demum corpora per divinam virtutem compenetrata tantam localem extensionem haberent, quanta alterutro illorum naturaliter corresponderet.

QUÆSTIO TERTIA.

Sit-ne possibilis per divinam virtutem circumscripiva corporis replicatio.

IDem corpus per divinam virtutem posse in uno loco existere circumscriptive, id est, totum in loco, & secundum singulas sui partes in singulis itidem partibus loci; atque simul etiam in pluribus aliis locis extare posse definitive, seu totum in toto loco, & totum in singulis loci partibus; Res certissima est, & ab omnibus Catholice approbata cum Fides divina edoceat nos, Christi Domini Corpus in celo esse circumscriptive, & in Sacramento Altaris definitive, quemadmodum diximus disput. 3. quæst. 1. Quæstio igitur nunc est, Utrum per Dei virtutem possit idem corpus in pluribus locis sibi adæquatius etiam circumscriptive simul constitui? Qua in re Thomistæ negantem partem tueruntur. Alii vero Philosophi passim affirmant.

Dicimus, possibilem esse virtute divina circumscripтивam corporis replicationem. Ita docet Scotus in 4. d. 10. q. 2.

Probatur. Naturalis ratio ostendit, illud omne Deo esse possibile, quod non præ se fert contradictionem, seu repugnantiam. Atque circumscripiva corporis replicatio nullam præ se fert contradictionem, seu repugnantiam: quemadmodum argumentorum solutio declarabit. Ergo dicendum est, possibilem esse virtute divina circumscripтивam corporis replicationem.

Confirmatur. Potest idem corpus à Deo in uno loco circumscriptive constitui, & simul in pluribus locis definitive collocari: ut Catholicæ omnes uno ore profitentur evenire in Sacramento Altaris. Ergo idem corpus à Deo simul constitui poterit in pluribus locis etiam circumscriptive. Consequentia probatur. Nam in replicatione Corporis Christi definitiva, duo habentur miracula, nimirum & localis replicatio corporis, & privatio connaturalis modi, quo corpus petit esse in loco. Ubi vero ejusdem corporis habeatur circumscriptive replicatio, unicum extat miraculum, nempe localis tantummodo replicatio corporis. Si ergo illud primum Deo est possibile, cur non & alterum? Si corporis in uno loco circumscriptione non excludit ejusdem corporis replicationem definitivam, cur replicacionem excludit circumscriptionem?

Res-

Respondent Thomistæ, disparem esse rationem. Ajunt enim circumscriptivam, & definitivam præsentiam secundum diversas rationes fieri, quoniam definitiva præsentia in Sacramento Altaris est ratione conversionis panis in Christi Corpus. At vero duæ præsentiae circumscriptivæ omnino essent secundum eamdem rationem.

Contra argumentatur Scotus laudatus. Nam illa Thomistarum responsio falsum assumit. Neque enim conversio panis in Christi Corpus est ratio existendi definitive in Sacramento. Quippe transacta conversione permanet adhuc ibidem Corpus Christi. Species quoque Sacramentales non insunt Corpori Christi; atque adeo non sunt illi rationes formales existendi definitive in Sacramento.

Objicies 1. Si unum, idemque numero corpus esset circumscriptive in pluribus locis adæquatis; esset, & non esset totum in illis. Esset enim, ut supponitur. Non esset autem; Nam corpus aliquod in loco adæquato circumscriptivo existens; ita continetur in illo, ut eodem tempore nihil illius possit esse extra. At in hypothesi corpus ita esset in uno loco, ut simul totum esset extra illum. Porro duo haec contradictionem sapiunt. Ergo impossibilis omnino est circumscriptiva corporis replicatio.

Confirmatur. Repugnat, idem esse adæquatae intus, & adæquate extra, cum esse intus præ se ferat

non esse extra. Repugnat, locum esse adæquatum locato, & comprehendere, ac terminare locatum, simulque istud ab alio loco contineri. Hoc ipso enim locus non esset adæquatus, & corpus esset extra suos terminos, quod est impossibile, cum terminus rei illud sit, extra quod nihil est rei. Igitur &c.

Respondeatur. Comprehensio localis adæquata præ se fert quidem, totum corpus locatum contineri intra ambitum ipsius loci. Sed non sub infertur inde, idem illud corpus non posse simul totum ab alio loco comprehendendi. Adæquatio autem inter locum, & locatum, est tantummodo quo ad magnitudinem, seu extensionem. Quapropter ut locus adæquatus uni corpori per divinam virtutem alterum etiam corpus valet recipere; quemadmodum in præcedenti questione diximus, & Thomistæ consentiunt; ita corpus, quod in uno loco sibi adæquato existit, poterit simul esse per divinam virtutem in alio loco sibi adæquato. Eodem modo locus adæquatus est terminus corporis locati, quatenus totum corpus intra illum locum continetur; sed inde non fit, totum illud corpus non posse esse in alio loco circumscriptive, sicuti Thomistæ tentur semper esse posse in alio loco definitive. Atque hinc animadvertisimus, ejusmodi argumenta, si vim haberent, pugnare etiam contra definitivam Corporis Christi

replicationem. Sed revera nec circumscriptivam , nec definitivam replicationem ostendunt esse impossibilem ; quia , ut diximus, circumscriptio affirmat corpus esse totum intus in eo loco sibi adæquato: non tamen negat, corpus esse posse totum extra , & in alio etiam loco adæquato.

Objicies 2. Si idem corpus constitueretur in duplice loco circumscrip-
tivo, esset in utroque loco cum una dumtaxat quantitate. Porro quantitas illa esset indivisa , quia una dicitur; esset etiam divisa, quoniam esset in duplice loco. Et cum extensio sit ipsa essentia quantitatis , quantitas illa tunc esset etiam divisa entitative , seu secundum suam entitatem. Ita & corpus , simul indivisum esset , & divisum à se ipso. Quæ omnia contradictionem sapiunt. Igitur impossibilis est replicatio corporis circumscrip-
tiva.

Respondetur. Quantitatem , & corpus in ea hypothesi , manere indivisa secundum suam entitatem, divisa vero esse localiter secundum diversas locales extensiones , & præsentias , quæ rem ipsam non dividunt entitatively , unde corpus successive multiplices adæquatas obtinet præsentias , & extensiones locales , quin secundum entitatem mutetur , & Corpus Christi idem omnino , & unum simul præsens est in Cælo , & in Saeramento Altaris. Negamus etiam, extensionem localem esse ipsam-

Tom. II.

met quantitatis, vel corporis entitatem aut essentiam.

Instabis 1. Non potest idem esse in duplice loco secundum eamdem præsentiam. Ergo nec poterit esse in duplice loco secundum eamdem quantitatem. Etenim ut corpus in loco est per præsentiam , ita extenditur in loco per quantitatem. Igitur. &c.

Respondetur , latum esse discrimen. Per eamdem enim quantitatem corpus successive extenditur in pluribus locis ; sed non per eamdem præsentiam. Ratio autem est, quia præsentia in illorum opinione, qui relationes reales admittunt , est ratio , qua corpus in loco est : in aliorum vero sententia est ordo ab intellectu nostro conceptus inter corpus , & talem locum. At quantitas est solummodo ratio fundamentalis essendi in loco impene-
trabiliter , & entitas ipsa substantia corporeæ est tantummodo funda-
mentum essendi in loco.

Instabis 2. Extensio localis est effectus secundarius extensionis entitativa. Atqui multiplicari non potest effectus secundarius, nisi multiplicantur etiam primarius. Ergo multiplicari non potest localis extensio , nisi multiplicantur extensio entitativa. Atque adeo &c. Minor probatur. Dari nequit effectus secundarius sine primario. Ergo &c.

Confirmatur. Extensio localis est essentialiter extensiva corporis. Ergo duplex extensio localis erit essentialiter extensiva duplicitis corporis.

Ecce Res-

Respondetur. Permitto majorem, nam extensio entitativa est solum ratio fundamentalis essendi in loco. Et nego minorem. Cum enim posterius pendeat à priori, & non ē converso, multiplicatio posterioris haberi potest, permanente unitate prioris. Proinde poterit multiplicari localis extensio, quæ sequitur extensionem entitativam, quin ista multiplicetur. Quod sane contingit, dum successive eadem entitas plures obtinet extensiones locales. Ad probationem minoris. Nego paritatem. Caussa enim absolute, & simpliciter sublata, nihil manet unde effectus oriri possit, adeoque effectus est impossibilis. At vero etsi non multiplicetur caussa, manet tamen multiplex caussæ applicatio, per quam prodire potest effectus.

Instabis 3. Sicuti se habent principia essentialia rei naturalis ad specificam illius constitutionem, ita quantitas, vel entitas corporis se habet ad constituendam rem aptam, ut sit in loco. Atqui sine multiplicatione principiorum essentialium non possunt res constitui in multiplo specie. Ergo sine multiplicatione quantitatis, vel entitatis, non potest corpus idoneum fieri, ut pluribus in locis existat circumscriptive.

Respondetur. Nego majorem, & paritatem. Etenim differentia essentialis, & specifica naturam rei determinat ad unam tantummodo speciem, tanquam ratio formalis. At

quantitas, vel entitas corporis est solummodo ratio fundamentalis essendi in loco, nec determinat corpus ad unum tantummodo locum, nam successive corpus est in pluribus locis.

Objicies 3. Si idem corpus posset constitui circumscriptive in pluribus locis, posset etiam à Deo in omnibus locis collocari. Ergo posset fieri immensum. Sed hoc repugnat creaturæ. Igitur &c.

Respondetur. Concedo antecedens, & nego consequentiam. Nam si corpus constitueretur à Deo in omnibus locis, non tamen esset immensum eo perfectionis genere, quod solius Dei proprium est. Et enim corpus illud non esset ubique ex vi sua essentiali, aut per suam virtutem intrinsecam, ut Deus; sed mere passive se haberet.

Instabis 1. Creatura non potest à Deo virtutem accipere producendi aliquid ex nihilo, vel effectus perfectiores, & perfectiores in infinitum. Deberet enim semper esse infinita. Ergo nec potest à Deo ubique collocari. Alioquin vere esset immensa.

Respondetur patere ex terminis rationem discriminis. Etenim illa virtus est activa; posse autem ubique collocari solam passivam potentiam connotat.

Instabis 2. Non potest Deus tollere à creatura limitationem in essendo. Ergo non potest ab ea tollere limitationem quoad locum, eamdem ubique constituendo.

Res-

Respondetur. Nego paritatem. Limitatio quippe in essendo est modus intrinsecus à creatura indistinctus, & cum illius essentia arctissime connexus. At limitatio quo ad locum est extrinseca creaturæ; unde Christi Corpus in pluribus simul locis à Deo re ipsa collocatur.

Objicies 4. Idem corpus non potest esse bis in eodem loco. Ergo nec potest esse in dupli loco. Secundo idem nequit simul concipi in diversis temporibus. Ergo nec in diversis locis. Tertio si posset idem corpus esse in dupli loco, separabilitas non esset evidens signum distinctionis, quia tunc corpus esset à se ipso separatum. Falsum esset etiam illud axioma: *Quæ sunt eadem uni tertio, sunt eadem inter se: nam Roma, & Mediolanum, v. g. essent præsentia eidem corpori, sed non inter se.* Quarto pars fieret æqualis, ac etiam major toto, quod occuparet æquale, aut majus spatiū. Quinto Petrus, v. gr. esset unus, ut supponitur, & non esset unus, quia posset bis numerari. Sexto explicari nequit modus, quo fieret corporis replicatio. Quod si corpus replicaretur in loco sibi immediato, nec continuum esset, nec contiguum; non continuum, quia continuatio multiplicem requirit entitatem: nec contiguum, quia ad hoc ipsum duo distincta requiruntur. Igitur &c.

Respondetur ad 1. Nisi corpus replicatum fuerit, non potest bis

esse in eodem loco, quia nequit intelligi multiplex relatio loci, nisi vel entitative, vel saltem localiter per replicationem multiplicatum sit corpus, quod velut illius relationis subjectum spectatur; cum locus, qui concipitur habere rationem termini, omnino immultiplicatus sit: relatio autem non sit multiplex, nisi multiplicatio habeatur vel fundamenti, vel termini. At vero ubi corpus replicatum fuerit circumscriptive, jam multiplex est corpus ipsum localiter, sed & loci multiplices habentur.

Ad 2. Cum tempus sic à nobis intelligatur, ut partes habeat continuo fluentes, siccirco immaginari non possumus duas temporis partes simul esse, aut unam rem simul esse in diversis temporibus. At loca permanent, & simul esse posse intelliguntur.

Ad 3. Separabilitas, quæ necessario absolute subinfert realem distinctionem, esse debet quo ad locum, & quo ad entitatem. Separabilitas vero quo ad locum tantummodo, indicat distinctionem realem solum naturaliter, & juxta id, quod per naturæ vires contingit: quemadmodum accidentia indicant substantiam. Sed per Dei virtutem etiam accidentia possunt esse sine substantia, & localis separabilitas sine reali distinctione entitatis. Ita & propositum axioma, ubi ad localem presentiam extenditur, valet solummodo spectatis naturæ viribus.

Ad quartum. Aequalitas rerum attendi debet penes entitatem, & magnitudinem, spectata etiam naturali virtute. Et ideo nunquam pars esset æqualis, vel major toto.

Ad quintum. Semper Petrus es-
set unus entitative, licet localiter multiplex.

Ad sextum. Quemadmodum, ut alibi diximus, Christi Corpus sit præsens in Sacramento per actionem adductivam ipsius Corporis sub speciebus; ita replicatio circumscriptiva Corporis fieret per actionem Dei adducientis idem corpus sub diversis locis. In allata autem hypothesi corpus illud nec continuum esset, nec contiguum, sed immediatum diceretur secundum præsentiam.

Objicies 5. Si possibilis est circumscriptiva corporis replicatio, sequerentur multa mirabilia, & paradoxa. Primo enim idem homo posset magnum exercitum se solo efformare, secum pugnare, sibi ipsi occurtere, quo in cassu difficile est divinari, utrum expelleret se ipsum, an potius se ipsum penetraret; posset etiam secum choræas ducere. Secundo posset idem homo de loco ad locum virtute propria moveri, & à pluribus locis discedens plures simul præsentias acquirere posset virtute propria: quod tamen est impossibile, cum pluralitas præsentiarum simul excedat vires naturales. Tertio idem posset simul moveri motibus contrariis, sursum, & deorsum; per-

scalas simul ascendere, & descendere; simul currere, & quiescere; stare, & sedere. Quarto idem posset in uno loco occidi, & mori, & in altero loco non occidi, & vivere, quia si occideretur, verbi gratia, Medionali, non per hoc occideretur Romæ, cum non possit dari actio in tanta distantia; sic etiam posset se ipsum occidere, quo in cassu ut sui aggressor vive-ret, & simul moreretur. Quinto idem corpus posset esse sanum in uno loco propter aeris temperiem, & in alio ægrum propter aeris intemperiem. Sexto in uno loco nutriretur, & satiaretur sumpto cibo, in alio autem loco esuriret. Septimo in uno loco calefieret ab igne sibi præsente, & in alio frigefieret ex defectu ignis. Octavo eadem aqua posset in uno loco per effusionem deperdere suarum partium colliga-tionem, & in alio non. Nono ea-dem gutta aquæ posset toties repli-car, ut universam terram inunda-ret, & omnia animalia suffocaret; super illam solam committi posset navale bellum. Ita & una candela Universum Orbem posset illumina-re. Decimo idem homo in uno lo-co posset Deo fundere preces, & mereri; in alio autem peccare, & demerer: quo in cassu si ex hac vita decederet; simul salvari debe-ret, ac damnari. Undecimo in uno loco videret intuitive objectum sibi præsens, & non in alio. Sic etiam in uno loco assentiretur, & in alio dissentiretur. Duodecimo si-

lapis replicaretur, à Deo in dupli-
ci loco extra suum centrum, ver-
bi gratia, in aere; vel ex utroque
loco moveretur ad centrum, at-
que tunc simul moverentur in du-
plici spatio. Vel nullatenus move-
retur, aut solum ex uno loco; at-
que tunc quiesceret in statu vio-
lento. Igitur. &c.

Respondetur ex Scoto laudato, hæc omnia puerilia esse, & im-
aginationem sensui innitentem se-
quentia, qui assuetus est corpori-
bus in uno dumtaxat loco existen-
tibus. At si rationem attendamus,
nihil ex illis colligi animadvertis-
mus. Itaque primo, ut ait Do-
ctor, per replicationem præsen-
tiarum non augetur virtus activa
rei locatæ, nec intensive, nec ex-
tensive, quatenus nec perfectior
in se se evadit virtus, nec ad am-
pliora potest extendi. Cum enim il-
la localis replicatio sit omnino ex-
trinseca, nec ad virtutem agendi
pertineat, siccirco hanc nullo modo
potest augere. Secundo affectiones
& operationes aliae sunt omnino ab-
solutæ, & à loco independentes: ut
albedo: aliae vero à loco essentia-
liter dependent, ut esse sursum. Ita-
que per virtutem activam non plus
posset res in uno loco, ac in duo-
bus. Accidentia autem illa, quæ
per se pendent à loco variari pos-
sunt juxta loci diversitatem, quia
cum à loco pendeant, ex pluralita-
te locorum tollitur omnis contra-
dictio: quemadmodum varietas
temporis tollit oppositionem pro-

positionum, quæ ab ipso tempore
essentialiter dependent. At vero af-
fectiones absolutæ, & à loco inde-
pendentes, mutari nequeunt ex lo-
ci diversitate, nam ut corpori con-
veniunt independenter à loco, ita
ex loci variatione minime remo-
ventur; quapropter etiam istæ af-
fectiones replicari debent ad corpo-
ris replicationem, quia admisso u-
no miraculo, debent etiam concedi
alia cum illo connexa. Et cum vir-
tus corporis omnino sit semper ea-
dem, non poterit corpus suscipe-
re contrarias affectiones absolutas;
etsi replicatum sit; sed respectu illa-
rum eodem modo se habet semper,
ac si in uno dumtaxat loco exis-
teret. Hinc igitur dissolvimus pro-
positum argumentum.

Ad primum proinde dicimus,
posse unum hominem se solo effor-
mare magnum exercitum, quo ad lo-
calem præsentiam, non vero quo ad
virtutem agendi, quia virtus activa
illius hominis per replicationem non
accipit incrementum. Posset tamen
secum pugnare, vel choræas duce-
, & sibi ipsi occurtere, quia hæc
omnia à loco dependent. Se ipsum
etiam expellere posset, quia tunc
se habet per modum plurium, &
expulsio depeindet à loco. Quando
autem Deus nollet amplius conser-
vare hominem illum in duobus lo-
cis, proprio sensu se ipsum pe-
netraret; quia penetratio connotat
distinctas quantitates; sed locum
unum amitteret, alterum vero re-
tineret ex Dei beneplacito.

Ad

Ad secundum. Posset corpus moveri in duplice loco. Sed simultanea illa replicata præsentia à Deo efficeretur, quia ipsa corporis activa virtus non augetur.

Ad tertium. Fätemur, idem moveri posse motibus contrariis, nam cum isti motus pendeant à loco, ex locorum diversitate tollitur omnis contradic̄tio.

Ad quartum. Negamus, hominem posse in uno loco vivere, & in alio mori, si mors sumatur pro separatione animæ à corpore. Cum enim conjunctio, vel separatio animæ à corpore non pendeat essentialiter à loco, utrobique anima deberet esse separata, & Deus id præstare teneretur, quare ipsa creatura non operaretur ad tantam distantiam.

Ad quintum. Si temperies, & intemperies aeris sint æqualis activitatis, vel nihil operarentur in illud corpus, vel devenirent ad effectum medium. Quod si alterutra majorem haberet vim, corpus absolute vel esset utrobique sanum, vel utrobique ægrum, quia sanitas, & ægritudo non pendent essentialiter à loco, & virtus corporis eadem semper est.

Ad sextum. Si nutritio accipiatur pro motu locali cibi, esset in uno loco, & non in alio, qui à loco dependet. Si vero sumatur pro acquisitione novæ partis, cum hæc sit quid absolutum, & à loco independens, deberet utrobique à Deo replicari. Sic transfixio, sive vulne-

ratio accepta pro motu locali esset in uno loco, & non alio, quoniam à loco dependet. Pro ut vero præ se fert partium separationem, esset eadem utrobique.

Ad Septimum. Idem dicimus ut ad quintum. Nam cum calor, vel frigus non pendeant essentialiter à loco, utrobique alterutrum illorum corpori conveniret.

Ad octavum. Utrobique aqua deperderet suarum partium colligationem, quia hæc non dependet essentialiter à loco.

Ad nonum. Concedimus unam aquæ guttam ita replicari posse, ut universam terram inundet, & omnia animalia submergat, quia hoc fieri potest per solam extensionem localem, replendo animalium guttura, ita ut aerem attrahere nequeant. At negamus, posse super illam guttam aquæ replicatam commiti navale bellum, quia virtus aquæ non augetur per replicationem. Ita nec candela posset totum mundum illuminare id enim activam præ se fert virtutem.

Ad decimum. Cum virtus activa sit semper eadem, nec per replicationem mutetur, siccirco homo sicut in uno loco non potest simul mereri, & demereri, ita nec in duabus locis.

Ad undecimum. Si actus vitales dicantur necessario præ se ferre respectum tendentia in objectum, tunc ex diversitate locorum tollitur contradic̄tio, & posset homo in uno loco videre intuitive, & non in-

al-

altero. Si secus contendas de ipsis actibus vitalibus esse dicendum, replicaretur visio utrobique quantum ad suum esse absolutum. Negamus etiam, posse hominem in uno loco assentiri, & in alio dissentiri, quia ista non dependent à loco, & virtus hominis semper eadem manet.

Ad duodecimum. Caderet lapis ex utroque loco, nisi Deus impedit. Sed illi duplex præsentia simultanea à Deo efficeretur.

Colligit, humanitatem Christi supponere Verbum ratione Divinæ Naturæ immensum, & quo ad localem præsentiam uniri illi tantummodo inadæquate; unde non est ubique, sicuti Verbum ipsum.

QUÆSTIO QUARTA.

Utrum in rerum Natura habeatur vacuum, vel saltem sit possibile?

CUM de vacuo in præsentiarum disserimus, non jam illud vulgi significatione accipimus, quænus quidquid ea non continet, quæ solet continere, vacuum dicitur: ut dolium appellatur vacuum, cum vino caret, licet sit aere plenum. Longe aliis est Philosophorum sensus, qui vacui nomine spatium intelligunt omni corpore destitutum.

Vacuum itaque apud Physicos spatiū est omni corpore destitutum, & aptum ut repleatur. Ut si Deus omnem aerem in vase accurate oc-

cluso comprehensum destrueret, ad cujuslibet substantiæ ingressum impediret, intra vasis latera vacuum haberetur. Proinde ab Aristot. lib. 4. Physic. tom. 57. & à Scoto sic rite describitur: *Est locus privatus omni corpore.* Ex quo intelligimus, & superficiem circumambientem ad vacuum requiri, & intra illam nullum extare corpus, & posse corpus in ea collocari.

Cartesius secunda parte Princiorum, num. 16. Vacuum omne, etiam spectata Dei Omnipotentia, prorsus esse impossibile contendit. Ex adverso opponuntur Cartesio Atomistæ, quippe qui re ipsa vacuum esse admittendum arbitrantur, ut diximus in prima disputat. quæstion. 1. Cumque vacuum bifariam dividatur; alterum enim Coacervatum dicitur, quod nimirum sensibile est; ac sensibili corpori proportionatum; aliud vero Disseminatum, hoc est inter ipsas atomos, vel corporum partes intercepsum; una omnium Atomistarum consensio est, extare vacuum Disseminatum. Sed & vacuum Coacervatum plerique re ipsa aliquando existere putant. Peripateticorum vero sententia est, nullum re ipsa vacuum esse admittendum: illud tamen per Dei virtutem esse possibile.

Dicimus, nullum in rerum Natura extare vacuum, nec Disseminatum, nec Coacervatum, neque per naturæ vires fieri posse: esse tamen possibile per divinam virtutem.

Pro-

Probatur primo. Eatenus Atomistæ arbitrantur , vacuum Disseminatum existere , & esse penitus necessarium, ut nemipe illius opere- rum divisio effici possit; unde illud inter unam , & ad alteram atomum mediare affirmant , ut istæ separari possint , ac dividi ; quemadmodum ostendimus in cit. disp. 1. q. 2. At qui vacui interpositio non est necessearia ad atomorum , vel partium di- visibilitatem. Ergo pro libito omni- nino effingitur vacuum Disseminatum. Minor probatur. Sola realis atomorum distinctio sufficit , ut possint invicem separari , ac dividi. Etenim realis illa distinctio sufficit , ut una atomus anihilari possit , al- tera permanente ; sufficit etiam , ut una atomus moveri possit , altera quiescente. Ergo sufficit etiam , ut una atomus ab alia dividi possit , ac separari. Atque adeo separabilitas rerum non est à vacuo Disseminato repetenda.

Confirmatur. Duo corpuscula possunt per divinam virtutem pe- netrari , cumdemque locum occupare : ut in prima quæst. diximus. Tunc autem utique semper separari invicem , ac dividi possent ; neque tamen vacuum ullum intercipe- rent. Ergo separabilitatem non fa- cit inanum interpositio , sed rea- lis rerum distinctio.

Probatur secundo. Continuum dividi potest , & partes illius ad in- vicem connexæ sunt , & colligatae. Porro si divisibilitas ex vacuo dis- seminato esset repetenda , vel con-

tinuum dividi non posset , vel par- tium colligationem minime habe- ret. Etenim non colligantur ato- mi , vel partes , nisi una alteram tangat. Ubi vero physicus ille par- tium habeatur contactus , nullum profecto vacuum mediat ; atque adeo nullus maneret divisioni locus. Igitur &c.

Confirmatur. Imperceptibile vi- detur , non posse duo corpora adeo invicem comprimi , ut nullam va- cuitatem intercipiant. Numquid e- nimir ingens moles alteri superimpo- sita , suspensa manebit , ita ut inter- posito vacuo subjectam basim ali- quibus saltem suis partibus non tan- gat ? Quod si nullum inter illa cor- pora mediat vacuum , & adhuc di- visibilia , & separabilia sunt : ergo di- visibilitas non est à vacuo repe- tenda.

Probatur tertio. Ideo Epicurei asseverant necessarium esse vacuum disseminatum , quia negato vacuo non posset dari motus. Sed ar- gumentum istud in primis nullam vim habet , ut apparebit ex illius solutione ; tum vero existentia mo- tur evincit nullum esse vacuum Disseminatum. Ita sane ex celeber- rimo arguento , quod ex locali mo- tur repetunt Atomistæ , vacuum ipsum Disseminatum invicte repro- bari arbitramur , siquidem Epicuri , Lucretii , & Gassendi communem sententiam , ipsorum asseclæ ratam habeant , quæ divisibilitatem ex so- lo vacuo adstruit repetendam. Talis igitur pacto ratiocinamur. Extat

localis motus, quo una res alteram propellit, & in ejus locum succedit; quemadmodum experientia demonstrat. Ergo nullum reperitur Vacuum Disseminatum. Probatur Consequentia. Quando formica, v. g. moveretur, vel tangit proximum sibi corpusculum, vel non tangit? Si primum dicant Atomistæ; Ergo inter formicam, & corpusculum illud non intercipitur vacuum aliquod; implicat enim duo tangi, adeo ut unum expellat aliud, & haberi vacuum intermedium. Atqui per Epicureos ubi nullum extat vacuum, non datur divisibilitas, seu separabilitas. Ergo formica à corpusculo illo, quod tangit, separari non posset. Porro idem dicendum est de aliis corporibus. Erpo corpora omnia necessario simul moverentur; nequit enim unum moveri, altero quiescente, si ambo sunt unum indivisible, & inseparabile corpus. Quod si Atomistæ alteram partem propositi Dilemmatis affirment, nempe formicam, dum movetur, non tangere proximum sibi corpusculum; Ergo formica illud non impellit, neque expellit à suo loco. Nam quod non tangitur, non impellitur, & quod non impellitur, non expellitur. Si ergo formica non expellit proximum sibi corpusculum, nullatenus transit ad locum sibi proximum; nisi quatenus penetraretur cum corpusculo sibi proximo: quod naturaliter repugnat. Ita

Tom. II.

porro de aliis corporibus dicendum esset. Nihil ergo moveretur. Igitur data Epicuri sententia, vel nihil moveretur, vel omnia simul moverentur: quorum utrumque absurdum est. Ergo ipsa existentia motus evincit nullum dari Vacuum.

Respondent Atomistæ, atomos uniri, colligari, & se tangere physice, seu sensibiliter, non tamen metaphysice; ideoque intercipere aliquod exiguum spatium inane insensibile, cuius ope divisibilitas locum habeat.

Contra est primo. Hæc enim responsio nudo verborum cortice continetur. Siquidem Atomistæ docent, atomos esse corpuscula physica, & tamen affirmant eas esse insensibiles: quemadmodum in Physicis extant innumera alia, quæ insensibilia sunt, & tamen physica. Ergo ipsum esse physicum non præ se fert sensibilitatem. Atque adeo colligatio physica partium Continui inepte explicatur per sensibilem contactum. Rursus quæ metaphysice tantum distinguuntur, in Atomistarum sententia non sunt à parte rei distincta. Ergo quæ metaphysice tantum uniuntur, aut se se tangunt, non sunt à parte rei unita, nec se realiter tangunt. Atqui partes Continui sunt realiter invicem colligatae. Ergo re ipsa se se tangunt immediate, nec vacuum re ipsa intercipiunt, nisi per metaphysicam mentis nostræ abstractionem id

Fff pro

pro marte suo confingant Atomistæ.

Contra secundo. Spectemus unam atomum, quæ vacuis illis spatio-
lis sit circumcincta. De ista in-
quirimus, quare ab aliis non se-
jungatur; quomodo sic pensula:
atque ab aliis per inane spatium
divisa persistere queat immobilis?
Non equidem à circumambiente
vacuitate impeditur, ne præcipi-
tet, vel sic suspensa detinetur
vacuum enim nihil est, nihilque
operatur. Nec dicant Atomistæ,
illam atomum per uncinatos ha-
mulos cum aliis irretiri. Nam hac
sonnia sunt, & figmenta, quæ
ipsammet atomorum naturam, &
simplicitatem maximam, & sum-
mam paritatem, ac indivisibili-
tatem de medio tollunt: ut dixi-
mus in 4. disp. qu. 4. Tum re-
dit argumentum. Si enim unius
atomii hamuli tangunt aliam ato-
mum, separari amplius, ac divi-
di ab illa non possent. Denique ut
ajunt Atomistæ, unam atomum
disjunctam esse ab altera, illam-
que non tangere, quoniam inter
illas vacuum intercipitur; sic pos-
sent Zenonistæ affirmare, puncta
Zenonica inextensa non se se in-
vicem tangere medijs quibusdam
vacuolis. Atque adeo nihil suppe-
teret Atomistis, unde Zenonica
puncta reprobarent.

Probatur quarto assertio nostra.
Nulla ratio, nullum experimen-
tum demonstrat, extare Vacuum
Disseminatum: ut argumentorum

solutio declarabit. Ergo gratis ad-
struitur ab Atomistis. Atque adeo
non est admittendum.

Objicies primo. Si in mundo
omnia essent plena, jam nullum
corpus, etiam si minimum, mo-
veri posset, quin cætera omnia ad
motum illius moverentur. Hoc ab-
surdum est. Ergo extat Vacuum
Disseminatum. Probatur major.
Ut musca, verbi gratia, movere-
tur, ubi omnia essent plena, cor-
pus ante ipsam existens deberet ei
locum cedere; alias musca cum
illo compenetraretur. Porro cor-
pus istud, ut locum cederet mus-
cae, deberet propellere aliud cor-
pus sibi proximum, & se se in ejus
locum recipere. Sed etiam hoc ter-
tium corpus propellere deberet
aliud corpus sibi contiguum, &
rursus hoc ipsum propellere de-
beret alterum, sic semper ratio-
cinando. Ergo ad muscae motum
oporteret omnia moveri; vel nun-
quam musca moveri posset, si ex-
cluso Vacuo Disseminato omnia in
mundo sunt plena.

Confirmatur primo. Si loca quæ-
libet aliis corporibus plena sunt,
quoniam musca moveri poterit; Pro-
fecto lapis inter duos sibi conti-
guos parietes occlusus moveri huc
illuc non potest. Ergo nihil pror-
sus posset moveri, si omnia sunt
plena. Nullum enim corpus alte-
ri locum cederet, nam quodcum-
que corpus necessario supponit lo-
cum sibi alio cedi. Igitur &c.

Confirmatur secundo. Si corpus
mus-

muscae propinquum cederet ipsi locum, locus à musca relictus aliquo saltem momento vacuus remaneret, donec à corpore ab aliis impulso repleatur. Ergo &c.

Respondetur concedendo muscam propellere corpus sibi propinquum, & hoc aliud, sed negando talem impulsu necessario futurum in omnibus. Non enim motus recta progrederetur, sed alio modo, nimirum circulariter, unum quippe corpus propellit alterum, donec factō vetuli corporum pulsorum circulo, propulsio tandem communicatur illi corpori, quod est à tergo muscae. Quod quidem eleganter declarat exemplum à piscium natatu depropatum. Etenim dum pisci per aquam moveruntur, anteriores quidem partes equæ propellit, ac dividit; Sed hæ vicinas, & laterales partes, & illæ rursus alias sic protrudunt, ut tandem aqua ad caudam piscis recurrat. Non ergo omnia simul moveri deberent ad motum unius muscae, licet in mundo omnia sint plena, nec ullum extet Vacuum Disseminatum.

Ad primam Confirmationem. Musca moverit posset ad locum alterius corporis, quod locum ei cedit, non solummodo propter impulsu, quem illi musca vi sua motrice imprimit, verum etiam propter sui fluiditatem, & flexibilitatem; inde enim differt aer à lapide clauso inter duos parietes solidos, qui impeditur etiam à pa-

rietum resistentia, ne vim suæ gravitatis descendendo exerat.

Ad secundam confirmationem. Negamus assumptum. Siquidem ea pars spatii, quæ à musca deseritur, eodem momento, quo deseritur, occupatur ab aere post muscam, vel circa muscam existente. Moveretur autem aer tum ex propria fluiditate, tum ex motu, quo semper agitur. Quod ut facile intelligamus, animadvertere juvat exemplum rotæ circa suum centrum circumactæ; eodem enim momento, quo una pars rotæ suum locum deserit, pars altera eundem locum subit.

Postremo celebre istud argumentum contra Atomistas debet retorqueri: ut in tertia diximus probatione.

Objicies 2. experimentum Gas-sendi, quo sibi visius est deprehendere intra aquam vacuola disseminata. Salem communem in aquam vase contentam eo usque injectit, dum aqua nihil amplius illius salis exsolveret. Deinde in eamdem aquam sale communi jam satiatam salem conjecit alterius conditionis, nempe alumum, quod pariter usque ad certam quantitatem solutum fuit: Deinde saccharum, mox vitriolum, & sic porro alios sales immisit, quorum uno satiata eademque aqua adhuc alio bene satiabitur. Ex hoc igitur experimen-to istud instituitur argumentum: Hujus effectus non alia potest caussa exhiberi, nisi quod

aqua habeat in se se multa inania spatiola, eaque diversarum figurarum, & subinde diversis salium figuris proportionata. Positis enim hisce vacuolis, tandem habetur aliquis salis solutio in aqua, quando minutissimæ partes, in aquas sal abit, inveniunt spatiola ipsis admittendis idonea. His vero repletis, cessat illius salis solutio, remanente tamen aqua disposita ad recipiendum alium salem diversæ figuræ, si in eam mittatur: cuius item solutio tamdiu durabit, quamdui extabunt in aqua vacuola configurationi illius salis proportionata. Ergo admittendum est Vacuum Disseminatum, ut habeatur ratio, cur aqua tantam quantitatem unius salis, & non majorem exsolvas, cum tamen alterius, & alterius salis copiam adhuc possit exsolvere.

Respondetur, aptissimam patere experimenti rationem, quin illum vacuum disseminatum admittamus. Facile enim concedimus inter aquæ partes plurima interspersa esse spatiola (ut ex ipsa aquæ asperitate animadvertisimus in 2. disp. qu. 8.), quæ injectorum salium particulas excipiunt. Attamen negamus, ejusmodi spatiola esse vacua. Prorsus enim repletur materia quadam subtilissima, per poros, meatusque, quibus omnia corpora pervia sunt, jugiter fluente: quam porro materiam, ut pote ad motum aptissimam, injecti sales ipsa graviores facile ab

illis spatiolis extrudunt, unde in illius locum se recipiunt. Hanc vero subtilissimam materiam Gassendus ipse admittit, & asserit, si non alia occasione, saltem cum lucem esse verum corpus pronunciat, nam certe lux corpora compactissima penetrare valet, ut vitrum, quod aliquando Boyle suspicatus est poris destitutum, quam ciuiissime permeat.

Addimus, unamquamque rem determinatos affectionis gradus admittere; quin majores queat accipere: ut in aqua calida notavimus evenire. Quo etiam fit, ut determinatam suscipiat aqua salsidinem, determinatam dulcedinem, ac similia; proindeque determinatam exsolvat unius vel alterius salis quantitatem. Rursus exquirimus à Gassendo, utrum inania illa spatiola per aquæ partes dispersa repleantur salinis particulis, an vero vacuola permaneant? Si primum; jam nullum haberetur vacuum inter particulam salis, & aquam ambientem, ac subinde juxta Epicuri, & Gassendi sententiam particula salis non posset amplius dividii, ac separari à particulis aquæ sibi immediatis. Si alterum; ruit ergo ipsa Gassendi ratio, quoniam vacuola non replerentur.

Objicies 3. Fieri non potest, ut in cavitatem sclopeti pneumatici, cuius meminiimus disp. 2. qu. 5. paulo post initium, jam aere repletam, novus adduc aer introducatur, nisi vel posterior aer compenetre-

tur cum priore, vel aliqua præexistante in priore aere vacuola disseminata, in qua novus aer se recipiat. Porro compenetratio non est admittenda. Ergo datur vacuum disseminatum. Rarefactio itidem, & condensatio non nisi per majorem, vel minorem vacuolorum interpositionem expendi possunt. Igitur &c.

Respondetur aerem crassiorem, qui per vim in sclopetum introducitur, expellere ab illo subtilissimam ætheream substantiam, quæ per sclopeti poros egreditur. Hinc meatus pristini aeris se se coarctant, & aer ille minorem locum occupat. Fit etiam id ipsum prioris aeris condensatione, quam sine vacuo fieri diximus in quinta disputatione, quæstione quinta. Quod etiam de rarefactione ibidem constituimus.

Objicies 4. Est quædam metalli pila, *Æolipyla* à Chemicis appellata (fig. 1. tab. 3. & ita deinceps). Hæc medioeris longitudinis manubrio appensa habet in parte anteriori foramen angustissimum, per quod aqua impletur. Hinc igni admota, ut eahuc, vehementem flatum emitit, ita ut fortius agens folle ad plures horas ignem in carbonibus accensum conservet. Quod si repleatur spiritu vini, & ubi is egreditur, admoveatur candella, spiritus vini tunc inflammatur, & igneam pluviam oculis nostris exhibet. Porro explicari nequaquam potest; quam ratione, ex eundem tot aquæ,

aerisque particulis ab æolipyla, reliquæ particulae permanentes repleant adhuc totum illud spatiū; nisi vacuola interspersa intra æolipylam admittantur. Ergo &c.

Respondetur ex dictis; ætheream substantiam corpora quæque permeantem subire partes æolipylæ, egradientibus ab illa particulis aquæ, vel spiritus vini. Quare ætherea subtilissima substantia spatiū omne replet. Egressus porro ille particularum aquæ, vel spiritus vini fit propter interni aeris dilatationem vehementem ignis actione caussatam.

Objicies 5. Innumeræ partes corpora componentes, quacumque figura constare dicantur, maxime habita ratione motus illarum, vindentur necessario debere intra se admittere aliqua spatiola vacua. Impereentib[ile] siquidem est eas adeo invicem uniri. Igitur &c.

Confirmatur primo. Etsi pori, ac meatus corporum subtilissimo dicantur æthere repleri; non vidi detur tamen, ætheream illam substantiam posse quibuscumque meatus sie adaptari, ut nihil omnino vacui intercipiant. Ergo &c.

Confirmatur secundo. Ipsa ætherea substantia corpus est, atquæ suis partibus constat, proindeque suos habet poros; Quo ergo corpore pori isti replentur? Si dicas repleri alio subtiliori æthere; de hoc idem semper inquirimus: in infinitum usque progrediendo. Ergo inter poros ætheris datur vacuum.

cuūm. Præcipue cum æthereæ particuliæ maximo concitatæ motu, non possint ita se se exacte tangere, ut nullum omnino vacuum intercipient. Igitur &c.

Respondetur, partes corporum crassiorum, & solidiorum profecto non ita perfecte invicem constrangi, & uniri, ut una alteram adæquate, & immediate tangat, sed intercipere spatiola quædam, quæ tamen vacua non sunt, sed subtilissimo replentur æthere. Porro ætherea substantia poros non habet: quod ex eadem ratione colligimus, per quam solidiora corpora poris constare deprehendimus. Hæc enim iccirco poros habeant, quod illorum partes plurimum tenaces sint propriæ figuræ, unde fit, ut invicem arctissime cohære-re non possint: maxime cum par-tes illæ crassiores sint. At vero ætherea substantia non est adeo te-nax propriæ figuræ, partibusque minutissimis constat, proindeque illius partes perfecte invicem adap-tantur, nec poros intercipiunt, & ipsa perfecte aptatur quibuscum-que poris corporum implendis.

Objicies 6. In lucerna turrita aer ingredi nequit, & tamen oleum in illa contentum patulat à flam-ma absumitur. Ergo dum oleum extrahitur, aliquod saltem erit in lucerna vacuum. Secundo si vas æneum repletum aqua, orificio her-metice cluso, exponatur aeri fri-gidissimo, congelabitur aqua, quæ subinde minorem occupat locum,

Sed hoc sine vacuo intelligi non potest. Ergo &c. Tertio vox soli-diores permeat parietes; Ergo apertas invenit vias, per quas transire queat. Igitur viæ illæ prorsus vacuæ sunt, nam si replerentur alio corpore; vox pertransire non pos-set.

Respondetur ad primum, in lucerna turrita partes olei actione flammæ rarefiunt, & subtiliores sursum ascendunt, crassioresque descendunt. Quando autem oleum incipit deficere, aer ingreditur per illud idem foramen, è quo oleum egreditur; unde quandam ab aere ingrediente fieri egredientis olei repulsionem ex parvo quodam strepi-tu deprehendimus.

Ad secundum. Aer subtilior intra poros aquæ contentus ab illis egreditur, dum aqua gelatur, & locum occupat ab aqua relictum; tum plura certe nitrosa, & sicca corpuscula in vas penetrant, quo-rum ope congelatio perficitur: ut erit suo loco dicendum.

Ad tertiam. Nulla inde vacui probatur necessitas. Ut enim vox percipiatur, sat est, aërem in meatibus parietum existentem com-municare qam aere externo, & cum alio aere intra parietes conclu-so; Inde enim fit sonus propa-gatio.

Objicies 7. celebre Newtonianorum argumentum, quo probare contendunt æqualem fore fluidorum omnium resistentiam, & corporum omnium gravitatem, si

nullum extat in rerum natura vacuum disseminatum. Si nulla corporibus interspersa sunt inania spatiola, jam una esset specifica corporum omnium gravitas. Quippe sub æquali volumine tantumdem materiae esset in omnibus corporibus, cum omnia plena esse dicantur. Porro gravitas est proportionalis quantitati materie. Atque adeo si omnia plena sunt, sub æquali volumine eadem esset in singulis materiae quantitas; eademque subinde gravitas. Quod experientia contrarium est. Rursus si nulla sunt disseminata vacuola, una est fluidorum omnium resistantia. Nam secluso vacuo, sub eadem mole erit semper, & ubique eadem materiae quantitas; ac propterea eadem resistantia. Hinc quæcumque corpora volumine æqualia moventur æqua velocitate, eamdem quoque vim illam haberent, nam hæc vis estimatur ex ductu celeritatis in massam. At si omnia plena sunt, eadem massa, seu eadem materiae quantitas in omnibus corporibus esset. Quod si reponant Peripatetici, subtilissimum ætherem aut levem esse, aut minus gravem, & minus resistere; hanc etiam responsionem pro libito confictam esse eadem illa allata ratio evincit. Quandoquidem gravitas, & resistantia ita ad universam materiam extenduntur, ut sint perpetuo proportionales quantitati illius. Absoluta autem levitas ætheris, aut cujuscumque alterius corporis,

num ratione probatur; Tum ætherem gravem esse ostendunt experientia, plurima à nobis relata in d. 2. q. 5. Nam suspensio liquorum in machina pneumatica, exhausto aere crassiore, non nisi à gravitate ætheris oriri potest. Eamdem quoque ætheris gravitatem declarat infimus locus, quem æther & prope terram, & in ipsis terræ visceribus obtinet, nam si natura sua esset absolute levis, tum à gravi aere sursum truderetur, tum nihil ei conferre posset ad locum deorsum obtinendum motus ille maximus, quo æther agitatur, renitente ipsius natura ad locum oppositum; quare nec posset apud nos manere, sicuti nunc manet, quia gravis est, & majore motu suo vincit subjecti aeris gravioris resistantiam. Demum nec exiguitas particularum ætheris idonea esse potest ad dissolvendum propositum illud argumentum; quippe ubi omnia sint plena, tantundem est materiae in omnibus æqualibus volumibus. Oportet adeo admittere vacuum disseminatum, cuius ope explicari possit major, vel minor gravitas, & resistantia corporum pro majori videlicet, aut minori interpositione vacuolorum.

Respondetur, argumentum ejusmodi non novum esse, sed perantiquum. Illud enim proposuit Lucretius in libro 1. de rerum natura, ubi vacuum disseminatum probare nitebatur, quia secluso vacuo plumbum, & lana ejusdem ponde-

de-

deris essent: ut retulimus in 4. d. q. 3. In ea porro quæstione doctrinam Peripateticorum exhibuimus cirea raritatem, & densitatem. Quare si impræsentiarum ea opinio recolatur, facile erit cognoscere, cur sub æquali volumine unum corpus sit altero gravius, nimirum quia unum est altero densius; raritas autem pondus imminuit, quoniam minus materiae continet. Poterit etiam quispiam argumento occurrere, dicendo, duo corpora volumine æqualia, pondere autem inæqualia, ita se habere, ut minus grave ampliores habeat poros, gravius vero strictioribus poris compactum sit. Quare æther faciliter pervadit poros prioris corporis, ac statim fluens ex illo, non addit eidem (servata proportione) tantum ponderis, quantum alteri corpori poros strictiores habenti, à quo proinde æther difficiliter egreditur.

Resistentia autem fluidorum non solum oritur ab ipsorum materia, & massa, sed præcipue proficiuntur ex tenaci configuratione partium fluidi, adeo ut quo majorem partes istæ connexionem habent invicem, eo major sit resistentia, qua fluidum contra nititur solido corpori in illud penetranti, & ipsius partes invicem separate ac dividere contendenti. Hinc ubi partes fluidi crassiores sunt, atque magis invicem complexæ, major ibi est fluidi resistentia. Ergo hæc resistentia penes configurationem, tex-

turam; & mutuam adhæsionem partium attendenda est, quæ cum non sit eadem in omnibus fluidis, nam aliquorum partes magis invicem nexæ sunt, aliorum partes, minus invicem cohærent, ideo etsi omnia sint plena, non una est fluidorum resistentia. Sed & resistentia fluidorum correspondet volumini, non autem massæ corporis fluidi pervadentis, aut per illa cadentis; unde corpora pondere, & massa æqualia, volumine autem inæqualia, inæqualiter etiam decidunt; ut fuse ostendimus in citata d. 4. ubi de gravitate disseruimus. Hinc optime ajebat Ceva in dissertatione 1. Philosophiæ Novo-Antiquæ, n. 3.

Expansum folium quoque charte

*Segnius inde cadet, quam si agglo-
meraveris illud*

*In globulum exiguum, quod magna-
ex parte sit illi*

*Tunc exempta superficies. Haud se-
cūs, auta*

*Mole globi, haud quammodum mo-
do quoque crescit eodem*

*Ambitus, ut Geometra docet; sed
pro ratione*

*Crescentis solidi, minor est cutis
extima, corpus*

*Quæ tegit; atque adeo minus offi-
cit aura cadenti.*

*Contra autem tenuis pulvisculus
aere longas.*

*Usque moras trahit, & variis am-
bagibus errat.*

Demum hoc argumento non sat is probari existentiam vacui Disseminati , ex ipsa Newtonianorum doctrina concludimus. Etenim Muschembroekius, in Elementis, §. 163. docet : *Quidquid est corporeum aquatis magnitudinis in exhausto machina Pneumatica , non solum æquali velocitate descendere , sed eamdem gravitatem habere , ex quocumque genere fuerit corporeum.* Ergo falsum est , à majori , vel minori vacuolorum interpositione oriri inæqualem gravitatem corporum magnitudine æqualium.

Probatur 2. pars nostræ assertio-
nis circa vacuum Coacervatum. In
hoc rerum universitate corpora ita
sunt constituta , ut sint sibi invi-
cem contigua , atque ad hanc ip-
sam contiguitatem servandam ple-
riique eveniunt motus etiam vio-
lenti. Sic ubi è phiala attrahatur aer,
aqua sursum truditur contra natu-
ralis suæ gravitatis vires : in cucur-
bitulis medicis , extincto igne , den-
satoque aere , caro ascendit , &
intumescit : clauso orificio superio-
ri clepsydræ aqua non effluit per
foramen inferius. Sexcenta quoque
alia sunt , quorum efficientem causam
ex aeris gravitate repétendam
esse diximus disputatione 2. quæ-
stione 5. Sed hanc ipsam partium u-
niversi contiguitatem demonstrant.
Ut nempe inde intelligamus hunc
ordinem à Deo Naturæ Auctore
præfixum fuisse huic rerum univer-
sati , ut omnia corpora colligata
sint invicem , vel continua nimi-

rum vel contigua. Porro ordinem
hunc nemo invertere , vel immuta-
re potest: Quantumvis enim multo
rerum apparatu in id Philosophi
contenderint , ut locum aliquem
sensibilem efficerent vacuum , nu-
quam id assequi potuerunt. Quin
immo vacui Coacervati existen-
tiam eadem illa experimenta de-
straunt , quæ in illius confirmatio-
nem producuntur: ut postea decla-
rabimus. Rite ergo dicimus , va-
cuum Coacervatum videri prorsus
impossibile per naturæ vires.

Objicies 1. In summitate Tubi
Torricelliani , cum hydrargyrum
descendit usque ad altitudinem 27.
aut 28. digitorum , ut diximus dis-
put. 2. quæst. 7. nullum profecto
extat corpus , quod hydrargyri des-
cendentis locum occupet. Ergo ex-
tat ibidem vacuum Coacervatum.
Probatur antecedens. Si corpus ali-
quod subiisset in locum ab hydrar-
gyro relatum , illud maxime fuisse
aer. Sed aer intrare non potuit,
tum propter nimis stipatam vitri
substantiam : tum quia ad aeris in-
gressum jam totus pene defluit mer-
curius , ut experientia ostendit , si
parvus hiatus in summitate tubi
aperiatur. Ex parte autem inferio-
ri ipsius tubi hydrargyrum impe-
dimento est , ne aer ingrediatur.
Igitur &c. Ea etiam miranda ef-
fecta , quæ in machina Pneuma-
tica exhibentur , ut diximus in
citata disputatione , ostendunt in
recipiente vacuum Coacervatum.

Respondeatur. Horum experimen-

Ggg to-

torum jam nos declarasse rationem, quin ulla sit adstruendi vacui necessitas. Immo vero hæc ipsa experimenta ostendunt, ibidem nullum extare vacuum coacervatum. Etenim in summitate Tubi Turricelliani, & in recipiente exhausto machinæ Pneumaticæ, reperitur lux. Porro lucem esse substantiam affirmant Atomistæ. Ergo substantia ibidem extat. Cartesiani vero cum lucem esse motum affirmant, fatentur motum non esse sine substantia, & Peripatetici, qui tradunt lucem esse accidens, docent accidens non esse naturaliter sine substantia. Atque adeo in sententia omnium Philosophorum extat ibidem substantia, cum ad sensum ipsum appareat ibidem lux. Eadem ergo illa experimenta, quæ pro adstruendo vacuo Coacervato proponuntur, vacuum illud non extare confirmant.

Proinde dicimus, summittatem Tubi Torricelliani repleri ab ætherea subtilissima substantia, quæ per vitri poros permeat, & locum occupat à mercurio derelictum. Hæc porro cum non tantam habeat vim superandi crassioris aeris in subje^ctum vas incumbentis pressionem, siccirco non tantum effluit hydrargyrum. Ita & in recipiente subtilis æther continetur. Quæ omnia cum in laudata quæstion. 2. disputationis 7. fusis exposita fuerint non sunt hic repetenda. Separantur etiam per motum ab hydrargyro subtiliores quædam par-

tes, quæ sursum truduntur. Quod idem evenit si tubus repleatur aqua.

Instabis. Vitrum non habet poros. Ergo ætherea substantia per illud ingredi nequit. Probatur antecedens. Subtilissimi liquorum spiritus per vitrum exire non possunt. Ergo &c.

Respondetur. Nego antecedens. Demonstrat enim experientia lucem ingredi per poros tubi, & recipientis. Tum si summitati tubi applicaveris pannum calidum, tunc hydrargyrum aliquantum descendit, non nisi quia calor penetratur per vitrum, & calore rarescant corpora illa in tubi summitate contenta; quod si glaciem admoveas, frigore densante illa corpuscula, hydrargyrum denuo attollitur. Ad probationem antecedentis, dicimus disparem esse rationem de spiritibus liquorum, & de ætherea substantia. Nam spiritus illi oblonga constant figura, cuius etiam plurimum tenaces sunt, unde & meatibus vitri permeantur non sunt satis idonei, quin potius illos obstruunt maxime eum nec tanto motu agitantur. At substantia ætherea maximo motu agitata, nec adeo tenax propriæ figuræ, quibuscumque corporum poris adaptat se se, & illos pervadit.

Objicies 2. Ingentis ponderis aureum cubum in planum ita descendenter fingamus, ut tubi basis semper subiecto plano parallela nos

veatur, donec illud contingens, aërem prorsus excludat; hic enim nequit inter utrumque corpus contineri, alias tam ingens auri pondus à tenui aere sustentaretur. Quod asserere ridiculum est. Porro in hypothesi vacuum aliquod fieri oportet. Sit enim aurei cubi basis A B (figur. 2. tab. 6.) cuius medium C punctum ad perpendicularum immineat punto D subjecti plani. Hoc dato aer medias intercapendinis partes occupans inter C & D, non potest inde exprimi, nisi ad cubi latera recedat. At motus iste aliquod temporis intervallum exigit. Antequam ergo aer ex C recedens attingat extrema latera, vacuum in C relinquiri necesse est. Ergo &c.

Respondetur. Aerem pressum pondere cubi descendenter ad latera refluere, donec sensum plane omnem intercepti inter illa duo corpora aeris particulae effugiant. Aliquæ tamen aeris particulae retinentur, sed adeo densatur, ut sensu percipi nullatenus possint, duoque illa corpora se se contingere adamussim videntur, quamvis discriminantur aere intermedio, qui non potens propellere alias aeris particulas comprimitur. Nec mirum est, aerem ita densatum prementi aureo cubo obsistere, ne subjectum planum omnibus suis partibus immediate contingat, cum duo corpora spatium unum non recipiat. An non & aer utribus inclusus, si penitus occludantur, ne

possit evadere, imposito ponderi obnittitur, hominemque sustentat? Nam & Alexandri milites utribus inflatis insidentes fluvium tranasse, nota res est, qui tamen non aeri insedisse dicendi sunt, sed utribus inflatis. Idem ergo in casu dicendum, licet facile non affirmarem aureum ingentis ponderis cubum ab aere sustentari, quin pariter adderem à subjecto piano aërem prohiberi, ne loco cedens spatium præmenti cubo relinquat. Quia sane ratione si oleo obliniatur subjecta basis, non immediate illam tangeret cubus impositus, sed nec ab oleo proprie dicitur sustentari. Quid quod nulla corpora adeo polita sunt, quin asperitates plurimas habeant, inter quas aer subtilis semper penetratur? Nec tantulum ergo vacuum admittere cogimur.

Objicies 3. Si uno, & subito iactu mallei vitrum aliquod frangatur, simul frangitur in medio, & in extremitatibus, nec tamen aer aëque potest primo ingredi ubique, cum successive moveatur. Ergo tunc aliquod saltem vacuum admitti debet. Id ipsum contingit dum duo corpora plana invicem conjuncta, per rectam lineam, & æqualiter separantur. Quod quidem maxima saltem vi fieri posse notavimus in separatione duorum marmorum, vel hemisphæriorum Magdeburgensium. Tunc porro aer simul partes omnes intrare non potest.

Respondetur. Medium illum vi-

Ggg 2 tri

tri facti partibus subtilioribus scis-
si corporis plurimum rarefactis res-
pleri, tum subtilissimo æthere, qui
pernicissimo agitur motu, & facilli-
me subit omnes vitri fracti partes.
Id ipsum in separatione duorum mar-
morum, vel hemisphæriorum Mag-
deburgensium contingit, nam cir-
cumundique permeat aer nec divi-
sio illa fit omnino in instanti, sed
correspondere eidem potest subtilis-
simi ætheris concitatissimus motus.
Ipsum porro medietatem marmo-
rum, vel hemisphæriorum statim
occupet subtilis æther inter illa con-
tentus, qui ad medium propellitur
ex æthere, & aer externo, qui cir-
cumundique confluit, & intra illa
corpora permeat. Maxima autem
vis requiritur ad ejusmodi divisio-
nem, ut pressio vincatur gravitan-
tis aeris quæmadmodum alias dixi-
mus. Quod vero aer intra duo illa
marmora etiam conjuncta, contineat-
tur, possumus etiam experimento
confirmare. Nam duas æreæ tabellæ
difficilius dividuntur, quam duo la-
teres, vel duo ligna; non alia pro-
fecto ex caussa, nisi quia cum æreæ
tabellæ politæ sint magis, & leviga-
tæ, ac minoribus subinde asperita-
tibus constent; iccirco minor extat
intra illa aeris copia, & subinde ma-
jori vi opus est ad earum divisio-
nem.

Colligite, non alia ratione asse-
verare nos, fieri non posse natura-
liter vacuum Coacervatum, nisi
quia ex effectis deprehendimus ejus-
modi colligationis ordinem fuisse à

Deo præfixum universitati rerum.
Attamen ut in mundo tot eveniunt
mala, pestilentiae, bella, rerum
corruptio, & similia, sic vacuum
haberi posset, nisi aliter extrin-
secus rerum ordo præ se ferret.

Probatur tertia pars nostræ asser-
tionis. Deo possibile est quidquid
non præ se fert contradictionem,
vel repugnantiam. At nulla pro-
fecto contradic̄tio, vel repugnan-
tia haberetur, si Deus corpus omne
intra vasis alicujus latera conten-
tum anihilaret, remanentibus hinc
inde parietibus vasis. Ergo vacuum
per Dei virtutem est possibile.

Confirmatur. Ex distinctione
idearum corporis, & animæ colli-
git Cartesius posse duo illa invicem
separari, & illorum unum posse sine
altero existere. Atqui distinctis ideis
nos concipiunt destructionem u-
nius materiæ, & productionem al-
terius. Ergo potest Deus materiam
aliquam destruere, quin alteram
producat. Proinde infinita Dei vir-
tus poterit materiam omnem de-
struere, quæ inter cælum, & ter-
ram continetur, quin debeat aliam
materiam ibidem creare. Est adeo
possibile vacuum per Dei virtu-
tem. Et miramus profecto, virtu-
tem illam Dei, quæ Cartesio teste,
ut diximus in prima Metaphysics
parte, disputatione tertia, quæ-
stione, prima, essentias rerum mu-
tare valuit, quæque potuit effi-
cere, ut bis quatuor non essent o-
cto, quia nihil est ei impossibile; eo-
dem Cartesio affirmante, locum
ali-

aliquem omni corpore privare non posse. Ita sane claritas, & distinctio idearum Cartesii pro ipsius nutu potentiam Dei ampliat modo, modo decurat.

Objicies. Si per Dei potentiam daretur vacuum, hoc simul esset extensem, & non extensem: Extensem quidem, ut supponitur: Non extensem vero, quia nihil extensem dici non potest: Vacuum autem est nihil. Manifesta igitur contradictione haberetur. Atque adeo dicendum est, vacuum, etiam spectata Dei Omnipotentia, prorsus esse impossibile.

Confirmatur 1. Si Deus omne corpus in vase aliquo contentum destrueret, latera vasis ad invicem distarent, ut supponitur; non distarent autem, quia medium facit distare latera continentis: tunc autem nullum extaret medium. Quemadmodum igitur duo temporis instantia non possunt invicem distare sine tempore medio, ita nec duo corpora distare invicem possunt sine corpore medio. Hinc Aristoteles ipse lib 4. Physicorum videtur docere, eos qui vacuum admittunt, concedere nihilo partes: quod praese fert contradictionem.

Confirmatur 2. Si vacuum extaret, tolleretur colligatio partium Universi: Ergo Universum ipsum destrueretur: quemadmodum sublata unione partium hominis, homo ipse destruitur. Ergo &c.

Respondetur ex Doctore quæstione undecima Quolibetalium,

§. Secundo, ubi pluribus sacerulis ante exortum Cartesium illius argumenta retulit, & dissolvit: Respondetur, inquam, vacuum non esse spatium aliquod habens dimensiones positivas; sed ibi solam intelligi possibilitatem ad tantas dimensiones positivas cum carentia cujuscumque realis actualis dimensionis. Quamobrem vacuum non vere extensem est, sed dicitur negative extensem, quatenus lateralia corpora inter se distant: atque inter illa aliud corpus collocari potest. Distant autem illa corpora negative, non positive; hoc enim præstari intelligitur à medio positivo. Recolite quæ diximus in tertia disputatione, quæstione prima, in solutione ad tertiam objectionem.

Quod de tempore exemplum assumitur in prima confirmatione, verum est si tempus spectetur, ut mente nostra concipitur. Nam qui tempus reale esse, ac positivum affirman, ajunt etiam duo temporis instantia invicem se solis distare posse negative. Sed nulla est consecutio ex iis, quæ mente imaginamur, ad rerum natura definiendam. Aristoteles autem loquitur contra Antiquos Philosophos, qui vacuum extare asseverabant, & simul illud re ipsa dimensionibus positivis constare dicebant, & solis naturalibus qualitatibus carere affirmabant.

Ad secundam confirmationem. Cum illa partium Universi colli-

gatio præ se ferat ex dictis accidentiarum quamdam unitatem à Deo præfixam universitati rerum ; iccirco illa per Dei voluntatem dissolvi potest , manentibus semper ipsis Universi partibus ; quemadmodum sublata unione animæ , & corporis , ipsa anima , & corpus permanent ; etsi non maneat homo , qui ipsa anima , & corpore invicem unitis , essentialiter consistere intelligitur .

QUÆRES PRIMO.

Quænam sit causa impeditiva vacui?

DIxere Veteres Peripatetici , Naturam à vacuo abhorrere . Quæ quidem verba Recentiores passim derident , unde & vacui horrorem appellant putidum Antiquitatis commentum . Verum si , ut par est , non externum verborum corticem , sed rem ipsam spectare velimus ; quid aliud unquam intellexerunt Veteres illi , dum asseverabant , naturam à vacuo abhorrere , nisi ordinem colligationis partium omnium à Deo universitati huic præfixum nullatenus posse ab agentibus naturalibus inverti ? Quod sane absurdii nihil involvit , atque ab iisdem Recentioribus debet approbari . Etenim ipsa aeris gravitas , & elaterium in caussa est , ne vacuum ullum naturaliter contingat , quoniam pondere suo , & elastica vi aer continuum servat corporum colligationem , ut alias exposui-

mus . Hinc porro fit , hac ipsam rerum omnium colligationem in Universo deprehendi ab innumeris effectis . Quamobrem affirmare licet , sic Deum omnia disposuisse , & ordinasse ; atque ex ordine naturali res ita consistere . Quo pertinet egregia illa Gregorii Nazianzeni sententia oratione septima , de Composita disserendi ratione : *Ordo omnia constituit , & colligavit . Ordo caelestia , & terrestria continent Ordo in elementis . Ordo cœlum in orbem duxit , aerem exporrexit supposuit terram .* At vero continua experientia ostendit , ordinem illum colligationis à nulla vi creata posse mutari . Cum igitur hanc ipsam partium Universi colligationem fateantur passim Recentiores , & maxime Cartesiani ; non est cur metaphoricam illam Veterum loquitionem usque adeo reprehendant . Etenim cum res ipsa intelligitur (notat optime Augustinus libro primo contra Cresconium , capite quarto decimo) , minus laborandum est , quid eam hominibus vocare placuerit .

Prima ita sententia ipsam aeris gravitatem , seu pressionem caussam habet , quæ vacuum impedit , ne per naturæ vires inducatur . Quæ quidem opinio dicitur *Tensistarum* quam nos approbavimus , ut jam antea diximus .

Altera sententia *Tensistarum* appellatur , quæ tensione , & rarefactione aeris , seu aliorum fluidorum , tradit corporum colligationem in Uni-

Universo servari, modumque explicat, quo iste rerum ordo obtinetur. Inde enim effectuum naturalium rationem ex determinata cujusque corporis tensione, seu rarefactione, nam quæque res ut ailiarum affectionum juxta determinatum gradum capax esse intelligitur, sic tantam potest rarefactionem suscipere, & non majorem: habitamen ratione diversæ affectionis, caloris nempe, vel frigoris. Porro sententia hæc verum quidem exponit, sed efficientem caussam non explicat, quæ vacuum impedit. Proinde ad aeris pressionem confugere oportet, ut germana effectuum ratio habeatur, & creata vis effætrix innotescat, quæ vacuum omnne impedit.

QUÆRES SECUNDO.

An in vacuo possibilis foret motus, isque successivus.

Quamquam non defuerint Philosophi, qui negaverint, dato vacuo coacervato, motum in eo fieri posse, eundem motum, si in vacuo continget, in instanti dicerent absolvendum, non autem in tempore, ac propterea illum minime fore successivum; communis tamen, nostra hac ætate, Philosophantium assertio est, motum in eo vacuo possibilem esse, eundemque successivum. Hanc sententiam diserte tradidit Scotus, in 2. d. quæst. 9. prope finem, ubi

ait: *Si vacuum posset cedere, & motus posset esse in eo, ex divisibilitate spatii motus haberet divisibilitatem, & successionem, sicut modo ex divisibilitate spatii pleni motus habet per se successionem essentialem.* Et infra scribit: *Vacuum nullam qualitatem accidentalem habet ultra successionem essentialem.*

Hæc porro assertio liquido descendit ex dictis in superiori quæstione, ubi vacui Coacervati possibilitatem defendimus. Nam si vacuum illud extrema habet invicem distantia, ubi in eo positum esse intelligamus aliquod corpus, aut motrice vi prædictum suapte natura, aut ab alio extrinseco agente compulsum ad motum, evidens fit, posse illud ab uno vacui extremo ad alterum transire, adeoque localiter moveri. Ejusmodi porro transitus de extremo ad extremum successivus foret, quippe ea extrema invicem distant; caque distantia unius ab altero, quam negativam esse diximus, non potest simul tota pertransiri, ubi virtus finita sit, sed mobile intelligeretur unam prius partem mente conceptam pertransire, deinde in alteram, & alteram ferri, ut ad extremum aliud perveniat: quo ipso successionem intelligimus. Ad hæc resistentia medii non efficit motum, quin potius illum præpedit. Ergo dato vacuo, in quo nulla mediæ resistentia haberetur, motus adhuc fieri posset, imo velocior esset: ut ex dictis liquet. Cum porro vix

motrix finita supponatur , & limitata , non attingeret simul utrum que vacui extremum , adeoque corpus successive moveretur : & quidem versus eam imaginarii spatii partem , ad quam à movente , vel projiciente determinaretur .

Dices . Motus omnis corporum sub cælo extantium à cælorum influxu pendet : ut sæpe Aristoteles videretur docere . Nullus porro esset cælorum influxus in vacuo ; nec adeo motus . Tam motus omnis localis respicit locum , quem in superficie ambientis corporis constituimus : hæc autem non habetur in vacuo .

Respondetur . Majorem propositionem veram non esse . Ut enim optime tradidit Scotus pluribus in locis , præsertim vero in 4. distinct. 49. quæst. 14. N , nulla est essentialis dependentia inter motum corporum sub cælo extantium , & motum , aut influxum ejusdem cæli . Ad secundum patet ex dictis de loco . Si enim vacuum sit terminatum , nempe terminis constet , adhuc loci ratio à partibus Mundi fixis , præcipuisque repeti posset . Quod si vacuum non habeat terminum , uti concipimus imaginaria spatia , non proprio sensu fieret localis motus , etsi esset motus lationis , quo corpus ab una imaginarii spatii parte in aliam ferri intelligeretur .

Dices secundo . Aristoteles in quarto Physicorum libro videtur probare , vacuum destruere mo-

tum , quia in eo motus debet necessario fieri in instanti . Successio enim motus à medii resistentia oritur , unde pro varietate densitatis , raritatisque medii successio quoque motus major est , aut minor .

Respondetur ex dictis , successionem motus essentialem ab ipsa extremorum distantia repetendam esse , quam distantiam finita , & limitata agentis virtus non nisi successive potest pertransire ; ideoque etiam in vacuo habetur ea resistentia , quæ distantiae extremorum proportionalis intellegitur . Quandoque autem accidit successivo motui , ut major , minorve ut pro varietate medii : & hæc accidentaria successionis varietas nulla esset in vacuo . De mente Philosophi variae extant opiniones . Sunt enim , qui putant , ipsum contra Veteres ex eorum principiis disseruisse . Nam illi visi sunt una simul docere , admittendum fore vacuum , ut motus localis effici posset , ejusdem vero motus successionem à positiva medii resistentia repetere . Cæterum hanc de mente Aristotelis inquisitionem nos iis permittimus , quibus pro otio libuerit .

DISPUTATIO NONA.

De Motu.

UBI

De Legibus Motus, & de Mechanica.

QUÆSTIO PRIMA.

Quid sint Motus, & Quies?

Aristoteles Motum universum acceptum sic describit libro tertio Physicorum, cap. 3. *Motus est actus entis in potentia, quatenus in potentia.* Nimurum significat, motum intelligi instar perfectionis, seu affectionis, quæ rei convenit, quatenus tendit ad aliam perfectionem, aut terminum quem non habet. Quod exemplo ædificationis domus declarat postea. Nam ædificatio non dicitur de domo antequam ædificetur, nec postquam est ædificata, sed ipsi domui intelligitur convenire, prout re ipsa ædificari, & fieri cognoscitur. Ita porro Aristoteles Motum generatim consideratum describit, quatenus variis motuum speciebus communis esse concipitur. Præcipua vero Motus species est *Motus Localis*, quem sensibus ipsis deprehendimus, atque hunc sic Peripatetici describunt: *Motus localis est translatio de loco in locum.* Quæ quidem definitio non

solius est vulgi, ut Cartesiani videntur; sed sapientibus etiam viris probatur. Unde Augustinus lib. 2. de Ordine, cap. 6. ajebat: *Nihil aliud est motus localis, quam de loco in locum transitus.* Altera motus species est à qualitate ad qualitatem, ut à frigore ad calorem, & dicitur *alteratio*. Alia species est à quantitate ad quantitatem, nempe vel à minori ad maiorem, & appellatur *accretio*; vel à majori ad minorem, & *decretio* vocatur. Præcipius tamen Motus, ut diximus, est Localis, cujus postea affectiones declarabimus.

Quamvis autem Motus ipsi invicem saepè opponantur, ut motus sursum, & motus deorsum; Tamen cuilibet Motui Quies adversari intelligitur. Quam Peripatetici non aliud esse arbitrantur, nisi ipsiusmet Motus privationem, ut docet Aristoteles lib. 5. Physicorum c. 8.

Calumniantur Recentiores Philosophi allatam ab Aristotele Motus definitionem, velut ipso definito obscuriorum, quam subinde ne à Dæmone quidem intelligi potuisse ex illius testimonio confirmant. Sed, ut verum fateamur, quod mox apparebit, nec ipsi Recentiores meliorem assignant motus definitionem, ut proinde merito impeti possint celebri illa Matrialis sententia, epigrammate octavo libri secundi:

Hac mala sunt, sed tu non meliora facis.

Gassendus ecce post Epicurum non alium motum cum Recentioribus omnibus agnoscit, nisi localem, cumdemque sic describit, *Est transitus mobilis à loco in locum fluxu continuo.* Alii autem Atomistæ motum localem definiunt: *Est corporis vel secundum se totum, vel secundum singulas sui partes transitus de loco in locum.* Quæ quidem duæ descriptiones omnino idem sunt cum ea, quam de motu locali exhibent Peripatetici.

Cartesius vero part. 2. Principiorum n. 24. & seq. ait: *Motus autem (scilicet localis) neque enim ullus aliud sub cognitionem meam cadit) nihil aliud est, quam translatio unius partis materiae, sive unius corporis, ex vicinia eorum corporum, qua illud immediate contingunt, & tanquam quiescentia spectantur, in viciniam aliorum.* Tradit autem n. 29. *translationem esse reciprocam, nec posse intelligi corpus A B. transferri ex vicinia corporis C D, quin simul etiam intelligatur corpus C D transferri ex vicinia corporis A B.* Et pag. 3. n. 38. scribit, *cælum non posse moveri circa Terram ab Ortu in Occasum, quin Terra pariter moveatur ab Occasu in Ortum.* Hinc Cartesiani motum localem describunt: *Est applicatio successiva mobilis diversis partibus corporum*

propinquorum. Docet etiam Cartesius, Quietem, quæ motui opponitur, non minus realem esse, ac positivam, quam sit ipse motus.

Dicimus, Motum localem non esse translationem corporis ex vicinia eorum corporum, quæ tangit, in viciniam aliorum: Quietem vero sitam esse in sola motus privatione.

Probatur prima pars. Si motus est translatio corporis ex vicinia eorum corporum, quæ tangit, in viciniam aliorum; Jam Nauta in navi iter perficiens non moveretur localiter: & arbor immobilis, ac fixa permanens in fluminis medio, deberet dici localiter moveri. Etenim Nauta iisdem semper navis partibus præsens esset, & ab iisdem semper immediate tangeretur; Non ergo moveretur localiter. Arbor autem illa successive applicaretur diversis aquæ partibus ipsam immediate tangentibus; Atque adeo localiter moveretur. Quæ omnia licet Jacobus Rohaultius part. prima Physics, capite decimo affirmare non dubitet, rectæ rationi contraria esse cuicunque homini evidenter appetit. Igitur &c. Rursus juxta Cartesii placitum navi mota litus deberet dici moveri. Litus enim successive relinquit propinquitatem ad navim, quam qui in ea est, quietam arbitratur. Et cum ex Cartesio illa translatio necessario sit reciproca, & utробique eadem vis translativa requiri-

ratur ; tam litus , quam navis di-
cenda sunt moveri. Arbor etiam
transferretur , etsi fixam immobili-
ter in fluminis alveo. Sed & ad
ipsam essentialem motus notionem
non videtur pertinere vicinia alio-
rum corporum , cum Cartesius
quasdam exhibeat leges localis mo-
tus , quas corpora mobilia serva-
rent , si ab aliis corporibus non
circumambirentur.

Respondent. Nautam revera non
moveri , ut vulgo etiam dicitur.
Cum enim & in sententia Peripa-
tetica locus non sit aliud , quam
situs , sive ordo corporis ad par-
tes propinquiores , quas immobi-
les dicimus ; siccirco quia Nauta
eundem situm servat , non est di-
cendus moveri. Addunt , litus non
moveri ad motum navis , quia na-
vis videtur quidem quieta , sed ta-
lis non est.

Contra est primo. Cartesius mo-
tum localem definiens non tradit
illum esse repetendum ex ordine
ad corpora , quæ distant à mobi-
li ; sed illum describit respectu
corporum , quæ propinqua sunt
mobili & immediate illud tangunt.
Ergo localis motus Nautæ repe-
tendus non est respectu litorum ,
sed respectu partium navis , quas
Nauta immediate tangit. Ergo cum
Nauta semper iisdem ambiatur
partibus navis , profecto juxta sen-
sum Cartesianorum nullatenus mo-
vetur localiter. Quod falsum est.
Similiter Cartesius definiens mo-
tum localem non ait esse transla-

tionem à vicinia corporum quies-
centium , sed translationem dixit
à vicinia illorum corporum , quæ
tanquam quiescentia spectantur.
Porro navis spectatur velut quies-
cens. Non ergo oportet navim re
ipsa quiescere , ut litus dicatur
mori. Imo per Cartesium translati-
o semper reciproca est ; nec proin-
de navis transferri potest à litora ,
quin litus transferatur à navi. Er-
go & navim , & litus localiter
moveri dicendum est : quemadmo-
dum Cartesius tradit , non posse
cælum circa Terram moveri , nisi
Terra ipsa circa cælum movea-
tur.

Contra secundo. Quod vulgus
dicat , Nautam non moveri , non
inde fit , rem ita se habere , &
Philosophos idipsum debere affir-
mare. Nec enim Philosophi vulgi
opiniones sequuntur. Mirum porro
est Cartesianos , qui nec vulgares ,
& usitatas loquendi formulas te-
nent , unde judicium actum esse
voluntatis affirmant ; ex vulgi as-
sertione suam firmare velle de Mo-
tus natura sententiam. Sed nec il-
lud Cartesianis concedendum est ,
vulgè nimirum sensum esse , Nau-
tam in navi iter perficiente mi-
nime moveri. Quod enim usu ho-
minum dicitur , Nautam non mo-
veri , nisi situm mutet ; id omnino
vel apud ipsos vulgares homines
limitatum est ad determinatum
Nautæ situm , nec significat Nau-
tam absolute quiescere , nam quo-
que sunt homines sentiunt , & fa-

tentur, Nautam ad navis motum cum ipsa transferri, & locum mutare. Unde Peripatetici varium tunc in Nauta ordinem esse intelligunt ad centrum Telluris, partesque Universi fixas, & immobiles.

Objicies. Natator, vel piscis, dum conatur adversum aquam contranitentem, absque eo quod progrederiatur, præstat aliquid. Sed hoc non potest esse, nisi motus. Ergo elicit motum. Atque adeo motus est translatio corporis è vicinia corporum ambientium. Major propositio indubia est. Exerit enim ille conatum, qui debet esse ad terminum aliquem. Probatur igitur minor. Status ille non est quies cum præseferat conatum. Vel si quies esse dicatur, erit quies resistiva. Sed ejusmodi quies præ se fert motum. Ergo revera Natura, vel piscis tunc movetur. Secundo dum quis navi iter facit, si migret à prora ad puppim ea celeritate, qua navis in oppositum fertur; jam ille movetur, neque tamen mutat ordinem ad centrum Terræ. Ergo &c. Tertio dum circino circulus describitur, acumen circini in centro defixum moverur, neque tamen per spatium transit, aut ordinem, mutat ad Telluris centrum partesque Universi fixas. Idem de sphæra, vel rota dicendum est, dum circumagit in torno. Igitur &c.

Respondeatur. Natatorem, vel pisces in ea hypothesi moveri motu contentionis, qui melius misus

admotum, quam *motus* dicitur; non tamen moveri motu *translationis*, & proprie dicto secundum se totum. Contentio ergo illa non movet loco, sed tantum resistit, nec corpus quiescens, & resistens per resistentiam localiter movetur, nisi velis moveri localiter secundum partes, truno permanente immoto: quod in illo homine evenire diximus qu. 1. disp. 8. qui eadem celeritate migrat à prora ad puppim, qua navis in oppositum fertur. Circinus autem, sphæra, vel rota non moventur localiter secundum totum, sed moventur, partes, quibus varium præseferunt adspectum, & ordinem ad centrum Telluris, & partes Mundi fixas. Non habent ergo motum lationis, sed habent mutum circulationis. Ex quibus omnibus nihil evincitur proridenda illa Cartesii opinione, qui suarum idearum amore usque adeo occupatus fuit, ut 3. par. Principiorum, n. 26. & seq. etiamsi Tellurem circa Solem versari existimet, eam tamen immotam esse decernit, quoniam iisdem semper æthereæ substancialiæ partibus eamdem ambiri creditit.

Probatur 2. pars. Nulla ratio ostendit, Quietem esse quidpiam positivum, quod ex consequenti præ se se ferat negationem motus. Ergo pro arbitrio id ipsum asseverat Cartesius. Quamobrem, ut te-nebræ non aliud sunt, nisi mera lucis privatio, sic Quies non aliud esse dicenda est, nisi mera privatio

mo-

motus. Hinc statim ac corpus non moveri intelligitur, hoc ipso illud quiescere deprehendimus. Ita juxta Cartesianum Systema, antequam Deus motum imprimeret materiæ, seu extensioni in longum, latum, & profundum, ipsa materies non movebatur, & hoc ipso quiescebat. Igitur Quies in sola motu privatione consistit.

Objicies. Quies est nexus partium, unde soliditas habetur; sicuti è contra fluiditas in motu partium consistit. Tum quies est permansio corporis in eodem loco. Porro corpus quiescens subsistit motui, utique per quietem ipsam. Dicendum igitur est quietem præse ferre modum corporis positivum. Alioquin ut quies asseritur sola privatio motus sic quis affirmare posset motum in mera quietis privatione consistere.

Respondetur, soliditatem non oriri ex partium quiete, nec fluiditatem in motu partium consistere: ut diximus disp. 4. q. 4. Nexus itaque partium ab illarum figura repetitur. Ita & permansio corporis in eodem loco ab interna illius gravitate ducitur. Eadem etiam gravitate resistit corpus mutui. Et quamquam tunc corpus quiescat, attamen ipsa quies non est nexus partium, nec permansio corporis in loco, nec vis resistens. Sed quies in sola motu privatione intelligitur, licet conveniat corpori positivo, quemadmodum tenebræ, & alia omnes meræ privationes conve-

niunt rebus positivis, nec tamen præ se se quidpiam positivum præ se ferunt. Non ita affirmare possumus de motu, nam ad motum requiritur actio, motus est transitus de loco in locum, & positivas habet affectiones. Quæ omnia quieti non congruunt.

Hæc adversus Cartesianos exhibuimus. Quod attinet vero ad Aristoteleam illam definitionem motus universim accepti, eandem idoneam esse arbitramur, & localem motum rite describi per translationem de loco in locum. Motus enim est id, quo res denominatur moveri. Sed id, quo res denominatur moveri, intelligitur velut perfectio rei, quæ movetur, quatenus tendit ad formam aliquam acquirendam. Ergo motus universim acceptus rite dicitur actus entis in potentia, quatenus in potentia. Hinc August. in lib. de Immortalit. Animæ, cap. 8. inquit: *Motus omnis ad aliud est, cuius indiget quod moverur.* Et sane non alia suppetit aptior descriptio motus universim accepti, cum tamen hæc exhibenda sit. Neque enim solus extat motus localis, ut Cartesio, & Recentioribus videtur. Nam, ut nihil dicamus de motu ad quantitatatem, vel ad alias affectiones materiales, profecto, in se se quisque experitur transitum de cogitatione in cogitationem, de nolitione ad volitionem: de quibus diximus in 2. Metaphys. part. Quod autem localis motus dicitur translationis corporis de loco in locum, ut-

cum-

cumque notio illius exhibetur, ac declaratur. Quod affirmare hic intendimus.

Quid vero sit ipse motus in se se, difficile est declarare. Ex Peripateticis nonnulli docent, motum esse formam ipsam, quatenus hæc rē ipsa effici intelligitur, & subjecto moto advenire; adeo ut motus sit quidem ipsam formam, tamen prout hæc connotat actualem sui effectiōnem, sive ut ajunt, *motus est ipsa forma fluens*. Scotista censem, motum esse successionem formæ advenientis post formam veterem immediate præcedentem; unde inquiunt, motum consistere in *fluxu formæ*, sive in successione termini *ad quem* pos terminum *a quo* immediate præcedentem. Porro hæc *successio* est relatio, cuius fundamen-tum est ipsum mobile, quod à privatione formæ ad formam transit, sive de *non esse ad esse*. Hinc Arist. lib. 5. Physic. t. 5. ajebat: *Non est Albedo motus, sed de albatio*. Quod ipsum exemplo ædificationis declaravimus in hujuscemodi questionis initio. Ita docet etiam Scotus in 4. d. 12. q. 4. Per eum quippe transitum res moveri, & mutari intelligitur: ut patet; cum è converso forma jam effecta quietem potius dicat motui adversam non sola connotatione, sed essentialiter, quatenus est ipsius motus privatio. Omnis autem naturalis mutatio sit in subjecto, seu in materia, ut sæpe diximus; at mutatio, quæ per creationem contingit, transitum dicit de *non esse ad esse*,

à subjecto tamen abstrahit. Potest etiam motus, seu mutatio fieri vel successive, ut naturaliter contingit, vel in instanti, si Deus ita vellet, quia nec resistentia contraria vincenda, nec finitas rei mobilis obstarere queunt divine virtuti infinitæ.

At si loquamus de unitate specifica motus, hæc extrinsece colligitur ab ejus termino sive à forma, ad quam motus ordinatur. Hinc motus ad esse substantiale dicitur generaliō, motus ad esse quantitatū, appellatur argumentatio, motus ad locum dicitur loci mutatio, motus ad esse qualitatis dicitur alteratio: ut frigescere, calefactio. Quando autem subjectum calefit, hanc utili-que denominationem habet à calore, sed quatenus calor advenit illi. Ad unitatem vero numericam motus necessaria est unitas subjecti, formæ, & temporis, alterutro enim variato, non permanet idem numero motus: ut manifestum est.

Ea motus relatio, quatenus transitus est de *non esse ad esse*, seu de privatione ad formam, dici non potest simpliciter realis, quia unum motus extreum, nempe privatio, non est verum ens reale, ut alias diximus; proindeque motus per se non collocatur in prædicamento, sed refertur ad prædicamentum formæ, quæ per motum acquiritur. *non motus privatus inter se* *motus* *conveniens* *colloqui* *positivo* *mutatio* *creationem* *excepit* *g. 8. s. 11.* *decreta* *motus privatives* *conve-*

QUÆ-

QUÆRES.
Quid dicendum sit de velocitate,
& tarditate motus localis?

OMnis profecto localis motus velox, vel tardus est. Placuit autem Veteribus quibusdam Philosophis velocitatem, & tarditatem localis motus repetendam esse ex minori, vel majori interpositione morularum, quatenus nempe corpus, quod movetur, inter motus sui cursum quasdam morulas minores modo, modo maiores interspersas habere intelligitur. Aristoteles autem motum velocem illum esse describit, quo mobile brevi tempore multum spatium absolvit eum vero motum tardum appellat, quo breve spatium multo tempore conficitur.

Causa porro majoris, vel minoris velocitatis motus, primo esse potest excessus unius virtutis activæ ad aliam. Nam cæteris paribus, homo majori vi prædictus velocius lapidem projicit ad determinatam distantiam, ac homo alter, cuius vires minores sint. Secundo caussa esse potest excessus unius resistentia majoris altera. Ubi enim minor est medii resistentia, ibi mobile velocius movetur. Sic lapis velocius descendit per aerem, quam per aquam.

At vero quid præ se feret ipsa velocitas, vel tarditas motus, vix videtur definiri posse. Attamen hoc unum pro certo habendum est;

nimirum velocitatem, & tarditatem motus non esse repetendam ex minori, vel majori morularum interpositione.

Assertio probata manet ex dictis in 3. disp. q. 3. ubi secundum Peripateticorum argumentum proposuimus adversus Epicureos. Et enīm duo rota ænea circa suum centrum volvitur, compertum est, partes centro viciniores tardius moveri partibus illis, quæ à centro distant. Neque tamen illo tardiori motu fas est ulla, vel maiores distinguere morulas. Nam partes rotæ omnes continuantur. Porro ex duobus invicem colligatis, & continuis impossibile est, unum moveri altero quiescente. Igitur &c.

Dices, rationem hanc non evincere propositum. Nam possunt partes centro viciniores alternis vicibus quiescere, si supponamus radios illius rotæ inflecti. Id vero declaratur exemplo ensis reflexi, cuius partes remotiores à manu vibrante velocius moventur; propinquiores vero tardius, illæsa continuitate, & morulis interceptis. Igitur &c.

Respondetur: motum ensis reflexi iisdem obnoxium esse difficultibus. Contendimus, enim, quod si parces remotiores à manu moventur indesinenter, moveantur etiam indesinenter partes manui vibranti viciniores; alioquin ensis frangeretur. Quare exemplum hoc non est ad rem. Sed & prædicta

reflexio radiorum rotæ chimerica est, & gratis confusa. Nam crassities rotæ supponi potest mille, & ultra palmorum. Quæ-nam igitur erit caussa physica istius inflexionis? Videmus projecto ensem in vagina valide compacta constitutum non posse manibus inflecti; quanto minus igitur inflecti potuerunt raddii adeo solidi, & magnam adeo crassitudinem habentes?

QUÆSTIO SECUNDA.

Quenam sit caussa continuati motus projectorum?

HÆC motus localis affectio, quæ projectio dicitur, notissima sensibus est, ut in lapidibus projectis, vel in sagittis emissis apparet, quæ perseverant in motu, etiam postquam separatae sunt ab ea motrice caussa, à qua primo motum accepere. Nunc igitur inquirimus, quenam sit caussa continuati motus projectorum, per quam nimirum projecta perseverent in motu.

Visum fuit olim Aristoteli causam continuati motus projectorum esse ipsum medium, quod cum à re projecta finditur, cogitur retrosum succedere, eamdemque impellit ad ulterius eundem. Sic corpus ab aere retro pelli existimat. Id ipsum non nulli nisi stnt confirmare ex eo quod res projecta aerem, quem impellit, condenset, quo fit, ut aer post rem ipsam projectam existens ra-

refiat. Alii ad vim aeris elasticam configiunt, ut P. de Chales, in Dissertatione de Elaterio, & D. Stair, in Physiologia nova experimentali, explorat. 19. sect. 2. Rem alii declarant à medii fluiditate, & gravitate. Ubi enim vis lapidein, ex g. sursum projiciens, columnam aeris lapidi respondentem impellit, & elevat, continuo fit, ut columnæ aereæ circumambientes in locum à lapide relictum descendant, descendendo autem vi gravitatis motum suum accelerant, lapidemque subinde progrederi cogunt, donec gravitate lapidis, & columnæ aereæ eidem respondentis vincatur actio ambientium columnarum.

Epicurei atomos per se mobiles caussam assignant, quæ à motore in mobile comméant. Gassendus vero docet, voyens debere necessario tangere ipsum mobile, atque impellere. Cum autem partes externæ impulse sunt à motore, haec successive impellunt internas; atque hoc modo diffunditur motus in mobili. Ita scribit sectione 1. Physicæ, lib. 5. de Motu rerum projectorum.

Cartesius, qui unicam efficiētem motuum omnium caussam docet esse Deum ipsum, projectorum motum continuari docuit ex lege generali naturæ, quæ dicitur, unamquamquam rem permanere semper quantum est ex se se in eo statu, in quo reperitur, donec externa vis occurrat, quæ statum illum immutet. Recentiores alii res pro-

jectas moveri docent per extrinsecam determinationem, qua ad tam motum à mobili determinantur. Boreli in libro de vi percuss. c. 4. prop. 9. affirmat vim motricem communicari rebus projectis à mobili, per quam in motu perseverant. Communis demum Peripateticorum opinio censet, causam motus projectorum esse impetum projectis à movente impressum: hunc vero impetum tradit esse qualitatem, quæ motum ipsum vel exigit, vel afficiat.

Dicimus, caussam continuati motus Projectorum non esse aerem, nec atomos per se mobiles, nec motum partium internarum corporis projecti, nec legem quamdam generalem Naturæ, sed esse vim impressam, seu impetum projectis ipsis à movente communiciatum.

Probatur 1. pars. Et primo quidem caussa non potest esse recursus aeris. Etenim non potest convenientius intelligi res projectas moveri à medio, sive ab aere, per quem transeunt, quam si concipiamus aerem ab illis divisum ad iliarum terga refluere, & hoc modo instare, ac propellere eas antrorum. Atqui etiam hoc modo res projectæ nequeunt moveri à medio. Ergo aeris recursus non est caussa Continuati Motus Projectorum. Probatur minor. Intelligere non possumus, quanam ratione aer impellat lapidem, nisi aer ipse velocius, ac majori nisu moveatur,

Tom. II.

quam lapis. At hoc ipsum fieri non potest. Nam ipse aeris motus à motu rei projectæ progreditur; atque adeo non potest esse velocior motu lapidis projecti. Major autem propositio exinde appetet, quia si aer æquali tantummodo velocitate moveatur ac lapidis, poterit quidem comitari lapidem ipsum, sed nullatenus illum poterit propellere: quemadmodum si duo globi, quorum unus post alterum volvatur, æqua velocitate moveantur: fieri nunquam poterit, ut posterior pellat anteriorem. Tum aer, quem lapis ante propellit, ac dividit, non minorem habet resistendi vim, ac aer ille vim habeat impellendi, qui à tergo lapidem urgere dicitur: Hinc medium impedit potius, quam foveat rei projectæ motum; unde quo medium est densius, eo tardior est motus rei projectæ. Igitur &c. Rursus si sagittæ, aut globo emiso corpus flexibile adjungatur, ut pili, aut lana, tum certe recurrens aer pilos in corpus ipsum globi propelleret, cum tamen illi fluitantes, & disjuncti videantur. Ergo &c. Demum in machina pneumatica; exhausto aere crassiore, projectæ res celerime moventur. Igitur &c.

Deinde caussa non potest esse condensatio aut dilatatio aeris, nam in machina pneumatica, exhausto aere crassiore, corpora celerius moventur: & pendula citius ibi suas vibrationem absolvunt, ac diu-

III tius

tius hunc ipsum motum vibrationis conservant. Ita scribit P. Regnault. 1. exercit. 4. p. 83. Taglini in sua Epistola Philosophica, pag. 74. Idem traditur in Transactionibus Philosophicis Londinensibus Domini Bremond. an. 1738. & refertur in Diario Eruditorum Transalpinorum.

Jam vero nullus ibi locus est condensationi aeris, aut dilatationi. Et cum ibidem non extet ille crassioris aeris impulsus, qui motum adjuvare dicitur, tardius profecto vibrationes penduli deberent absolvi, & minori tempore motus ille vibrationis perduraret. Ergo dicendum est, projectilia non moveri propter aeris condensationem, vel rarefactionem. Secundo eadem recurrunt quæstio de aere; quid-nam videlicet illi motum imprimat? quæ caussa efficiat, ut motus illius tamdiu perseveret? Aer enim movetur, à sagitta per ipsum projecta; ergo æquali ad summum motu, non velociori; atque adeo non posset sagittam à tergo impellere; nemo enim alium stricto ense confodiet, qui æquali velocitate fugiat, qua ipse insequitur. Tertio paleæ, ac laneis floci in aërem projecti velocius moverentur, non tardius; ut experientia demonstrat. Quippe aer ea corpora facilius, fortiusque propelleret, eum minutiora sint, & leviora. Quarto cum plumbea pila è balista ignea deorsum exploditur per lineam Finitori, seu Horizonti per-

pendicularem, deberet pila eo maiorem ictum efficere, quo magis à balista recedit. Tunc enim pila ageretur & à propria gravitate, & ab aere propellente. Experientia autem aliter evenire demonstrant; etsi plerique opinentur, pilam vix è balista ignea egressam minorem ictum imprimere, majoremque è converso ictum efficere, quo longius à balista recedit. Igitur dicendum est, nec aeris condensationem, vel rarefactionem esse caussam Continuati Motus Projectorum.

Denique caussa esse non potest alterium aeris. Nam vis elasticæ aeris ea est, qua pressus se se restituit, & dilatat. Iisdem ergo momentis, quibus evincitur dilatationem aeris non esse caussam Continuati Motus Projectorum, probatur etiam, vim elasticam non efficere motum illum. Secundo medium, quo densius est magis resistit. Porro medium densius, quando comprimitur, fortius à tergo urget, majorique vi propellere valet projectum. Ergo lapis projectus deberet velocius moveri in aere crassiore, quam in puriore. Quod est contra experientiam. Tertio in crassiore aere major est resistentia; majorque subinde vis elasticæ, quam in rariore. Et tamen qui de re tormentaria scripserit, fatentur globi bombardilis impetum à vido aere, idque maxime cum secus fluvium explosus est, multum retundi. Hoc porro

non

non deberet evenire, si elaterium aeris promoveret motum corporis projecti. Huc pertinet etiam pendulorum experientia superius relata. Igitur &c. Gravitas quoque, quia aereæ columnæ lapidem circumambientes descendunt, motumque suum descendendo accelerant, potest eisdem efficere, ut subjectus aer æqualiter moveatur, ac lapis, non tamen ut magis moveatur: quemadmodum contingere oporteret, ut lapidem possent, impellere; ea vero acceleratio efficit, ut aer sequi valeat lapidem sursum projectum, cum vi suæ gravitatis aer ipse deorsum nitatur.

Objicies. Ad motum Projectorum sufficit solus aer impellens, & premens à tergo, & per latera ipsum corpus mobile ad instar nuclei cerasi, qui digitis pressus longius emittitur. Et sane aer condensatur, & rarefit, virtute etiam elastica prædictus est: atque corpori se moyenti per ipsum continuo succedit. Cum ergo à tergo lapidis nullam inveniat resistantiam, ibi totam vim suam exerit, atque lapidem propellit. Quod quidem declaratur exemplo folliculi aere inflati, qui in terram decidens, eadem pene vi resilit, qua in terram cecidit, quoniam tanta vis est elaterii sui restitutione, quanta fuerat vis compressionis.

Confirmatur. Non solum tormenti bellici, aut tonitrui motus succutit vitreos cancellos, sed etiam campanæ, tubæ, aut tympani so-

nus corpora solidiora commovet. Et aer vehementi vento agitatus interdum evellit arbores, & naves oneratus impellit. Ergo aeris recurrentes agitatio sufficere potest ad continuationem motus projectorum.

Respondetur, non sufficere aeris condensationem, rarefactionem & elaterium, ut causa habeatur motus Projectorum. Ex illis enim tantummodo fit, ut diximus, aerem æqua velocitate moveri, ac lapis ipse projectus moveatur: quod tamen non satis est, cum aer debeat magis moveri, quam lapis, ut lapidem queat propellere: maxime cum aer in diversas partes diffluat. Nec eadem est ratio inclusi, & pressi aeris in folliculo, quæ liberi. Unde non est necesse, ut liber aer in unam partem exercat vim omnem suam, dum pressus restituitur. Tum si aer tanto dilatatur, quanto fuit pressius, non plus movebitur, quam lapis.

Ad Confirmationem. Cum aer recurrens agitatione sua movere dicitur projectum, omnis illa aeris agitatio contra naturalem aeris gravitatem est ab ipso projecto. Quare nunquam poterit aer velocius moveri, quam projectum moveatur. At ubi pulsatione campanæ, vel ventorum vi aer moveatur, vehementer comprimitur contra objecta sibi corpora, & maiorem tunc istis motum habet, ac resistantiam vincit aeris post illa corpora existentis. Hinc vitreos

succutit cancellos , evellit arbores , & naves propellit.

Colligite ad motum medii posse multa moveri , dummodo tamen illorum motus non excedat motum medii. Sic paleæ in aqua circumacta moventur. In projectis vero motus longe major est , quam in aere.

Probatur secunda pars. Epicurei cum atomos per se mobiles in medium proferunt , caussam motus projectorum in eo constituunt , quod re ipsa extare nullatenus probant : ut ex sæpe dictis compertum est. Inquirendum etiam superest , unde nam atomi illæ suum habeant motum , & quæ sit causa continuati illius motus atomorum. Igitur &c. Gassendus vero non satis ostendit , externas projecti corporis partes ita ad motum concitari , ut successive internas impellant , atque hac ratione habeatur continuatio motus in corporibus projectis. Rursus si dum manus commovet corpus projiciendum , partes illud componentes à proprio naturali pristino statu sic dimoverentur , ut externæ partes impellerent internas ; eo magis à proprio situ partes illæ recederent , quo majori vi corpus moveretur. Proinde pila ceræ , vel alterius materiae elastica vi carentis , validis brachiis projecta , post motum suum præ se ferret signum aliquod compressionis ex ea parte , quæ jacientis manus palmae contigua fuit : atque ex altera parte

pila inflamationem aliquam habebet. Neque enim illius partes à proprio situ dimotæ possent se se restituere , cum vi elastica careant. Neque tamen experientia , id ipsum ostendit. Apparet autem in ejusmodi pila compressio ; ubi ictu mallei fuerit projecta , etsi minorum tunc accipiat velocitatem , & vim. Igitur &c.

Dices pro Gassendo. Si longa , & crassior trabs in una extrema sui parte percutiatur , tunc in alia extrema parte percipitur sonus ab ea percussione proveniens. Quod sane non contingit , nisi quia exterior trabis pars percussa interiores partes commovet. Idem ergo dicendum est evenire in projectis.

Respondeatur , in projectis certe nihil simile contingere , ut nuper ostendimus. Experimentum vero à Gassendo propositum explicabitur in sequenti quæstione , post assertionem quartam. Id enim fit interni , & externi aeris tremore , & concitatione.

Prob. 3. pars. Effectricem causam Continuati Mutus Projectorum inquirentes , non jam generalem tantummodo caussam inquirimus ; Sed potissimum caussam creatam , & particularem. Nam effectiva creaturas operari constituiimus disp. 6. qu. 1. quamquam aliter Cartesius docuerit. Ea vero Naturæ lex , si admittatur , rem ita evenire statueret ; sed principium ipsum efficiens , & speciale , cur projecta pergant moveri , nequa-

quaquam aperit, ut apparer. Rur-
sus doctrina sua non ostendit Car-
tesius, quid nam sit modus ille, aut
determinatio, quam corpora à mo-
vente accipiunt, dum projiciuntur.
Ergo &c.

Objiciunt Cartesiani. Corpus in
quiete positum, nequit ex se se mo-
tum incipere. Ergo & corpus, semel
ac in motu positum est, non poterit
se se à motu cessaret, & quiescere. Sa-
ne nulla res suapte sponte ad sui de-
structionem nititur, & lex naturæ
postulat, corpora semper in eo sta-
tu, quem habent, permanere, nisi ab
externa caussa aliter determinen-
tur. Ergo hoc ipso intelligitur ratio
continuati motus Projectorum.

Respondetur, argumentum pug-
nare contra Cartesianos. Etenim si
lex Naturæ postulat, ut unaquæque
res permaneat in eo statu, in quo
est, mutatio status erit contra natu-
ram, nec fieri poterit primo, nisi à
caussa extrinseca, imo nec poterit
perdurare, nisi caussa pariter extrin-
seca eumdem conservet. Atqui lo-
calis motus non est status quidam,
sed mutatio status. Ergo necessaria
erit caussa exterior, quæ illum in-
cipiat, & illum conservet. Minor
propositio manifesta est. Nam status
omnis quidpiam præ se fert fixum &
permanens. Ita determinatam habe-
re figuram, & determinatam occu-
pare spatii partem, status est. Porro
localis motus è contra essentialiter
præ se fert continuam successio-
nem. Igitur motus localis non est
status.

Dices, nomine status intel lig-
certam quandam modificationem,
seu modum essendi simplicem, &
determinatum.

Ita sit sane. Atqui motus localis
non est modus aliquis essendi sim-
plex, & determinatus, sed vera
successio, sive continua mutatio mo-
dorum essendi. Nam ubicatio, sive
præsentia determinatae parti spati,
est modus essendi simplex, & positi-
vus, atque adeo est verus status. At
motus localis est successio quædam,
seu continua mutatio ubicationum.
Ergo est successio, sive continua
mutatio modorum essendi, seu sta-
tuum. Nec adeo est status.

Confirmatur ratiocinatio nostra
exempli figuræ, coloris, aliarum
affectionum. Mutatio figuræ, si-
ve transitus à figura, ex. gr. ro-
tunda ad triangularem, vel qua-
dratam, non est status, sed statuum
mutatio: quod & in coloris muta-
tione patet. Ergo nec localis motus
erit status. Quemadmodum er-
go mutatio figuræ, & coloris, ut
primo fit à caussa extrinseca, sic
minime perdurat, nisi caussa ex-
trinseca permanente; ita mutatio
loci, seu motus localis caussam ex-
postulat extrinsecam, tum ut pri-
mo incipiat, tum ut perseveret.
Maxime cum in Cartesiano Syste-
mate mutatio figuræ non sit nisi
quædam mutatio loci. In mutatio-
ne quidem loci mutantur relationes
corporis ad partes Universi, in mu-
tatione vero figuræ mutantur rela-
tiones partium corporis invicem. In
quo

quo nullum sane est essentiale discrimen.

Dices. Cartesii doctrina tradit, motum hominum à solo Deo effici, Deus porro est infinite sapiens. Qui ejusmodi est, à volitione non cessat, nisi ratione aliqua ductus. Ergo Deus non nisi ob novam rationem cessabit à volitione, qua motum corporis efficit. Non igitur quærenda nobis est ratio continuationis motus in Projectis, sed ratio tantummodo cessationis motus investiganda est. Idem valet de mutatione figuræ, aliarumque affectiōnum. Sane producere corpora est efficere, ut sint, conservare corpora est efficere, ut in esse perdurent: Nequeunt autem existere plura corpora, nisi habeant situm. Quamobrem producere, conservare, & in situ collocare corpora, præ se ferunt unam, eamdemque actionem. Proinde locum dare corpori non est aliud, nisi producere, & conservare ipsum corpus intra corpora alia per aliquod tempus; & mutare locum corpori, est illud producere, & conservare intra alia diversa, seu distincta corpora. Igitur &c.

Respondeatur, nos minime latere, quæ sit Cartesianorum doctrina de caussa motuum effectrice. Proinde si caussæ secundæ sunt mere occasionales, hoc etiam sensu impræsentiarum disserimus, & caussam itidem occasionalem continuati motus Projectorum exquirimus. Neque enim hic loquimur de motu cælestium corporum, quem Deus

ut pro libito primitus impressit, ita pro libito conservat. Sed de iis disputat, corporibus, quæ modo quiescent, modo moventur: ut sunt gravia, & projectilia. Horum motus sane non incipit, nisi creata quædam existat caussa occasionalis: ergo nec sine ista perdurat. Negamus itaque Deum conservare motum in ipsis corporibus, etiam nulla extante caussa occasionali quemadmodum nec illum primo efficit Deus sine occasionali caussa creata. Redeunt subinde omnia, quæ retulimus, argumenta.

Probatur ultima pars nostræ assertionis. Sane aliorum opinione expositæ vel non sufficiunt, vel non declarant effectricem ipsam causam illius continuati motus. Ubi vero intelligimus vim impressam projectis communicari pro majori, vel minori actione moventis, inde utcumque percipimus caussam ipsam, quæ continuationem motus in projectis efficiat, habita semper ratione majoris, vel minoris actionis moventis ad majorem, vel minorē aeris resistantiam. Quemadmodum ergo per vim à movente impressam intelliguntur corpora primo moveri; ita per majorem vim impressam projecta corpora suo in motu perseverare probabilius dicenda sunt. Extrinseca vero agentis determinatio dirigit vim impressam ad partem determinatam, in postea projectum corpus nititur pro majori impressa vi.

Dices. Si projecta per vim im-

pres-

pressam moventur, levior lanæ pila, & longe gravior pila lignea, quæ æquali constent mole, & æqua vi projiciantur; æqualiter saltem moveri deberent. Quippe vis impressa partibus laneæ pilæ numero minoribus, intensior in illis eset, majorisque activitatis, quam in lignei globi numero majoribus. Atque adeo, etsi majorem patiatur resistentiam aeris pila lanea, tamen vis impressa eo intensior evaderet, quo servata proportione superficies est major. Tum vis impressa non nisi ad initium motus deservire videtur. Ergo &c.

Respondetur. Vim projectis impressam correspondere suo modo internæ vi gravitatis, quæ inest corporibus, quatenus ut ista descendendi ratio est, sic illa motum projectionis continuandi. Sed utriusque vi resistit aer pro ratione superficie. Quare ut levior globus majorem aeris resistentiam descendendo patitur, & tardius descendit; sic globus levior in projectionis motu majorem patitur resistentiam, tardiusque movetur. Recolite quæ diximus prope finem Quæsti primi post quæstionem quintam disputationis quartæ. Etsi autem vis impressa quandoque solum primum motum efficiat; tamen si major est, poterit etiam motum continuare.

Quid autem sit hæc vis impressa, difficile est explicare. Peripatetici putant, eam esse qualitatem absolutam à mobili realiter distin-

ctam: quod aliarum instar qualitatum exponunt. Tametsi autem Recentiores id renuant approbare, non inde sequitur illius vis existentiam non esse admittendam. Sexcenta etenim pene sunt, quorum existentia omnium confessione tenetur, etsi de eorum essentia discors sit Philosophorum opinio, eaque potius inter Naturæ arcana recenseatur.

QUÆSTIO TERTIA.

De Motus Elasticitate, Reflexione, & Refractione; & unde oriuntur?

E laterium, quod alteram efficit localis motus affectionem, est *vis se se in statum naturalem restituendi; seu vis est, qua corpus pressum resilit.* Et quidem ejusmodi vim pluribus inesse corporibus saepe diximus. Quod conspicuum sit in balistis, aliisque consimilibus machinis, & in ramo tenui, ac viridi; quæ inflexa primum resilunt, postea restituunt se se. Unde & motus dicitur elasticus.

Elastici porro motus caussa varia in Physicis habetur captu, & nutu Philosophorum. Cartesius, 4. part. Principiorum, num. 132. effingit in corporibus elasticis ordinem quemdam pororum, elasticum corpus per transversum penetrantium; qui, cum ipsum corpus inflicitur, ex una parte, ea videbilet, quæ concava remanet, perstringantur, & veluti occludantur: ex alia vero parte, concava scilicet,

cet, dilatentur, & patentia permaneat. Quo fit, ut subtilis materia poros illos pervadens, ea, qua patent, parte in alteram transmigrare nitens, compressos ibi dilatet poros, & dilatando, inflexum corpus in pristinam restitut reſtitudinem. Recentiores alii passim elasticam vim ab ipsa partium contexitura repetunt, nempe ex partium rigiditate, & flexibilitate. Peripatetici sic rem exponunt, ut Elasticitati praesupponatur contextura partium, ex rigidis quidem, sed flexilibus, ipsa tamen elastica vis auspicanda sit ab intrinseca virtute illius corporis, quod elasticum dicitur: quæ virtus ea ipsa est, qua res quilibet debitam sibi raritatem, vel densitatem jam desperditam reparat. Newtonus elasticam corporum vim à mutua attractione componentium particularum repetit, unde, scribit, illa ad figuram suam revertere ea vi, qua ex mutua partium attractione oritur. Vim porro attrahentem, de qua alias diximus, docet in vim repellentem, aucta distantia, mutari. Ait enim quæst. 31. Optics: *Sicuti in Algebra ubi quantitates affirmativa evanescunt, & desinunt, ibi negativa incipiunt; ita in Mechanicis ubi attractio desinit, ibi vis repellens succedere debet.*

Motus autem reflexus ille est, qui contingit propter incidentiam unius corporis in aliud obsistens, à quo fit resilitio illa, quæ reflexio dicitur. Velut cum pila resilit

à pariete, in quem projecta fuit, reflexioni consonat refractio, qua corpus mobile ex via recta in obliquam propter medii majorem, & minorem densitatem detorquetur. Quod tunc evenit, quando mobile non perpendiculariter incidit, sed oblique, & per medium variæ densitatis transit, v. g. per aerem, & aquam.

Aristoteles docet reflexionem caussari à projiciente, sic tamen ut tum in corpore projecto, tum in termino incidentiæ determinata repe riatur durities. Id ipsum tradunt Gassendus, & Cartesius. Aliorum Recentiorum opinio est, omnem reflexionem ab Elaterio profici sci, adeo ut corpus durissimum, & inflexible (si juxta illorum sententiam extaret), in aliud quoque itidem inflexible impactum non resiliret. Proinde putant, vel projectum corpus, vel corpus ob sistens, vel etiam utrumque, ex incidentia unius in alterum compri mi, atque vi elastica se se restituere, unde habeatur reflexio.

Dicimus, caussam motus elasticis esse virtutem elasticis corporibus intrinsecam, qua debitam sibi raritatem, vel densitatem reparant: Reflexionem autem, & refractio nem oriri à primo impellente.

Probatur prima pars. Et I. quidem idonea non est Cartesii opinio. Quod ita concludimus. Subtilis materia juxta Cartesii hypothesim circa Tellurem agitata movetur circulariter ab Occasu in Ortum, non

vero versum quamcumque partem. Atqui experientia compertum est, arcum inflexum, laxata fune, redire in se ipsum, sive ad Austrum, sive ad Boream, sive sursum, sive deorsum dirigatur. Ergo ejusmodi redditus repeti non potest à subtili materia. Quod si dicant Cartesiani, subtilem materiam simul moveri ab Ortu in Occasum, contrarios eidem motus simul attribuerent; atque tunc ex utraque arcus parte materia subtilis pro iisdem poris transversis instaret, unde altera alterius omnem vim obtunderet, atque adeo arcus immobilis, & iners permanerer intra vires æquales. Rursus affirmare non possunt Cartesiani, poros concavæ partis arcus adeo exiguo esse, ut materia subtilis liberum aditum per ipsos habere non possit; nam & ea materia nihil extat subtilius, & materia illa nullius est figuræ tenax, ut ipsimet Cartesianis placet. Igitur &c. Inde etiam fit, pressionem subtilis materiæ non posse caussam constitui motus elasticæ; quippe si arcus directus ita permanet, etsi major sit moles aeris incombentis, poterit etiam inflexus sic semper manere. Nam æqua semper est vis superioris aeris, & inferioris.

II. Sola partium contextura non est caussa motus elasticæ. Ergo &c. Probatur antecedens. Caussa motus elasticæ est virtus activa; actio enim relucet in ipso motu elasticæ. Sed figura non videtur esse activa virtus. Unde ab Henrico Regio dicitur

Tom. II.

terminatio extensionis, & à Gasendo, in lib. 10. Diogenis Laertii, de Physiologia Epicuri appellatur *corporis superficies*. Nec sane vis agendi in ea relucet. Unde corpora, qualicumque constent figura, nisi motum acquirant, nihil omnino operantur. Ergo sola contextura partium non est caussa motus elasticæ.

III. Caussa illa non satis explicatur per vim attractionis. Quod multiplici ratione convincimus. Et primo quidem, cum vis attrahens, Newtono asserente, particulis corporum omnium conveniat, omniaque homogenea vim illam obtineant, cur non omnia corpora sunt elasticæ? Evidens est plumbi particulas se se attrahere? Dum enim plumbum liquidum est, supra ferrari laminam modo in varias guttulas rotundas efformatur, modo parvæ istæ guttulæ, hydrargyri instar in majorem conscrescent, ubi ad latera se se contingant, & tamen plumbum elasticæ virtute destituitur. Secundo æneum vas est maxime elasticum, & tamen æs cyprium minimam habet vim elasticam, stannum vero nullam. Quamobrem dicendum videtur, maximam illius compositi vim elasticam oriri à nova contextura æris cyprii, & stanni illud componentis; proindeque non esse repetendam à mutua partium attractione. Tertio ferrum vel nullam, vel minimam habet vim elasticam, quam tamen temperatione acquirit. Atqui vis attrahens eadem semper est in ferro.

Kkk

Er.

Ergo si ferrum temperatione fit elasticum, id à partium attractione non oritur. Eadem est ratio de Argento, quod ex se se minima gaudens elastica vi, maximam obtinet, dum chymica actione in Lunam Corneam reducitur. Idem de cineribus in vitro efformatis apparet. Quod luculentius demonstratur in aqua; hæc enim, licet vim attrahentem habeat, elaterio caret. At vaporis formam subiens, maximam vim elasticam acquirit. Denique nos latet, quid sit ea vis repellens, quæ elasticis corporibus, puta aeri, adscribitur; unde idem erit inquirere, quidnam sit vis illa repellens, & quidnam præ se ferat vis elastica. Adeoque ea Newtoni doctrina caussam elaterii non explicat.

Quamobrem etsi fateamur partium contexturam necessariam esse ad motum elasticum, & huic deservire, tamen caussa istius motus erit vis intrinseca. Figura sane, seu partium textura plurimum confert motibus perficiendis: ut omnibus notum est. Celerius enim moveruntur sphærica, quam quadrata. Non tamen id evenit, quia figura sit vis activa, vel motrix, sed quia secundum figurarum varietatem fit diversa applicatio moventis, & juxta diversam applicationem virtutis moventis magis, ac minus, mobile per medium penetrat. Et quod attinet ad rem nostram, illa partium contextura ex rigidis quidem, sed flexilibus, omnino necessaria est

ad motum elasticum, sicut approximatio prærequisitur ad combustionem. Hinc quando ex diutina inflexione, & compressione partes corporum paulatim se junguntur, ut evenit in lamella calybea, quæ in horologii portatis tympano convoluta est: vel quando succi molliores è corpore extrahuntur, aut salium admixtione fixantur partes, & flexibilitas ab illis tollitur; tunc ex consequenti elasticus motus impeditur: quemadmodum sublata approximatione impeditur combustio. Igitur cum ex dictis sola figura non sufficiat, nec aptat si Cartesiis hypothesis, elastica vis erit ipsa intrinseca virtus, qua res reparat deperditam, raritatem, vel densitatem sibi congruentem. Ubi nos raritatem, & densitatem justa sententiam omnem accipimus. Neque enim aptior constitui potest causa elastici motus.

Dices. Si ita est, ergo omnia corpora essent elastica, nam ea virtus intrinseca videtur corporibus omnibus concedenda. Secundo aqua existens in æolipila, & igni admota, in vapores cum imetu difflatur: quod quidem sine elaterio contingit. Ergo diversa est vis rarefactiva à vi elastica. Tertio si vis elastica ab intrinseca corporis elasticæ natura repetitur, jam corpus post pressionem resiliens, ubi ad debitum sibi statum pervenit, non ultra progrederetur: quo pacto aqua ab intrinseco reparans debitum sibi frigus, sistit in gradu sibi con-

gruo.

gruo. Atqui corpora, dum se se per vim elasticam restituunt, ultra debitam rectitudinem procedunt. Igitur &c.

Respondetur ad primum, vim elasticam præsupponere, quod corpus debitam sibi raritatem, vel densitatem amittat. Id porro contingit solum in corporibus duris, ac rigidis, quæ cum maxime recedant à conditione fluidorum, partes habent naturalis vinculi tenaces, nec ab uno ad alium locum migrare potentes. Quare dum flectuntur, aut comprimuntur, rarescunt, vel densantur. Non ita res se habet in corporibus mollioribus, ac liquidorum conditioni finitimis, cuiusmodi est plumbum; hujus enim lamina, dum flectitur, non rarescit ex convexa, parte, nec densatur ex concava, sed partes aliquæ molitudinis beneficio transcurrunt ad convexam.

Ad secundum. Non omnis vis rarefactiva est elastica, sed ea solum, quæ ab intrinseco facit motum restitutionis. In allato autem experimento violenta est illa aquæ rarefactio.

Ad tertium. Id speciale est in motu etiam naturali, ut nempe mobile impetum concipiatur, quo feratur etiam ultra terminum naturalis exigentia, donec sensim impetu extinto, in termino quiescat. Quemadmodum de pendulis diximus disputatione quarta, quæstione quinta, quæsito primo, & secundo.

Colligite ex illis, quæ diximus

in probatione, ut necessitatem contexturæ partium adstrueremus, optime expendi omnia experimenta. Velut cur corpora elasticitatem quandoque admittant, cur non omnia corpora sint elastica, & similia. Animadvertisimus tamen determinatam etiam requiri crassitatem, non magnam, ut corpora sint flexibilia. Quare ad effectuum naturalium rationem exhibendam non oportet Cartesianam hypothesim approbare. Cui etiam experimentum illud adversatur. Nam partes ligni complicatae, & per modum flaminum intextæ, non habent poros rectos, sed flexuosos, & curvos, alioquin juxta placitum Cartesii essent diaphanae. Materia autem subtilis, cum non nisi recta moveatur, non potest connitti, nisi ut poros rectos ingrediatur, & illos dilatet.

Inter cætera autem elastica corpora insignis est quædam gummi species apud Indos, ex qua anuli efformantur, & qui postea maxime extendi possunt, atque iterum elastica vi ad paryam anuli configurationem se se restituunt ut tradit Pater Regnault, tom. 1. pag. 107.

Dices 2. cum Newtono. Radii lucis in reflexione repelluntur à corporibus sine immediato contactu corporis reflectentis vel inflectentis; adeoque vis quædam existit, quæ in distans operatur, radiosque à se repellit: & hæc vis est elastica. Eadem etiam vis videtur consequi ex emissione luminis, nam radius simul ac elucente corpore per vi-

brantem partium ipsius motum ex-
cussus sit, & à sphæra attractionis
eius evaserit, ingeniti admodum ve-
locitate propellitur. Porro videtur
etiam consequi ex productione aeris,
& vaporum, nam particulae
è corporibus excussæ per calorem,
vel fermentationem, simul ac è
sphæra suæ attractionis evaserint,
recedunt deinceps & ab ipso, &
à se invicem. Eadem autem vi re-
pellenti tribuendum videtur, quod
Muscae in aqua ambulent, nec
tamen pedes suos madefaciant.
Dicendum est igitur, vim attrac-
tivam, aucta distantia, in vim
repellentem mutari; adeoque elas-
terii caussam rite exponi per do-
ctrinam Newtonianam.

Respondetur, opinionem illam
Newtoni de caussa reflexionis ra-
diorum lucis à nobis minime approbari: quemadmodum in 3. Physi-
cæ parte, ubi de luce disseremus,
distinctius declaravimus. Radius
autem lucis, puta qui è Sole emittitur,
cum per motum excussus est
ab ipso Sole, nullatenus dici potest
evasisse à sphæra Solaris attractionis;
hæc enim, Newto docente, ad
Saturnum usque pertingit, ejus-
demque maximum globum in orbe
suo retinet. Deinde quemadmo-
dum plumbea pila non dicitur nec
est elastica, tametsi ab ignea balista
per aeris calore expansi varias, mul-
tiplicesque vibrationes explodatur;
ita nec radius Solaris lucis, eo quod
à Sole excutiatur, dici poterit
elasticus. Eadem ratione verus aer

suapte natura elasticus est, nec e-
laterium acquirit, quia ubi per
calorem, vel fermentationem ex-
cussus sit ab aliquo corpore, à sphæ-
ra attractionis ejusdem corporis e-
grediatur. Nam & sine calore, ac
sine fermentatione, ut in exhausto
Machinæ Pneumaticæ contingit, aer
separatur à corporibus, & elas-
ticus est. Alii autem vapores, qui
à corporibus separantur, elastici
non sunt. Sed nec concedimus at-
queos vapores fieri elasticos, eo
quod egrediantur à sphæra attrac-
tionis eorum. Nam & vapores
hydrargyri, opè caloris à sphera e-
grediuntur attractionis, nec tamen
evadunt elastici. Hydrargyrum,
oleum, & resina terebinthina mu-
tu se se attrahunt, adeo ut vel le-
vi tactu uniantur, & tamen tria il-
la mixta effugiant, ubi aquam tan-
gant. Quomodo igitur eodem tem-
pore vim simul attrahentem ha-
bent, & repellentem? Ajunt quidem
Newtoniani, vim attrahentem a-
gere in parva distantia, repellen-
tem vero in majori, præindeque par-
ticulas trium illorum mixtorum se
se invicem atrahere, quia minimam
inter se distantiam habent; at cum
majorem servent ab aqua distan-
tiam, ab ea retrahunt se se, & il-
lam repellunt. Verum hæc ipsa res-
ponsio nihil proficit. Nam si hy-
drargyrum cum sale acido oleum
cum alkali, & resinam terebinthi-
nam cum rubro ovi conjungas,
vim servant inter se attrahentem,
& aquam etiam attrahunt, non

repellunt; licet dicantur majorem habere distantiam à particulis aquæ. Ad ultimum. Si Muscarum pedes vi gaudent repellente, quid in caussa est, quod aquam quidem repellant, non tamen vitrum, nec glaciem, à quibus eas pendere sæpe conspicimus? Forte dicent Newtoniani, Muscarum pedes vim habere attrahentem respectu vitri, & glaciei. At si veram quæras rationem, cur Muscæ in aqua ambulent, nec tamen pedes suos madefaciant, caussa non à materia, quæ unguis earum componit, repetenda est, sed à forma unguarium oritur. Hæ enim hirsutæ sunt, multisque constant subtilissimis velleribus, intra quæ aer continetur, unde particulæ aquæ ingredi prohibentur: quo modo conspicimus tenue velum aeris in subtili quadam lanugine implexi super brassicæ pampinos impedire, ne aquæ particulæ in pampinos penetrent. Quod fit, ut lanuginem illam auferre debeat, qui velit folia brassicæ madefieri. Muscæ autem subtilissimis unguis suis adhærescunt insensilibus vitri, & glaciei asperitatibus.

Probatur 2. pars nostræ assertio-
nis, quam docet Scotus in 2. d. 13.
& in 4. d. 10. q. 9. Quamquam fa-
teamur, determinatam duritiem
esse dispositionem quamdam ad re-
flexionem: elasticitatem vero quandoque augere, posse & adjuvare,
reflexionem ipsam.

Multa corpora, quæ elaterio

(saltem sensibliliter) carent, si in alia projiciantur elaterio similiter carentia, aliquantulum resiliunt, & reflectuntur. Sic lapis in lapide projectus resilit, & eburnea pila in incudem cades reflectitur. Porro in istis corporibus appetit sensibilis reflexo, nec tamen sensibile extat elaterium. Atque adeo elaterium non rite constituitur causa illius reflexionis. Proinde dicendum est reflexionem trahere originem suam à primo impellente. Hinc quo major est vis projiciens, co major est reflexio; quatenus impetus projecto impressus ex objecti corporis duritate ad retrocessionem determinatur. Durities autem se habet veluti necessaria dispositio; ea quippe sublata, nulla extat reflexio. Neque tamen inficiamur, elaterium sæpe reflexionem fovere, unde fit, ut quæ corpora elastica sunt, pro majori vi sui elaterii, eo majorem habeant reflexionem, cum impressus à projiciente, vel à gravitate impetus augeatur ad ipsius elasticæ virtutis actionem.

Inde vero appetit, etiam ipsam Refractionem à primo impellente caussari, sic tamen ut illius determinatio repetenda sit à medii diversitate. Unde varia fit refractio pro majori vel minori medii densitate: ut erit dicendum in sequenti disputatione.

Objicies. Corpora quæcumque solida ex alterius incidentia introflectuntur. Nam si globus eburneus impingat in incudem, altius
re-

resilit, quam si in ligneam tabulam incideret. Quod non contingit, nisi quia incudis partes pressæ se se restituunt, fortiusque globum repellunt: quemadmodum in folli inflato appareat, cuius partes impingentes in durius deprimuntur, unde & resilunt fortius. Et sane dum pilla impingit in parietem premit partes parietis. Quippe si multæ pilæ simul in parietem projecterentur, ita ut aquarent impetum caussatum à tormento bellico, paries rueret; quatenus unaquæque pila partem sibi proportionatam premeret. Hinc pilæ in parietem projectio tremorem efficit. Ergo &c.

Respondetur, non videri satis probabile, eburneum globum loco movere posse partes incudis se ipso diores. Ratio ergo illius effectus ex majori incudis duritate, & levitate est repetenda. Refert autem Dominus le Bernier, folliculum inflatum, pressum in pavimentum, se se quidem restituere, sed non resilire. Neque tamen inficiamur, elaterium fovere ipsam reflexionem. Quemadmodum vero plures virgæ simul unitæ dividi, ac scindi non possunt, etsi de se facile unaquæque dividatur. Ita plures pilæ, maximusque impetus destruere possent, ac demollire parietem, non tamen quicumque impetus vallet commovere partem illam parietis aliis unitam, quam prius à cæteris disjunctam repelleret. Quare à partibus disjunctis ad se ip-

sas conjunctas argumentari non licet. Tremor demum ex aeris percusione caussatur: ut in præcedenti quæstione diximus.

Hæc de reflexionis, & Refractionis caussa. Solet autem hic disputari, utrum in puncto reflexionis detur quies? Qua in re, plerumque saltem nullam tunc haberi quietem dicimus. Cum enim à principali projiciente motus procedat, nec multiplex si motus ipse, sed unus, etsi varias habeat determinationes, nulla ibi subinde motula est, qua motus continuatio tollatur. Neque confundenda est duratio instantanea contactus projecti cum ipsa quiete, alioquin mobile deberet dici quiescere in singulis partibus spatii, quod percurrit, quippe non discedit ab illis, quandiu illas tangit.

QUÆRES.

An omnia corpora dura, & solidiora sint elastica.

ID affirmant Recentiores, & docent illa secundum partes insensibiles compressionem pati, & postea resilire, & se se restituere. At nos arbitramur, corpora solidiora, ut sunt incus, campanum æs, crassiora marmora, eburnæ pilæ, non habere vim elasticam.

Etenim nulla ratio nullum experimentum est, quo probari possit compressio, & elaterium in partibus illorum corporum solidido-

dorem. Nec facile persuadere potuerunt hominibus Recentiores, crassissimum, solidissimumque campanum æs ex mallei percussione figuram suam rotundam in ovalem mutare, partesque illius postea resilientes intra circulum rotunditatis comprimi; aut incudis partes vel levi ictu inflecti. Quæ tamen affirmant. P. Pace tom. 1. Physicæ, tractatu 3. c. 12. & alii passim Recentiores docent. Tanta enim illorum corporum durities, ac consistentia elaterio adversatur, atque illud impedit. Nec facile rem demonstrare poterunt Recentiores, quibus hoc ipsum manet probandum. Quod enim sensibiles quidem partes inflexibilis dicant, insensibiles autem flexibilis; hoc est quod demonstratione indiget. Ex reflexione, inquiunt Recentiores, id apertum fieri, cum pilæ ex prædictis corporibus reflectantur, tum ex tremore, sive sono, quem illa corpora edunt. Sed reflexionis quidem alia erit caussa exponenda in questione sequenti. Campanæ autem tremor nec non incudis, aliorumque solidorum corporum, non jam in illorum partibus compres- sis, elasticis, ac resilientibus habetur; sed omnia explicari possunt ex eo, quia cum in eorum poris magna sit copia aeris crassioris, & subtilioris, aliorumque halituum, commoventur hæc primum ab aere externo, tum successive sibi invicem tremorem communicant. At cum Recentiores velut caussam sen-

sibilium effectorum constituunt partes insensibiles, & earum insensibilem motum; non jam mechanicam exponunt Philosophiam, sed notissimi effectus ignotum omnino habent principium, quod ne mente quidem consequi possumus: ut ad similia sœpe diximus. Fatum tamen solidiora corpora quandoque secundum se tota moveri posse à vehementissimo aeris im- petu. Sic aer parietes non satis crassos concurrit, qui & restituunt propter partium colligationem; quæ firmioribus corporibus innectitur. Ergo &c.

Objicies, Campana, & incus malleo percussæ tremere ex omni parte videntur; idque applicata manu quisque poterit experiri. Immo si nonnulla granula milii in extrema incudis parte constituas, & alteram illius extremitatem clavi percutias, videbis granulla illa saltitare, lucumque mutare super ipsam incudem. Quod certe explicari non potest, nisi dicatur incudis partes fidum more hoc, & illuc convolvi ob per- cussionem. Similiter si trabem in una extremitate percutias, sonum in altera extremitate percipies. Si calicem aqua repletum digito per cutias, aqua in eo contenta com- movetur, & tremore concipi- pit. Rursus si tibiæ super lignum viride, non expolitum, nec con- cavum extendantur, longe diver- sum sonum edunt, ac si lignum esset debita dispositione donatum;

quia

quia nimirum ligni partes in priore casu non sunt capaces vibrationis. Si surdus quidam teneant dentibus extremitatem citharæ sonum percipiet; non nisi quia ligni partes commovent aerem contentum in illius ore. Narrat etiam P. Pace, militem quemdam in Hungaria, obincidentibus Cæsareis Civitatem quamdam Turcarum, applicata a terra aure, nocturno tempore, audivisse strepitum, quem è civitate obsessa educti quam plures equi caussabant. Recensent quodque, se in Ripa Salodii, ubi Lacus sinum habet latitudinis duorum milliarium, & longitudinis quinque, aure ad litus ad mota, deficiente jam die, & aquis placide fluentibus, audivisse distincte omnia verba Piscatorum in altera rīpa extantium, quasi essent sibi præsentes. Hæc autem sine motu partium terræ nullatenus contigissent; Neque enim erectus homo poterat audire. Ut refert Wolfius in Cosmologia §. 488. Sint duo globi eburnei, (fig. 2. tab. 5.) vel vitrei, æquales, & ex filis suspensi juxta se invicem. Unus eorum quiescat, & ea parte, qua alterum contingit, atramento, vel alio colore infectatur. Antequam color siccus evadat, globus alter nullo colore infectus elevetur, & in eum denuo demittatur. Facta percussione apparebit majorem globi incurrentis partem atramento, vel colore esse infectam, quam contactus permittat. Evidens adeo est,

in percussione fieri debere compressionem, adeoque figuram mutari. Experimento pariter alio idipsum nititur ostendere. Ut enim D. Mariote expertus est, si eburneum globum (fig. 4. tab. 6.) dimittas incudem sebo illitam, non solum vistigium suum majus relinquit, quam contactus permittat, sed eo majus, & amplius vestigium imprimitur, quo altius decidit globus: & illud quidem vestigium semper rotundum est. Ergo &c.

Respondeatur, magnum in campana tremorem percipi; cum secundum se totam dimovetur: percipi etiam tremorem quemdam, dum ipsa è loco suo non dimovetur. Sed hujusce tremoris caussa rite exponitur, quin partes illius inflæcti, figuramque mutare dicamus. Idemque de incude valet. Etsi verum sit, percussionis vim in id contendere, ut partes illorum corporum loco dimoveat, quæ tamen resistunt soliditate sua, consistencia. Cum igitur in eorum corporum meatibus multum aeris continetur, cum aer illa ambiens commotus resiliat, & in ea rursum feratur; hinc tremor particulis aeris communicatur, quæ intra illorum poros continentur; unde tremor ille percipitur. Eadem de causa succutiuntur, & commoventur milii grana in una extremitate incidis consistentia; quia nimirum commotus percussione aer aliis particulis intra poros contentis tremorem

rem communicat: haec vero aliis successive atque propagatione, & ex majori incudis resistentia augescit aeris reflexio, & commotio; unde & grana excutiuntur: maxime cum ob rotundam eorum figuram facile aer se se subillis constitutat. Eadem quoque est ratio in trabe. Quare id solum evenit in iis lignis, quæ aut amplioribus poris abundant, aut excavata sunt; quoniam in istis facilis est illa tremoris communictatio aeri poros occupanti, etiam subtiliori, nam & in isto sonus potest propagari: ut notavimus disput. 2. q. 6. In calice aqua commovetur ex aeris commotione per manum facta, etiamsi aqua occupet solam calicis medietatem, quia aer à manu commotus non immediate communicat tremorem aquæ, sed aeri proximo.

Diversitas soni non ex majori, aut minori partium ligni elaterio repetitur, sed quia, ut optime docet Aristoteles, si corpus expolitum siccum, & concavum fuerit, eo validius, & fortius reflectitur aer in illud impingens, atque ictus iterantur, & multiplicantur, eos non impediente, sed coadjuvante termini dispositione. Hinc sparsis in orchestra paleis, vox minor auditur, & templi parietes aulæis convestiti vocem Concionantis frangunt. Leviora vero, & politiora & concava sonum adjuvant, quia reciprocante intra ipsa aere, maiorem motum concipit, vel quia perinde ut lux à concavo speculo,

Tom. II.

sic sonus à cavo corpore reflexus concurrit in unum, & intenditur. Surdaster arrepta dentibus cithara sonum percipit, quia aer tum intra cithara poros contentus, tum etiam exterior subit in os illius; quoniam tunc os non est omnimode clausum.

Nec Pater Pace suadere nobis poterit, simplici humana voce litora ipsa concuti, & commoveri, etiam ad distantiam quinque miliarum. Quare ex sola aeris successiva commotione repetidebet ratio, cur strepitus, & voces in tanta distantia percipiuntur; aut si mavis, id quadam Echo specie dicendum est evenire. Placidus enim aquæ fluxus vocem à se, seu aeris commotionem repellebat resistentia sua, eique liberum supra se iter permettebat. Quare commotus aer cum recta progrederetur, in partes litoris incidens, aerem ibi contentum commovebat, tumque subeunte aere partes litoris, ex commotione aeris contingit, ut verba audirentur: & quidem solum admota litori aure, quia ibi solum tanta reperitur commotio, quanta necessaria est ad aures commovendas, organumque nostrum percutiendum.

Illa etiam major attramenti communicatio non à pressione pilæ repetenda est, sed facile sine ea explicatur. Cum enim pila quælibet multos habeat poros, liquida eos subeunt, tantoque major est liquidæ communicatio, & expansio,

LII quan-

quanto major est impetus, quo liquidum in illa corpora conjicitur. Potro quando pila non infecta atramento incidit oblique in aliam pilam eo colore imbutam, hæc profecto locum cedit, rursumque visuæ gravitatis ad proprium se se restituit locum medium; proinde tunc in priorem innititur, & illi attramentum cum impetu superinfundit, quod exinde in poris illius magis dilatatur pro ratione impetus. Hoc autem non contingit in simplici contactu in quo impetus ille non habetur. Impingens itidem pila tenuorem facit attramenti medietatem, quare cum illud siccis jam extremitatibus diffluere nequeat, circa medium rursus confluit, atque in majori copia superinducitur pilæ impingenti, ibique per illius poros pro impetu magis diffunditur.

Alterum quoque postremo loco allatum experimentum sic expendimus, quin pilæ partes comprimi dicantur. Etenim cadens pila deorsum propellit multum vappidi aeris, eoque majorem impetu illi communicat, quo ex altiori loco pila ipsa descendit. Hinc aer tanta vi contra sebum impulsus, comitante pila, sebique partes commovente, habet unde illarum commotionem & ipse efficiat majoremque redditum: & quidem secundum rotunditatem: quoniam rotunda pila circumundiæ æqualiter aerem premit, deorsumque trudit æquali impetu. Maxime cum & compressus aer à pilæ medietate, inter ipsam, & sebum,

exitum sibi faciat, & diffluentes sebi partes ex pressione, quæ fit in medio, locum sibi invicem cedant.

Colligite ea corpora, quæ elastica sunt, dici posse perfecte elastica. Negat quidem id Newtonus, quoniam dum congreguntur, vis, & celeritas regressus à vi, & celeritate congressus aliquantulum deficit. Sed ratio ista non satis idonea est, ut notat ex Riccardo Rizzetus in epistola ad Franciscum Mariam Zanottum, de Collisione corporum. Etenim quando duo corpora elastica, v. g. duo folles aere inflati, inter se mutuo congreguntur, tremorem quemdam concipiunt internæ illorum partes: quemadmodum ex sono, quem edunt in ictu, manifeste colligitur. Quamobrem etsi vis elastica, quæ in illis excitatur, dum colliduntur, plane sit æqualis vi ictus, verumtamen tota vis elastica in distrahit, repellendisque, à congressu follibus non insumitur, sed pars illius dumtaxat, altera in tremore efficiendo insumpita. Alioquin, si securus res se haberet, summa virium reflexionis, & tremitus excederet vim elasticam, ac proinde effectus major esset efficacia suæ caussæ. Quod repugnat. Ea igitur corpora perfecte elastica dicenda sunt, quatenus tantam resiliendi vim habent, quanta potest esse vis compressionis.

QUÆSTIO QUARTA.

De præcipuis Legibus motus.

U B I
Mechanica principia exhibentur.

EAMDDEM MOTUS QUANTITATEM AB INITIO MUNDIUSQUE IN PRÆSENS, NON QUIDEM IN SINGULIS MATERIAE PARTIBUS, SED IN TOTA MATERIA, CONSERVARI A DEO CARTESIUS DOCUIT, PART. 2. PRINCIPIORUM, NUM. 36. MOTUMQUE SUBINDE NON DESTRUÍ, SED AB UNO IN ALIUD CORPUS TRANSFERRI. AT NULLA SUFFICIENTI RATIONE ASSERTUM SUUM CARTESIUS PROBAT, & CUM MOTUS EX IPSIUS SENTENTIA NON SIT ULTRA RES A CORPORE MOTO DISTINCTA, EIENQUE SUPERFUSA, ILLIUS TRANSLATIONEM PERCIPERE NEMO POTEST. QUOD AUTEM INQUIUNT CARTESIANI, DEUM ESSE IMMUTABILEM, PROINDEQUE NUL- LUM MOTUM DE NOVO CREARE; ID NUL- LIUS MOMENTI EST. DEI ENIM IMMUTABILITAS NON EST *OBJECTIVA*, SED *FORMALIS*; UNDE & MUNDUM PRIMO CREAVIT DEUS SINE SUI MUTATIONE, & RATIONALES ANIMAS DE NOVO CREAT. HINC & FIGURÆ RERUM, & CORPO- RUM COMBINATIONES MUTANTUR, DEO JAM AB ÆTERNO OMNIA ORDINANTE, & SECUNDUM SUAM UNIVERSALEM DISPO- SITIONEM CONSERVANTE.

PRIMAM PORRO GENERALEM MOTUS LEGEM A CARTESIO, NEWTONO WOL- FIO, ALIISQUE PASSIM RECENTIORIBUS CONSTITUTAM, HANC ESSE DECLARANT:

UNAQUEQUE RES MANET, QUANTUM IN SE EST, IN EODEM SEMPER STATU, NEC UNQUAM MUTATUR, MISI CAU- SIS EXTERNIS. QUOD IPSEM ALII SIC EXHIBENT: *CORPUS*, QUOD MOVERUR, QUANTUM IN SE EST, SEMPER MOVENTUR DONEC ALIORUM CORPORUM OCCURSU STA- TUSILLE MUTETUR: SIVE DONED A CAU- SA ALIQUA EXTERNA, & PARTICU- LARI CORPUS ILLUD DETERMINETUR AD QUIETEM.

JAM VERO LEGEM HANC VERAM ESSE, SI DE CORPORE INTELLIGATUR GEOMETRI- CE SPECTATO, QUATENUS SOLA EXTENSI- NE CONCLUDITUR, & AB OMNIBUS suis AFFECTIONIBUS ABSTRAHIT, AC VELUTI IN- DIFFERENS INTELLIGITUR AD GRAVITATEM, FIGURAM, MOTUM, & QUIETEM, LI- BENTISSIME FATEMUR.

AT UBI CORPUS PHYSICE CONSIDERE- TUR, & UNUMQUODQUE PECULIAREM NA- TURAM SUAM, PROPRIASQUE AFFECTIONES PRÆ SE FERT, LEGEMILLAM UT CERTAM IMMERITO ASSUMI, IMMO & FALSAM ESSE TUEMUR. UT CERTA ASSUMI- TUR SINE SUFFICIENTIRATIONE, QUA RE- CENTIORES NON POSSUNT EVIDENTER PROBARE, GRAVITATEM NON ESSE COR- PORIBUS INTRINSECAM. AT SI GRAVITAS INTRINSECA SIT, CORPORA PER EAM NI- TUNTUR, AD LOCUM SIBI CONVENIENTEM, IN QUO QUIESCAN. ERGO SI MOVEANTUR SURSUM, NON MANENT, QUANTUM IN SE IPSIS EST, IN EODEM SEMPER STATU: SED, È CONTRA EX SE STATUI ILLI REPUGNANT, & CONTRARIUM PETUNT MOTUM DEORSUM. CUM AUTEM EX DICTIS DISP. 4. q. 5. GRAVI- TAS SIT INTRINSECA, HINC LEGEMILLAM ESSE FALSAM COHVINCIMUS.

Unaquæque etiam res naturalis proprias affectiones, & locum naturæ suæ convenientem expostulat: ut disserte docet S. August. à nobis laudatus, tum motus corporibus impressus finitus est; & vis creata, quæ corpora movet, finita prorsus est, & limitata. Ergo motus corporum etiam ex se se cessare debet, & destrui; adeoque &c.

Si corporis figura sit eidem conaturalis, eamdem non amittit, nisi vi extrinseca, ut de loco naturali diximus. Stat autem motum aliquem esse uni corpori violentum, & naturalem dici respectu totius compositi, cuius velut pars esse intelligitur illud corpus. Ita sanguinis in corpore humano motus est naturalis relate ad humanum corpus, est autem violentus, cum sanguis sursum agitur. Solis motus circa Tellurem naturalis est respectu Universi, neuter vero eidem Soli, quia nihil ostendit, Solem aut repugnare circulari illi motuit, aut passivam præ se ferre inclinationem ad illum.

Secunda lex generalis motus à Cartesio hæc dicitur: *Unaquæque pars materiae seorsim spectata non tendit unquam, ut secundum ullas lineas obliquas pergit moveri, sed tautummodo secundum rectas; et si multæ sepe cogantur deflectere proper occursum aliarum.*

Sed si corpus geometrice speletur, illud tanquam pura extensio concipitur, atque ex se se omnino indifferens intelligitur ad mo-

tum, & quietem, adeoque indifferens est ad motum, & quietem: ad motum rectum, & obliquum. Considerato autem corpore physice unumquodque propriam natura sua figuram expostulat, aliud rotundam, aliud ramosam &c. proindeque petit partes suas per lineas obliquas moveri, & disponi juxta peculiarem suam formam essentialiem, quam Recentiores in mole, figura, & motu constituant. Falsa igitur est ea lex quocumque modo spectetur corpus. Quod si Recentiores abstrahere etiam velint à forma essentiali corporum, nescio, quid conferre queant ejusmodi leges ad rerum naturam explicandam, cum omnia corpora, quæ in ista Universitate existunt, eadem sint determinata specificè, & essentialiter, propriisque instructa affectionibus.

Ex secunda illa sua lege motus hanc alteram colligit Cartesius: *Cörpera in gyros acta conantur recedere in centro sui motus.* Nam si quidquid movetur, per rectam lineam pergit moveri, dum corpora in gyros aguntur, eadem nituntur moveri per lineam rectam, quo fit ut à centro sui motus circularis recedere conentur. Id ipsum autem ita constituit Cartesius, ut velit conatum recendi à centro exerceri per quascumque lineas secantes. Linea autem secans ea est, quæ à circulo per alterum ipsius arcus extremum producitur: ut linea CC in figur. 5. tabul. 6. (& ita-

ita deinceps). Alii vero Recentiores conatum illum recedendi à centro putant exerceri per lineas tangentes: cujusmodi est ea linea, quæ habens commune punctum in circumferentia, licet producatur, circulum non secat: ut in prædicta figura se habet linea A B.

At experientia compertum est, corpora, quæ in gyros acta recedunt à centro sui motus, id exequi per lineas tangentes. Sic v.gr. si corpora ex partibus invicem dumtaxat contiguis, & adhaerentibus composita ponantur supra laminam horizontaliter collocatam, & valide circumactam, patiuntur illa quidem suarum partium dissociationem, atque ita recessum à centro sui motus. Sic arenæ granula dissilient è rota; Non dissiliunt tamen per lineam secantem, sed, per tangentem circuli, supra quem volvebantur. Alioquin quando ad extreum marginem laminæ circumactæ perveniunt, atque ita liberam habent facultatem dissiliendi recta per secantes, non dissilirent per tangentes mutato conatu, & tendentia. Ergo dicendum est, corpora in gyros acta non conari, ut recedant à centro sui motus per lineas secantes.

Deinde cum Cartesiani naturales inclinationes, & inergiam omnem rebus creatis admant, corpus ex se se vim habere non potest recedendi à centro, nec vis hæc à motu circulari oriri potest, cum iste motui recto opponatur. Hinc

rota valide circumacta secum abripit aerem, & festucas, quas tamen repellere deberet, si circularis motus compelleret corpora ad recedendum à centro sui motus.

Arbitramur autem iis tantum corporibus, quæ gravia sunt, & in motu violento detinentur, concedendam esse eam vim recedendi à centro: & quidem per lineas tangentes. Etenim experimenta omnia in iis solis corporibus eveniunt, in quibus gravitatis actio ad proprium connaturalem locum illa determinat. Sic lapis in funda rotatus (figura 8. tab. 6.) distendit gravitate sua habens fundæ, & quamvis quia à funda detinetur, id efficiat per lineas secantes, tamen dimisso funicularum altero recedit lapis, non per lineam secantem, sed per lineam aliquam tangentem ultimæ rotationis: quod quidem & ex pre concepto impetu, ac directione caussari intelligitur. Sic globulus æneus, sic tritici grana rotæ circumactæ superposita, tum ex propria gravitate, tum ex impetu impresso dissiliunt per tangentes. Ergo cum vix illa recedendi à centro ex gravitatis actione proficiatur, atque in motibus violentis contingat; nulla ratio nos cogit, ut in aliis motibus, qui violenti non sunt, aut in corporibus, quæ in Tellurem non gravitant, eundem illum conatum recedendi à centro adstruamus, quoties eadem in gyros aguntur. Et sane hoc pertinet, experi-

men-

mentum Perrhaultii ; ut diximus disputat. 4. quæstione 5. quo ille deprehendit , globulum cereum ejusdem fere cum aqua specificæ gravitatis , injectum aquæ in gyros actæ , sic obsequitum fuisse motui ipsius aquæ , ut eundem semper circulum describere , neque à centro sui motus recederet. Nempe ostendit ejusmodi experimentum vim omnem recedendi à centro ex gravitatis actione potissimum saltem esse repetendam.

Quamobrem cum cœlestia corpora in gyros acta adspectamus , sufficiens nobis non subest ratio , qua dicere possimus illorum partes conari , ut recedant à centro sui motus. Sane illorum motum esse violentum , nihil est quod demonstret ; nec facile assentimur , si quis velit affirmare maxima illa cœlestia corpora in statu violento constituta à Deo fuisse ; atque in motu violento semper conservari. Rursus ea corpora in Tellurem gravitare non credimus ; & quamquam probabile videatur illa esse gravia ; istius tamen gravitatis centrum in singulis potius constitui debet cœlestibus corporibus : ut quæ partes Solem componunt , illæ gravitent in centrum Solis : quæ Lunam constituant , in ipsius Lunæ centrum exerceant vim suæ gravitationis. Nulla igitur ratio est , per quam affirmare debeamus , Solaris vel Lunaris corporis partes in gyros actas conniti , ut recedant à centro sui motus , vel recta in Tel-

lurem ipsam , vel extra illud idem corpus , cujus sunt partes.

Maxime vero id contendimus , quoties cœlestia corpora ex solidis partibus compacta sint : quod probabile satis est. Nam & in globo æneo valide circumacto conatus partium ipsius non videtur expendi posse. Si enim ejusmodi globus inter cuspides torni intra ipsum obfirmatas velocissime in orbem agatur , nulla in illius partibus vis esse potest recedendi à centro sui motus. Quippe ut existat partium ille conniunctus , necesse est partes centro proximiores plus solito impellere , ac premere eas partes , quæ sunt ad circumferentiam. Nec enim alia rite constitui potest causa. Atqui id mente assequi non possumus ; primo quidem quia partes illæ propter totius globi soliditatem non recedunt à centro , quare nec possunt impellere , ac premere alias partes ; secundo quia centrum ex una tantummodo parte constituitur , quo sit , ut si hæc pars pelleret alias , debere simul circumduque premere plures partes , atque simul tendere ad diversa loca. Quod absurdum est. Ergo media illa pars non nititur recedere à centro sui motus , nec ab illo recedit : quod ipsum de aliis solidi partibus videtur affirmandum.

Colligite , Naturam rite dici affectare rectilineum in suis operationibus , cum via illa agendi per rectam lineam sit facilitior , & expeditior , si nulla specialis ratio ex-

agentibus essentia proveniens , aliter expostulat : ut in corporum formatione diximus evenire pro rotunda , vel ramosa figurā , quam essentialiter pleraque exigunt.

Recentiores exhibit alias Leges motuum , quas ad examen revocare impræsentiarum non vacat.

De Principiis Mechanicæ.

Motus à Mechanica pendentes vocantur illi , qui diversarum machinarum ope exhibentur , quare Mechanica apud Physicos idem ac *Scientia Machinalis* , quæ videlicet nobis diversarum machinarum apparatus , atque usum exponit . Illius præcipua pars , quæ docet quomodo modica vi moveri possint etiam maxima corpora , appellatur *Statica* , quoniam Græcum vocabulum *Statics* idem sonat , ac scientia ; quæ de ponderibus ad æquilibrium perducendis , adeoque majori facilitate movendis pertractat . Statica genus est ; quod in duplice speciem distribuitur , nimirum in *Geostaticam* , & *Hydrostaticam* . Illa circa solidorum corporum seu terrestrium æquilibrium occupatur ; haec circa liquidorum æquilibrium versatur . Et de Hydrostatica quidem diximus disp . 2. qu . 3. Impræsentiarum igitur Mechanicæ exhibentes Principia : ut præstítit etiam Aristoteles in libro de Mechanicis Quæstionibus ; potissimum primam illam partem Geostaticam nempe , exhibebimus .

Ut autem distincte percipiantur ea , quæ postea dicuntur sumus ; oportet animadvertere , quid sint determinatio motus , celeritas motus , & quantitas ipsius motus : de quibus plura jam pridem notavimus . Determinatio motus est directio ipsius motus in unam potius , quam in alteram loci partem . Simplex tunc dicitur determinatio , quando ab una tantum causa profiscitur , à qua corpus in unam tantummodo loci partem dirigitur : ut cum gravia vi suæ gravitatis , si nihil obstat , recta feruntur deorsum . Composita vero est determinatio , quando à duabus vel pluribus caussis oritur : quarum unaquaque capax est dirigendi corpus in loca diversa : quod in horizontaliter projectis evenire notavimus quæstione secunda in fine .

De celeritate motus jam diximus post primam quæstionem . Est adeo celeritas motus relatio quadam ipsius motus , qua comparatur ad majorem , vel minorem extensionem temporis , & spatii prædicto tempore peracti . Celeritas autem alia est absoluta , qua nemppe corporis moveri intelligitur , quin comparetur ad alterius moti corporis celeritatem , alia vero relativa dicitur , ut ad alterius corporis celeritatem refertur . Porro celeritas ipsa non dimetur nec à massa , nec à volumine , sed ab extensione temporis , & à spatio peracto . Unde fit , ut distributis per mentem partibus spatii , distinguantur postea

stea secundum determinatum tempus gradus illi celeritatis, qui convenientiunt mobili peragranti prædictum spatium. Si corpus aliquod perpendiculariter cadat in alterum, celeritas illius respectiva idem est ac illius absoluta velocitas. Quod si corpus secundum lineam obliquam descendat per planum inclinatum, & immobile (fig. 6. tab. 6.) illius relativa celeritas dimittenda non est ex longitudine, vel gradibus in linea obliqua A B. peractis; sed ex longitudine, & gradibus linea perpendicularis A C, quæ dicitur à puncto, unde corpus descendit, usque ad planum: quoniam excessus ille, quo linea obliqua superat perpendicularem, non deseruit ut corpus plano approximetur.

Quantitas motus, per quam respondemus quæstioni factæ: *Quantis sit Motus?* est vis ipsiusmet motus, qua corpus aliquod, dum movetur impellit corpora sibimet obvia. Absoluta autem dicitur quantitas motus, quando secundum se se consideratur; Relativa vero cum ad alteram refertur, & illi comparatur. Porro utraque quantitas motus æstimanda est ex mole, aut pondere corporis mobilis, & ex motus velocitate. Sic si corpus duram librarum moveatur gradibus quatuor celeritatis, & corpus quatuor librarum moveatur duobus gradibus velocitatis; itus idem semper erit, quando in aliud corpus impinget. Quo sit, ut celeritas motus æque æstimant-

da sit & ex massa, & ex velocitate.

Ita pariter si duo corpora mole æqualia celeritate pariter æqualia moveantur; tunc in utraque tantumdem erit motus. Quod si illorum alterum duplo celerius moveatur, duplo major erit in illo quantitas motus. Et quando corpus aliquod altero majus æqualem cum isto velocitate moveatur, major etiam erit in illo quantitas motus pro suæ molis magnitudine: Hinc si certa vis impendatur, ut corpus librale, intra minutum secundum unius horæ, ad quinquaginta pedes projiciatur: eadem vis necessario duplicanda erit, ut idem corpus ad centrum usque pedes intra idem tempus propellatur; & dupla quoque in eo futura est motus quantitas: ut docet Aristoteles lib. 7. Physicorum, cap. ult.

Quamobrem respondent sibi quantitas motus, & corporis mole, ac illius velocitas. Utrum vero quantitas, seu vis corporis moti producatur, atque æstimari debeat ex multiplicatione massæ in simplicem velocitatem; an ex ductu massa in quadratum velocitatis; altercantur invicem Mathematici, quibus nos litem dirimendam relinquimus.

His igitur breviter expositis, illud in primis in Machina Facultate certum est; Nullum grave descendere, nisi centrum gravitatis descendat, & linea directionis extra illius basis excurrat. Centrum

por-

porro gravitatis est punctum in quolibet corpore gravi positum, ex quo si appendatur corpus, omnes corporis partes servabunt quemcumque situm illis tribueris: adeoque erunt in æquilibrio. Exemplum habetis in virga ferrea, quæ si media sui parte filo suspendatur, ita ut in neutrā partem inclinet, & sit in æquilibrio; illud punctum, ex quo suspenditur, erit centrum gravitatis. At si virga non sit ubique homogenea, sed partim, v. gr. ferrea, partim lignea, punctum in medio suæ extensionis positum, non est centrum gravitatis, quamvis sit centrum magnitudinis, seu extensionis: sed tunc centrum gravitatis recedit versus partem materiæ graviorem. Quare licet centrum magnitudinis, & centrum gravitatis in homogeneis sint idem punctum, non tamen in heterogeneis. Jam vero cum grave deorsum tendat, nempe ad terræ centrum, quod ideo centrum gravium appellatur; ipsius motus fit per quamdam lineam cui centrum gravitatis semper insistit; & linea directionis vocatur, quæ describi solet: linea recta, quæ à gravitatis centro ad centrum gravium porrigi intelligitur. Hoc itaque sensu tanquam principium certum assumitur; grave descendere non posse, nisi centrum gravitatis descendat; nec posse centrum descendere, nec cadere, quoties linea directionis intra illius bassim permaneat: descendere autem, dum hæc linea extra illius basim excurrat.

Tom. II.

Ex iis, quæ diximus de motus quantitate sequitur, quod si in balance (fig. 7. tab. 6.) duo corpora pondere æqualia bilancibus æquilibris ponas, ea erunt in æquilibrio: hoc est unum ab alio non superabitur, siquidem æqualiter distant ab axe circa quem rotatur jugum bilancis. At si corpora sint mole inæqualia, & ad extrema virgæ ferreæ appendantur, (fig. 9. tab. 6.) ita tamen ut unum, sit quater minus alio corpore, sed quadruplo longius à fulcro, seu punto fixo removeatur; tunc ea quoque futura sunt in æquilibrio, quia corpus quadruplo majus non descendit, quin velocitatem quadruplo majorē causset in alio corpore, illudque sursum evehat. Cum autem motus quantitas à mole, seu pondere corporis, & velocitate repetatur; hinc sic ut tantumdem esse debeat motus in corpore quater minore, sed quadruplo celerius moto, quantum in alio corpore, quod mole, seu pondere quadruplum est, sed quadruplo lentius motum; adeoque neutrum ex illis corporibus prævalebit sed ambo immota consistent in æquilibrio.

Proinde id velut axioma apud Mechanicos receptum est: *Quoties duo pondera ex utraque parte virga appensa, inter se sunt in ratione reciproca molis, seu ponderis, & velocitatis, seu distantia à punto fixo: id est, quantum unum vincit mole, seu pondere, tantum ab altero velociitate, aut distantia à punto fixo vin-*

Mmm

c.

citur ; ea sunt in æquilibrio. Nimirum quia tunc æqualis est in utroque vis ad agendum, & resistendum.

Ita si *Statera Romana* (figura 10. tabula 6.) adhibeatur, & ex ejus uncino corpus duodecim librarum pendeat, ex puncto autem unciarum duodecim pendeat corpus librale, ea corpora futura sunt in æquilibrio. Ratio est, quia uncinum, ex quo pendet corpus duodecim librarum uno pollice vel una uncia distat à punto, in quo suspenditur Statera: corpus autem libræ duodecim unciis. Quare non minor motus requiritur in corpore majori, ut una uncia descendat, quam in corpore minori, ut duodecim unciis ascendat: illud enim descendere nequit, nisi hoc ascendat. Quapropter cum illi motus æqualem vim habeant, & sint invicem contrarii; necesse est, ut corpora in æquilibrio sistantur. Oppositum autem suo modo contingit mutata distantia.

Hinc apparet, quod, si æquipondii loco vim aliquam, aut potentiam adhibeas, quam *momen-*
tum Mechanici appellant : illudque puncto duodecim unciarum applices; verbi gratia, si manu, aut digito statere brachium deprimas ea vi, quæ unius libræ pondus superaret, corpus duodecies gravius in uncino suspensum attolles. *Quod si momentum remotius applices*, tunc etiam facilius elevabis corpus illud in uncino suspensum:

eaque rationem vires in immensum possunt augeri. Quocirca Archimedes punctum dumtaxat fixum in aere postulabat, ut Tellurem loco dimoveret.

Hoc igitur principio utitur Mechanica, seu Statica, ut magnas moles modica, vi possit movere; & machinis utitur, quæ omnes ad *Vectem*, & *Planum inclinatum* commode referuntur; nam ex *Vecte Axis in Peritrochio*, & *Trochlea*: ex plano autem inclinato *Cuneus*, & *Cochlea* ducuntur, de quibus breviter dicendum est.

Vectis est oblongus quidam palus ex materia solida constans, qui ad ingentia pondera facilius movenda commodissime adhibetur. In eo autem tria sunt distinguenda, potentia scilicet movens, seu momentum C (figur. 1. tabul. 7. & ita deinceps), resistantia seu pondus A, & fulcrum, seu punctum fixum B. *Triplex genus vectis* reputatur, prout pondus, & potentia ad punctum fixum comparantur. Vel enim punctum fixum inter potentiam, & pondus constituitur: & tunc habetur primum genus vectis: ut in praedicta figura. Vel idem fulcrum in parte extrema collocatur, & pondus inter fulcrum, ac potentiam: & secundum genus vectis dicitur. (fig. 2. tab. 7.) Vel tandem potentia inter fulcrum, & resistantiam collocatur: & tertium genus vectis apparet (figur. 3. tabul. 7.) In primo vectis genere quantum distantia potentiae à ful-

ero superat distantiam fulcri à resistentia , tantum potentia superat resistentiam. Atqui ita si spatium inter potentiam , & fulcrum sit decies longius , quam spatium aliud inter fulcrum , & resistentiam , resistentia autem , sive pondus sit centum librarum ; dummodo potentia motrix decem libris , & paulo amplius æquivaleat ; ipsa superabit resistentiam , & attolleret pondus : et tamen lege , ut cum potentia decem unciiis , & paulo amplius descendet , pondus unius tantum unicæ spatio sursum efferatur : propter allatam rationem. Idem fere accidit in aliis vēctibus , nisi quod in tertio vēctis genere aliquid contrarium evenit , cum nempe potentia nimis accedit ponderi. Statera Romana est vēctis primi generis , ut considerati apparent.

Axis in Peritrochio (figur. 4. tabul. 7.) est mechanicum instrumentum ponderibus levandis aptum , in quo cylindrus , quem axem vocant , fulcris ex utraque parte sustinetur , circumpositum habens tympanum , quod peritrochium dicitur , in cuius ambitus foraminibus ad id factis , infinguntur baculi teretes , qui radii appellantur : quibus applicata vis peritrochium cum axe vertit , & convoluti funis ope pondus attollit. Hæc machina refertur ad vēctem primi generis. Concipienda est ergo linea fixa , & immobilis , circa quam volvitur cylindrus , & in ea punctum fixum : resistentia vero ,

sive pondus sustinetur ad superficiem tympani : & potentia ad radiorem extremitates : quæ potentia magis recedit à punto fixo , quam pondus. Unde quantum distantia potentiae superat distantiam ponderis à punto fixo , tantum ejus superat resistentiam ; quare quo radii longiores erunt , eo facilius , attolleretur pondus.

Trochlea (fig. 5. tab. 7.) est machina uno , vel pluribus orbiculis constat circa suos axes volubilibus , quibus circumposito fune pondera sublevantur , ac trahuntur. Si Trochlea sit simplex , id est , si unito constet orbiculo , illa non auget vires potentiae motricis , nam in ea æqualis est motus tum ponderis , tum potentiae ; quantumenam ascendit pondus ; tantum descendit potentia : unde totum emolumentum in hanc trochlea est , quod funis non atteratur ; & facilius circa orbem moveatur. Si autem trochlea duplice orbiculo constet , ita ut funis altera sui parte clavo fuerit alligatus , & ex altera parte à vis manu , seu potentia attrahatur ; tunc potentia erit dupla , quatenus si per trochleam simplicem trahere valebat pondus quinquaginta librarum , per hanc alteram compositam ex duobus orbiculis trochleam trahere poterit pondus centum librarum. Ratio est , quia in hoc casu licet pondus sit in ratione dupla ad potentiam , potentia tamen erit in ratione dupla ponderi quo ad velocitatem , quia dum

pondus movebitur eo intervallo, quod intercedit inter unum, & aliud, potentia duo funis segmenta adducet, quæ duplo spatio æqualia sunt; adeoque duplo celerius movebitur; ac proinde ejus vis erit dupla. Unde si orbiculi plures, & plures sint, tantumdem augabitur potentia.

Planum inclinatum (figur. 6. tabul. 6.) vocamus illud, quod cum linea horizontali angulum efficit acutum. Quo minor autem est angulus, eo magis planum erit inclinatum. Utimur *plano inclinato*, ut graviora pondera faciliter attollamus, vel demittamus. Hæc autem est regula, quæ potentiam inter, ac resistantiam est; ut quantum linea referens *planum inclinatum* excedit lineam perpendicularē, tantum potentia superat resistantiam, sive pondus; ideoque si linea ducta sit dupla linea perpendicularis, vis quinquaginta librarum futura est in æquilibrio cum pondere centum librarum.

Ad *planum inclinatum* referuntur *Cuneus*, & *Cochlea*. *Cuneus* (figur. 7. tabul. 7.) pro corporibus findendis, seu dividendis adhibetur: ut vulgo patet. *Cochlea* (figur. 8. tabul. 7.) pro ponderibus attrahendis, vel dimittendis usurpatur. Quæ omnia facilius innotescunt, ubi eadem apud Artifices intuemur. Ea tamen lex semper servanda est, ut quidquid virium potentia movens acquirit,

id omne longiori spatio compensari debeat.

Ad vectem pariter revocari possunt *Rotæ dentatae* (figur. 9. tabul. 7.). Quo enim plures sint rotæ, quarum dentes se se mutuo aptissime stringant, eo facilior redditus motus corporum elevandorum, & potentia motrix augetur, majorque fit istius celeritas, quam pondus attollendum.

Ex dictis porro varia explicantur phænomena. Et primo assignatur ratio, cur *Funambuli*, qui in partem dexteram nutant, brachium sinistrum protendant; qui in sinistram, brachium dextrum; qui retrorsum, utrumque brachium porriganter, qui prorsum, retrahant, aut pedem retro projiciant. Etenim ille, qui dextrorsum casurus est, brachium sinistrum quasi vectem extendit, vim & gravitatem parti sinistre addit, ut corpus nutans vindicet; Ex majori, quippe brachii sinistri distantia à centro gravitatis, seu à media parte corporis, fit ut brachii pondus æquivaleat alteri parti corporis.

Secundo illi, qui stant recti, aciculam, aut nummum humi jacentem colligere nequeunt, nisi pedem alterum, vel promoveant, vel retrorsum tendant. Dum enim demissum caput antrorsum protenderent, nisi pedum alter in partem oppositam produceretur, prono capite in terram ruerent; sublato scilicet æquilibrio, & centro gravitatis extra basim posito. Quare

re vel pedem , vel brachium instar vectis ex altera pte porrigan , oportet.

Tertio eadem de caussa Bajuli , si onus humeris gestent , antrorum incurvant se se : quod etiam gibbosis in usu est ; Si ulnis , aut brachiis onus sustineant , retrorsum inclinantur : ut prægnantibus quoque accidit . Ita & qui situlam aqua plenam dextera manu gestat , in partem sinistram brachio sinistro corpus inflectit : quod & vicissim fit extenso brachio dextro , si manus sinistra sustineatur situla aquis referta . Horum quippe omnium una ratio est , ut per corporis inclinationem , vel brachii extensionem centrum gravitatis in medio consistat , & hinc inde æqualibus viribus corpus sustineatur .

Quarto homines scalam , aut montem ascendentis caput porrigit , & posteriores partes retro projiciunt . Ita & anser horrei ostium , quamvis altum subiens , caput demittit : quando nimis ad ostium horrei positum sit limen , quod ab ansere in ingressu superrandum est . Etenim dum anser antecedentem pedem in limine posuit , tunc ut alterum pedem una cum posterioribus partibus adducat , priori pède velut fulcro innititur , & porrecto ultra limen capite quasi veete utitur , ut totum corpus facilius admoveat . Quod idem præstant homines ascendendo .

Quinto cum duo parietes paralleli ad perpendiculum excitantur , magis inter se in parte supra-

prema distant , quam in infima , tametsi sensibus id percipi nequeat . Quia cum perpendicula ad Terræ centrum nitantur , paulatim ad se mutuo debent accedere , donec in eo tandem puncto concurrant .

Sexto ex dictis sequitur , nullum esse ruinæ periculum in turribus , quæ vehementer quatuntur , dum pulsantur æra campanæ dummodo linea directionis lapidum quadratorum , ex quibus turres compactæ sunt , extra parietum basim non excurrat .

Septimo ut homines , & cætera animalia vel stare , vel ambulare possint , linea directionis intra eorum basim descendat necesse est verbi gratia , cum homo utroque pede nititur , linea directionis intra ambos pedes producta intelligitur . Cum altero tantum pede stat , per eum pedem eadem linea dirigitur . Quod si idem homo moveri incipiat , & linea directionis pedem ejus sinistrum trajiciat , eadem , ubi ipse dextrum pedem attollet , & corpus in anteriora promovebit , intra ambos pedes progredietur : sive corpus in dextrum pedem sponte subsidet ; tum in sinistrum : atque ita alternatim , donec moveri desinat . Idque semper verum erit , sive ipse pedibus terram premat , sive grallis utatur , aut manibus incedat , aut capite nitatur , aut quavis alia ratione vel quiescat , vel moveatur .

Octavo si quis in fune , vel in

tra-

trabe non admodum lata , vel angusto demum spatio ambulet, quo tota pedum planta non excipiatur, ægre omnino casum declinare poterit , quia linea directionis extra funis, vel trabis , vel angusti spatii latitudinem facilissimè excurret. Nam corpora , quo latiores habent bases , eo stant firmius ; & quo eas habent angustiores , hoc facilius decidunt. Hinc conus, vel turbo in apice vix consistere potest, facile vero in parte latiore statuitur.

Nono situla A (fig. 10. tab. 7.) aqua plena , baculo B C è mensa, cui imponitur, prominentē suspensa non cadit , dummodo alter baculus C D infra ansam , & prioris baculi extremum C in situæ fundo ad perpendicularum erigatur. Nam cum ambo baculi simul cum situla unum & idem corpus efficere videantur , cadere non potest situla , quin attollatur pars extrema B baculi B C. Eadem autem attrolli non potest , quin simul centrum gravitatis , quod est in situ-

la sursum versus mensam gyrando contendat , contra gravium nimis. Quare situla decidere non potest ; sed necessario è baculo immota pendet.

Decimo forfices facilius secant prope clavum , quo invicem connectuntur , quam in summitate. Sunt enim duæ vectes primi generis , in quibus clavus est communè centrum , seu punctum fixum; unde fit , ut quo corpus secundum (quod resistentia rationem habet) proximus est illi punto fixo , eo facilius cedat , ac dividatur. Rem navigantium sunt vectes secundi generis. Manus remum movens est; potentia navis habet rationem ponderis , seu resistentiae & aqua est veluti punctum fixum. Quilibet radius rotarum pristini , quæ ab aqua in gyros aguntur , est vectis primi generis. Sic se habet etiam parvus capulus pistrillæ , qua molere solemus fructum illum , qui vulgo dicitur *Caffè*.

Horum itaque , & sexcentorum similium ratio ex dictis descendit.

FINIS TOMI SECUNDI.

IN-


INDEX


Disputationum omnium , & Quæstionum quæ in hoc secundo volumine continentur.

- I** N Physicam Præfatio. Pag. 3.
 Physicæ Pars prima , seu Physica Generalis. 7.
 Disputatiō I. De Principiis Corporis Naturalis. ibid.
 Quæstio I. Quænam sint prima Physica Principia Corporis Naturalis ex Sententia Aristotelis , Cartessi , Gassendi , aliorumque Philosophorum : & que præ ceteris sint approbandæ? Ubi de Existentia Formæ Substantialis Materialis speciatim disserimus. ibid.
 De Systemate Atomistico. 38.
 De Systemate Elementari. 41.
 De Principiis Chymicorum. 42.
 De Principiis Physicis Cartesii. 45.
 De Systemate Newtoni, & Wolfsi. 49.
 Quæst. II. Utrum Materia prima propriam habeat existentiam , & an queat plures simul formas recipere? 50.
 Disputatio II. De Elementis. 62.
 Quæst. I. Utrum Elementa obnoxia sint generationi , & corruptioni? ib.
 Quæst. II. Quomodo Elementa maneat in Mixto. 73.
 Quæst. III. Utrum Elementa suis in locis constituta gravitent? Ubi Hydrostatica Principia exhibentur. 80.
 Quæst. IV. Quænam figura adscribenda sit particulis minimis singularum Elementorum? 101.
 De aliis affectionibus , & natura Ignis. 110.
 De aliis affectionibus , & natura terre. 120.
 Quæst. V. Utrum Aer gravis sit , & elasticus ? Ubi de Aeris natura speciatim disserimus , & Principia quædam Aerometria exhibentur. 122.
 Quæst. VI. An præter aerem crassiorem admittenda sit subtilissima at herea substantia? 128.
 Quæst. VII. De effectibus ab aeris gravitate , & elaterio provenientibus. Ubi Machina Pneumatica describitur , & principia quædam Hydraulicæ exhibentur. 131.
 De Tubis Capillaribus. 158.
 Quæst. VIII. Utrum Aqua sit elastica , ejusdemque particula minima invicem sibimet adharescant? 159.
 De aliis affectionibus , & natura aquæ. 163.
 Disputatio III. De Essentia corporis naturalis , ejusdemque Integritate. 166.
 Quæst. I. In quo constituenda sit Essentia corporis? ibid.
 Quæst. II. Utrum Natura physice considerata referatur ad principium activum , vel ad passivum? 181.
 Quæstio III. Utrum Continuum componatur ex partibus semper divisibilibus ; an vero ex indivisibilibus? 185.
 Disp. IV. De affectionibus , seu Qualitatibus Corporis Naturalis. 197.
 Quæstio I. Utrum ex Venerabile Eucharistie Sacramento rite colligatur. 240.


- gatur existentia Accidentium ab-
 solutorum in sensu Peripate-
 tico? ibid.
Quæstio II. De Calore, & Fri-
 gore. 237.
Quæstio III. De Raritate, & Den-
 sitate; & quomodo siant? 264.
Quæstio IV. De Humiditate, & Sic-
 citate: Seu de Fluiditate, & So-
 liditate. Ubi nonnullæ alia cor-
 poris naturalis affectiones expli-
 cantur. 272.
Quæstio V. Utrum Gravitas Corpo-
 rum oriatur à causa extrinseca,
 vel à principio intrinseco? 291.
Quæres I. Quanam sit causa acce-
 lerationis motus corporum gra-
 vium? 309.
Quæres II. Quanam proportione fiat
 acceleratio gravium? 318.
Disputatio V. de Composito Sub-
 stantiali. 321.
Quæstio unica Utrum Compositum
 Substantiale distinguitur realiter
 à suis partibus? ibid.
Disputatio VI. De Virtute activa,
 & de potentia passiva rerum na-
 turalium. 331.
Quæstio I. Sit-ne in rebus natura-
 libus vera virtus effectrix? ibid.
Quæstio II. Quanam requirantur in
 causa efficiente ad operan-
 dum? 347.
Quæstio III. Utrum Accidens possit
 producere substantiam? 351.
Quæstio IV. Utrum activa creatura-
 rum facultas per Virtutem Divi-
 nam attingere valeat effectus om-
 nes? Sive an detur potentia obe-
 dientialis activa in quolibet ad
 quodlibet? 357.
Quæstio V. An idem effectus produ-
 ci possit à pluribus caussis
 totalibus? 369.
- Quæstio VI.** Quanam ratione per
 divinam virtutem passiva crea-
 turarum potentia ampliari pos-
 sit? Sive an detur potentia obe-
 dientialis passiva in quolibet ad
 quodlibet? 377.
Disputatio VII. De Infinito. 382.
Quæst. unica. Utrum infinitum pos-
 sit à Deo creari? ibid.
Disputatio VIII. De Loco, & Tem-
 pore. 387.
Quæst. I. Quid sit Locus? ibid.
Quæst. II. Utrum duo corpora quan-
 titate affecta possint esse in eo-
 dem loco? 397.
Quæst. III. Sit-ne possibilis per di-
 vinam virtutem circumscriptiva
 corporis replicatio? 399.
Quæst. IV. Utrum in rerum Natura
 habeatur Vacuum, vel saltem sit
 possibile? 407.
Quæres I. Quanam sit causa impe-
 ditiva Vacui? 422.
Quæres II. An in vacuo possibilis fo-
 ret motus, isque successivus. 423.
Disp. IX. De Motu. Ubi de Legibus
 Motus, & de Mechanica. 425.
Quæst. I. Quid sint Motus, &
 Quies? ibid.
**Quæres Quid dicendum sit de Veloci-
 tate, & Tarditate motus loca-
 lis?** 431.
Quæst. II. Quanam sit Caussa conti-
 nuati motus Projectorum? 432.
Quæst. III. De Motus Elasticitate,
 Reflexione, & Refractione, &
 unde oriuntur? 439.
Quæst. IV. De præcipuis Legibus Mo-
 tus. Ubi Mechanicæ principia ex-
 hibentur. 451.


T.II.TAB.I.







TII TAB II







TII TAB. III.






TH TABIV.






TII. TAB. V







T. II TAB. VI.





V' R' V' V




T. II. TAB VII.













FERRARI

Philosoph.



A

5470